

**VERITAS
RELIGIONIS CHRISTIANÆ**

CONTRA

*Atheos Polytheos Idololatrias Mahometanos
& Judæos*

**Ex Devictis Hæresibus directè ejus Veritatem
impugnantibus**

DEMONSTRATA

PER

FR. VINCENTIUM LUDOVICUM GOTTI

ORDINIS PRÆDICATORUM

In Bononiensi Universitate Controversiarum Fidei Professore

NUNC

S. R. E. CARDINALEM.

TOMUS VII.

PARS II.

De Hæresibus II. III. & IV. Seculi.



ROMÆ, ex Typographia Bernabò, MDCCXXXIX.

SUPERIORUM PERMISSO.



ELENCHUS

Hæresum quæ in hujus septimi Tomi
Parte II. referuntur & confutantur.

CAPUT XXIII.

De Cataphrygibus, sive Montanistis aliisque eorum asseclis.

§. I. De Montano, Priscilla, Marcellina.	pag. 1
§. II. Montani Assectæ. De Tertulliano & Pontifice Romano.	7
§. III. Montani error de Paraclete. Quid de Trinitate senserit.	16
§. IV. Error de secundis nuptiis.	24
§. V. Error de Jejunis.	31
§. VI. Error de potestate remittendi peccata.	36
§. VII. Error de fuga in persecutione.	42
§. VIII. Errores Montanistis tributi.	47

CAPUT XXIV.

De Pepuzianis, Artotyritis & aliis.

§. I. Qui fuerint Pepuziani.	50
§. II. Pepuzianorum errores.	52
§. III. Artotyritæ eorumque errores.	56
§. IV. Tascodrugitæ, Passalorincbitæ, Ascodrugitæ & Ascodrytæ.	60

CAPUT XXV.

De Teslarecedecatistis seu Quartodecimanis.

§. I. Origo & progressus controversiæ.	62
§. II. Catholica de die Paschatis decisio.	67
§. III. Pro Quartodecimanis aliqua.	71

CAPUT XXVI.

De Alogis.

§. I. Qui fuerint, & cur sic dicti.	76
§. II. Alogorum errores confutati.	80

CAPUT XXVII.

De Adamitis, seu Adamianis.

<i>s. I. Adamitarum origo & mores.</i>	85
<i>s. II. Adamitarum errores rejiciuntur.</i>	88

CAPUT XXVIII.

De Elcesæis & Samæis.

<i>s. I. Auctor, ortus, progressus.</i>	92
<i>s. II. Elcesaitarum errores de Christo, modo orandi, & sacrificiis.</i>	95
<i>s. III. Elcesaitarum errores de Fide, Virginitate, Incantationibus & Juramento.</i>	102

CAPUT XXIX.

De Theodotianis seu Theodotiis.

<i>s. I. Theodoti lapsus & hæresis.</i>	112
<i>s. II. Theodotianorum errores.</i>	115

CAPUT XXX.

De Melchisedecianis.

<i>s. I. De Auctore & eorum hæresi.</i>	121
<i>s. II. Melchisedecianus error rejectus.</i>	124

CAPUT XXXI.

De Bardefanitis.

<i>s. I. Bardefanis conditio & gesta.</i>	130
<i>s. II. Bardefanis errores.</i>	132

CAPUT XXXII.

De Noetianis.

<i>s. I. Noeti conditio, errores, & exitus.</i>	136
<i>s. II. Errores Noeti confutati.</i>	140

CAPUT XXXIII.

De Valefiis.

<i>s. I. Eorum Auctor, error, & mores.</i>	146
<i>s. II. Valefiorum error profligatus.</i>	150
<i>s. III. Danæi calumnia dissipata.</i>	154

CA-

CAPUT XXXIV.

De Catharis seu Novatianis.

s. I.	<i>De Novato & Novatiano.</i>	157
s. II.	<i>Novati & Novatiani schisma.</i>	163
s. III.	<i>Novatianorum error palmaris.</i>	170
s. IV.	<i>Alii Novatianorum errores.</i>	177

CAPUT XXXV.

De Angelicis.

s. I.	<i>Qui fuerint, & quis eorum error.</i>	181
s. II.	<i>Angelicorum error à Catholico dogmate secernitur.</i>	183

CAPUT XXXVI.

De Apostolicis.

s. I.	<i>Qui, quando fuerint, & in quo erraverint.</i>	187
s. II.	<i>Monachatus defensio.</i>	191
s. III.	<i>Rerum temporalium possessio Christianis non vetita.</i>	196

CAPUT XXXVII.

De Sabellianis.

s. I.	<i>Eorum Origo, Auctor, Tempus &c.</i>	210
s. II.	<i>Sabellii error refutatur.</i>	215

CAPUT XXXVIII.

De Origenianis seu Origeniis.

s. I.	<i>Origeniani qui fuerint, & quis eorum auctor.</i>	220
s. II.	<i>Origenianorum errores.</i>	227

CAPUT XXXIX.

De Origene & Origenistis.

s. I.	<i>Origenis gesta & exitus.</i>	225
s. II.	<i>De Origenis Fide.</i>	231
s. III.	<i>Origenis errores de Animabus &c. rejecti.</i>	239
s. IV.	<i>Origenes de Filio Dei & Christo.</i>	249

CAPUT XL.

De Paulianis seu Samosatensis.

§. I. <i>Pauli Samosatensi Patria, Conditio, Damnatio.</i>	254
§. II. <i>Pauli Samosatensi errores.</i>	259

CAPUT XLI.

De Photino & Photinianis.

§. I. <i>De Marcello Ancyrano.</i>	265
§. II. <i>De Photino, ejusque damnatione.</i>	268
§. III. <i>Photini errores rejecti.</i>	272

CAPUT XLII.

De Manichæis.

§. I. <i>Hæresis ortus: De Scythiano & Terbintho.</i>	275
§. II. <i>De Mane seu Manichæo, ejusque exitu.</i>	277
§. III. <i>Generalia hæresis Manichæorum capita.</i>	285
§. IV. <i>Errores de Deo & de natura mali rejecti.</i>	289
§. V. <i>Errores de Carne & de Christo refutati.</i>	294
§. VI. <i>Errores de Homine, Animabus, Libero arbitrio, Fide, Bello &c.</i>	303

CAPUT XLIII.

De Hieracitis.

§. I. <i>Hæresis Auctor.</i>	314
§. II. <i>Hieracitarum errores.</i>	317

CAPUT XLIV.

De Meletianis.

§. I. <i>Meletius quis fuerit.</i>	320
§. II. <i>De Meletianorum erroribus.</i>	324

CAPUT XLV.

De Arianis.

§. I. <i>De Ario, ejus hæresis occasione, & initis.</i>	327
§. II. <i>De Arii damnatione, restitutione & exitu.</i>	331
§. III. <i>Constantini mors, Julius Rom. Pontifex, Ariane hæresis furor.</i>	338
	§. IV.

<i>§. IV. Persecutio in Liberium & Osum.</i>	344
<i>§. V. Arii & suorum errores rejecti.</i>	354

CAPUT XLVI.

De Audæanis seu Anthropomorphitis.

<i>§. I. De Andæo, Danaï calumniis, & Anthropomorphitarum ortu.</i>	363
<i>§. II. Audæanorum & Anthropomorphitarum errores rejecti.</i>	368

CAPUT XLVII.

De Semiarianis & Acacianis, ac voce Homousion.

<i>§. I. Qui & à quo fuerint.</i>	373
<i>§. II. Semiarianorum & Acacianorum errores rejecti.</i>	376
<i>§. III. De voce Homousion.</i>	379

CAPUT XLVIII.

De Macedonianis.

<i>§. I. Macedonii conditio, fortuna, hæresis ortus, & damnatio.</i>	387
<i>§. II. Macedonii error refutatus.</i>	391



IMPRIMATUR,
Si videbitur Reverendissimo Patri Magistro Sacri
Apostolici Palatii.

Pbi. Archiepiscopus Theodosiæ Vicesgerens .

IMPRIMATUR.
Fr. Nicolaus Ridolfi Ordinis Prædicatorum Sacri
Palatii Apostolici Magister .



TRACTATUS

De victoria adversus hæreses.

CAPUT XXIII.

De Cataphrygibus, sive Montanistis
aliisque eorum affectis.

§. I.

De Montano, Priscilla, Marcellina &c.

I.



ATAPHRYGES seu Phrygastæ hi hæretici nuncupati sunt, quia ex Phrygia orti. Ita S. Augustinus Hæres. 26. *His nomen, inquit, Provincia Phrygia dedit, quia ibi existerunt, ibique vixerunt, & etiam nunc in eisdem partibus populos habent.* Pepuziani etiam dicebantur à Pepuza oppido Phrygiæ, quod pro Jerosolyma sua habuerunt. Ita Philastrius Hæres. 49. & Epiphanius Hæres. 48. num. 14. dicens: *Ceterum iidem illi desertum quendam in Phrygia locum præcipue venerantur, ubi Pepuza quondam oppidum fuit, quod hodie solo æquatum est. Eo siquidem Cælestem Jerusalem descendere affirmant. Ergo illò profisciscuntur, ac mysteria quadam obeunt, sacrisque caeremoniis pro sua opinione celebrant.* Montanistæ etiam, seu Montenses sunt communiter appellati à Montano eorum Sectæ Auctore unâ cum duabus Prophetissis Prisca & Maximilla, de quibus infra.

II. Montanus ergo in Provincia Phrygiæ ortum habuit ex parentibus gentilibus, & in gentilitate probabiliter educatus. Postea Christianam fidem professus & baptizatus, non diù in veritate stetit. Nam adhuc à baptismo recens, ambitione elatus sub Grato Præsidente aditum Dæmoni præbuit, & in vico quodam Ardaba nuncupato vaticinari cœpit, & novæ prophetiæ novam adjunxit hæresim. Ita Anonymus Scriptor apud Eusebium. Lib. 5. Hist. cap. 16. de Cataphrygibus scribit: *Igitur obstinata eorum coitio adversus Ecclesiam, & nova perniciosi schismatis hæresis banc habuit originem. Vicus quidam esse dicitur in Mysia contermina Phrygiæ nomine Ardaba: in quo ajunt, Montanum quendam ex iis, qui fidelium numero recens adscripti fuerant, immodicâ primi loci cupiditate captum, primum sub Grato Asia Proconsule aditum in se adversario spiritui præbuisse, & Dæmone repletum; subito quodam furore ac mentis excessu concuti cœpisse, & nova quædam atque inaudita proloqui, bariolantem ac prædicentem futura præter morem, atque institutum Ecclesiæ à majoribus traditum, & continuâ deinceps successione propagatum. Quæ fuerit ambitionis & lapsus causa, an fortè fuit primi loci & dignitatis, exploratum non est. Quæcumque fuerit semper locum habebit S. Augustini dictum Serm. 46. (aliàs 165. de Tempore) cap. 8., quod hæreses Una mater superbia omnes genuit.*

III. Videns autem Montanus, se suasque prophetias tanquam à Demone inspiratas à viris piis contemni, imò palam condemnari, ut incautos faciliè decipere posset, duas sibi adscrivit mulierculas, Priscam seu Priscillam, & Maximillam, ad sua dogmata propaganda adjutrices, quas adulterino spiritu repletas, tanquam verè prophetissas venerandas voluit, & earum fictis revelationibus Libros promulgavit, quos propheticos appellavit: unde Theodorus L. 3. Hæret. Fabul. c. 2. de Montano ait: *Et duas fecit prophetissas Priscillam & Maximillam, & earum scripta libros propheticos appellavit.* Harum seminarum ministerio plures Ecclesias in errorem inductas refert S. Hieronymus in Epist. 43. ad Ctesiphontem dicens: *Montanus immundi spiritus prædicator multas Ecclesias per Priscam & Maximillam nobiles & opulentas feminas primum auro corrumpit, deinde hæresi polluit.* Nec nova fuit hæc Diaboli ars; qui enim feminâ decepit Adam, & totum humanum genus perdidit, hoc sibi felici eventu animatus, fraudes suas per feminas infinuare non desinit.

IV. De harum seminarum conditione & statu dissidium est. Nobiles & opulentas fuisse Hieronymus asserit: eas etiam virgines, ut earum prophetiæ majori in exultatione haberentur, Montanistæ proclamabant. Oppositum tamen sentiunt, tum Apollonius

nus (apud Eusebium L. 5. Hist. c. 18.) qui adversus Cataphrygarum hæresim adhuc suâ ætate vigentem nempe quadragelimo anno post ejus ortum scribens, eas non virgines, sed conjugatas fuisse dicit, deseruisse tamen viros suos, ut Montano adhererent, his verbis : *Ostendimus igitur, has principes prophetissas simul ac spiritum impleta sunt, viros suos dimisisse. Quotopere ergo mentiebantur, qui Priscam virginem vocabant ?* Tum supra relatus ignotus Scriptor (quem aliqui volunt fuisse Apollinarium Hieropolitanum, Episcopum, aliqui Apollonium, alii Asterium Urbanum) qui apud Eusebium L. 5. c. 16. eas mulierculas appellat : *Duas alias mulierculas suscitavit, & adulterino spiritu replevit*, quo nomine feminas nobiles ac opulentas non appellasset. Nicephorus Lib. 4. Hist. c. 22. nedum mulierculas, sed & Montani conjuges vocat : Et Christophorus dictum Eusebii locum vertens legit, *Meretrices*. & quidem in ornatu meretriciam potius, quam propheticam speciem præferebant. Etenim comam molliter nutriebant, capillos coloribus pingentes : stibio quoque oculos lineabant, vestium ornatum & pompam undique affectabant, neque à tabulis, tessellis, aliisque secularibus ludis se abstinebant. Hinc Apollonius supra laudatus apud Euseb. L. 5. c. 18. eas verè prophetissas non fuisse, his verbis ostendit : *Dic mihi : tingis ne capillos prophetæ ? an stibio oculos linis ? an studet ornari ? propheta ne tabulâ ludis, & tesseris ? an pecuniam locat saniori ? Ingenuè fateantur ac respondeant ; utrum hæc agere liceat, an secus.*

V. Dubitatur etiam de eo quod S. Hieronymus dixit, nempe Montanum per feminas illas opulentas auro primùm Ecclesias corrupisse ; cum potius ipse pecuniam à simplicibus quos seduxerat, exigeret : sic enim de eo Apollonius dicto c. 18. apud Eusebium L. 5. ait : *Qui pecuniarum exactores constituit, qui sordidam munusculorum captationem oblationum nomine callidè obvelavit. Qui doctrinam suam prædicantibus salaria præbet, ut per faciliorem ventris ingluviem doctrina ejus convalescat.* Et post multa, arguens Montani prophetas non esse veros prophetas, quia munera recipiebant : *Hoc igitur, inquit, fateantur, non esse illos prophetas, si munera accepisse convicti sunt.*

VI. Hanc viam, Christi mandatis & Apostolorum exemplo contrariam, suis falsis doctrinis Montanus ac ejus Prophetissæ effundendis elegerunt. Sic ait Apollonius dicto c. 18. *Cum enim Dominus præceperit : Nolite possidere aurum neque argentum, neque duas tunicas ; isti contra in rerum vetitaram possessione graviter delinquerunt. Qui enim ab ipsis prophetæ & martyres dicuntur, eos non solum à divitiis, sed etiam à mendicis, pupillis, ac viduis pecunias corro-*

gare demonstrabimus. Iſtis & aliis eos redarguit Apollonius. Propterea aliqui, ut refert apud Euſebium L. 5. c. 16. præſatus ignotus Auctor, Montanum ut abreptitium & Dæmoniacum, ac ſpiritu erroris actum turbasque in populo excitantem indignabundi objurabant, & loqui ulterius prohibebant. Alii verò ejus ſermonibus, & maximè prophetiſarum vanis prædictionibus obcæcati, verum in eis ſpiritum loqui putantes obſecundabant. Hi tamen ſaltem initio perpauci erant in Phrygia. Univerſa autem Eccleſia, cùm ſæpius in pluribus Aſiæ locis conveniſſet, tandem agnitâ fraude eos expulit.

VII. Porro Montanus ex dictis ex Apollonio ſuæ fundandæ Sæctæ locum præcipuum Pepuzam & Tymium tunc parva oppida, quæ novam Hieruſalem appellabat, velut thronum elegerat. Ibi cum ſuis prophetiſſis aſcendens, convocatiſque populis prophetabat, oblationes conſtitutis exactoribus recipiebat, aliæque diſtribuebat officia. Hierarchiam tamen Apoſtolicæ contrariam in ſuo cœtu conſtituit: ubi enim Apoſtolico inſtituto Apoſtoliſ ſuccedunt Epiſcopi, Montanus Epiſcopis tertium, & ultimum locum reſervabat. Teſtis eſt S. Hieronymus Ep. 27. (aliàs 54.) ad Marcellam hiſ verbis: *Apud nos Apoſtolorum locum Epiſcopi tenent, apud eos Epiſcopus tertius eſt. Habent enim primos de Pepuza Phrygiæ Patriarchas: ſecundos quos appellant Cenonas: atque ita in tertium, ideſt penè ultimum locum Epiſcopi devolvuntur.*

VIII. Quo autem tempore Montani hæc inſania eruperit, diſceptatur. Epiphanius Hæreſ. 48. quæ eſt de Phrygaſtis ſeu Montaniſtis: *Iſti*, inquit, *ſub Antonini Pii, qui poſt Hadrianum imperavit, annum XIX. emergere cœperunt*, ideſt circa ann. Domini 142. Euſebius in Chronico hanc hæreſim conſignat ſub Marco Aurelio Antonino anno Domini 172. Hæc tamen ex eodem Euſebio ſimul conciliari poſſet Baronius ad an. 173. n. 1., nam Euſebius L. 4. Hiſt. c. 27. Apollinaris ſcripta recenſens: *ſcripſit*, inquit, *contra Catapbrygum hæreſim, quæ quidem non longè poſtea maximis tumultus excitavit: tunc temporis verò primum enuſci cœperat, Montano cum falſis vatibus ſuis adhuc erroris ſui fundamenta jaciente.*

Iſ ex quibus Baronius Montani & ſociorum tria tempora diſtinguit. Primum, cùm iidem in Eccleſia prophetare cœperunt; tunc enim in admiratione ſunt habiti, necdum detecti hæretici. Cùm enim ovinis pellibus lupos induentes vitam moribus compositam agerent, abſtinentiâ præſertim exultam, pravos mores liberrimè increparent, prophætico ſpiritu multa prædicarent, eaque apparentibus ſignis confirmarent, velut homines à Deo miſſos ad Eccleſiæ reformationem totus ſerè Orbis admiratus fuit. Et hoc fuit tem-

pus, quo juxta Epiphanium sub Antonino Pio Montanistæ emergere cœperunt.

IX. Secundum verò tempus fuit, quo eorum doctrina, & propheticus quem jactabant spiritus, in controversiam verti cœperunt: & hoc fuit Marci Aurelii Antonini primis temporibus: & his Apollinaris, ut ait Eusebius, Librum contra eam tanquam hæresim tunc nascentem, quia talem tunc primò apparentem, conscripsit. Hæc duo tempora distinguere videtur Eusebius L. 5. Hist. cap. 3. dum ait: *Ceterum cum Montanus & Alcibiades ac Theodotus tunc primum in Phrygia opinione hominum tanquam Prophetæ celebrari cœpissent (multa quippe divinæ gratiæ miracula in pluribus Ecclesiis etiamnum fieri solita fidem plurimis faciebant, eos quoque prophetare) cumque illorum hominum causâ dissensio orta esset, qui in Gallia erant fratres, privatim de his judicium suum, religiosum in primis & cum recta fide consentiens, rursus eidem Epistola subjunxerunt . . . partim ad fratres in Asia & Phrygia degentes, partim ad Eleutherum Romanæ Urbis Episcopum scripserant pro pace Ecclesiarum quasi legatione fungentes.* His ergo duo tempora supponuntur: alterum, quo Montanistæ ut veri Prophetæ habiti fuerunt: alterum, quo in suspicionem hæresis devenerunt apud Gallos, cum Marci Aurelii persecutio apud eos vigeret: & de hoc tum ad fratres in Phrygia, tum ad Eleutherum tunc Romanum Pontificem judicium suum privatim detulerunt. Tunc ergo cœpit Montanistarum Secta prius in existimatione sanctitatis habita, in suspicionem hæresis apud aliquos privato judicio revocari.

X. Tertium tandem tempus fuit, cum eorum fraude palam detectâ, ab universa Ecclesia Catholicâ eliminati fuere. In quo non parum temporis & negotii opus fuit ob æstimationem & gloriam, quam sibi signis mendacibus & vitæ severiori disciplinâ apud plurimos comparaverant: adeò ut etiam ab Ecclesia pulsi acerrimos sui invenerint defensores, inter quos infelix Tertullianus, de quo intra dicam.

XI. Hanc temporum distinctionem à Baronio propositam confirmat Ricciolius parte 3. Chronol. Reform. catal. 2. ubi ait, Montanum prophetare cœpisse anno 14. Antonini Imperatoris, qui fuit Christi annus 112. sub Thelephori Pontificatu. Indè primis Marci Aurelii temporibus, & Pii I. Pontificatu anno Christi 162. de hæresi suspectum esse cœpisse. Palam postea detectum fuisse hæreticum, & ab Ecclesia pulsum, atque in Asia & in Græcia ab Episcopis damnatum anno Domini 173. Aniceti Pontificis anno ultimo, & Marci Aurelii circa duodecimum; ac denique sub Eleutheri Pontificis initiis, circa ann. 17. ejusdem M. Aurelii

laqueo suffensum anno Domini serè 178. interisse.

XII. Talem enim fuisse Montani exitum, imo & Maximillæ ejus prophetissæ, ut meruerant, ex publica fama refert præfatus ignotus Scriptor apud Eusebium L. 5. Hist. c. 16., ubi dilutâ calumniâ, quâ Catholicos tanquam Prophetarum interfectores Montanistæ accusabant, dicit: *Respondeant nobis quæso per Deum, est ne aliquis eorum qui jam inde à Montano & mulierculis garrere premium ceperunt, qui à Judæis persecutionem passus sit, aut ab impiis cruciatus? Nemo certe. Nec verò ullus eorum pro Christi nomine prebensus, in crucem actus est: sed neque ulla mulier in Judæorum Synagogis, aut flagris cæsa, aut lapidibus impetita est. Nusquam profectò nec unquam.* Deinde subdit: *Imo longè alio mortis genere interiisse dicuntur Montanus & Maximilla. Ambo enim, ut fama est, ab insano spiritu incitati, laqueo sibi gulam fregerunt, non quidem simul, sed suæ quisque mortis tempore: atque ita instar proditoris Judæ vitam sinierunt.*

Subinde Theodoti unius è primis Montani asseclis exitum referens: *Sic etiam, inquit, admirabilis ille Theodotus, qui primus prophetiæ illorum, quasi procurator quidam fuit, plurimorum sermone perhibetur falso mentis excessu abreptus fuisse, proinde ac si levaretur aliquando & assumeretur in Cælum: cumque se totum fraudulentiſſimo spiritui permisisset, ab eo in altum jactatus miserabili exitu periisse.* Hæc Scriptor ille, ut fama perhibebat.

XIII. Non citò tamen hæresis hæc mansit extincta, sed Constantinianis temporibus adhuc vigeat: nam in sua adversus Hæreticos edita sanctione, ut refert Eusebius Lib. 3. de vita Constantini c. 64. & 65., quâ quoscumque tum publicos, tum privatos conventus eis agere interdixit, recenset etiam Cataphryges. Hæc tamen Lex quoad Montanistas, seu Phryges, in cæteris Imperii Provinciis effectum sortita fuit, exceptâ Phrygiâ primâ eorum origine. Ita Sozomenus L. 2. Hist. c. 32. ubi de hac Lege loquens ait: *Phryges autem in reliquis Provinciis Imperii Romani eadem perpeſsi sunt, quæ alii omnes Hæretici, exceptâ Phrygiâ & vicinis aliquot Provinciis; in quibus jam inde ab initio, & ab ipsis Montani temporibus, multitudine abundarunt, & nunc quoque abundant.* Quæ confirmat S. Augustinus Lib. de Hæres. c. 26. dicens de Cataphrygis: *His nomen Provincia Phrygiæ dedit, quia ibi extiterunt, ibique vixerunt. Et etiam nunc in ejusdem partibus populos habent.* Concilium quoque Constantinopolit. 1. sub Theodosio anno 381. Montanistas, seu Phryges recenset inter Hæreticos, qui venientes ad fidem rebaptizari debent Can. 7. Tempore Epiphaniî adhuc supererant, ut ait Hæres. 48. num. 14. *Est enim hominum illa factio per Cappadociam,*

DE MONTANI ASSECLIS.

7

eians, Galatiam, Prygiamque, quam ante commemoravimus, dispersa. Unde & secundum Phrygas Secta dicitur; sed & in Cælicia & Constantinopoli frequentissima cernitur.

§. II.

Montani Asscla. De Tertulliano, & Romano Pontifice.

I. **P**RÆTER duas feminas Priscillam (seu Priscam) & Maximillam, quas sibi socias ad falsas prophetias effundendas elegerat, de quibus supra locutus sum, alios suæ Sectæ promulgatores, vel sibi addictos, habuit Montanus. Celebres fuere Theodotus, & Alcibiades, quorum meminit Eusebius L. 5. Hist. c. 3. De infelici Theodoti exitu supra dixi. Fuit autem iste Theodotus diversus ab illo Theodoto Coriario, qui Christum purum hominem asserens à Victore Papa fuit excommunicatus, de quo Eusebius L. 5. Hist. c. 28. & Philaster Hæres. 50. ; & ab altero Theodoto Trapezita argentario Theodoti Coriarii discipulo, ut citato loco Eusebius : & nos de utroque infra.

De Alcibiade notandum est cum Eusebio L. 5. c. 3., hunc Alcibiadem Montani gregalem diversum esse ab altero Sancto Martyre, qui eodem tempore, quo in Phrygia hæresis hæc grassabatur, in Gallia martyrium subiit. De eo in Epistola Ecclesiæ Lugdunensis hæc apud Eusebium citato loco referuntur : *Alcibiades quidam unus ex illorum Martyrum numero durum & squalidum vivendi genus sectabatur : nullumque omnino cibum admittens solo pane & aquâ ad id usque temporis vesci consueverat. Cùmque in carcere positus eandem vicendi rationem vellet retinere, Attalo post primum quod in Amphitheatro consecerat certamen, revelatum est, non rectè neque ordine facere Alcibiadem, qui & creaturis Dei minimè uteretur, & aliis exemplum scandali fieret. Parnit itaque Alcibiades, & cunctis deinceps cibis promiscuè uti cepit gratias agens Deo. Hæc de Alcibiade Martyre. At alter Alcibiades genere Phrygius falso spiritu seductus Montanum sequens, ipse quoque vanis prophetiis alios seducebat.*

II. Pro Montano pugnabat quoque Themison quidam. Is enim, ut ex antiquo Scriptore refert Eusebius L. 5. c. 16., Zotico Episcopo Comanenti & Juliano Apameno garrulum Maximille spiritum coarguere volentibus toto conatu sese opposuit : *Quibus Themison aliique us obtinuerunt, mendacem illum ac vulgi seductorem spiritum ab illis coargui vetuerunt.* Hic Themison apud Montanistas tanquam Contestor celebrabatur, cum tamen confessionis signum

signum nullum dedisset, sed potius vi pecuniæ erogatæ à vinculis se liberasset: unde Apollonius apud Euseb. L. 5. c. 18. *Themison*, inquit, *speciosâ avaritiâ obvelatus, qui confessionis signum non pertulit, sed magnâ pecuniâ vi erogatâ vincula abiecit*. Hoc tamen non obstante Martyrem se jactasse, ausumque fuisse exemplo Apostoli Catholicam Epistolam ad suos conscribere, subdit Apollonius: *Cum ob eam causam modestius deinceps ac submissius agere deberet, tanquam martyr sese offerens, ausus est exemplo Apostoli conscribere Epistolâ Catholicâ, eos quidem qui fideliores ipso extiterant iustituere; novâ autem doctrinâ patrocinari: ac postremo in Dominum, in Apostolos, in Sacrosanctam Ecclesiam impiè loqui*. Tales erant Montani martyres.

III. Ejusdem furfuris extitit alius nomine Alexander à Montanistis ceicbratus, & ut martyr habitus; qui certè non ob Christi fidem, sed ob latrocinia ab eo patrata Ephesi ab Æmilio Frontino Proconsule judicatus fuit. Hunc ceû prophetissæ familiarem Apollonius ibidem ita describit: *Respondeat nobis prophetissa de Alexandro, qui se martyrem predicat, quocum ipsâ convicatur, qui adoratur etiam ipse à multis; cujus latrocinia & reliqua facinora, pro quibus penas dedit nihil opus est dicere, præsertim cum in Tabulario contineatur*. Et infra, rem clarius exponens: *Quid verò, inquit, ad Alexandrum pertinet, ut veritas omnibus nosse cupientibus, innotescat, judicatus est Ephesi ab Æmilio Frontino Asiæ Proconsule, non ob nomen Christi, sed ob ea quæ perpetraverat latrocinia, cum jam desertor fidei esset. Deinde verò ementitus nomen Christi, dimissus est, cum urbis illius fideles fessellisset. Ecclesia verò ejus loci, unde erat oriundus, ipsum non recepit eò quod latrocinia exerceret. Si qui verò totum illius negotium scire desiderant, præsto est publicum Asiæ Tabularium*.

IV. Inter acerrimos Montani ac prophetissarum ejus defensores recensendus est quidam nomine Proclus genere Phrygius vir disertissimus. Hic exemplo filiarum Philippi Diaconi, qui in Asia cum prophetiæ dono vixerant, Maximillæ & Priscillæ prophetias corroborare nitebatur. Cum hoc Cajus Scriptor antiquissimus disputationem habuit Romæ sub Zephyrino Papa, ut refert Eusebius L. 6. Hist. c. 20. *Pervenit etiam ad nos Caji disertissimi viri disputatio Romæ habita temporibus Zephyrini adversus Proclum, quemdam Cataphrygarum hæresis propugnatorem. Quod & repetit S. Hieron. L. de Script. Eccles. c. 59. in Cajo his verbis: Cajus sub Zephyrino Romanæ urbis Episcopo, idest sub Antonino Severi filio disputationem adversus Proclum Montani sectatorem, valde insignem habuit, arguens eum temeritatis, super novam prophetiam ascenden-*
dam;

dam; ubi quem Eusebius & alii vocant *Proclum*, ipse appellat *Proculum*, & Theodoritus L. 3. Hæret. Fab. *Patroclum* nominat.

V. Huic Proclo conjungendus est *Æschines* Montani & ipse discipulus, qui tamen de suo particularem Sectam condidit: cum Proclo enim conveniebat, quod Spiritus Sanctus in Apostolis fuerit, non item Paracletus: & quod Paracletus in Montano plura imo & majora & meliora dixerit, quam Christus in Evangelio: in eo autem *Æschines* ejusque discipuli à Proclo & Proclianis dissidebant, quod Christum & Filium & Patrem esse dicerent. Ita Auctor Append. ad Tertullianum de Præscr. cap. 52. his verbis: *Acceperunt alii hæretici, qui dicuntur secundum Phrygas: sed horum non una doctrina est. Sunt enim qui Kata Proclum dicuntur: sunt qui secundum Æschinem pronuntiantur. Hi habent aliam communem blasphemiam, aliam blasphemiam non communem, sed peculiarem suam: & communem quidem illam, quâ in Apostolis quidem dicant Spiritum Sanctum fuisse, Paracletum non fuisse, & qua dicant Paracletum plura in Montano dixisse, quam Christum in Evangelium protulisse; nec tantum plura sed etiam meliora atque majora. Privatam autem blasphemiam illi qui sunt Kata Æschinem hanc habent, quâ adjiciunt etiam hoc, ut dicant, Christum ipsum esse Filium & Patrem. Sic Æschines à Montano deflexit: cum enim de Christo & Trinitate Catholicè sentiret, Æschines ab eo recedens Sabellianæ hæresis viam paravit.*

VI. Præfatum Proculum seu Proclum inter alios Baronius ad ann. 173. num. 37. suspicatur, fuisse Proculum Siccensem ex Africa insignem Grammaticum; cujus magisterio inter alios Latinos usum fuisse M. Aurelium Imperatorem, eumque ad dignitatem Proconsularem provexisse, auctor est Julius Capitolinus (in Marco) atque illum eundem fuisse, qui antea scripserat adversus Valentinianos, quem tanquam Christianæ eloquentiæ dignitatem laudat Tertullianus in Lib. adv. Valentinianos c. 5. Et ab hoc eodem Proclo deceptum Tertullianum ipsum ad Montanismum defecisse, addit Baronius ad ann. 201. n. 11. At Valesius in Notis ad L. 6. c. 20. Eusebii censet Proclum istum, quem Tertullianus laudat, & qui contra Valentinianos scripsit, diversum esse ab eo, contra quem Cajus disputavit. Quia iste Montanista fuit homo Græcus; ideoque Græco idiomate disputationem suam Cajus conscripsit, eum Proclum vocans. E contra verò qui adversus Valentin., scripsit Latino idiomate est usus, & à Tertulliano Proculus appellatur. Sed hæc levia sunt, nec in eis hæere præsentis Operis est.

VII. Ad hæresim Montani accessisse aliquando Praxeam, notat

tat Pacianus in Epist. ad Symphronianum, ubi cum dicit Proculum habuisse institutorem. Sed à Montano Praxeas deficiens, & factus ejus hostis infensissimus, ad Zephyrinum Romanum Pontificem, ut nefarii architectum erroris eum detulit, & in causa fuit ut à Pontifice damnaretur. Nec tamen Catholicam fidem Praxeas interius suscepit, sed suam corde tenuit hæresim, quam, ut dicam, nunquam dimisit. Inaniter etiam de martyrio gloriabatur. Hujus rei fidem facit Tertullianus jam Montanista in Libro quem contra Praxeam ipsum scripsit cap. 1., ubi tam iniquè ob detectam Montani hæresim, quàm justè ob propriam Sectam conditam, ipsum laceffit his verbis: *Isle primus ex Asia hoc genus perversitatis intulit Romanæ humo* (nimirum Montani prophetiam expulit, & suam hæresim intulit, ut notat Pamelius) *& aliàs inquietus: Insuper de jactatione martyrii inflatus ob solum & simplex & breve carceris tedium: quando etsi corpus suum tradidisset exurendum, nihil profecisset, dilectionem Dei non habens, cujus charismata quoque expugnavit. Nam idem tunc Episcopum Romanum agnoscentem jam prophetias Montani, Prisca, Maximilla, & ex ea cognitione pacem Ecclesiis Asia & Pbyrgie inferentem, falsa de ipsis Prophetis & Ecclesiis eorum adseverando, & præcessorum ejus auctoritates defendendo, coegit & litteras pacis revocare jam emissas, & à proposito recipiendum charismatum concessare. Ita duo negotia Diaboli Praxeas Romæ procuravit: Prophetiam expulit, & hæresim intulit: Paracletum fugavit, & Patrem crucifixit. At turpiter fallitur Tertullianus, dum ait, duo negotia Diaboli Praxeam egisse Romæ. Negotium quidem Diaboli fuit: cum non distinguens Patrem à Filio, crucifixo Filio Patrem quoque crucifixum asserens, hæresim intulit: sed cum fanaticum Montani Paracletum Romæ expulit, negotium Dei egit, & Diabolum expulit.*

VIII. Damnatus ergo Romæ ob hæresim Praxeas, hæresim suam ejurasse visus est, sed re verâ eam corde retinentem apertâ fronte postea dideminasse Tertullianus ibidem asserit dicens: *Denique caverat pristinum doctor de emendatione sua, & manet chiogramma apud Psychicos* (idest animales, seu carnales, quo nomine sanctus Montanista Clerum Romanum per contentum appellare consuevit) *apud quos tunc gesta res est, exinde silentium. Et nos quidem postea agnitio Paracleti atque defensio disjuncta à Psychicis. Avenæ verò illa ubique tunc semen excusserant. Ita aliquandiu per hypocrisis subdola vivacitate latitavit: & nunc denud erupit. Sed & denud eradicabitur, si voluerit Dominus in isto commeatu: si quo minus, die suo colligentur omnes adulteræ fruges, & cum ceteris scandalis igni inextinguibili cremabuntur.* Ita Tertullianus, deinde procedens

dens ad expugnandam Praxeæ hæresim, qui blasphemè aiebat, Filium Dei eundem esse cum Patre, & Filio crucifixo Patrem quoque fuisse crucifixum. Et ideo Praxeas è Sylla incidit in Charymbdim, dum hæresim Montanistarum vitans in turpiorem prolapsus fuit.

IX. Ex hæcenus dictis apparere cœpit lugenda Tertulliani fors, qui cèlebres suos pro Catholica fide exantlatos labores misero in Montanismum lapsu fœdavit. Quæ hujus causa fuerit, disputatur. Pamelius in Tertulliani Vita putat, causam fuisse repulsam quam ab Episcopatu Carthaginensi post obitum Agrippini passus fuit; cui cum invidia quorundam de Romano Clero operam contulisset, & ab eis proinde calumniis affectus, ad partes Montani descendit, eorumque laxiorem vivendi rationem carpere cœpit. Alii volunt, magis propter adeptum Episcopatum Ecclesiæ Romanæ à Victore qui Eleuthero successerat. Cum enim Victor Afer & ipse fuerit, invidiam potuit in Tertulliano excitare, quòd ipse postpositus fuerit gentili suo. In hanc sententiam inclinat Baronius ad ann. 201. num. 9. Verisimile tamen hoc de Tertulliano non videtur, qui similem ex ambitione discessionem in Valentino coarguerat L. adv. Valentinianos c. 4. his verbis: *Speraverat Episcopatum Valentinus, quia & ingenio poterat, & eloquio: sed alium ex martyrii prærogativa loci potitur indignatus, de Ecclesiæ authenticæ regulæ abruptis (ut solent animi pro prioratu exciti præsumptione ultionis accendi) ad expugnandam conversus veritatem.* Et Lib. de Baptismo c. 17. rectè animadverterat, ambitionem schismatum originem esse: *Emulatio, inquit, schismatum mater est.* Cum ergo hæc ita sint, non videtur ambitio, quam in aliis reprehenderat, ei causa fuisse, ut ad Montanistas deficeret.

X. Verosimilius ergo puto cum Nat. Alex. Hist. Eccl. Seculi 2. Dissert. 9. art. 1., causam defectionis Tertulliano fuisse, partim austerioris vitæ & strictioris disciplinæ prætextus, à qua Romanus Clerus deficere putabatur: partim quòd Romanorum Clericorum exprobrationes impatienter ferret. Primam partem colligo ex ejus Libro de Monogamia c. 2. ubi ait: *Nec ullâ magis ex causa Paracletum negare coguntur, quam dum existimant, novæ disciplinæ institutores, & quidem durissimæ illis, ut jam de hoc primum considerandum sit in generali retractatu, an capiat Paracletum aliquid tale docuisse, quod aut novum deputari possit adversus Catholicam Traditionem, aut onerosum adversus levem fucinam Domini.* Quia verò Monogamiam multi & maximè de Romano Clero non probabant, ideo paulò ante eos vocat *Psychicos*, idest *carnales*, dicens: *Sed Psychicos non recipientibus spiritum, ea quæ sunt spiritus non placent.*

Ita dum quæ sunt spiritus non placent, ea quæ sunt carnis placebunt, ut contraria spiritui.

Itaque Tertullianus, ut ex ejus Scriptis apparet, duri erat ingenii, austeriorisque animi: quare severioris disciplinæ arctiorisque vitæ amator, et si simplex presbyter judicem se faciebat Ecclesiæ, quòd in ea aliqua morum laxitas sibi appareret. Cùmque Montanistæ severius vitæ genus profiteri viderentur, eò tandem erroris prolapsus est, ut de veritate dogmatum ex asperiori vitæ cultu judicium ferens, Catholicâ veritate desertâ, ad eorum partes transierit.

XI. Altera secessionis illius conjectura sumitur ex factò cujusdam militis, quod sic expono. Accidit, ut Septimio Severo imperante, dum militibus corona Castrensis distribueretur, miles quidam eam capite gestare recusaverit, putans eò quòd Christianus esset, sibi hoc non licuisse, quia juxta Gentilium morem. Cùmque contra hoc reclamarent nedum Gentiles, sed Christiani etiam, & fortè Romanus etiam Clerus, metuens ne Ecclesiæ turbaretur pax, & persecutio excitaretur, Tertullianus factus præfati militis advocatus defensam suscepit Libro quem de Corona militis inscripsit, & ita nempe c. 1. *Proximè facta est liberalitas præstantissimorum Imperatorum. Expungebantur in Castris milites laureati. Adhibetur quidam illic magis Dei miles, ceteris constantior fratribus, qui se duobus dominis servire non posse præsumserat, solus libero capite, coronamento in manu otioso. Vulgata jam & justa disciplina Christianorum relucebat. Denique singuli designare, eludere minus, infrendere cominus in nostrum. Tribuno desertur, & persona jam ex ordine accesserat. Statim Tribunus; Cur, inquit, tam diversus habitus? Negavit ille cum ceteris sibi licere. Causam exposcullatus, Christianus sum, respondit. O militem in Deo gloriosum! Suffragia exinde, & res apud Acta, & reus apud Præfatos.... de martyrii candida laureâ melius coronatus donativum Christi in carcere expectat.* Subinde toto eo Libro hujus militis factum acriter defendit, ostenditque, tali coronâ capiti impositâ uti viro Christiano non licere.

XII. Cùm ergo factum militis illius Romana improbaret Ecclesia, quod nec crimen esset, nec Gentilitatis protestatio milites lauream gestare donativum accepturos, & è contra ex insolentia facinoris nova in Christianos persecutio timeri posset; Hinc magna Tertulliano à Romanæ Ecclesiæ Clericis conflata invidia est, qui durioribus verbis ipsum passim ac frequenter excipiebant, quòd privatus presbyter totius Ecclesiæ censorem ageret ac judicem. Quibus objurgationibus afflictus, & exasperatus vir acris

in-

ingenii , calamm acuit, Apologiam pro Milite edidit, & tandem Montani errores, quos jam mente imbiberat, palàm propugnare cœpit pluribus editis contra Ecclesiam scriptis. Huic conjecturæ favet S. Hieronymus L. de Script. Eccl. ubi de Tertulliano : *Cum, inquit, usque ad mediam ætatem presbyter Ecclesiæ permanisset, invidiâ postea & contumeliis Clericorum Romana Ecclesiæ ad Montani dogmata dilapsus est.* Quibus apparet, Tertullianum invidiâ præcipuè & contumeliis Cleri Romani, & studio etiam severioris discipline ad partes Montani declinasse.

XIII. Diluenda est calumnia, quam aliqui præcipuè ex Protestantibus alicui ex Romanis Pontificibus impingunt, nimirum quòd Priscæ & Maximillæ prophetias agnoverit, & aliquandiu approbarit. Ita inter ceteros Ittigius de Hæres. sect. 2. c. 13. u. 19. qui testem inducit Tertullianum adv. Praxeam c. 1. scribentem, „ quòd Praxeas, dum multa falsa de Montanistarum prophetiis „ & Ecclesiis adseveraret, Episcopum Romanum agnoscentem „ jam prophetias Montani Priscæ & Maximillæ, & ex ea agnitione pacem Ecclesiis Asiæ & Phrygiæ inferentem coegerit, & „ literas pacis revocare jam emissas, & à proposito recipiendorum charismatum concessare : ad quem locum Rigaltius notavit, non esse quòd suspicemur, Tertullianum in re tam recenti, „ tamque manifesta mentiri voluisse, quod contra eos notamus, „ qui hic Tertulliani fidem suspectam reddere conantur, „. Hæc Ittigius. Qui tamen determinare nescit, quis fuerit Episcopus ille Romanus, qui Montanizavit, solum dicit, aliquos velle fuisse Anicetum, aliquos Eleutherum, alios Victorem, alios Zephyrinum ; solum concludit, „ Quisquis autem Episcopus ille Romanus fuerit, inallibilis certè non fuit „.

XIV. Profectò quis fuerit Romanus Episcopus, cui Montanismi potam attingunt, nemo hucusque determinavit. Fuisse Zephyrinum aliqui etiam ex Catholicis putant, inter quos Natalis Alexandre Hist. 3. dissert. 1. art. 1. qui tamen Montanismi notâ eum purgat. Quia tamen Zephyrinus nonnisi multò post detectam Montani hæresim, quæ sub Aniceto, & Sotero eruperat, sedem Pontificalem obtinuit, credibile non est, eum errori jam cognito, & damnato connivere voluisse. Censent ergo alii, hunc fuisse Eleutherum Soteri & Aniceti in Sede Romana successorem, & ad eum referenda esse verba illa ex Tertulliano L. adversus Praxeam relata. Et hoc colligunt ex eo quod Eusebius L. 5. Hist. c. 3. narrat : *Cum Montanus & Alcibiades ac Theodotus tunc primum in Phrygia opinione hominum tanquam Prophetæ celebrari capissent (multa quippe Divinæ gratiæ miracula in pluribus Ecclesiis etiamum fieri*

feri solita fidem plurimis faciebant eos quoque prophetare) cūque illorum hominum causā dissensio orta esset, qui in Gallia erant fratres, privatim de his iudicium suum, religiosum in primis & cum recta fide consentiens; rursus eidem Epistola subiunxerunt prolatis interfectorum apud se Martyrum variis epistolis, quas illi dum in vinculis adhuc essent, partim ad fratres in Asia & Phrygia degentes, partim ad Eleutherum Romanæ urbis Episcopum scripserant pro pace Ecclesiarum, quasi legatione fungentes.

Idem Eleutherus fuisse creditur ille, de quo Tertullianus supra relatus adv. Praxeam scribit, quod auditā Praxeæ relatione de Montanistarum in suis falsis prophetiis perversitate & contumacia, literas pacis, quas Lugdunensium insinuatione dederat, revocavit, ac suorum Prædecessorum sententiam contra eos confirmavit.

XV. Uter autem fuerit, sive Zephyrinus sive Eleutherus, hæresim Montani non approbavit, nec Montanizavit. Nam Tertullianus licet jam Montanista & Episcopo Romano infensus, ac proinde suspectæ fidei (ut notat Pamelius ibi) non dicit Episcopum Romanum prophetias Montani adprobasse, sed tantum agnovisse: *Agnoscentem jam prophetias Montani, Priscæ & Priscilla*: agnoscere autem, non est idem ac approbare. Præterea agnoscere prophetias, idem non est ac agnoscere hæresim, vel in hæresi contumaciam. Imo cum ex litteris fidelium Lugdunensium, ut supra, spem concepisset, Montanistas ad fidem & Ecclesiam redituros, literas pacis expedivit. Sed cum à Praxeæ rescisset, eos in suo errore pertinaces, omnem pacis spem excludere, literas pacis revocavit, & Prædecessorum suorum condemnationem renovavit.

XVI. Factum ergo tale fuit, ut in notis ad Cap. 3. Libri 5. Eusebii exponit Yalesius. Consulti fuerant Lugdunenses & Viennenses in Gallia à fratribus in Asia & Phrygia consistentibus, quid sentiendum esset de pseudopropheta illâ, quæ apud illos exorta fuerat, quidque agendum esset Montano, Theodoto, aliisque, qui per Sancti Spiritus gratiam futura se prædicere jactabant. Res quidem eo tempore perplexa, & discussione digna erat: quia ut ex Eusebio dixi, cum tunc prophetiæ & miraculorum dona in plurimis Ecclesiis Divinâ gratiâ adhuc perseverarent, fidem faciebant plurimis, talia esse quoque ea quæ Montanistæ spargebant. Ut tutò in hoc negotio Lugdunenses, & Viennenses procederent, sententiam suam iudicio, nedum proprio, sed etiam Martyrum Epistolâ ad Asianos aperuerunt, & insuper Iræneum tunc presbyterum Romæ ad Eleutherum cum Epistola tum propria, tum Martyrum direxerunt, ut cum eo rem communicaret, ejusque judi-

cium expostularet. Lugdunensium & Martyrum sententia hæc erat. Prophetas benignè tractandos esse, & ad pœnitentiam provocandos: ac si quidem resipiscerent, ad Ecclesiam admittendos esse, ut pax inter fratres solidaretur. Si verò pertinaces in errore suo permanerent, nec post frequentes admonitiones Sacerdotibus Dei obtemperare vellent, ab Ecclesiæ corpore abscinderentur.

XVII. Si ergo votum hoc Romanus Pontifex sub hac conditione expressum suis literis approbavit, quis sanæ mentis audebit dicere, Lugdunenses & Romanum Episcopum Montani errorem approbasse, eique adhæsisse? Nunquid Pater errorem filii desertoris approbaret, si pœnitentiâ revertenti gratiam suam promittat: se tamen eum exheredaturum, si in desertione persistat: minetur? Hoc fecit cum Montanistis Eleutherus, quod facit cum peccatoribus Deus: gratiam suam si convertantur exhibet: si persistant, pœnas indicit. Quia verò à Præsea audit, Montanistas pacem sibi oblatam respuere, oblatas litteras revocavit, ac suorum Prædecessorum exemplo ab Ecclesia eos eliminavit. Hæc dixi admissio Tertulliano, qui dicit Episcopum Romanum litteras pacis revocasse, homine ab Ecclesia extorri, & ideò suspecto calumniæ: maxime quia Eusebius citatus dicit quidem, Lugdunenses litteras pro pace Ecclesiarum ad Eleutherum direxisse, non dicit tamen Eleutherum eas decreto & literis suis confirmasse.

XVIII. Quid ad hæc Ittigius, & sui gregis alii? Dicet ne amplius: *Quisquis autem Episcopus ille Romanus fuerit, infallibilis certe non fuit?* Fateatur potius, perpetuam Ecclesiæ regulam, fuisse semper in causis arduis & fidei semper Romanum adire Pontificem, & ab eo pro securitate iudicium exquirere. Factum hoc Lugdunensium evidenter id demonstrat. Unde Valesius citato loco ait „Cum enim in omnibus Ecclesiasticis negotiis primæ essent partes Episcopi Romani, merito Lugdunenses hanc controversiam ad eum detulerunt: id agentes & omnibus modis „studentes, ut Episcopi Romani auctoritate, quæ semper summa „fuit in Ecclesia, hæc apud Asiam orta dissensio sedaretur, & pax „in Ecclesia restitueretur, „. Imò idem Tertullianus adhuc sanæ fidei l. de Præscr. c. 36. *Habes, inquit, Romam, unde nobis quoque auctoritas præstò est statu felix Ecclesia, cui totam doctrinam Apostoli cum sanguine suo profuderunt Videamus quid dixerit, quid docnerit, quid cum Africanis quoque Ecclesiis contesserit.* Ubi pro veritate habenda ad Ecclesiam Romanam specialiter provocat: in qua supremum iudicium residere nec factus hæreticus negare ausus fuit, dum in Lib. de Pudicitia c. 1. et si Episcopi Romani decretum suo errori contrarium hæretico more sugillet, illud tamen

tamen appellat Decretum supremum, & peremptorium, quia decretum Episcopi Episcoporum & Pontificis Summi: *Audio etiam*, inquit, *edictum esse propositum, & quidem peremptorium; Pontifex scilicet Maximus, Episcopus Episcoporum dicit: ego & mechie & fornicationis delicta penitentia suis dimitto*. Quo loquendi modo vel nolens fateri cogitur, Decretum Romani Episcopi, utpote supremi in Ecclesia, habitum fuisse etiam tunc à Catholicis ut ultimum & peremptorium. Ad hæc Ittigius respondeat: ego enim cum alibi hanc veritatem contra sui similes statuerim, in præsens eum dimitto.

§. III.

Montani error de Spiritu Sancti adventu, & quid de Trinitate senserit.

I. **U**T in suos errores traheret incautos Montanus, se ac suos Spiritu Sancto plenos ac prophetiæ dono insignitos prædicabat. Dicebat ergo, Spiritum Sanctum Apostolis promissum, in se suasque Prophetissas majori plenitudine descendisse ac in Apostolos. Unde Joelis prophetiam c. 2., quam S. Petrus Act. 2. v. 17. impletam dicit in die Pentecostes, nimirum: *Et erit in novissimis diebus, dicit Dominus, effundam de Spiritu meo super omnem carnem, & prophetabunt filii vestri & filia vestra: & juvenes vestri visiones videbunt, & seniores vestri somnia somniabunt. Et quidem super servos meos, & super ancillas meas in diebus illis effundam de Spiritu meo & prophetabunt*: hanc in se ac suis Prophetissis majori effusione impletam promulgabat. Et quidem magna fuit hæc tentatio, dum eo tempore emerfit, quo, ut scribit Eusebius supra relatus L. 5. Hist. c. 3., adhuc in Ecclesia verus Prophetiæ spiritus cernebatur apud sanctissimos viros: quo factum fuit, ut aliquandiu fideles hæsitarent, nec Montani fraudem detexerint, ut superius observavi.

II. Dicebat ergo Montanus, referente S. Hieronymo Epist. 27. aliàs 54. ad Marcellam, *Deum primum voluisse in Veteri Testamento per Moysen & Prophetas salvare Mundum: sed quia non potuerit explere, corpus sumfisse de Virgine, & in Christo sub specie Filii prædicantem, mortem obisse pro nobis. Et quia per duos gradus Mundum salvare nequiverit, ad extremum per Spiritum Sanctum in Montanum, Priscam, & Maximillam insanas feminas descendisse, & plenitudinem, quam Paulus non habuerit, dicens (1. Cor. 13. v. 9.)*, Ex parte cognoscimus, & ex parte prophetamus, & nunc vide-

mus

„ mus per speculum in ænigmate „ *abscissum & semivirum habuisse Montanum*. Hæc S. Hieronymus, qui propterea Montanum vocat *abscissum & semivirum*, quia erat ex Phrygia, ubi Cybelis Sacerdotes castrari solebant.

III. Disquiri solet, an Montanus eò infania devenerit, ut se ipsum Paracletum vocaret, seu Spiritum Sanctum, quasi huic hypostaticè unitum. Affirmant Cyrillus Jerosolym. Cateches. 16. num. 8., *Montanus* (inquiens) *se ipsum ausus est Spiritum Sanctum edicere*; & Theodoritus L. 3. Heret. Fab. c. 3.: quin & Epiphanius addit Hæres. 48. n. 11., Montanum ad hoc delirium devenisse, ut se assereret etiam Patrem Omnipotentem, unde agebat: *Non Angelus, non legatus aliquis, sed egomet Deus Pater accessi*. Verùm nec se in substantia Deum Patrem, nec Paracletum insinuare voluisse Montanum, sed solum in ipso specialiter & Patrem & Paracletum per gratias & dona inhabitare, imo ipsi majora & meliora, quàm Christo & Apostolis communicare, probabilius censent alii: quod idem Epiphanius citato loco indicat dum ait: *Montanus unum se glorificat, ac Patrem esse dicit Omnipotentem, qui in se se habitet*. Alioquin si se Patrem & simul Paracletum in substantia & Persona esse dixisset, Paracletum & Patrem unam esse, Personam existimasset: qui error licet ex ejus schola in Æschine prodierit, Montano tamen non tribuitur, ut infra dicam.

Verius ergo censent alii, vel Montanum se appellasse Paracletum, non in persona, sed in munere, quasi eo tanquam præcipuo organo uteretur, & per ipsum majora quàm per Christum & per Apostolos manifestaret, vel potius ejus discipuli sub hoc nomine eum distinxerint: imo quidam Spiritum Sanctum à Paracleto distinguentes, illum in Apostolos, ipsum in Montanum descendisse dixerint. Et in hoc sensu Eusebius L. 5. Hist. c. 14. dicit, Cataphrygas Montanum Paracletum nominasse. Omnes tamen ita conciliari possunt dicendo, Montanum ab initio tantum pro insigni Paracleti propheta habitum fuisse, postea verò ejus gregales obsecratos Montanum suum seu ipsum Paracletum venerari cœpisse.

IV. At neque Paracletum fuisse Montanum, neque à Spiritu Sancto Paracleto, sed à Demone incitatum ad falsis prophetiis homines decipiendos, multa sunt quæ apertissimè evincunt. Primò ex Epiphanio Hæres. 48. n. 1. Dona Spiritus Sancti Ecclesiæ Catholice conferuntur, & illis, qui è Sanctorum grege sunt, ac ea quæ Christus & Apostoli docuerunt pronuntiant, non verò iis qui contendendi studio nova & contraria proferentes ab Ecclesia recedunt. Imò hi sunt à quibus cavere monet Joannes Epist. 1. c. 4. v. 1.

Nolite omni spiritui credere, sed probate spiritus si ex Deo sunt, quoniam multi pseudoprophetae exierunt in Mundum. Et cap. 2. v. 19. ostendens quinam sint: *Ex nobis, inquit, prodierunt, sed non erant ex nobis; nam si fuissent ex nobis permansissent utique nobiscum.* Cum ergo Montanus & sui, prophetandi studio, se supra Apostolos extollentes, & eorum doctrinæ contraria proferentes, ab Ecclesia recesserint, non Spiritu Sancto inspirante sed Dæmone instigante locuti sunt.

V. Secundò ex eodem Epiphanio num. 2. Gratiarum Spiritus Sancti dona ad nullum certum tempus limitata sunt, sed quolibet tempore ubi vult & cui vult dispensat, ut nunquam Ecclesiæ defint. Cur ergo post Montanum & Priscillam & Maximillam nullos amplius habent suæ Sectæ Prophetas? Aded citò ab eis Spiritus Paracletus evolavit? At ab Ecclesia Christi non item. Ajunt Vatem suam Maximillam dixisse: *Post me nulla erit amplius Prophetissa: sed finis sequetur.* At unde hoc scivit, in se finem habituram prophetiam? an quia finis Mundi sequetur? Ita planè. Cum ergo ab hoc vaticinio tantum sit temporis interlapsum, nec finis Mundi adhuc advenerit, quis non videt, eam falso ac illusorio spiritu fuisse locutam? Ita eam coarguit Asterius Urbanus apud Eusebium L. 5. Hist. cap. 16. Cum enim bella & clades Orbi imminere post ejus obitum prædixisset, & jam tredecim anni summâ in pace fluxissent: *Nonne, inquit, etiam hoc mendacium manifestum apparuit? Etenim ab obitu Maximillæ usque in hunc diem plusquam tredecim anni jam elapsi sunt, nec tamen ullum aut particulare bellum aut universale in terris fuit. Imò Christianis præcipuâ quædam Dei misericordiâ pax stabilis & firma permansit.* Si ergo quia tredecim annorum lapsu fatalis Orbis eversio à Maximilla prædicta nondum evenerat, mendax ejus vaticinium Asterius pronunciat, quid modò diceret, cum per quindecim secula nihil eorum factum fuerit?

VI. Tertiò, falsos fuisse Vates ex modo quo prophetabant evincitur. De Montano enim narrat sepeditus antiquus Auctor apud Euseb. L. 5. c. 16., dum prophetaret, *Subito quodam furore ac mentis excessu concuti cæpisse, & nova quædam atque inaudita proloqui: bariolantem atque prædicentem futura præter morem atque institutum Ecclesiæ à majoribus traditum.* Idemque de ejus prophetis observans: *Duas, inquit, alias mulierculas suscitavit & adulterino spiritu replevit; aded ut ipse quoque perinde ac supra memoratus ille, insana quædam & importuna atque aliena loquerentur.* Hoc clarè demonstrat eos non Dei Spiritu motos, sed dæmoniaco arreptos, fuisse locutos. Ait enim apud Eusebium L. 5. c. 17. Militiades:

des: *Pseudopropheta autem in falso mentis excessu, cujus comes est licentia & audacia, à spontanea quidem imperitia initium sumens, in amentiam autem, ut jam dixi, involuntariam desinens. Hujusmodi verò spiritu nullum unquam nec in Vetere nec in Novo Testamento Prophetam afflatum poterunt demonstrare. Quibus subjungit Epiphanius Hæres. 48. num. 3. Verus quippe Propbeta cum sui compos, tum ea quæ dicebat intelligens, futura nuntiabat: proque eo ac Spiritus Sanctus impulerat, præcipue quodam animi robore vaticinari solebat. Sic servus Dei Moyses ac fidelis in domo: unde & Videns in Vetere Testamento Propbeta dicitur, Visio, inquit, quam vidi Isaias filius Amos Propbeta. Vidi Dominum sedentem super thronum & elevatum. Et vidi Seraphim & Cherubim; & audiavi vocem Domini dicentem ad me. Vade dic Populo huic: Auditum audietis & non intelligetis, & videntes videbitis & non aspicietis.* Quæ cum audisset à Domino, tum ad Populum accedens ita narrabat. Hec dicit Dominus, Videtne intelligentis hæc esse quæ dicat, non ejus qui extra potestatem exierit. Alia congerit Epiphanius, ut ostendat, veros Prophetas non extra se raptos, nec ignorantes quæ dicunt, sed scientes ac intelligentes loqui. Quare concludit: *At contra quæ isti vaticinare se jactitant neque certam anni firmitate prædicant, nec quæ dicunt intelligentiâ consequuntur. Sed obliqua sunt illorum ac perplexa verba, nec recti omnino quidquam effutiant.* Hactenus Epiphanius.

VII. Quis ergo audiens Montani Prophetissas furore adactas, ac quid dicerent nescientes loqui, ethnicum potius, quam sacrum vaticinandi morem in eis non inspexisset? Ita de Pythia celebri apud Delphum Vate judicavit Origenes L. 7. contra Celsum n. 3.: quam postquam dixit per pudendam sui corporis partem spiritum infidentem accipere, eoque sic repletam divina, ut putabatur, fundere oracula, advertens, spiritum eam vaticinantem extra se abripere, & in furorem agere ut ipsa sibi constare non posset, subjungit: *Id certè spiritus Divini non est opus. Oportet enim, ut qui Divino spiritu afflatus est, is longè ante eos qui discendi causâ quid ad civilem aut naturalem vitam conducatur, quid quævis quid commodo sit, oracula consulunt, utilitatem inde percipiat, ac tum maxime fiat perspicax, cum Numen ipsi conjungitur.* Inde allato exemplo Prophetarum Judæorum, quorum mens dum Sancto Spiritu implebatur, magis sui compos perspicax clara & intelligens fiebat, subdit: *Si autem extra se rapitur, si sui compos non est Pythia dum vaticinia edit, cujusnam alius generis cenferi oportet spiritum illum, qui menti & rationi tenebras offundit, præterquam illorum Daemonum, quos ex obsessis profligant è Christianis multi, idque sine ullo inutili*

magiæ aut incantationis auxilio, sed solis precibus simplicibusque adjurationibus, & quales vel simplicior homo possit adhibere?

VIII. Quia verò aliqui erant qui dicerent, prophetas furore ac insaniam prophetare, humanam mentem à spiritu absorptam, S. Basilius Magnus in Proœm. ad Comment. in Isaiam num. 5. eos corrigit dicens: *Verum id abhorret à professione Divinæ præsentis, ut mentem reddat qui à Numine corripitur; cumque plenus Divinorum decretorum esse cæperit, tum à sua ipsius mente excidat, & qui aliis ex se se præbeat utilitatem, ipse ex propriis sermonibus nihil capiat emolumenti. In summa, quâ ratione consentaneum est, ut quis per sapientiæ spiritum simillimus insano evadat, ac ex intelligentiæ spiritu vim amittat intelligendi? . . . Non quidem dissimile veri est, improbam potestatem, naturæ humanæ insidiantem, confundere mentem; sed id ipsum per Spiritus Divini præsentiam effici, dicere impium est.* Ita Basilius. Quod si aliquando de Prophetis dicitur, eos in stupore & excessu mentis locutos, non denotatur per hoc alienatio mentis, sed admiratio, dum ea quæ supra hominis cognitionem sunt videntes stupebant, & admirabantur. De hoc Epiphanius citato loco fusè discurret.

IX. Hanc differentiam inter Vatem & Prophetam tradit etiam Chrysost. Homil. 29. in 1. ad Cor. dicens: *In idolis, si quis abreptus esset à spiritu immundo & vaticinaretur, quasi abductus, sic ille traheretur à spiritu vincens, nihil sciens eorum quæ dicebat. Hoc enim divinatori proprium est, ut mente excedat, vim patiatur, pellatur, trabatur quasi furens. Propheta verò non sic; sed cum vigili mente, cum temperanti constitutione illa sciens quæ dicit, omnia loquitur.* Unde ad rem præsentem S. Hieronymus in Proœm. ad Comm. in Isaiam: *Neque verò, inquit, ut Montanus cum insanis feminis somniat, Prophetæ in ecclasi sunt loquuti, ut nescirent quid loquerentur, & quum alios erudirent, ipsi ignorarent, quid dicerent, de quibus Apostolus ait (1. Timoth. 1. v. 17.) „Nescientes quæ loquuntur, neque de quibus affirmant „: sed juxta Salomonem qui loquitur in Proverbis (c. 16. v. 23.) „Sapiens intelligit quæ profert de ore suo, & in labiis suis portabit scientiam „ etiam ipsi sciebant quid dicerent. Si enim sapientes erant Prophetæ, quod negare non possumus: & Moses omni eruditus sapientiâ loquebatur ad Dominum, & Dominus respondebat ei: & de Daniele ad Principem Tyri dicitur (Ezech. 28. v. 3.) „Nunquid sapientior es Daniele „? Et David sapiens erat qui gloriabatur in Psalmo (50. v. 8.) „Incerta & occulta sapientiæ tuæ manifestasti mihi „: quomodo sapientes Prophetæ instar brutorum animalium quid dicerent ignorabant? Quod si Montanus & sue assertæ Prophetidæ quæ dicerent nesciebant, Prophetæ Dei non erant, sed spiritus nequam.*

X. Aliis

X. Aliis etiam rationibus constare potest, hæc Montani prophetias à spiritu Dei non fuisse: Primò, ex causâ, quæ fuit ambitio; cum enim primum quem ambiebat locum obtinere Montanus non potuisset, se prophetam jactare cœpit, ac duas mulieres tanquam in prophetando socias adulterino spiritu replevit, ut apud Eusebium L. 5. c. 16. Secundò, ex fructibus assertæ prophetiæ, qui alii non erant, nisi munera & pecuniam accipere, ut eis impropere Apollonius apud Eusebium Lib. 5. c. 18. Tertiò, ex vano luxu & pompa, quâ ejus Prophetiæ incedebant, ut idem Apollonius citato loco testatur, quæ certè veris Dei Prophetis contraria sunt. Quartò, ex iis quæ prænuntiabant, quia insana, inaudita, & à Deo per Apostolos Ecclesiæ revelatis adversantia. Et tandem ex infelici exitu quem Montanus & Maximilla habuere, quorum uterque laqueo sibi gulam frangens, instar proditoris Judæ vitam finivit.

XI. Alterum quod examinandum propono est, an Montanus rectè & catholicè de Trinitate senserit. Eum malè de Trinitate sensisse dubitant aliqui: Primò, quia Montanus se Paracletum nominabat: unde Tertullianus passim eum Paracletum vocat, sed Montanus se Paracletum nominavit, & velut Paracletus à suis agnitus est; qui etiam in ejus nomine, non in nomine Patris & Filii & Spiritus Sancti Baptisma conferebant. Ita S. Basilius Magnus Epist. 1. Canonicâ ad Amphilochem. Ideo in Canone 8. Concilii Laodicensi decernitur, ut qui ab hæresi Cataphrygum convertuntur, ab Ecclesiâ baptizentur. Quod confirmavit S. Gregorius L. 9. Ep. 61. quæ est ad Quirinum. Secundò, quia S. Epiphanius teste Hæres. 48. n. 11. non solam se Paracletum, sed Deum Patrem esse dicebat: *Non Angelus, non legatus aliquis: sed egomet Deus Pater accessi.*

Tertiò, quia Montanus unicam tantum in Deo Personam videtur agnovisse, ut enim ex S. Hieronymo Epist. 54. modò 27. ad Marcellam colligitur, dicebat, Deum, cum per Moysen & Prophetas Mundum salvare non potuisset, corpus sumisse de Virgine, & mortem obisse: & quia ne sic quidem Mundum salvare potuerit, per spiritum in Montanum descendisse. Hinc est quòd Sozocrates L. 1. Hist. c. 23., & Sozomenus L. 2. c. 8. Montanum cum Sabellio conjungunt.

XII. Nihilominus Montanum ipsum circa Trinitatis mysterium non errasse, communior sententia est. Fundatur tum in silentio veterum Scriptorum, qui Montani penè ætate floruerunt, ut supracitati apud Eusebium Lib. 5. c. 16. 17. & 18. Apollinaris, ignotus Auctor, seu Asterius Urbanus, Apollonius, Miltiades &c. Hi namque cum Montani errores, minoris etiam momenti, nota-

verint, nullum ipsi errorem de Trinitate tribuerunt, certè non omitturi, si in hoc Fidei Christianæ fundamentum ab eo violatum deprehendissent. Tum quia de Montani prophetiis Ecclesia aliquandiu anceps visa fuit, an aliquid Catholicæ Fidei contrarium pronuntiarent, ut supra apud Eusebium L. 5. c. 3. in Lugdunensibus & Viennensibus ostendi. Si autem de Mysterio Trinitatis aliquid impiè dictum detexisset, eas statim ut blasphemias damnascent.

XIII. Probo hoc idem ex Tertulliano Lib. adversus Praxeam, quem factus jam Montanista scripsit. In eo enim licet Montanum *Paracletum* appellet, omniaque Montani dicta ut à Paracleto accepta, & proinde divinitus inspirata proponat, nihil tamen Trinitati contrarium ab eo dictum profert. Imò cap. 13. Trinitatis Mysterium Catholico more exponens: *Nos enim, inquit, qui & tempora & causas Scripturarum per Dei gratiam inspicimus, maximè Paracleti, non hominum discipuli, duos quidem definimus Patrem & Filium, & jam tres cum Spiritu Sancto, secundum rationem æconomiae, quæ facit numerum; ac subinde ostendit, Deum Patrem esse, Deum Filium, Deum Spiritum Sanctum, non tamen plures Dominos, aut plures Deos, ut retrò Idololatræ sentiebant; & L. de Pudicitia, quem etiam factus Montanista scripsit, c. 27. ait: Ecclesia propriè & principaliter ipse est Spiritus, in quo est Trinitas unus Divinitatis, Pater, & Filius, & Spiritus Sanctus.* Sic loquitur Tertullianus jam Montani discipulus. Non ergo Montanus malè de Trinitate sensit.

XIV. Accedunt ad hanc sententiam Epiphanius Hæres. 48. n. 1. ubi recensitis Montanistarum erroribus subdit: *Nam de Patre, & Filio, & Spiritu Sancto eadem cum Ecclesia Catholica sentiunt.* Philaster L. de Hæres. c. 49. de Cataphrygibus: *Patrem, inquit, & Filium & Spiritum consentur.* Et Theodoritus Lib. 3. Hæret. Fab. c. 2. De Montano ait: *Doctrinam verò de Divina Trinitate non corrumpit.*

XV. Nunc ad contraria fundamenta respondendum est. Ad primum jam supra num. 3. exposui, in quo sensu Montanus se Paracletum nominaret, & à suis ut talis agnosceretur; non quia in Persona Paracletus esset & talem eum existimarent, sed quia suis ipse insinuaverat, Spiritum Sanctum, qui in Apostolos descenderat, majori plenitudine charismatum in se ac suas Prophetissas descendisse, ideoque ut Paracletum idest Consolatorem. Et in hoc sensu ejus discipuli eum Paracletum vocabant, quia nempe in eo specialioribus & majoribus donis, quam in Apostolis Paracletum residere putabant. Ita autem eos sensisse testantur, non solum Philaster citato loco, & Augustinus L. de Hæres. c. 26. Sed

& Ter-

& Tertullianus jam Montanista, qui tum L. de Pudicitia cap. 21. tum L. de Jejunio adversus Psychicos c. 12. dicit quidem in Montanum & Prophetas suos Paracletum venisse; eos tamen Paracletum esse non dicit.

Quod verò additur, Montanistas non in Patris & Filii & Spiritus Sancti nomine, sed Montani & Prophetissarum ejus baptizasse, ideoque eorum Baptisma ab Ecclesia rejectum fuisse; probat quidem, successu temporis ex Montanistis aliquos in deterius semper ruentes, ad hanc amentiam devenisse, ut in nomine Montani & Prophetissarum ejus baptizarent, & ex hoc factum fuisse, ut eorum baptisma ab Ecclesia repudiaretur, & Patres posterioris ævi hunc inter Montani errores recensuerint: At Montanum, ipsum, & puros ejus discipulos non ita sensisse, ex supradictis nimis aperte constat. Imò ipse Basiliius asserit, S. Dionysium Alexandrinum Montanistarum Baptisma ratum habuisse, quod signum est illud verbis Evangelicis saltem suo tempore fuisse ab eis collatum; nisi fortè dicatur, baptisma Montanistarum fuisse Ecclesiæ suspectum, non quia sine verbis Evangelicis illud conferrent, sed quia in ejus collatione aliqua miscebant denotantia Montani heresim, puta se profiteri fidem in Patrem & Filium & Spiritum Sanctum, eam tamen quam Montanus, & Propheti illæ tenebant, & docebant; Ideoque Ecclesia ad majorem cautelam venientes ab heresi Montanistarum jussit baptizari. Prior tamen responsio magis consona videtur.

XVI. Ad secundum dico, S. Epiphanium, dum ait, quòd Montanus se dicebat esse Patrem, intendisse, quod hoc dixerit in eo sensu, quod dicebat se esse Paracletum, idest non in Persona, sed in spiritu, quasi haberet in se ut organo Paracletum, & Patrem loquentem. In hoc autem sensu se loqui ipse Epiphanius explicat dicens: *Montanus unum se glorificat, ac Patrem esse dicit Omnipotentem, qui in se habitat*, ut superius dixi.

XVII. Ad tertium dico, errorem asserentem unam in Deo Personam ex schola quidem Montani prodiiisse, sed à Montani mente fuisse alienum. Hujus ergo erroris auctores fuere Æschines, & Praxeas, Montani quidem olim discipuli, sed private postea hæresis inventores. De Æschine Auctor Appendicis ad Lib. de Præscript. c. 52. hæc dicit: *Privatam autem blasphemiam illi, qui sunt Kata Æschinem hanc habent, quâ adjiciunt etiam hoc ut dicant, Christum ipsum esse Filium & Patrem*. De Praxeæ verò Tertullianus Libro adversus Praxeam c. 1. ait: *Unicum Dominum vindicat Omnipotentem, & Mundi conditorem, ut & de unico heresim faciat. Ipsum dicit Patrem descendisse in Virginem, ipsum ex ea natum, ipsum*

ipsum passum, denique ipsum esse Jesum Christum; & inferiùs Patrem crucifixit. Cumque toto eo Libro Tertullianus jam Montanista hunc errorem impugnet, evidens est, Patrem & Filium unam esse Personam uon fuisse errorem ipsius Montani, sed quorundam ex ejus schola in hoc ab eo recedentium. Hinc S. Hieronymus loqui dicendus est de quibusdam Montanistis sui temporis, qui in hoc errore erant: unde de eis etiam dicebat: Nos Patrem & Filium & Spiritum Sanctum in sua unumquemque Persona ponimus, licet substantiâ copulemus: illi Sabellii dogma sectantes Trinitatem in unius Personæ angustias cogunt. Loquitur ergo de Montanistis, qui post Sabellium vigeabant duobus terè seculis post Montanum, qui à Sabellio, non à Montano hunc errorem hauserant, & ideo dicit Sabellii dogma sectantes. De his etiam recentioribus Montanistis loquuntur Socrates & Sozomeus. Nam (ut ait Valesius in notis ad Lib. 1. c. 23. Hist. Socratis) Montanus in doctrina Trinitatis ipse quidem nihil innovavit, sed Ecclesiæ Catholice fidem secutus est. Quidam tamen ex illius discipulis Personarum differentiam cum Sabellio sustulerunt, ut scribit Theodorus L. 3. Hæc. Fab. c. 2. Nonnulli autem eorum tres Personas Divinitatis, sicut & Sabellius, negarunt, eundem esse dicentes Patrem & Filium & Spiritum Sanctum. Hæc dixi in patrocinium, nou Montani, quem ut hæreticum detestor, & inferiùs detestabor, sed veritatis.

§. IV.

Montani de secundis nuptiis error.

I. **M**outanus, ut delirium suum confirmaret, quo dicebat, se à Paracleto melioribus donis, quàm Apostolos, imbutum, in eo totus erat, ut quod Apostoli permiserant tauquam minùs instructi, ipse meliori à suo Paracleto lumine perfusus denegaret. Sicque ubi anteriores hæreses, ut vidimus, laxitati, & libidini nimium indulserant, ipse severiori disciplinæ nimium se addicens in extremam & oppositam hæresim lapsus est.

II. Dixit ergo primò, secundas nuptias pro fornicationibus & adulteriis esse habendas, ac proinde esse illicitas. Ita refert S. Augustinus L. de Hæres. cap. 26. de Cataphrygibus dicens: *Secundas nuptias pro fornicationibus habent: & ideo dicunt eas permisisse Apostolum Paulum, quia ex parte sciebat, & ex parte prophetabat. Nondum enim venerat quod perfectum est. Hoc autem perfectum in Montanum & ejus Prophetissas venisse delirant. Quod magis explicans*

L. 32. contra Faustum c. 17. *Et Cataphryga*, inquit, *se promissum Paraclitum suscepisse dixerunt*, & binc à fide Catholica deviarunt, conantes prohibere quod Paulus concessit, & damnare secundas nuptias quas ille permisit; sub his verbis insidiantes, quia scriptum est de Paraclito: Ipse vos inducet in omnem veritatem; quasi videlicet non omnem veritatem Paulus & ceteri Apostoli docuissent, ac locum Cataphrygarum Paraclito reservassent. Ad hoc & illud traxerunt, quod Paulus ait: Ex parte enim scimus, & ex parte prophetamus; cum autem venerit quod perfectum est, quod ex parte est evacuabitur: ut scilicet ex parte sciens & prophetans Apostolus dixerit 1. Cor. 7. v. 36. *Quod vult faciat, non peccat si nubat: & ideo perfectum Paracliti Phrygia hoc evacuaverit. Ad hæc cum eis dictum fuerit, quod sint Ecclesia tantò ante promissa & toto Orbe diffusa auctoritate damnati; respondent, binc etiam in se illud esse completum, quod de Paraclito dictum est (Jo. 14. v. 17.) Et Mundus eum accipere non potest.* His Augustinus exponit Montanistarum impudentiam, qui se solos sapere quod perfectum est effutiebant, ac se solos accepisse Spiritum Paraclitum, quem nec Ecclesia nec Apostoli accipere potuerunt. Hoc quod Augustinus hic etiam de Manicheis dicit, an dici quoque possit de nostri temporis prætensis Reformatoribus, qui se solos Spiritum Dei accepisse gloriantur, & hoc præsidio contra Ecclesiam eos damnantem se muniunt, judicet eruditus Lector.

III. In hoc errore tuendo totus est Tertullianus factus jam Montanista, qui propterea integrum edidit librum, quem de *Monogamia* inscripsit. Hunc quodam superbo fastu ita inchoat: *Hæretici nuptias auferunt, Psychici (animales homines) ingerunt. Illi nec semel, isti non semel nubunt. Quid agis Lex Creatoris? Inter alienos spadones & aurigas tuos tantundem quereris de domestico obsequio, quantum de fastidio extraneo: proinde & te ledunt qui abutuntur, quemadmodum qui non utuntur. Verum neque continentia ejusmodi laudanda, quia hæretica est, neque licentia defendenda, quia Psychica est. Illa blasphemat, ista luxuriat. Illa destruit nuptiarum Deum, ista confundit. Penes vos autem, quos spirituales meritis dicit facit agnicio spiritualium charismatum.... Unum matrimonium novimus, sicut unum Deum. Magis honorem refert lex nuptiarum ubi habet & pudorem. Sed Psychicis non recipientibus spiritum, ea quæ sunt spiritus non placent: ea quæ sunt carnis placebant, ut contraria spiritui: Caro, inquit, concupiscit adversus spiritum. Hæc & alia ambitioso spiritu Tertullianus. Qui tamen malè discurrit, debuisset enim dicere: hæretici sunt qui nuptias auferunt, ergo hæretici sunt qui secundas nuptias inferunt, vel si magis placet,*
Tom. VII. Par. II. D qui

qui secundas nuptias præcipiunt, non verò qui secundas nuptias tantum indulgent ac permittunt. Imò sicut hæresis non est, quæ nuptias non præcipit, sed concedit, ita nec erit quæ secundas nuptias concedit quidem, se non præcepit; sicut enim illa non aufert nuptias, sic nec ista secundas nuptias infert. Quæ tamen secundas nuptias absolute negat, directe opponitur ei quæ nuptias aufert. Cum ergo Catholica Ecclesia à Paulo edocta nec primas nuptias nec secundas nuptias vetet, nec præcipiat, sed tantum concedat, & indulgeat; Montanistæ autem secundas nuptias damnent ac reproben: quis magis accedit ad hæresim auferentem nuptias, Catholici? an ipsi? Catholici sequuntur Paulum 1. Cor. c. 7. v. 39. dicentem: *Mulier alligata est Legi quanto tempore vir ejus vivit: quòd si dormierit vir ejus, liberata est: cui vult nubat: tantum in Domino.* Ut autem notum sit, secundas nuptias permitti quidem, sed non præcipi, subiungit: *Beatiorem eritis si sic permanseritis secundum meum consilium:* puto autem quòd & ego spiritum Dei habeam. Paulus ergo spiritu Dei loquens continentiam à secundis nuptiis laudat quidem velut suum consilium, sed transitum ad secundas nuptias mortuo priori viro concedit: quo ergo spiritu hoc negat Tertullianus?

IV. Dicit ibi, hanc fuisse quidem veterem & Apostolicam Traditionem, sed à Paracleto novam disciplinam Apostolis incognitam fuisse postea inductam, quam Dominus ipse futuram pronuntiavit, cum ait Joan. 16. v. 12. *Adhuc multa habeo vobiscum: sed non potestis portare modò. Cùm autem venerit ille Spiritus veritatis, docebit vos omnem veritatem.* Bene! At hoc Christus promissit Apostolis, non Montano & ejus Prophetis: Ille, inquit, *Spiritus veritatis docebit vos*, non unam aut alteram, sed omnem veritatem. Quod promissit, implevit: misit in Apostolos Spiritum Veritatis, quo edocti omnem veritatem noverunt, & Ecclesiæ voce & scripto prædicare cœperunt, ei regulas præscribentes, non pro certo tempore, sed usque in finem duraturas. Quòd autem nova & contraria Montano revelaverit, unde habet Tertullianus? Si hoc ita est; quisquis novum & onerosum, imò & Apostolicæ doctrinæ contrarium, inducere velit, poterit se hanc viam tueri dicens, se à Paracleto hoc accepisse.

V. Dicit ulterius L. de Monogamia cap. 11., Paulum supra allegato loco permittere secundas nuptias mortuo viro mulieri, quæ in infidelitate nupserrat, & virum ethnicum habuerat, hæc enim si eo mortuo ad fidem conversâ nupserrat, non delinquet, quia, inquit, *nec hic secundus maritus deputabitur, qui est à fide primus.* Non autem hoc permittere mulieri fideli, ut mortuo marito fideli alteri

alteri nubat. Sed quia ipse Tertullianus videt, Paulum non dicere *si dormivit vir ejus*, ut referri possit ad virum jam in infidelitate amissum, sed *si dormierit vir ejus*, quod futuri temporis est, & spectat mulieres fideles, quibus jam Christianis viduitas contigerit: respondet, quòd si ita esset, posset mulier etiam infinitum nubere. Sed hæc nugæ sunt. Nam ex doctrina Pauli sequitur, quòd si mulieri permittitur secundò nubere, permittitur etiam tertio, & quoties virum amiserit. Cæterum ut pateat, Paulum viduis etiam fidelibus permittere, imò & velle ut secundò nubant, legatur Ep. 1. ad Timoth. c. 5. v. 14., ubi de viduis fidelibus, sed junioribus ait: *Volo ergo juniores nubere, filios procreare, matres-familias esse.*

VI. Verùm acre Tertulliani ingenium non quiescit, sed in dicto Libro duo conatur ostendere. Unum, quòd in Novo Testamento, sicut Christus abstulit repudium in Vetere à Moyse permissum propter duritiem cordis Judæorum, ita & Paracletus abstulit secundas nuptias, quas Paulus ob carnis infirmitatem indulserat. Secundum, quòd adulterium committit, qui post obitum alterius conjugis secundis copulatur nuptiis, ac ille qui vivente uxore alteri nuberet. Probat primum c. 9. sic: Ideo repudium jam permissum Christus prohibuit, quia ab initio non fuit sic, & quia quos Deus conjunxit homo non separabit, solus enim eos separabit, qui eos conjunxit, si autem quis repudiaret uxorem, homo contra Dei voluntatem separaret quæ Deus conjunxit: atqui nec ab initio fuit numerus nuptiarum, nam unum uni non pluribus conjunxit Deus: ergo sicut ablatum est à Christo repudium, ita & nuptiarum pluralitas. Secundum verò ita probat: Matrimonium est, cum Deus jungit duos in unam carnem: Adulterium verò est, cum quoquo modo disjunctis alia caro, imò aliena miscetur: sed qui priori conjugē defuncto alias contrahit nuptias, aliam carnem sibi immiscet super pristinam: ergo adulterium committit.

VII. Respondeo ad primum, quòd Repudium habemus expressè ablatum à Christo in Evangelio Matth. 5. v. 32. Matt. 19. v. 9., ubi declarat adulteram, quæ dimissa alium duxerit. At transitum ad secundas nuptias mortuo priori conjugē, à quo legitur vetitum in Evangelio? A Christo? non. Ab Apostolis de ejus mandato? Minus. Imò Paulus Roman. 7. v. 2. & 3. primum expressè negat, secundum concedit dicens: *Nam quæ sub viro est mulier, vivente viro, alligata est Legi: si autem mortuus fuerit vir ejus, soluta est à Lege viri. Igitur vivente viro vocabitur adultera, si fuerit cum alio viro: si autem mortuus fuerit vir ejus, liberata est à Lege viri, ut non sit adultera si fuerit cum alio viro: quod repetit 1. Cor. 7.*

v. 39. Ex his ad secundum. Si mortuo viro soluta est à lege viri, ut non sit adultera si fuerit cum alio viro, & hoc dicit Paulus; cur eam esse adhuc ligatam, & adulteram, si fuerit cum alio vult Tertullianus? Qui carne conjuncti sunt, per carnis unius mortem manent separati, non ab homine, sed à Deo. Quis eum docuit, carnem conjugis viventis manere adhuc conjunctam cum carne conjugis jacente in sepulchro? Si dicat: Paracletus Montani. En, dicam ego, Paracletus iste non est spiritus Dei, sed adversarius spiritus: nam (ipso Tertulliano testante) *adversarius spiritus ex diversitate prædicationis apparet, primò Regulam adulterans fidei, & ita ordinem adulterans disciplina.* Cùm ergo constet, novam hanc Paracleti disciplinam adversari fidei Regulæ, quia adversatur doctrinæ ab Apostolo prædicatæ, fit consequens eam ab adversario spiritu proditiile. Unde aut necesse est dicere, Spiritum Dei non esse in Paulo locutum; aut si in Paulo locutus est, non esse locutum in Montano, adversa dictis Pauli pronuntiante.

VIII. Concedo utique, perfectiorem esse continentiam vidualem, quàm secundas nuptias, sicut & virginitatem, quàm matrimonium, eodem Paulo teste 1. Cor. 7., & ideo virginitatem & continentiam vidualem iis, qui eam servare volunt & possunt, consilio suo proponit: & de viduâ dicit: *Beatior autem erit, si sic permanserit, secundum meum consilium.* Attamen sicut non damnat matrimonium, sed illud proponit iis qui non se continent, ita eis secundas nuptias proponit tanquam remedium: *Dico autem (inquit v. 8.) non nuptis & viduis: bonum est, si sic permaneant, sicut & ego. Quòd si non se continent, nubant. Melius est enim nubere quàm uri.* Continentiam ergo vidualem Paulus laudat, sed secundas nuptias non damnat. Beatior pronuntiat viduam si sic permaneat, sed beatam non negat, si iterum nubat. Hinc Theodoritus in c. 7. 1. ad Cor. *Notandum est, inquit, non esse absolute & simpliciter beatam vocandam eam quæ continet, sed eam beatiorē appellavit, dicens, nec eam quidem esse miseram, quæ secundo matrimonio jungitur: sed beata est, quæ ex Apostolica lege matrimonium contrahit. Comparatio enim illam etiam beatam ostendit. Hoc autem sufficit ad refellendos Novatianos, qui digamiam tanquam fornicationem accusant, Apostolicis legibus aperte contradicentes.* Novatiani enim in hac eadem hæresi erant.

IX. Catholicam hanc veritatem consentiunt Patres ceteri. S. Hieronymus Epist. 30. aliàs 50. ad Pammachium: *Ego, inquit, etiam nunc liberâ voce proclamo, non damnari in Ecclesia digamiam, imò nec trigamiam, & ita licere quinto, & sexto, & ultra, quomodo & secundo marito nubere: sed quomodo non damnantur istæ nuptiæ,*

ita

isa nec predicantur. Solatia miseria sunt, non laudis continentia. Item Epist. 91. aliàs 11. ad Ageruchiam de Monogamia: *Quid igitur? Damnamus secunda matrimonium? minime; sed prima laudamus. Abjicimus de Ecclesia digamos? Absit. Sed monogamos ad continentiam provocamus.* Et Ep. 27. aliàs 54. ad Marcellam de Montanistis ait: *Nos secundas nuptias non tam appetimus, quam concedimus, Paulo jubente, ut viduæ adolescentulæ nubant: illi in tantum putant scelerata conjugia iterata, ut quicumque hoc fecerit, adulter habeatur.*

X. S. Augustinus Lib. de Bono Viduitatis c. 11. In ea quidem, quæ Deo vovit continentiam vidualem, damnat secundas nuptias tanquam adulteriis peiores. *Si enim, quod nullo modo dubitandum est, ad offensionem Christi pertinet, cum membrum ejus fidem non servat marito, quanto gravius offenditur, cum illi ipsi non servatur fides in eo quod exigit oblatum, qui non exegerat offerendum? Cum enim quisque non reddit, quod non imperio compulsus, sed consilio communitus vovit; tanto magis fraudati voti auget iniquitatem, quanto minus habuit vivendi necessitatem.* (Quæ mirè probant contra modernos Heterodoxos debitum observandi Votum cælibatus semel emissum). Ne autem videatur secundas damnare nuptias, addit: *Hæc ideo disputo, ne arbitreris, vel secundas nuptias crimen esse; vel quasvis nuptias, cum sint nuptiæ, malum esse. Non itaque illas abs te damnavas velis esse, sed speras.* Et Lib. 16. de Civit. Dei cap. 34., ubi querit, cur Abraham post Saræ obitum jam susceptâ prole, cui promiserat Deus filiorum multiplicationem usque ad numerum stellarum Cœli & arenæ maris, iterum Cethuræ nupserit, cum in eo incontinentiam non liceat suspicari; post multa hanc reddit rationem: *Quid si enim & hoc provisum est contra hæreticos futuros secundarum adversarios nuptiarum, ut in ipso patre multarum gentium post obitum conjugis iterum conjugari demonstraretur non esse peccatum?*

XI. S. Epiphanius Hæres. 48. num. 9. agens contra Montanistas ait: *Quod si quis post uxoris obitum secundas nuptias pro sua imbecillitate desiderat, minime id quidem veritatis regula prohibet in eo dumtaxat, qui Sacerdos non fuerit. At isti prohibent, adeoque Pauli illâ sententiâ comprehenduntur: prohibentium nubere. Nam eum, qui secundis nuptiis illigatus fuerit, expellunt, ac ne facere istud audeat vim ac necessitatem adhibent. Nos autem neque necessitate ullâ constringimus, sed suademus: nec aliter quam honestis præceptis ac consiliis eum, qui quidem possit, ad id præstandum impellimus: eum verò qui minus potest, nullâ vi cogimus, nec à salute prorsus excludimus. Nam tenuiorum imbecillitatem ferendam cuilibet Divino sermone*

mone præcipitur. Atque hoc Sanctus Apostolus non dixisse modò reperietur, sed & istos apertè refellere, & ab ea quam habebat gratiâ alienos offendere. „Adolescentiores, inquit, viduas devita. Cum enim luxuriatæ fuerint in Christo, nubere volunt, habentes „damnationem, quia primam fidem irritam fecerunt. Siquidem quæ castitatem professæ irritam eam professionem fecerint, damnationem habere dicuntur. Quæ verò minimè professæ fuerint, sed pro infirmitate sua nupserint, damnationis sunt prorsus expertes. Si enim ulli essent obnoxie, cur diceret „Nubant, domui præfiant „Ita Epiphanius.

XII. Ex hæcenus dictis apparet, Ecclesiam damnasse Montanistarum hæresim & aliorum volentium, secundas nuptias fornicationes & adulteria esse: & proinde eas reprobabant. Quia transitus ad secundas nuptias infirmitatem & incontinentiam sapit, ad hanc evitandam eas permisit quidem, sed numquam tanquam melius bonum laudavit, sequens monitum Pauli de vidua dicentis: *Beatior autem erit si sic permanserit, secundum meum consilium.* Ideoque Ecclesia Græca rigidioris disciplinæ fuit, maxime circa tertias & quartas nuptias, non quidem eas declarando nullas, sed contrahentes in poenam incontinentiæ poenitentiis subjiciendo. Indulgentior tamen Ecclesia Latina fuit: æquè enim semper secundas, tertias, quartas & ulteriores nuptias permisit, ut ex Hieronymo dixi, quia Paulus eadem ratione, quâ secundas indulget, scilicet ad vitandum periculum incontinentiæ, censetur indulgere etiam nuptias ulteriores. Quia tamen secundæ nuptiæ tollunt perfectam significationem Sacramenti, quæ consistit in conjunctione unius ad unam, sicut Christi ad Ecclesiam; ideo digamos Ecclesia declaravit irregulares, & inhabiles ad Ordines sacros suscipiendos. Sed in his immorari non vacat. Tum quia hic satis est contra Hæreticos ostendisse, secundas nuptias non esse adulteria, nec Divino jure interdictas. Tum quia de his locutus sum in Theol. Tom. 4. in 3. p. Tract. de Matrim. q. 4. Dub. 4. per totum. Quæ Studiosus adire poterit.

XIII. Sunt qui Montano hunc etiam errorem affingant, quòd nempe dixerit, Matrimonium ratum & consummatum posse ad libitum conjugum dissolvi. Sed hoc errore à nullo antiquorum, Augustino, Philastrio, Epiphanio, Montanum aut Montanistas notatos vidi. Referunt Apollonium apud Eusebium Lib. 5. Hist. cap. 18. de Montano dicentem: *Hic est, qui nuptiarum dissidia docuit.* Sed non de primis nuptiis locutum fuisse Apollonium, sed de secundis, quas velut fornicationes & adulteria scindendas docuit, ut dictum est, verius existimo. Eò vel maxime quòd si prima

ma conjugia scindi posse docuisset, cum in ejus sententia ad secunda transire non possent, conjuges sic discissi perpetuò continentes vivere debuissent. Et in hoc sensu aliqui volunt, Montanum dissolutionem matrimonii conjugibus liberam concessisse, ut qui vellent contineri, mutuò discedere possent. Ita sentiunt Centuriatores Magdeburgenses Centur. 2. c. 5. §. de Hæresibus sub Commodo, [ut hoc dogmate Ecclesiæ Romanæ detrahant velut ab ea recepto. Aiunt ergo „ Legem Montanus de solvendis, dirimen- „ disque matrimoniis tulit, inquit apud Eusebium Apollonius: „ ex proprio fortassis, seu furto, seu facto, quo abortivas suas „ prophetissas Priscillam & Maximillam, à maritis suis abstra- „ xit, dogma generale constituens: quòd mulieribus, religionis „ scilicet gratiâ, à viris liceret discedere, sicut etiam Pontificii „ docent „.

XIV. Verùm in hoc maximè, quod ab Ecclesia Romana Montani dogma adoptatum dicunt, Calumniatores potius se quàm Centuriatores exhibent. Quidquid enim sit, an Apollonius censeat, Montanum legem statuissè de primis nuptiis dirimendis, & non potius dirimendis secundis, quod veriùs esse nuper dixi: dato etiam quòd Prophetissæ relictis viris suis Montano adhaeserint studio religionis, & non potius libertatis & vanitatis amore, quod ex earum profano incestu jam ostendi: mentiuntur tamen dum hoc idem à Pontificiis receptum dicunt. Nam Montanus matrimonium ratum & consummatum arbitrio conjugum dirimi posse docebat, Pontificiù autem, seu Catholici, id solum docent de matrimonio rato quidem sed non consummato, & hoc per ingressum alterius & professionem in aliqua ex Religionibus probatis. Ceterùm matrimonium ratum, & consummatum omnino indissolubile quoad vinculum statuunt. Catholicam de matrimonii indissolubilitate doctrinam fusè exposui Tom. 4. in 3. p. Tract. de Matrim. qu. 5. Dubio 1. 2. 3. 4. 5. & 6. Contra verò facilitatem matrimonia etiam consummata apud Centuriatorum Sectam, non studio religionis, sed incontinentiæ, solvendi, ostendi in Vera Ecclesia Tom. 3. cap. 8. §. 1. num. 3., præcipuè ex Luthero præsentis Reformationis duce & inventore. Videantur ergo citatis locis dicta.

§. V.

Montani error de Jejuniis.

I. Nter errores, quos ut leges ac præcepta à suo Paraclete tradita & necessaria ad salutem suis proponebat, erat is quo dicebat, plura jejunia ab ipso solo instituta, etli ab Ecclesia non præ-

præcepta, esse de necessitate salutis servanda. In quo observandum est, Montanum & Montanistas non errasse, quia plura observarent jejunia, quam ea quæ ex præcepto Ecclesiæ, vel consuetudine observantur: studio enim severioris disciplinæ, potest quis specialia jejunia, quæ Ecclesia non præcipit, frequentare, & à certis quibusdam cibis abstinere, sicut quidam Religiosi Ordines etiam modo profitentur: & Carolus Magnus Lib.6. Capitularium cap. 187. apud Cabasutium in Notitia Eccl. seculi VII. tres quadragesimas proponit observandas in anno, idest quadraginta dies ante Nativitatem Domini, quadraginta dies ante Pascha, & quadraginta dies post Pentecosten, addens, „ Quamquam enim non-
 „ nulla ex his canonicæ priventur auctoritate, nobis tamen simul
 „ omnibus propter consuetudinem plebis, & parentum nostrorum
 „ mores, hæc observare, ut superius est comprehensum, convenit, „
 Amalarius etiam L.1. c. 36. tradit, suâ ætate tres pariter quadragesimas à piis viris observatas, ante Nativitatem Domini unam, ante Pascha alteram, & tertiam ante festum S. Joannis Baptiste, quam tamen non omnes uniformiter observabant, aliis prius, aliis post eam inchoantibus. Sic in aliis Ecclesiis variis temporibus plura jejunia observata fuere, & fortè adhuc observantur, quæ apud ceteros observantiam non obtinent ex consuetudinis varietate: qui tamen non ob hoc hæretici reputantur.

II. Sic ergo, ut dicebam, non ex hoc præcisè, quòd Montanus & sui plures quadragesimas jejunaverint, hæretici erant: sed eo quòd veluti ex nova Paracleti Montano & Prophetiis ejus facta revelatione, volebant servanda esse jejunia à Montano indicta tanquam Divino jure præscripta universæ Ecclesiæ ut ad salutem necessaria. Ita S. Hieronymus Epist. 27. aliàs 54. ad Marcellam de Montanistis: *Nos, inquit, unam quadragesimam secundum traditionem Apostolorum, toto anno tempore nobis congruo jejunamus: illi tres in anno faciunt quadragesimas, quasi tres passi sint Salvatores. Non quòd & per totum annum, exceptâ Pentecoste, jejunare non liceat: sed quòd aliud sit necessitate, aliud voluntate munus offerre.* Non negabant ergo Catholici, posse quemquam ex sua voluntate ultra dies ab Ecclesia præscriptos ad macerationem corporis jejunare, cum hoc à pluribus sanctis viris factum legamus: sed in eo reprehendebant & hæreticos accusabant Montanistas, quòd nova & insueta jejunia præter Ecclesiæ institutum inducentes, vellent ea necessariò ad salutem servanda, tanquam à Paracleta Montano revelata.

III. Hoc Tertullianus ipse jam factus Montanista L. de Jejuniiis adv. Psychicos c. 1. testatur dicens: *Arguunt nos, quòd jejunia pro-*

propria custodiamus, quod stationes plerumque in vesperam producamus, quod etiam Xeropugas observemus, siccautes cibum ab omni carne & omni jurulentia & avidioribus quibusque pomis, ne quid vinositatis vel edamus vel potemus; lavacri quoque abstinentiam congruentem arido victui. Novitatem igitur obiectant de cujus illicito præscribant, aut hæresim judicandam si humana præsumtio est, aut pseudopphetiam pronuntiandam si spiritualis indicio est, dum quaquæ ex parte anathema audiamus qui aliter pronuntiamus. Hac Tertulliani querela clarè ostendit, jejunia Montanistarum fuisse ab Orthodoxis ut hæretica anathemate damnata, quia humanam præsumptionem, aut falsam prophetiam tanquam observatu necessaria ab eis præcepta contra antiquam Ecclesiæ disciplinam. Eadem ergo ratione, quæ Ecclesia Catholica præsens Lutheranos & Calvinistas omnia jejunia traditione Apostolicâ & Ecclesiæ præcepto hæcenus custodita abrogantes ut hæreticos damnat, Montanistas ut hæreticos antiqua Ecclesia proscripsit; quia vanam præsumptionem, & falsas prophetias obrudentes, nova jejunia contra Ecclesiæ statuta ut necessaria indicebant. Et sicut Lutherum, Calvinum & alios, qui nullam in Ecclesia ordinariam auctoritatem habentes, nec ullum suæ specialis à Deo missionis signum ostendentes, jejunia à tota Ecclesia religiosè observata tollere ausi sunt, anathemate jure proscripsit: sic Montanum, qui, cum nec Pontifex esset, nec ullam in Ecclesia auctoritatem haberet, homo laicus ac de plebe infimus, ementito Paracleti oraculo novas in Ecclesia de jejunii leges indicare tentavit, Orthodoxa Ecclesia meritò reprobavit.

IV. *Ex iis, quæ hæcenus dixi, contra Montanistarum jejunia occasionem arripuere novi Protestantes Ecclesiam Catholicam calumniandi, quasi in suis jejniis & in abstinentia à certis cibis Montanistarum jejunia adoptarit. Inter primos hanc calumniam evomuit Kemnitius in Exam. Conc. Trident. p. 4., postea Dallæus in L. de Jejunio & alii. Quibus omnibus plausum facit Ittigius de Hæresiarchis sect. 2. cap. 13. 14. his verbis, „ Videant modò Pontificii, quomodo doctrinæ suæ de jejniis cum Montanistarum „ doctrina consensum, & harmoniam declinare possint. Tentavit id jampridem Bellarminus Tom. Controv. de Bonis Operibus in partic. Lib. 2. cap. 9. Tentarunt & alii, & in his Natalis „ Alexander secul. 2. disert. 4. Aegrè certè effugient, si attentè „ legant, quæ Kemnitius in Exam. Conc. Trid. p. 4. Bebelius in „ Antiquit. seculi 2. & alii de hoc Pontificiorum cum Montanistis consensu observarunt. Unicum ex Dallæo hoc annotare „ placet, nempe tantam esse inter Pontificios & Montanistas in „ doctrina de jejniis harmoniam, ut Martinus Peresius sibi per-*

„ suaferit, Tertullianum in Libro de Jejuniis Catholicam, si Pontificiam sic appellare fas est, de jejuniis doctrinam propugnare, „ Psychicos autem, contra quos disputavit Tertullianus, hæreticos esse Lutheranis similes „. Hæc & alia audacter ut de more Ittigius.

V. Cæterùm hæc quæ postremò dicit de Martino Peresio, qui de Traditionibus p.3. de Jejuniis dicit, Psychicos fuisse illius temporis hæreticos, qui jejuniorum præscriptiones damnabant; dicentes, suo arbitrio relinquendos esse homines in jejuniis, ut modò sentiunt Lutherani, & alii Protestantes, & contra hos pugnare Tertullianum: de quorum progenie se asserere Dallæum non pudet, ait enim: *Peresi, istos Psychicos libenter amplectimur, neque nos de eorum sanguine prognatos esse pudet ac pœnitet, nostri illi sunt fatemur*. Vos (simul cum Peresio Turrianum alloquitur) *in tota hac causa Tertulliani clientes, & illius quem defendit Paracleti proles ac sætura estote: nos vobis hanc gloriam non invidemus*. Hæc inquam, quæ dicit Peresius, & in quibus Dallæus gloriatur, inania, quia falsa, sunt: Illi enim quos Tertullianus per contemptum Psychicos idest carnales seu animales appellat, non erant, ut falsò dicit Peresius hæretici Lutheranis similes, qui omnia jejunia libera esse contenderent; sed erant Catholici præsertim à Romano Clero, qui Montanistis obsistebant, non quia aliqua jejunia de præcepto observanda ponerent; sed quia plura alia addebant, absque ulla Ecclesiæ auctoritate, sed à Montano sub falso sui Paracleti nomine indicta tanquam omnibus ad salutem necessaria.

VI. Porro quod Psychici, qui Tertulliani & Montani jejuniis obsistebant, aliqua jejunia ex præcepto servarent, idem Tertullianus eis objicit dicto Libro de Jejuniis c.13., quòd ex præcepto majorum jejunarent illis diebus quibus ablatas est sponsus, & illis quibus ob aliquam Ecclesiasticam causam mandato Episcopi jejunabant; ergo Lutherani, qui nullo jejunii nec ante-paschalis, nec alterius præcepto teneri volunt, Psychicorum soboles non sunt, sed Aerianorum potius, qui cum illis eadem in hoc sentiebant. Aerius enim teste S. Augustino L. de Hæres. c. 53. dicebat, *Nec statuta solemniter celebranda esse jejunia, sed cum quisque voluerit jejunandum, ne videatur esse sub Lege*. Sed cujuscumque coetus sint proles, certum est Protestantes à catholicis non esse prognatos.

VII. Modò abjicienda est calumnia, quâ imponitur, Catholicos Romanos in causa jejunii Montanistarum dogmatis hæredes esse, quam licet difficile abstergere putet Ittigius, eam tamen facile diluam sic: Jejunia, quæ Catholici Romani modò obser-

vant,

vant, sunt jejunia ab Ecclesia, cui ex Christi promisso Spiritus Sanctus jugiter assistit, & longo seculorum usu & traditione firmata: Jejunia Montanistarum contra Ecclesiæ Catholicæ usum, Paracleti ut somniabant in Montano residentis, seu Montani & Prophetillarum ejus privatâ auctoritate, tanquam omnibus ad salutem necessaria fuerunt inducta, & proinde tanquam hæretico spiritu intrusa Ecclesia damnavit: ergo jejunia Montanistarum toto Cælo distant à jejuniis Catholicorum, nec Catholici Romani ea ex instituto Ecclesiæ observantes Montanistas imitantur, qui privatâ auctoritate plura contra Ecclesiæ institutum non liberè, sed necessariò ad salutem observanda invexerant. Plura enim jejunia, quàm Ecclesia præceperit, ex arbitrio observare laudabile est; at ea inducere privatâ auctoritate ut necessaria omnibus, damnable: & hac ratione jejunia Montanistarum Ecclesia rejecit, non quia ultra jejunia Ecclesiæ jejunare vellent, sed quia ea eise necessaria contendebant. Unde Hieronymus Ep. 27. aliàs 54. ad Marcellam de Montanistarum jejuniis ait: *Non quidd & per totum annum exceptò Pentecoste, jejunare non liceat: sed quòd aliud sit necessitate, aliud voluntate munus offerre.* Montani autem jejunia fuisse ab ipso lege latâ instituta, dicit Apollonius apud Eusebium L. 5. c. 18. *Hic est qui nuptiarum dissidia docuit, qui jejuniorum leges imposuit.* En in aperto positam inter Montanistas & Pontificios in jejuniorum observantia discrimen, et si litigius cum suis illud videre nolint.

VIII. Quod verò jejunia, quæ nos Catholici observamus antiquo Ecclesiæ usu firmata sint, vel ipsi jejuniorum hostes absolute inficiari non possunt. Centuriat. Magdeburg. Centur. 2. cap. 6. pag. 91. ajunt: *Quando hac jejuniorum diversitas cæperit, non usque adeò certum est: videtur statim post Apostolos, & hos & alias diversitates ortas esse.* Centuria 3. cap. 6. pag. 95. *Frequens apud Scriptores hujus seculi (tertii) occurrit jejuniorum mentio, adeò ut in opinionem meriti jejunia abiisse jam tum viderentur, Origenes dierum quadragesimalium meminit jejuniis consecratorum, item quarta & sexta feria, in quibus solemnia fuisse dicit jejunia; quæ negare non audet Confessio Helvetica cap. 24. dicens: Quadragesimale jejunium vetustatis habet testimonia, sed nulla ex litteris Apostolicis, ergo non debet, nec potest imponi fidelibus.* Calvinus ipse L. 4. Inst. c. 12. n. 20. *Qua in parte, inquit, non in totum excusare audeo Veteres, quin & superstitionis quadam semina jecerint, & occasionem præbuerint tyrannidi, quæ postea exorta est. . . . Et tunc passim invaluerat supersticiosa Quadragesima observatio.* En nec ipsi moderni Heterodoxi jejuniorum hostes infensissimi, antiquam esse

eorum in Ecclesia Catholica observantiam, negare possunt.

IX. Quod verò ea improbant, & ut supersticiosa acculent, nec sine tyrannide ad ea obligari posse fideles effutiant, eorum solita impudentia est; cum discere potius debuissent à S. Augustino, quòd quamvis de hoc Scripturarum non proferatur auctoritas, cum tamen id universæ placuerit Ecclesiæ, certissimè tenendum est. Sic enim L.1. contra Cresconium c.33. *Proinde, inquit, quamvis hujus rei certè de Scripturis canonicis non proferatur exemplum: earundem tamen Scripturarum etiam in hac re à nobis tenetur veritas, cum hoc facimus quod universæ jam placuit Ecclesiæ, quam ipsarum Scripturarum commendat auctoritas; ut quoniam Sancta Scriptura fallere non potest, quisquis falli metuit hujus obscuritate questionis, eandem Ecclesiam de illa consulat, quam sine ulla ambiguitate Sancta Scriptura demonstrat.* Similia dicit L.6. contra Julian. c. 5. & propius ad rem præsentem de quæst. circa Jejunium, & alia in Quadragesima observanda, ait Epist. 54. alias 118. ad Inquisitiones Januarii c.5. *Ad hæc itaque respondeo, ut quid horum sit faciendum, si Divina Scriptura præscribit auctoritas, non sit dubitandum, quin ita facere debeamus ut legimus:.... Similiter etiam si quid horum tota per Orbem frequentat Ecclesia. Nam & hinc quia ita faciendum sit, disputare, insolentissima insania est.* Cum ergo & ipsi Heterodoxi fateantur, jejunia Quadragesimæ, & alia ab antiquis temporibus Ecclesiam servasse, & quidem toto Orbe servata suos prætenso Retormatores reperisse, quid ultra quærunt, quid disputant, quâ fronte ea abrogarunt? Si insolentissima insania est velle de hoc disputare, è medio tollere & abrogare quid erit?

Sed in hoc diutius immorari hujus loci non est. Videantur Catholici Doctores ex professio agentes, & inter eos Natalis Alexandri Hist. Eccl. seculi secundi Dissert. 4. art. 1. & sequentibus. De quo & ego egi in Vera Ecclesia Tom. 2. parte 1. art.6. In præsens ita concludam, si apud ipsos Protestantes hæretici sunt Montanistæ, quia plura jejunia ab Ecclesia non observata ut necessaria ad salutem inducebant: cur hæretici non erunt, qui jejunia ab Ecclesia toto Orbe observata penitus sustulerunt?

§. VI.

Montani error de potestate remittendi peccata.

I. **M**ontanus rigori disciplinæ nimium studens præallatis erroribus hunc etiam addidit, quo dicebat, in Ecclesia non esse potestatem remittendi aliqua gravia peccata post baptismum

commiffa, inter quæ ponebat adulterium, homicidium, lapfum in idololatriam, & alia fimilia. Unde à Tertulliano in Libro de Pudicitia, quem pro Montaniftis aduersùs Catholicos composuit, talia peccata vocantur irremiffibilia & immundabilia. Non tamen talia vocat refpectu Dei, quafi de ejuſmodi peccatis nulla venia à Deo ſperari poſſit, ſed refpectu Eccleſiæ, quam in graviorum peccatorum remiſſionem nullam poteſtatem habere arbitratuſ fuit. Porrò hanc eſſe Montaniſtarum mentem & ſuam, declarat præfato Libro c. 3., ubi Catholicis objicientibus, quòd cùm de omnibus peccatis pœnitentia agenda ſit, & nihil fruſtra ſit agendum, ſit ut nullum peccatum careat veniâ, ita reſpondet: *Meritò ita opponunt, quoniam huius quoque pœnitentiæ fruſtum, ideſt veniam, in ſua poteſtate uſurpaverunt. Quantum enim ad illos à quibus pacem humanam conſequitur: quantum autem ad nos, qui ſolum Dominum meminimus delicta concedere, & utique mortalia, non fruſtra agetur. Ad Dominum enim remiſſa, & illi exinde proſtrata, hoc ipſo magis operabitur veniam, quòd eam à ſolo Deo exorat, quòd delicto ſuo humanam pacem ſufficere non credit, quòd Eccleſiæ mavult erubere, quàm communicare.*

II. Ex his ergo apparet, Montanum dum aliqua ponebat irremiſſibilia, non ea talia ponebat refpectu Dei; imò dicebat, pro eorum veniâ ſolum Deum exorandum: ſed ſolum ea ponebat irremiſſibilia per poteſtatem Eccleſiæ: non negat tamen de talibus pœnitentiam coram Eccleſia faciendam, imò eam adhortatur, quia ſic de notæ ſuæ exemplo cæteros admonet, & lacrymas fratrum advocat, ac redit pluſquam negotiata. *Et ſi pacem hic non metis, apud Dominum ſeminat. Nec amittit ſed præparat fruſtum.* Sed vult pœnitentiam hanc coram tratribus & Eccleſia præparare ac negotiari, & quafi ſeminare veniam, non poteſtate Eccleſiæ, ſed à ſolo Deo obtinendam, quia peccata gravia facultatem Eccleſiæ conceſſam excedunt, ut ab ea veniam obtinere quâcumque impletâ pœnitentiâ non poſſint, ſed ſibi ſoli eam largiri Deus reſervavit.

III. Verùm hæc doctrina, quam ut ſibi à ſuo Paracleto revelatam Montanus pronuntiavit, directè contraria eſt doctrinæ, quam de ſuo Spiritu Paracleto Apoſtoliſ collato tradidit Chriſtus. Ubi enim Montani Paracleto poteſtatem Eccleſiæ remittendi peccata ad aliqua ſola eaque leviora reſtringit: iſte ad omnia nullâ exceptione facultatem dimittendi extendit. Sic enim Jo. 20. v. 22. ait Jeſus Apoſtoliſ: *Accipite Spiritum Sanctum: quorum remiſeritis peccata remittuntur eiſ, & quorum retinueritis retenta ſunt.* Quibus amplam & generalem facultatem quæcumque peccata remittit

mittendi vel retinendi Spiritu suo Paraclete Christus Apostolis impartitur, quam eis Matth. 18. v. 18. ante concesserat dicens : *Quaecumque alligaveritis super terram erunt ligata & in Cælis : & quaecumque solveritis super terram erunt soluta & in Cælo*. Eamdemque absque ulla limitatione specialiter concessit Petro Matth. 16. v. 19. cum ipsum Ecclesiæ Petram & Caput constituens ait : *Et tibi dabo claves Regni Cælorum . Et quodcumque ligaveris super terram , erit ligatum & in Cælis , & quodcumque solveris super terram , erit solutum & in Cælis* . Cur ergo potestatem dimittendi , & solvendi, quam Christus & Spiritus ejus Apostolis ut Ecclesiæ Pastoribus & Petro ut Capiti illimitatam concessit , Montani Paracletus ad sola peccata levia restringit ?

IV. Respondet pro Montanistis Tertullianus dicto L. de Pudicitia c. 21., talem facultatem à Christo & Spiritu ejus fuisse concessam Apostolorum personis, sicut potestatem debiles sanandi & mortuos suscitandi, & eandem concessam fuisse personæ Petri, non verò Ecclesiæ : ideoque in Ecclesia non perseverasse . Sic enim de Apostolis ait : *Si & ipsos Beatos Apostolos tale aliquid indulgisse constaret , cujus venia à Deo non ab homine competeret , non ex disciplina sed ex potestate fecisse . Nam & mortuos suscitaverunt , quod Deus solus : & debiles redintegraverunt , quod nisi Christus* . Infra verò : *Si quia , inquit , dixerit Petra Dominus , super hanc Petram ædificabo Ecclesiam meam , dedi tibi claves Regni Cælestis , vel quaecumque alligaveris vel solveris in terra erunt alligata vel soluta in Cælis , idcirco præsumis , & ad te derivasse solvendi & alligandi potestatem , idest ad omnem Ecclesiam Petri propinquam , qualis es evertens & commutans manifestam Domini intentionem personaliter hoc Petro conferentem : Super te , inquit , ædificabo Ecclesiam meam . Et dabo tibi claves , non Ecclesia* . His ultimis verbis Tertullianus factus hæreticus dicendo, potestatem Petro concessam in sola Petri persona stetisse, nec ad ejus Successores, aut in Ecclesiam transiisse, miserrimè recessit ab eo, quod Catholicus ipse docuerat præsertim in Præscript. cap. 36., & modernis Hæreticis, qui idem sentiunt, viam paravit .

V. At cum Montanistis turpiter errat Tertullianus . Primò, Si facultas remittendi peccata & solvendi data fuit à Christo non Ecclesiæ, sed solis eorum personis : ergo Ecclesia omni prorsus caret potestate remittendi peccata & solvendi . Cur ergo Tertullianus & Montanistæ concedunt Ecclesiæ potestatem remittendi peccata leviora , etsi non graviora ? Nam vel Christi verba referenda sunt ut dicta Apostolis , & in ipsis dicta Ecclesiæ , vel non . Si non : ergo potestas in ipsis Apostolis expiravit , & nullo modo

modo in Ecclesiam transiit. Si sic: cum potestatem illam remittendi & solvendi ad nulla peccata Christus restrinxerit, sed dixerit: *Quorum remisistis remittuntur: quaecumque solveritis &c.*, ineptè Ecclesiæ potestatem ad aliqua sola restringunt, dum Christus ad omnia eam extendit.

Fallitur etiam & quidem enormiter, dum ait soli personæ Petri Christum dedisse claves & potestatem solvendi, non Ecclesiæ. Ideo quippe (ita S. Augustinus tract. 124. in Joann.) ait *Dominus super hanc Petram edificabo Ecclesiam meam, quia dixerat Petrus Tu es Christus Filius Dei vivi. Super hanc ergo, inquit, Petram, quam confessus es, edificabo Ecclesiam meam. Petra enim erat Christus, super quod fundamentum etiam ipse edificatus est Petrus. Fundamentum quippe aliud nemo potest ponere præter id quod positum est, quod est Christus Jesus. Ecclesia ergo quæ fundatur in Christo claves accepit in Petro, idest potestatem ligandi solvendi que peccata. Quod est enim per proprietatem in Christo Ecclesia, hoc est per significationem Petrus in petra, quæ significatione intelligitur Christus petra, Petrus Ecclesia. His Augustinus errorem Tertulliani funditus evertit.*

VI. Rursus potestatem remittendi peccata concessam à Christo generaliter Apostolis non fuisse personalem tantum, fatetur Firmilianus Epist. 75. ad S. Cyprianum ubi ad illa verba *Quorum remisistis peccata &c.* ait: *Potestas ergo peccatorum remittendorum Apostolis data est, & Ecclesiis quas illi à Christo missi constituerunt, & Episcopis, qui eis ordinatione vicariâ successerunt. Quæ confirmat idem S. Cyprianus Ep. 73. ad Jubajanum. At tota vis Tertulliani in hoc sita est, quod peccata in Deum committā, qualia sunt graviora, solus Deus dimittere potest, non homo, non Ecclesia quæ est coetus hominum, sed Ecclesia spiritalis ex tribus Divinis Personis congregata; ait enim ibidem cap. 21. Ecclesia quidem delicta donabit; sed Ecclesia spiritalis per spiritalem bonorum, non Ecclesia numerus Episcoporum. Domini enim non famuli est jus & arbitrium; Dei ipsius, non Sacerdotis. Sed nimis crasse hallucinatur. Hoc quidem verum esset, si Sacerdotibus Ecclesiæ tribueremus facultatem peccata remittendi propriâ & principali auctoritate & arbitrio, & quibuscumque etsi impenitentibus, & in peccato suo permanere volentibus: hoc enim esset peccata remittere contra voluntatem Domini: non verò si (ut nos dicimus) Sacerdotes Ecclesiæ potestate solum ministeriali, & sibi à Deo concessâ, iis qui poenitentiam petunt, veniam indulgeant: hoc non est contra voluntatem Domini facere; sed voluntatem Domini veluti tanulos ministerio implere. Hoc autem Deum voluisse,*
Chri-

Christus ipse locis supra ex Evangelio allatis testatus est. Unde S. Cyprianus Epist. 52. ad Antonianum ait : *Neque enim præjudicamus Domino judicaturò , quo minus si pœnitentiam plenam & justam peccatoris invenerit , tunc ratum faciat , quod à nobis fuerit hic statutum .*

VII. Non defuerunt S. Cypriani ætate , qui graviorum criminum reis veniam denegarent , quorum ipse meminit pralaudatâ Epistolâ ; ubi tradit , quosdam antecessores suos Episcopos dandam pacem mœchis non putavisse , & pœnitentiæ locum adulteris in totum clausisse ; non tamen quia cum Montanistis crederent in Ecclesia non esse hanc potestatem , sed ex mero rigore disciplinæ . Quare ait : *Non tamen à Coepiscoporum suorum collegio recesserunt , aut Catholicæ Ecclesiæ unitatem , vel duritiæ , vel censura suæ obstinatione respuerunt , ut quia apud alios adulteris pax dabatur , qui non dabat de Ecclesia separaretur . Manente concordie vinculo , & perseverante Catholicæ Ecclesiæ Sacramento , actum suum disponit & dirigit unusquisque Episcopus , rationem propositi sui Domino redditurus .* Quod Cyprianus , qui oppositam sententiam acriter tuebatur , non dixisset , si diversitas fuisset in dogmate , ut scilicet dandam pacem mœchis negassent , quia putassent cum Montanistis hanc in Ecclesia non esse potestatem .

VIII. Hâc ratione , quia ex rigore disciplinæ statutum fuerat , ne quorundam graviorum rei , adhuc peractâ pœnitentiâ , ad Clericatum , vel Episcopatum promoverentur , non proinde velut rami ab Ecclesia præcisi censebantur , dicit S. Augustinus Ep. 50. modò 185. ad Bonifacium cap. 10. sic : *Ut enim constitueretur in Ecclesia , ne quisquam post alicujus criminis pœnitentiam clericatum accipiat , vel ad clericatum redeat , vel in clericatu maneat , non desperatione indulgentiæ , sed rigore factum est disciplinæ : alioquin contra claves datas Ecclesiæ disputabitur , de quibus dictum est „ Quæ solveritis in terra , soluta erunt & in Cœlo „ : sed ne forsitan etiam detestis criminibus , spe honoris Ecclesiastici animus intumescens superbe ageret pœnitentiam , severissimè placuit , ut post actam de crimine damnabili pœnitentiam , nemo sit Clericus ; ut desperatione temporalis altitudinis , medicina major , & verior esset humilitas .* Hæc & alia ibi Augustinus . Cui antiquæ Disciplinæ rigori respondet modò ob aliqua graviora crimina etiam post pœnitentiam imposita Irregularitas .

Quia verò quis objicere potuisset , quòd Et Sanctus David de criminibus mortiferis pœnitentiam egit , & tamen in honore suo perstitit . Et Beatus Petrus , quando amarissimas lacrymas fudit , utique Dominum negasse pœnituit , & tamen Apostolus mansit . Respondet :

det: *Sed non ideo supervacua putanda est posteriorum diligentia, qui ubi saluti nihil detrabebatur, humilitati aliquid addiderunt, quò salustius muniretur, experti credo aliquorum fidas pœnitentias per affectatas bonorum potentias. Cogunt enim multas invenire medicinas multorum experimenta morborum. Verùm in bujushodi causis ubi per graves dissensionum scissuras, non bujus aut illius hominis est periculum, sed populorum strages jacent, detrahendum est aliquid severitati, ut majoribus malis sanandis caritas sincera subveniat. Hæc ex S. Doctore placuit subjicere, quia in multis inservire possunt.*

IX. Nunc ad Montanistas revertor, quorum inclementiam erga lapsos in graviora peccata S. Hieronymus in Ep. 27. aliàs 54. ad Marcellam ita sugillat: *Illi ad omne penè delictum Ecclesiæ obsecrant fores; nos quotidie legimus: malo pœnitentiam peccatoris quàm mortem. Et Numquid qui cadit non resurgit, dicit Dominus? Et Convertimini ad me filii convertentes, & ego curabo contritiones vestras. Rigidi autem sunt, non quò & ipsi pejora non peccent: sed hoc inter nos & illos interest, quòd illi erubescunt peccata confiteri quasi justì, nos dum pœnitentiam agimus, facilius veniam promeremur.* In hoc cum Montanistis concordare videntur moderni Heterodoxi, qui dum negant peccata aperienda esse per Confessionem Sacerdoti, sed soli Deo; consequenter dicunt, in Ecclesia non esse potestatem remittendi peccata: imò Montanistas superant; nam Montanistæ aliqua saltem peccata minùs gravia remittendi potestatem Ecclesiæ concedebant; isti verò nullam, sed omnia soli Deo absque ullo Ecclesiæ opere remittenda reservant.

X. In hoc errore cum Montano & Montanistis convenerunt Novatiani, de quibus infra: hi autem illum à Montanistis acceperunt. Nam primus qui illum evulgavit fuisse creditur Montanus: quamvis oppositum videatur sentire Vincentius Lirinensis in Commonitorio num. 24. dicens: *Quis ante crudelissimum Novatianum crudelem Deum dixit eo quòd mallet mortem morientis, quàm ut revertatur & vivat?* Dici fortè possèt, Novatianum fuisse primum qui Deum crudelem fecit, quia peccatorem neque à Deo sperare veniam posse doceret; sed neque hoc sustineri potest. Teste enim Socrate Lib. 4. Hist. c. 24. Novatus cum Montano sensit, nimirum veniam non per Ecclesiam, sed à Deo unicè esse sperandam. Cyprianus tamen, seu alius Lib. contra Novatianum, videtur asserere, hunc lapsis consequendæ etiam à Deo veniæ spem ademisse. Sed de hoc infra.

§. VII.

Montani error de fuga in persecutione.

I. **M**ontanus qui studio rigidioris disciplinæ excessit, ut hætenus vidimus, zelo quoque Fidei, sed non secundum scientiam, accensus alium statuit errorem, nimirum, non licere Christianis urgente persecutione quâcumque fugam capere. Hinc Montanistæ martyrii amore flagrantés se prædicabant, & plures è suo numero martyres jactitabant, & hoc certissimum prophetici, quem se habere gloriabantur, spiritus indicium esse prætendebant: quos tamen sæpe laudatus antiquus Scriptor apud Eusebium L. 5. Hist. c. 16. falsos martyres appellat. Nam etiam alii Hæretici plurimos se habere martyres prædicant, & præcipuè Marcionitæ, qui tamen nec pro veræ fidei & Christi confessione mortem subire, quod ad verum martyrium necessarium est: & addit, quod quotiescumque Ecclesiæ viri ad martyrium pro vera fide subeundum vocati unâ cum quibusdam de Phrygum hæresi, qui martyres dicuntur, casu quodam coierunt, semper ab illis dissentiunt, & communionem illorum sollicitè vitantes, gloriosum martyrii exitum consequuntur: & affert recens exemplum de Cajo & Alexandro in urbe Apamæa Martyribus. Quod apud Eusebium cap. 18. Apollonius testatur de Alexandro & aliis quos martyres prædicant Montanistæ, qui pro aliis potius delictis pœnas dederunt, quàm pro fide passi fuerint.

II. Hunc tamen errorem Tertullianus factus Montanista, etiam adoptavit, & pro tuendo scripsit Librum de Fuga in persecutione ad Fabium, in quo pluribus conatur ostendere, non licere vero Christiano in persecutione fugam arripere, sed debere eam fortiter ad mortem usque tolerare; & hoc esse argumentum, quod ille accepit Paracletum, ac Librum ita concludit: *Et ideo Paracletus necessarius deducet omnium veritatem exhortator omnium tolerantiarum: quem qui receperunt, neque fugere persecutionem, neque redimere noverunt, habentes ipsum, qui pro nobis erit, sicut loquutus in interrogatione, ita juraturus in passione.* At Paracletum numquid habebant Apostoli, numquid habebat Christus? Et tamen Christus declinavit persecutionem Herodis, & à Judæis pluries se abscondit eum occidere volentibus, ut se reservaret tempori sue passioni à Patre præfixo. Apostoli pariter, & maxime Paulus, qui Paracleto ducente non semel à persecutoribus evasit, non quia mortem pro Christo detestaret, sed ut diuturniori tempore Evangelio serviret, quo elapso Paulus ceterique Apostolo-

stolorum martyrio vitam gloriose coronarunt ; ut præteream tot alios sanctos viros , qui Sancto Spiritu duce persecutionibus se substraxere , ut sic melius Christo ac ejus fidei prodesse . Qualis est iste Paracletus Montani & Tertulliani , qui fugam in persecutione nemini permittere vult , quam Spiritus Paracletus Christi & Apostolorum permittit ?

III. Quando , & quomodo , & quibus liceat in persecutione fugere , latè ostendi in Theol. Tom. 1. in 2. 2. Tract. de Fide qu. 4. de actu externo Fidei Dubio 8. quò Lectorem remitto . Attamen ut Tertulliani rationes , quas in dicto Libro congerit , vanas esse , demonstrem , aliqua repetam , & alia addam . In primis enim Tertulliani doctrina & Montani ex nova pseudopropheta produeta , nemini unquam & in nulla circumstantia , aut casu licere , persecutionem vitare , contraria est verbis Domini Matth. 10. v. 23. *Cum autem persequentur vos in Civitate ista , fugite in aliam .* Loquitur autem de persecutione illata propter nomen suum : quod estò præceptum non contineat sed consilium , sequitur tamen fugere persecutionem non esse absolutè & in omni casu illicitum . Consilium hoc secutus fuit Petrus Act. 12. , qui ab Herode in carcere detentus ad mortem , Angelo duce fugâ vitæ suæ consuluit . Secutus fuit Paulus , cum à Judæis quæsitus ad necem Damasci dimissus à fratribus per murum in sporta fugiens evasit , quod narrat ipse 2. ad Cor. c. 11. v. 33. Thessalonicæ quoque seditione contra ipsum concitatâ , fugâ Beræam unâ cum Sila petiit. Act. 17. & à Festo Proconsule Cætare appellavit , ut Judæorum insidias declinaret . Si ergo illicitum esset in persecutione fugere , malum consilium Christus dedisset , & Petrus ac Paulus ei adherendo turpe exemplum posteris reliquissent .

IV. Respondet Tertullianus citato Libro cap. 6. Hoc in persona propriè Apostolorum , & in tempora , & in causas eorum pertinere , sicut præcedentia & subsequenta demonstrant : cum enim prius prædicare deberent domui Israël & prædicationis esset initium : *Idè illis fugere tunc ad tempus præcepit , non propter eludendum periculum proprio nomine persecutionis (at quin persecutiones eos passuros prædicabat & tolerandas docebat) sed propter profectum annuntiationis , ne statim oppressis , Evangelii quoque disseminatio perimeretur .* At Evangelio Judæis promulgato & jam ad gentes translato , cessante periculo , cessavit & fugæ præceptum . Et propterea Apostoli ad Nationes transeuntes , pati non dubitaverunt , & Paulus qui se per murum expediri concesserat , à discipulis rogatus , ne se Jerosolymæ committeret , ubi eum passurum Agabus prænuntiaverat , eorum precibus subscribere noluit . Unde in-

fert, etiam apud Apostolos temporaneum fuisse fugæ præceptum ; & pioinde apud nos non perseverare , quod etiam apud ipsos cessavit : aut si perseveravit , deliquerunt Apostoli , qui non usque in finem fugere curaverunt . Ita Tertullianus discurrit .

V. Verum hæc doctrina , quam à suo Paracleto edoctus protulit , in multis ruit . Primò , quia supponit , fugam in persecutione fuisse à Christo Apostolis præceptam , cum solum fuerit prudenti consilio permittenda ; aliàs Stephanus qui primam illam persecutionem fugâ non declinavit , sed lapidibus ad mortem usque se se subjecit , præceptum violasset . Secundò , quia dicit hoc solis Apostolis ad tempus præceptum , seu veriùs permittum , nec ad alia posteriora tempora perseverasse . Unde enim hoc colligit ? Quia Christus loquitur de sola persecutione , quam Apostoli passuri erant in Synagogis Judæorum ? At loquitur etiam de persecutionibus , quas passuri erant à Regibus & Præsidibus v. 18. *Et ad Præsides & ad Reges ducemini propter me , in testimonium illis & gentibus* . Ergo dum subjungit : *Cum autem persequerentur vos in Civitate ista , fugite in aliam* , non de sola persecutione Judaica , sed gentili etiam loquebatur . Tertiò , quia ratio , ob quam dicit fugere in persecutione præceptum fuisse initio Apostolis , fuit , ne eorum morte Evangelii quoque disseminatio perimeretur . Sed hoc quovis tempore periculum evenire potest , nimirum si in aliqua regione aliquis , vel plures Evangelium spargere incipientes , in persecutione morte succumbant , Evangelii disseminatio perimetur : & istis tunc persecutionem vitare licebit , ac se meliori tempori reservare , in tei ea etiam absentes in Evangelio fideles confirmando , quod Apostoli fecerunt , & S. Cyprianus cum aliis præstitit . Quo completo , tempore à Deo statuto , sicut Apostoli vitam pro Christo dederunt , ita & S. Cyprianus , aliique pro eodem pati non dubitarunt .

VI. Hinc idem Cyprianus in Lib. de lapsis : *Primus est* , inquit , *victoria titulus gentilium manibus apprehensum Dominum confiteri . Secundus ad gloriam gradus est cautâ secessione substractum Domino reservari . Illa publica , hæc privata confessio est . Ille iudicem sæculi vincit , hic contentus Deo suo iudice conscientiam puram cordis integritate custodit . Illic fortitudo promptior , hic sollicitudo severior . Ille appropinquante horâ suâ jam maturus inventus est : hic fortasse dilatus est , qui patrimonio derelicto idcirco secessit , quia non erat negaturus ; confiteretur utique si fuisset & ipse detentus .*

Quantum inutilitatis Ecclesiæ advenerit ex fuga in persecutionibus , fusè S. Athanasius ostendit in Apologia de fuga sua , exemplis Jacob , David , Eliæ , & Pauli : unde inter num. 21. *Nequam vituperanda igitur est aut inutilis Sanctorum fuga : nam si à per-*

persecutoribus non declinassent, quomodo ex semine David ortus esset Dominus? aut quoniam predicassent Verbum veritatis? Persecutores quippe ea de causa Sanctos perquirebant, ut nullus superesset Doctor veritatis, prout Judæi Apostolis præcepere; qui tamen nihil non pertulere, ut Evangelium prædicaretur. Et infra num. 22. Sic igitur Sancti, ut dictum est, dum fugerent, maximam providentiâ & curâ in usus indigentium servabantur. Aliis autem & planè omnibus nobis hominibus hæc posita lex est, ut fugiamus persecutores, nosque occultemus dum inquirimur, neque ita præcipientes & temerarii simus, ut tentemus Dominum: sed expectemus, ut supra dixi, donec definitum mortis tempus adveniat, aut judex ipse id de illis statuatur, quod sibi visum fuerit: sintque parati, ut vocante eos statuto tempore, apprehensi, ad usque mortem decertent pro veritate. Hæc observant beati Martyres in persecutionibus quæ suis occurrere temporibus, in persecutione scilicet fugere solebant, in latebrisque permanere, deprehenso autem martyrium fortiter subire. Quod si ex illis quidam persecutoribus sese offerrent, non temerè illud agebant: martyrium quippe statim perferebant, palamque omnibus erat, eam alacritatem, eumque ad persecutores accessum Spiritum Sanctum auctorem habere. Hæc Athanasius.

VII. Dicit ulterius Tertullienus, persecutionem esse à Deo. Quo supposito cap. 7. Si à Deo persecutio est, quale est, ut idem fugiendam eam mandet, qui & insert? quam si evadi vellet, melius non immitteret, ne voluntatem suam aliâ voluntate prævaricari videretur. Aut pati enim nos voluit persecutionem, aut fugere. Si fugere, quomodo pati? Si pati, quomodo fugere?

Respondeo, quod persecutio à Deo est, & à Deo volita, eo modo quo à Deo fuit & ab eo & Christo volita passio Christi. Sicut autem passio Christi alio modo à Deo & Christo volita fuit, ac volita fuit à Judæis, à Juda, & à Pilato, & ideo ut à Deo & Christo bona fuit, & laudabilis; ut à Judæis autem, Juda, & Pilato, fuit mala & vituperabilis juxta S. Thomam 3. p. q. 47. art. 3. ad 3. dicentem: Quod eadem actio diversimodè judicatur in bono vel in malo secundum quod ex diversa radice procedit. Pater enim tradidit Christum, & Ipse semetipsum ex caritate; & ideo laudantur: Judas autem tradidit ipsum ex cupiditate, Judæi autem ex invidia, Pilatus ex timore mundano, quo timuit Cæsarem; & ideo ipsi vituperantur: Ita eadem actio persecutionis, ut à Deo volita in exercitium patientiæ, & meritum fidelium constanter ipsum confitentium, bona est, & in hoc sensu dicitur Deus tradidisse Martyres persecutoribus, sicut dicitur Christum tradidisse pro nobis: ut autem volita à tyrannis persecutoribus in odium Christi mala est, & sic nec à Deo

Deo volita, sed solum permiffa. Et ideo ficut laudat & coronat fideles eam fortiter tolerantes, ita detestatur & punit tyrannos eam inferentes. Uno verbo perfecutio quatenus à Deo, & ex parte fidelis eam perferentis, bona est; quatenus verò à tyranno illata mala & à Diabolo excitata.

Ex ea parte autem, quâ perfecutio bona est, malè infert Tertullianus, Deum velle ut Christianus se coram tyranno sistat, ut non liceat ei persecutionem fugâ declinare; sed solum Deus vult, ut fidelis paratus sit persecutionem sustinere eo modo quo ipse decreverit. Qui autem eam fugâ declinant, adhuc persecutionem patiuntur, eique subsunt diuturniora & graviora mala tolerantes, quàm si semel occisi fuissent. Cumque hæc omnia patiantur, quia Christum negare nolunt, sed in ejus fide constantes perseverare etiam ad mortem usque, ideo Christum coram hominibus verè confitentur. Sic Apostoli, dum declinantes persecutionis furorem hinc illucque fugiebant, verè patiebantur, & Christum confitebantur, quod nec Tertullianus negabit.

VIII. Dicit tamen tertio: Præpositi Ecclesiæ fugere in persecutione non possunt, nec debent: ergo neque grex illis commissus: sic enim ait cap. 11. *Si grex fugere deberet, non deberet Præpositus gregis stare, sine causa statutus ad tutelam gregis, quam grex non desideraret ex licentia fuga.*

Respondeo, quòd si totus grex fugeret, ut nulla ovis permaneret, inutilis eilet permanentia Pastoris; sed falsum supponit Tertullianus, dum ait gregem fugere debere. Possè quidem licet gregem fugere dicimus, sed debere non dicimus. An autem, & quando Præpositus fugere possit, quando non, dixi citato Tomo 1. in 22. de Fide q. 4. Dub. 8. §. 1. num. 6. & sequent. unde quæ ibi dixi Lector videat. In præsens solum dicam, quòd alia est ratio de Ecclesiæ Præpositis, alia de plebe, & privatis Christianis, quibus non subest animarum cura. Præpositi enim Pastoris officium gerunt, ideoque instante persecutione non debent desertâ plebe fugâ sibi consulere; aliâs Pastores non essent, sed mercenarii. Ut enim dicit Christus Joan. 10. v. 11. *Bonus Pastor animam suam dat pro ovibus suis. Mercenarius autem & qui non est Pastor, cujus non sunt oves propria, videt lupum venientem & dimittit oves & fugit: & lupus rapit, & dispergit oves.*

In aliquibus autem casibus licere Præpositis, ut se in utilitatem gregis meliori tempore reservent, secedere ingruente persecutione loco citato dixi: puta si remaneant in Ecclesia alii Ministri, qui eorum vices implere possint: vel si à persecutione specialiter persona Præpositi quærat, vel si Præpositus suæ infirmitatis con-

consciis timeat, se non fore constantem in tormentis. In his & similibus casibus poterit, & fortè etiam debèbit Præpositus seipsum fugâ reservare. Sic SS. Petrus & Paulus, Cyprianus, Athanasius, & alii etfi Ecclesiæ Pastores, persecutionem declinarunt. De hoc videri potest S. Augustinus Epist. 180. modò 228. ad Honoratum, ubi præscribit Regulas, quando Præses Ecclesiæ possit in persecutione secedere, quando verò non.

§. VIII.

Errores Montanistis tributi.

- I. **M**ontanistas hoc alio ferunt fuisse infectos errore, quòd Animam humanam corpoream esse existimarent, substantiæ tamen aeræ, levis, & lucidæ. Cui errori occasionem dedisse putant visionem quamdam phantasticæ illius Sectæ feminæ, cui in ecstasi talis apparuerat: quo factum fuit ut Montanistarum saltem aliqui nimium visionibus dediti, animam humanam re verâ in se corpoream esse existimarint. Factum Tertullianus narrat Lib. de Anima cap. 9. his verbis: *Est bodie soror apud nos revelationum charismata sortita, quas in Ecclesia inter Dominica solemnia per extasim in spiritu patitur, conversatur cum Angelis, aliquando etiam cum Domino, & videt & audit Sacramenta, & quorundam corda dignoscit, & medicinas desiderantibus submittit. Jam verò prout Scripturæ leguntur, aut Psalmi canuntur, aut adlocutiones proferrantur, aut petitiones delegantur: ita inde materiæ visionibus ministrantur; fortè nescio quid de anima differueramus, cum ea soror in spiritu esset. Post transacta solemnia, dimissâ plebe, quo usu solet nobis nuntiare quæ viderit (nam & diligentissimè digeruntur, ut etiam probentur)* „ Inter cætera, inquit, ostensa est mihi Anima „ corporaliter, & spiritus videbatur, sed non inanis & vacuæ „ qualitatis, imò quæ etiam teneri repromitteret, tenera & lucida & aerei coloris, & formâ per omnia humanâ „ . *Hæc visio est: Deus testis & Apostolus charismatum in Ecclesia futurorum idoneus sponzor.* Hæc Tertullianus: qui nimium credulus muliebri huic visioni fidem præstare videtur, dum subdit, quòd si anima corporea est, sinè dubio non alterius erit coloris, quàm acrii, & lucidi: unde sic concludit: *Recognita enim, cum Deus flasset in faciem hominis statum vitæ, & factus esset homo in animam vivam, totum utique per faciem statim statum illum in interiora transmissum, & per universa corporis spatia diffusum simulque Divinâ aspiratione densatum, omni intus lineâ expressum esse, quam densatus impleverat,*

rat, & velut in forma gelasse. Inde igitur & corpulentia animæ ex densatione solidata est, & effigies expressione formata. Hic eris homo interior, alius exterior, dupliciter unus &c.

II. Ex præfata ergo fallaci visione Tertullianus existimavit, animam esse statum illum, quem Deus in faciem hominis inspiravit, qui deinde per omnia membra corporis diffusus & ibi condensatus, omnium eorum formam imbuerit, puta in oculo formam oculi, in lingua formam linguæ, & sic de cæteris, ideoque corpoream formam habere, æream tamen, & tenuem, quam vocat hominem interiorem, quem habere oculos, manus, linguam, & cæteros artus ostendere conatur in Divite, Lazaro, & Abraha, qui estd solum secundum animam apud inferos essent, eis tamen lingua, digitus, & sinus in Evangelio tribuuntur; ait enim: *Sic & diviti apud inferos lingua est, & pauperi digitus, & sinus Abraha.*

III. Licet autem ex præfata mulieris visione, in errore quod anima corporea sit, habens oculos, manum, linguam & cætera membra, Tertullianus confirmatus fuerit, illam tamen antea concepisse apparet ex his quæ alibi dicit, præsertim in Lib. de Resurrect. Carnis cap. 17. An autem illum hauserit à Montanistis dubito: potius à Philosophis illum accepisse crediderim. Tum quia priusquam fieret Montanista illo laborasse apparet ex locis allatis ante suum lapsum in Montanismum conscriptis, ut plures credunt. Tum quia factus Montanista hunc errorem, ut alios, contra Orthodoxos propugnandum non suscepit. Tum denique quia certum non est, Montanistas hæc labe fuisse infectos, cum nec S. Augustinus, nec Philaster, nec Epiphanius, nec Theodoritus, nec ullus Veterum de hoc illos accusent.

IV. Sacram Eucharistiam funesto ritu contaminasse fama fuit, utendo scilicet in ea pane ex farinâ innocentis pueri sanguine permixtâ. Referunt hoc S. Augustinus L. de Hæres. c. 26., ubi de Cataphrygibus seu Montanistis: *Sacramenta, inquit, perbibentur habere funesta: nam de infantis anniculi sanguine, quem de toto ejus corpore minutis punctilionum vulneribus extorquent, quasi Eucharistiam suam conficere perbibentur, miscentes eam farinæ, panemque inde facientes: qui puer si mortuus fuerit, habetur apud eos pro martyre: si autem vixerit, pro magno sacerdote.* Philaster Hæres. 49. loquens de Pepuza Phrygiæ villa, in qua Montanus cum suis Prophetissis vitam duxit, ait: *Ubi & mysterium Cynicorum (seu Quintilliano- rum) & infantis execranda celebratur impietas: Dicunt enim eos de infantis sanguine in Pascha miscere in suum sacrificium, suisque ira emittere perniciosi & falsi satellitibus.* Epiphanius item Hæres. 48. n. 14. *Cæterum, inquit, iidem illi (Cataphryges) desertum quen-*
dam

dam in Phrygia locum præcipuè venerantur, ubi Pepuza quondam oppidum fuit, quod hodie solo æquatum est. Eò siquidem descendere Cælestem Hierusalem affirmant. Ergo illò proficiscuntur, ac mysteria quadam obeunt, sacrisque cæremoniis pro sua opinione celebrant. Quenam autem essent hæ cæremoniæ inferius exponit dicens: In hac Montani, vel in ejus germana Quintillianorum, aut certè Priscillianorum & Pepuzianorum hæresi, horrendum quoddam ac detestandum fieri dicitur; nam infantulum per solemne quoddam scissum acubus æreis toto corpore pungentes, exceptam sanguinem sacrificiis suis adhibent.

V. Illi tamen, cùm hoc eis exprobraretur, calumniam esse dicebant: unde Theodoritus Lib. 3. Hæret. Fab. c. 2. ait: *De mysteriis autem nonnulla quidam jactitant. Sed illi non fatentur, & sui accusationem calumniam appellant.* Sed præ pudore hoc fateri volebant. Unde Timotheus presbyter ait: *Isti sanguinem miscent cum farina ad Communionem; verùm hujusmodi perceptionem præ verecundia negant:* vel quia non omnibus notum erat, cùm clanculum, non in omni illius Seclæ parte, sed in loco tantùm Pepuza, & quidem in solo Paschate celebraretur; nec inde ad omnes sed aliquos ex præcipuis pars illius nefandi sacrificii mitteretur, unde aliquibus eorum, maximè simplicibus, poterat esse ignotum: apud eos enim hoc erat mysterium; ut autem ait Theodoritus in c. 15. 1. ad Cor. *Mysterium dicitur, quod non omnibus declaratur, sed solis amicis creditur.* Quidquid tamen fuerit, S. Hieronymus præ horrore mavult non credere. Sic Epist. 27. aliàs 54. ad Marcellam: *Prætermitto, inquit, scelerata mysteria, quæ dicuntur de lactente puero, & de victuro martyre confarrata. Malo, inquam, non credere: sit falsum omne quod sanguinis est.*

VI. Alii alios errores Montano, seu Cataphrygibus affingunt. Quòd mortuos baptizarent, dicit Philaster Hæres. 49. Quòd etiam mulieres sacris initiari possint. Sed hic specialis Pepuzianorum, de quibus infra, error fuit. Quod incestuosos concubitus, & contra Jus gentium & Divinum initos Montanus approbaverit. Sed hoc contra ejus ideam est. Quis enim putet, hominem adeo rigidiore disciplinæ addictum, ut etiam secundas nuptias ut illicitas reprobaverit, omnes illicitos concubitus approbasset? Hoc fortè putabitur, quia Priscillam & Maximillam, earum viris adhuc superstitibus, ut uxores habuisse fertur. Dicunt alii insuper, Montanistas quædam fabulosa nugari de corporum statu, quæ pii & fideles homines sunt recepturi, definientes, quantâ lucis mensurâ illa nostra corpora Solem ipsum superabunt, alia nimirum, ut ajunt, centum, alia pluribus, alia paucioribus gradibus; sed cùm pro his

nullum Veterum aut certum testimonium asseratur, tanquam nugæ habenda sunt ac omittenda.

CAPUT XXIV.

De Pepuzianis, & Artotyritis, & aliis.

§. I.

Qui fuerint Pepuziani.

I. **P**EPUZIANOS eosdem fuisse ac Montanistas & Cataphryges, solâ etymologiâ nominis diversos, censet Theodoretus L. 3. Hæc. Fab. c. 2. ubi de Montano agens: *Qui autem, inquit, ab ejus doctrina pendent, vocantur quidem ab eo Montanista, vocantur etiam Cataphryges à Gente, Pepuziani à vico, quem ille nominavit Hierusalem.* Cum enim, ut Cap. præced. dixi, Montanus hæresim suam in Phrygia primò effuderit, & quidem in oppido Pepuza, ubi ipse tanquam in nova Hierusalem cum Prisca seu Priscilla & Maximilla moram trahebat, & inde commenta sua sub Paracleti nomine spargere cœperit, factum est, ut qui eum sequebantur Pepuziani etiam vocarentur. Idem sentit etiam Nicephorus L. 4. Hist. c. 22. Pepuzianos autem specialiter dictos fuisse Montanistas illos, qui Pepuzæ tanquam in prima suæ hæresis sede, & apud eos tanquam Cœlesti Hierusalem habita, residebant, ubi intandum illud pueri sacrificium conficiebant, & inde partes illius, ut ex Philastrio dixi, ad alios suæ Sectæ per satellites trans mittebant.

II. Pepuzianos tamen, non solo nomine à puris Montanistis seu Cataphrygibus discrepasse, sed ab istis quidem ortos, & quasi surculum, aliqua de suo addidisse communius existimatur. Nam & Quintilliani etiam dicebantur, quia cujusdam Quintillæ pseudo-propuerisse, cui Christum in muliebri specie apparuisse dicebant, insanias sequebantur, & alia addebant supra Montanistarum deliria. Hinc Epiphanius Hæres. 49. num. 1. *Quintilliani qui & Pepuziani vocantur, & Artotyrita ac Priscilliani, inter Phrygas censentur, & ab iis exorti sunt. Etenim Phryges isti, sive Priscilliani Quintillam, aut Priscillam (neque enim utra sit certò scimus) sed barum alteram dicunt Pepuzæ aliquando somno correptam. Tum ad eam descendisse Christum, & simul cum ipsa eodem habitu dormisse, ut vana muliercula jactabat.* „ Muliebri, inquit, specie, ac veste „ splendidâ venit ad me Christus, mihiq; sapientiam indidit,

„ atque hunc locum sanctum esse significavit, in eumque sanctam „ Hierusalem delabi, „ Ob id nonnullæ ad bodiernum usque tempus mulieres ac viri eodem initiari cultu solent, ut ibidem excubantes Christum contemplantur. Quamobrem sive apud istos, sive apud Phrygas, Prophetissæ feminae nuncupantur. Hæc Epiphanius.

S. Augustinus quoque Lib. de Hæres. c. 27. ait: Dicant enim, inquit, Quintilla, & Priscilla in eadem Civitate Pepuza Christum specie femina revelatum: unde ab hac Quintilliani etiam nuncupantur. Damascenus quoque de Hæres. cap. 49. hæc habet: Pepuziani, qui & Quintilliani dicuntur, quibus accedunt Artotyrita, bæreses duæ. Superioribus quidem illis, hoc est Cataphrygibus annumerantur, sed ab eis tamen diversa nonnulla sentiunt: ac Pepuzam desertum quoddam oppidum, Galatiam inter & Cappadociam ac Phrygiam situm, Divinis honoribus extollunt, quippe Hierosolimam esse dicunt: est autem & alia Pepuza. Mulieribus Magistratus & Sacerdotia deferunt. Sacra faciunt, puerum quidem acubus areis compungentes, ut solent Cataphryges, ejusque sanguine farinâ admixtâ panem conficientes, oblationis participes fiunt. Fungunt Pepuza Christum olim se Quintilla, seu etiam Priscilla, videndum præbuisse muliebri specie. Vetus ac Novum Testamentum adhibent, ita tamen ut omnia pro animi libidine ad prævos sensus transferant. Hactenus Damascenus.

III. Epiphanius autem Hæres. 49. num. 2. alia præter dicta adjungens ait: Utrumque porro Testamentum adhibent, & mortuorum resurrectionem approbant. Quintilliam verò cum Priscilla auctores suas prædicant, quam & Phryges asciscunt. Multas & vanissimas ætioritates circumferunt. Singularem Evæ gratiam tribuunt, quod prima de scientiæ fructu comederit. Sororem verò Moysis Prophetissam jactitant; cujus exemplo illi cooptandarum in Clerum mulierum instituto suffragantur. Quin & quatuor, inquit, Philippus Prophetissas filias habuit. Sæpenuerò in eorum Ecclesiam septem cum facibus Virgines ingrediuntur candidâ veste, ut Populo videlicet oracula reddant. Hæ cum speciem quamdam furoris præ se tulerint, adstantibus illudunt, & ad fletum provocant; ut is penitentiae lætus esse videatur. Nam & lacrymas profundunt, & toto corporis gestu vitam hominis deplorant. Apud eosdem mulieres Episcopi sunt & Presbyteri, & ad cæteros gradus alleguntur, nullum ut sexus discrimen servetur. Nam in Christo Jesu neque mas est, neque femina (Galat. 3. v. 28.) Ex his ab Epiphanio, Damasceno, & Augustino relatis apparet, in quo Pepuziani cum Cataphrygibus sentirent, & quid supra eorum errores adderent.

IV. His adjungit S. Basilii in Epist. ad Amphilochem Canoni-

nonica 1., Pepuzianos non habuisse verum Baptisma, cum in *Patrem & Filium & Montanum seu Priscillam baptizarent*. Sed in hoc idem ac supra de Montanistis dicendum est; non omnes scilicet in hac forma baptizasse, sed aliquos fortè, qui Montanum vel Priscillam verum Paracletum esse existimantes, loco Spiritus Sancti Montanum vel Priscillam nominabant, quorum Baptisma certè irritum erat. Quamvis PP. Maurini in Notis ad hunc locum existiment, Pepuzianos in Baptismo nomen Spiritus Sancti non omisisse, sed eo nomine intellexisse suum Paracletum, quem Montanum seu Priscillam existimabant. Ut ut sit, non omnes Montanistæ seu Pepuziani debitam in Baptismo formam omittunt, etsi in fide Trinitatis aliqui errarent, ut supra ostendi.

§. II.

Pepuzianorum errores.

I. **P**epuziani specialiter errabant, quia feminas plus æquo extollebant, & hoc in duobus: Primo, quia feminas ad Episcopatum & Presbyteratum admittebant. Secundò, quia Evam comedendo de ligno vetito singularem scientiam acquisivisse asseriebant. Primum errorem supra rejeci cap. 11. §. 3. num. 6. & 10. in Marcitis, qui eadem mulieribus concedeant, & infra in Collyridianis resutabo. Una ex Pepuzianis, fortè illa mulier fuit de qua Firmilianus in Epist. modò 75. ad Cyprianum ait: *Emersit istic subito quædam mulier, quæ in exstasi constituta prophetem se præferret, & quasi Sancto Spiritu plena sic ageret. Ita autem principalium demoniorum impetu ferebatur, ut per longum tempus sollicitaret, ac deciperet fraternitatem, ac mirabilia quædam & portentosa perficiens, & facere se terram moveri polliceretur.* Et post multa subdit: *Atque illa mulier, quæ prius per præstigias & fallacias demonis multa ad deceptionem fidelium moliebatur, inter cætera quibus plurimos deciperat, etiam hoc frequenter ausa est, ut & invocatione non contentibili sanctificare se panem & Eucharistiam facere simularet, & Sacrificium Domino siue Sacramento solita prædicationis offerret.*

II. Et quidem hæc non ab alio, quàm à Demone inspirari poterant. Qui enim Gentiles induxit, ut in Deos etiam feminas adscriberent, & primam mulierem promissione divinitatis decipit: sicut Deabus feminis feminas sacrificare voluit, ut testantur Historici apud Gyraldum in Historia Deorum Syntagm. 17. de Dea Bona, cui semina tantum sacerdotio inserviebant, sicut & Cereri Eleusina scribit Tacitus de Moribus Germanorum: ita aliquas
etiam

etiam Christianas feminas ambitione sacerdotii seducere voluit. Sed stultè, ne dum impiè. *Quod enim* (inquit Epiphanius ibi num. 3.) *mulieres ad Episcoporum aut Presbyterorum ordinem asciscunt, idque ob Evam facere se dicunt, non audiunt sanè quod à Domino dictum est* „ Ad virum erit conversio tua, & ipse dominabitur tibi „. Si autem femina ad Presbyteratum, aut Episcopatum promoveretur, jam vir subjiceretur mulieri, & mulier dominaretur viro, & corpus capiti: quia mulier ex costa viri formata corpus est, & caput est vir, dicit enim Paulus 1. Cor. 11. v. 3. *Caput autem mulieris vir*. Et v. 8. *Non enim vir ex muliere est, sed mulier ex viro*. Si ergo mulier Episcopatu vel Presbyterio honoretur, percutitur Ordo à summo Opifice constitutus.

III. Accedit, quòd, ut ibidem Epiphanius notat, idem Paulus 1. Cor. 14. v. 34. dicit: *Mulieres in Ecclesiis taceant, non enim permittitur eis loqui, sed subditas esse, sicut lex dicit*. Et 1. ad Timoth. c. 2. v. 11. *Mulier in silentio discat cum omni subjectione. Docere autem mulieri non permitto, neque dominari in virum sed esse in silentio: Adam enim primus formatus est, deinde Eva. Et Adam non est seductus, mulier autem seducta in pravaricatione fuit*. Si ergo mulier Episcopatu vel Presbyteratu funderetur, quomodo in Ecclesia docere non posset, sed esse in silentio teneretur? Imò & loqui & docere ex officio deberet. Quia ergo viri creatio productionem mulieris præcelsit, è contra autem peccatum mulieris præcelsit peccatum viri, consultò Deus ducatum ad instillandam sacerdotio pietatem mulieri non concessit; quæ posterior creata, prior peccavit, & virum in peccatum traxit. Hæc discursus Pauli vis esse videtur.

IV. Adducebant tamen pro se Pepuziani, ut ex Epiphanio dixi, locum Pauli ad Galatas 3. v. 27. *Quicumque enim in Christo baptizati estis, Christum induistis: non est Judæus, neque Græcus, non est servus neque liber; non est masculus, neque femina: omnes vos unum estis in Christo Jesu*. Si ergo omnes baptizati, quia sunt unum in Christo capaces sunt sacerdotii, cur non & feminae?

Retorqueo primum hunc discursum. Si in Christo Jesu unum sunt masculus & femina, ut nulla sit inter eos differentia quoad Ecclesiæ officia allumenda, cur Paulus vetat mulieribus in Ecclesiis loqui, & docere, sed vult, eas esse in silentio, nec dominari viros sed esse in subjectione? Signum est igitur, quòd ea quæ in Ecclesia dominationem, & superioritatem sapiunt, qualia sunt Episcopatus & Sacerdotium, mulieribus etsi Baptismo factis unum in Christo, non permittit. In hoc ergo stat inter baptizatos convenientia, quòd sicut omnes nec attentâ diversitate nationum, aut sexus,

sexus, facti sunt unum in Christo, tanquam ejus membra, ita capaces sunt gratiæ, filiationis adoptivæ, & aliorum, quæ Baptismus consequuntur. Sed sicut idem Paulus Roman. 12. v. 4. dicit, quod *sicut in uno corpore multa membra habemus; omnia autem membra non eundem actum habent: ita multi unum corpus sumus in Christo, singuli autem alter alterius membra. Habentes autem donationes secundum gratiam quæ data est nobis, differentes.... Sive ministerium in ministrando, sive qui docet in docendo* &c. Ex quo fit, ut sicut in corpore humano omnia membra conveniunt quidem in participandâ vitâ corporis, alium tamen actum habet manus, alium caput, ut manus suo actu capiti quidem inserviat, sed imperare aliis membris, qui est actus proprius capitis, manus non possit: ita in corpore mystico omnia quidem membra participant vitam, sed actus alterius participare nequeant, ideoque mulieres actus ministerii, & doctrinæ, qui capitis proprius actus est, incapaces sunt. De hoc locutus sum in Theol. Tom. 4. in 3. p. Tract. de Ordine qu. 3. de subiecto Ordinis Dub. 1., ubi ad rem præsentem aliqua dixi, & præsertim de Diaconissis & Presbyteris in Antiqua Ecclesia, quæ videri possunt.

V. Alio fundamento ad mulieres sacerdotio donandas movebantur Pepuziani: quia Legis Evangelicæ privilegium est, ut non minus mulieres, quàm viri ad Sacerdotium assumantur, in qua sine sexus discrimine Spiritus Sanctus ad omnes effusus dicitur à Petro Apostolo juxta Joelis prophetiam Act. 2. v. 16. &c. his verbis. *Et hoc est quod dictum est per Prophetam Joel. Et erit in novissimis diebus dicit Dominus: Effundam de Spiritu meo super omnem carnem, & prophetabunt filii vestri & filia vestra.... Et quidem super servos meos & super ancillas meas in diebus illis effundam de Spiritu meo, & prophetabunt.*

VI. Sed neque hoc eis faver. Nam allatum ex Joelle testimonium loquitur de gratiis gratis datis, ut est donum Prophetiæ, quæ sunt gratiæ extraordinariæ, nec pertinent ad ordinarium Ecclesiæ regimen, ac doctrinæ ministerium. Et has quidem in Lege Evangelica erant credentes sine sexus discrimine recepturi. Sed non loquitur de ordinario Ecclesiæ ministerio, quo aliqui præfunt dignitate, vel doctrinâ, à quo, ut dixi, Paulus feminas excludit. De hoc agit S. Thomas in 4. dist. 25. q. 2. art. 1., ubi postquam dixit, quædam requiri in suscipiente Sacramentum, quasi de necessitate Sacramenti, quæ si desint, non potest quis recipere Sacramentum, neque rem Sacramenti: quædam verò requiruntur, non de necessitate Sacramenti, sed de necessitate præcepti, propter congruitatem ad Sacramentum, & sine talibus aliquis suscipit Sacramentum,

tum, sed non rem Sacramenti, Postea subiungit: *Dicendum ergo, quod sexus virilis requiritur ad susceptionem Ordinis non solum secundo modo, sed etiam primo. Unde si mulieri exhibeantur omnia quæ in Ordinibus sunt, Ordinem non suscipit: quia cum Sacramentum sit signum, in his quæ in Sacramento agunt, requiritur non solum res, sed significatio rei: sicut dictum est, quod in extrema unctiōe exigitur quod sit infirmus, ut significetur curatione indigens. Cum ergo in sexu femineo non possit significari aliqua eminentia gradus, quia mulier statum subjectionis habet, ideo non potest Ordinis Sacramentum suscipere. Quidam autem dixerunt, quod sexus virilis est de necessitate præcepti, sed non de necessitate Sacramenti, quia etiam in Decretis fit mentio de Diaconissa, & Presbytera. Sed Diaconissa dicitur, quæ in aliquo actu Diaconi participat, sicut quæ legit hominiam in Ecclesia: Presbytera autem dicitur vidua, quia Presbyter idem est quod Senior.*

Deinde ad primum ibi subiungit, quod prophetia non est Sacramentum, sed donum Dei: unde non exigitur ibi significatio, sed solum res. Et quia secundum rem in his quæ sunt animæ mulier non differt à viro, cum quandoque mulier inveniatur melior quantum ad animam multis viris, ideo donum prophetiæ & alia huiusmodi potest accipere, sed non Ordinis Sacramentum.

Quia verò opponebatur, mulierem fieri posse Abbatissam, & Debboram præfuisse ac iudicasse Israel, respondet: *De Abbatissis dicitur, quod non habent prælationem ordinariam, sed quasi ex commissione propter periculum cobitationis virorum ad mulieres. Debbora autem præfuit in temporalibus non in Sacerdotalibus, sicut & nunc mulieres possunt temporaliter dominari.* Ita S. Thomas.

VII. Alter error, quo laborasse Pepuzianos Epiphanius dicit, est: quod singularem Evæ gratiam tribuunt, quod prima de fructu scientiæ comederit. In hoc errore conveniebant aliquantulum cum Ophitis, quos supra Cap. 14. refutavi. Ac debuissent potius in Evæ lapsu ruinam humani generis deplorare, quæ de fructu vetito comedendo, sibi ac omnibus veræ scientiæ iacturam comparavit. Movebantur fortè ex Genes. 3. v. 7., ubi statim post comestionem fructus vetiti dicitur: *Et aperti sunt oculi amborum*, quod serpens ante v. 5. prædixerat dicens: *Scit enim Deus, quod in quocumque die comederitis ex eo, aperientur oculi vestri, & eritis sicut Dii scientes bonum & malum.* Sed quis non videt, serpentem diabolum fuisse malignum deceptorem? Aperti sunt oculi amborum. Granditatem nempe criminis sui, & promissionum Dæmonis vanitatem tandem noverunt. Intellexerunt bonum quod amiserant, & tanta in se induxerant mala; & cum cognovissent se esse nudos, carnis à spiritu detectio pudorem in illos induxit de probro, & nudos se

se esse erubescere cœperunt. En quid de ligno vetito comedens, sibi ac nobis Eva lucrata fuit. *Mox ut ergo* (inquit S. August. L. 11. de Genes. ad litter. cap. 31.) *præceptum transgressi sunt, intrinsicis gratiâ deferente omnino nudati, quam typho quodam & superbo amore suæ potestatis offenderant, in sua membra oculos injecerunt, eaque motu eo, quem non noverant, concupiverunt. Ad hoc ergo aperti sunt oculi, ad quod antea non patebant, quamvis ad alia paterent. Sed in hoc errore ab omnibus seculis damnato confutando immorari superfluum est.*

§. III.

Artotyritæ & eorum errores.

I. **A**rtotyritæ hoc nomine appellantur, quia panem & caseum in Eucharistia offerebant. Etenim *Artos* Græcis panis est, & *Tyros* caseus: ideoque hæresis ab operatione desumpsit nomen. De his S. August. Lib. de Hæres. cap. 28. *Artotyritæ*, inquit, *sunt, quibus oblatio eorum hoc nomen dedit. Offerunt enim panem & caseum, dicentes, à primis hominibus oblationes de fructibus terræ, & ovium fuisse celebratas. Philaster Hæres. 74. Artotyritæ sunt nomine ex re ipsa imposito in Galatia qui panem & caseum offerunt, non illud quod Ecclesia Catholica & Apostolica celebrat offerendo. Epiphanius autem jungens eos Pepuzianis num. 2. ait: Ceterum Artotyritas eosdem idcirco vocant, quod ad celebranda mysteria sua panem & caseum adhibent: quibus indicat, Artotyritas fuisse raram quemdam hæresis Pepuzianorum, & Cataphrygum. Idem sentit Damascenus de Hæres. c. 49. dicens: Pepuziani, qui & Quintilliani dicuntur, quibus accedunt Artotyritæ: hæreses duæ. Idem existimat Nicetas L. 4. Thesauri c. 16. Timotheus tamen Presbyter apud Cotelierium Monum. 3. ex Marcionis hæresi eos descendere facit. Horum etiam meminit Isidorus Lib. 8. Etymol. c. 5.*

II. Hanc hæresim in Galatia maximè viguisse, ex Philastrio apparet, & ex S. Hieronymo, qui in præmio L. 3. in Ep. ad Galatas loquens de Hæresibus, quæ in Galatia grassatæ fuerant, etiam Artotyritas recenset his verbis: *Scit mecum qui vidit Anchiram Metropolim Galatiæ civitatem, quot nunc usque schismatibus dilacerata sit, quot dogmatum varietatibus constuprata. Omitto Cataphrygas, Opbitas, Borboritas, & Manichæos. Nota enim jam hæc humanæ calamitatis vocabula sunt. Quis umquam Passaloricetas, & Ascondobos, & Artotyritas, & cetera magis portenta quam nomina in aliqua parte Romani Orbis audivit? Antiquæ stultitiæ usque hodie*

ma-

manent vestigia. His indicat Hieronymus, Artotyritarum hæresim vix extra Galatiam protensam fuisse, & etiam parum durasse, sive ob paucitatem Sectatorum, sive quia in hæresi Cataphrygum absorptam. Quis autem illius Auctor primarius fuerit, silent veteres. Si, ut ex supra allatis Patribus dixi, ex hæresi Montanistarum prodiit, credibile est, post excessum Montani quoddam aliquis phanaticus Montanista, ut tamam sibi compararet, hunc aliis erroribus addiderit, sicut ex dictis Pepuziani fecerunt. Nam, ut ad rem inquit Epiphanius citato loco n. 3. *Ubi ab sincera religione semel aberratum est, ridicula ac perturbata, quæ ab hominibus geruntur, esse omnia necesse est, varia ut inde furoris genera Dæmonumque in corpora impressiones oriuntur*. Quod quæ his temporibus grassantur hæreses ad oculum demonstrant.

III. Peculiaris ergo & unicus Artotyritarum error erat, ex Augustino & aliis, quod in suis mysteriis loco panis & vini panem & caseum, sive potius, ut vult Timotheus presbyter, panem ex farina, non aqua sed lacte confectum, offerbant. Et hoc fortè magis consentaneum falsæ eorum opinioni videtur. Dicebant enim, ut ex Augustino relato, à primis hominibus oblationes de fructibus terræ & ovium fuisse celebratas: atqui nullibi legimus, à primis hominibus caseum fuisse oblatum, sed vel primogenita ovium, vel de adipe eorum. Nam cap. 4. Gen. habemus, quod Cain obtulit de fructibus terræ munera Domino, quia erat agricola; Abel autem qui erat pastor ovium obtulit de primogenitis gregis suis, & de adipibus eorum.

IV. Sed quomodocumque sit, erraverunt. Christiani enim in oblatione Eucharistica imitari non debent, quod primi homines fecerunt, sed quod fecit Christus, qui eam instituens non sumisit panem & caseum, seu panem & lac, sed panem & vinum: & potius quàm ad primorum hominum oblationes respicere debent ad oblationem Melchisedech figuram oblationis Eucharisticæ, qui obtulit panem & vinum. Hoc demonstrat S. Cyprianus Epist. 63. ad Cæciliam his verbis: *In Sacerdote Melchisedech Sacrificii Domini Sacramentum præfiguratum videmus, secundum quod Scriptura Divina testatur & dicit (Genes. 14.)*, „Et Melchisedech Rex „ Saltem protulit panem & vinum: fuit autem Sacerdos Dei summi, & benedixit Abraham „. *Quod autem Melchisedech typum Christi portaret, declarat in Psalmis Spiritus Sanctus ex persona Patris ad Filium dicens*, „Ante Luciferum genui te: Tu es Sacerdos in æternum secundum ordinem Melchisedech „. *Qui ordo atque hic est de Sacrificio illo veniens, & inde descendens, quoddam Melchisedech Sacerdos Dei summi fuit, & quoddam panem & vinum obtulit,*

quòd Abraham benedixit. Nam quis magis Sacerdos Dei summi, quàm Dominus noster Iesus Christus, qui sacrificium Deo Patri obtulit, & obtulit hoc idem quod Melchisedech, panem & vinum, suum scilicet corpus & sanguinem? His Cyprianus Artotyritarum infaniam detegit. An verò præter panem & caseum offerrent etiam vinum, cum nemo præfatorum Veterum id expresserit, in incerto manet.

V. Abs re non erit hic addere, in primitiva Ecclesiæ disciplina consuevisse, ut fideles in Ecclesiam convenientes oblationes facerent super altare earum rerum, quæ per Sacerdotem consecrabantur, nimirum panis & vini: ex quibus à Sacerdote ea tantum pars consecrabatur, quæ Sacerdoti sufficiens videbatur pro Populo; quæ verò supererat, vel in usus pauperum distribuebatur, vel distribuenda allervabatur. Testis est S. Justinus Martyr Apolog. 2. ad Antoninum pag. 98., ubi fusè descriptâ de oblatiis pane vino & aqua à Præsidente factâ consecratione, & per ipsum datâ præsentibus, per Diaconos autem missâ ad absentes distributione, subiungit: *Ceterum qui copiosiores sunt, & volunt, pro arbitrio quisque suo, quod visum est contribuunt: & quod ita colligitur apud Præpositum deponitur: atque inde ille opitulatur pupillis & viduis, & his qui propter morbum, aut aliquam aliam causam egent, quique in vinculis sunt, & peregrè advenientibus hospitis, &, ut simpliciter dicam, indigentium is omnium curator est.* Et Cyprianus L. de Opere, & Eleemotynis, ad Matronam divitem, quæ nihil de suo ad altare offerebat, sed oblatiis à pauperibus in sacrificio participare volebat, sic ait: *Locuples & dives es, & Dominicum celebrare te credis, quæ carbonem omnino non respicis; quæ in Dominicum sine sacrificio venis, quæ partem de sacrificio, quod pauper obtulit, sumis?*

VI. Procedente tamen tempore præter panem & vinum cœperunt alia ad altare offerri, ut mel, lac, legumina, carnes & ejusmodi comestibilia, & loco vini aliæ potiones, quæ omnia prohibentur Can. 3. ex iis qui sub nomine Apostolorum perstant, ubi statuitur, quòd nihil offeratur, præter id quod Dominus ordinavit, excepto oleo pro lampadibus, & thure pro incenso. Cætera verò nempe cujuscumque fructus primitiæ ad Episcopi vel Presbyteri domum mittantur, utique distribuenda. Quia verò videbatur permissum novas spicas, & uvas maturas suo tempore ad altare deferre, non ut in sacrificium adhiberentur, sed ut primitiæ: ea cum aliqui hoc in abusum vertentes, uvas in altari oblatas unâ simul cum Eucharistia Populo distribuere consuevisent, ideo Synodus Trullana Can. 28. hunc abusum proscripsit. Non desuere qui

qui mulsam, potionem scilicet ex vino & melle confectam, offerrent; quos Concil. Antisiodorense Can. 8. coercuit statuens: *Non licet in Altario in sacrificio Divino mellitum quod mulsam appellant, nec ullum aliud poculum extra vinum cum aqua mixtum offerre.* Et ad similes tollendos abusus Concilium Carthaginense 3. Can. 24. jam statuerat: *Ut in Sacramento Corporis & Sanguinis Domini nihil amplius offeratur, quam ipse Dominus tradidit, hoc est panis & vinum aqua mixtum, nec amplius offeratur in sacrificiis, quam de uvis & frumentis.*

Alii quoque eo devenerunt, ut in sacrificiis lac pro vino offerrent: alii intinctum panem, & inde expressum in calice populo porrigebant. Alii non vinum in calice offerebant, sed uvas populo porrigebant. Aliqui pannum lineum tinctum musto toto anno reservabant, & tempore sacrificii partem ejus in aqua lavabant, & sic offerebant. Quibus abusus occurrere volens Concilium Bracarense 3. anno 675. c. 2. Ita loquitur: *Audivimus quosdam schismaticam ambitione deceptos, contra Divinos ordines, & Apostolicas institutiones lac pro vino in Divinis sacrificiis dedicare: alios quoque intinctam Eucharistiam Populis pro complemento communionis porrigere: quosdam etiam non expressum vinum in Sacramento Domini calicis offerre, sed oblati uvis populos communicare. Quod quam sit Evangelica atque Apostolica doctrina contrarium, & consuetudini Ecclesiastica adversum, non difficile ab ipso fonte veritatis probabitur, à quo ordinata ipsa Sacramentorum mysteria processerunt. Illud verò quod pro complemento communionis intinctam tradunt Eucharistiam Populis, nec hoc prolatum ex Evangelio testimonium recipit, ubi Apostolis corpus suum & sanguinem commendavit: seorsum enim panis, & seorsum calicis commendatio memoratur. Nam intinctum panem aliis Christum praeuisse non legimus, excepto illo tantum discipulo, quem intincta buccella Magistri proditorem ostenderet, non quæ Sacramenti hujus institutionem signaret. Nam quod de inexpresso botro, idest de uvæ granis Populus communicatur, valde est omnino confusum. Calix enim Dominicus juxta quod quidam Doctor edisserit (Cyprianus) vino & aqua permixtus debet offerri. His & aliis Concilium hoc abusus, qui irreperant, damnat. Quos proscriptos legimus etiam Cap. Cum omnes distinc. 2. de Consecrat. sub nomine Julii Papæ ad Episcopos Ægypti, ubi damnantur illi etiam, qui pannum lineum intinctum musto per totum annum reservabant, & tempore sacrificii partem aqua lavabant, & sic offerebant.*

VII. Hucusque dicta manifestant, quot modis Eucharistiæ consecrationem corrumpere in aliquibus Satanas tentarit. Soli

tamen Artotyritæ panem & caseum offerendi errorem sibi refer-
varunt. Scio modernos A catholicos præfatis Eucharistiæ profa-
natoribus nos conjungere, quòd in ea aquam vino miscamus: sed
ipsi potius tanquam Eucharistiæ detractores damnandi sunt: cum
ut supra ostendi cap. 22. de Tatiano & Enekratitibus §. 4. num. 13. &
sequentibus, antiquæ & continuatæ Ecclesiæ traditioni & praxi
ipsi audeant contradicere. Videantur ibi dicta.

§. IV.

*Tascodrugitæ, Passalorinchitæ, Ascodrugitæ,
& Ascodrytæ.*

I. **A**D Cataphryges refert Epiphanius Hæres. 48. n. 14. Tascodrugitas, qui sic dicti sunt, quòd inter orandum indicem digitum manus naso imponerent, ut affectate sanctitatis speciem in orando præferrent. Ita Epiphanius his verbis: *Tascodrugitæ idcirco cognominati sunt, quòd Tascos illorum lingua paxillum significat: Drugitos verò nasum sive rostrum. Quòd igitur inter orandum indicem manus digitum naso imponunt, ut animi tristitiam, & affectatam quamdam sanctitatem præferant, à nonnullis ideo Tascodrugitæ nominantur, quasi Paxillo-nasones dixeris.* Hos autem ideo Cataphrygibus jungit, quia, præter peculiarem allatum orandi modum, cum Cataphrygibus in cæteris conveniebant. Unde etiam Damascenus Hæres. 48. eos vocans Ascodrugetas Montanistis ad-
jungens: *Cataphryges*, inquit, *qui & Montanistæ & Ascodrugetæ.*

Hos eòdem eò crediderim, quos Philaster Hæresii 76. Passalorinchitas appellat, de quibus ait: *Alii sunt Passalorinchitæ, qui digitum imponunt in nares & in ora sua, & in labia, quasi silentium semper exercent, non rei aliæ nisi taciturnitati, quasi studium commodantes. Hoc autem facientes quasi Prophetas cupiunt imitari, quia ait David Propbeta „Pone Domine custodiam ori meo, & osium circumstantiæ labiis meis „. Et quia jejuniis beati prophetæ vacantes silentium sapius commodabant, inde usurpantes isti assimant observandum, Pythagoricam vanitatem potius quàm Prophetarum cælestem vitam & sapientiam sequi properantes.* Notissima sunt quæ de Quinquennali Pythagoricæ silentio Scholæ teruntur, de quo viri docti ad Gellium L. 1. c. 9. & ad Laertium 8. 10. & Hollstenius ad Porphyrium p. 80. Celebre etiam est, quod Harpocrates silentii Deus digito labellum compescens ab Ethnicis exprimebatur. Hos ergo hi Hæretici, sive Tascodrugitæ sive Passalorinchitæ vocentur, imitabantur.

II. Ascodrogitæ tamen, de quibus idem Philaster Hæres. 75., à Tascodrugitis, ut supra Epiphanius appellavit, diversi sunt, sicut diversa est eorum insania. De eis enim sic ait: *Alii sunt Ascodrogitæ in Galatia, qui utrem inflatum ponunt, & cooperiunt in sua Ecclesia, & circumeunt eum insanientes potibus, & bacchantes, sicut pagani Libero patri, insanis mentibus more Gentilium fuerentes, & non intelligentes quod ait Salvator (Matth. 9. v. 17.) utres novos sumendos, inque eos novum vinum mittendum, non in veteres. Et cum suis cecitatibus properant inservire, alieni modis omnibus Christianæ salutis reperiuntur, cum Apostolus (2. Cor. 5. v. 17.) deſiciat iustificationem illam Judaicam carnalemque varietatem, Christi autem veram & plenam confirmet scientiam dicens „ Vetera transierunt, & ecce nova omnia „ per Christum facta sunt. De lege enim & umbra dicebat Dominus & de suæ gratiæ plenitudine i duorumque hominum, quod ait Apostolus (1. Cor. 15. v. 47.) „ Pri- „ mus homo de terra terrenus, secundus homo de cælo cælestis, „ Quod enim erat per umbram, & quod erat futurum in Domini præ- „ sentia majus & melius, & hoc nuntiabat docendo ac rebus testantibus confirmando. His Philaster reſert, & simul refellit horum Ascodrogitarum errorem. Hos emerſiſſe tempore Commodi Imperatoris & Soteri Papæ circa annum 181., putat Præcolus.*

Ascodrogitæ isti iidem fortè sunt ac Ascitæ, de quibus S. Augustinus Hæres. 62. *Ascitæ*, inquit, *utre* appellati sunt, ascos enim græcè latine uter dicitur: quem perhibentur inflatum & opertam circumire bacchantes, tanquam ipsi sint Evangelici utres novi novo vino repleti. In hoc solum errasse dicit Auctor Prædestinati: *Isti cum in dogmate nihil mali habeant, utrem tamen ingentem juxta altare ponunt, eumque vacuum inflant & liuteaminibus velant & adorant, quia consecrum cruoris Domini adjiciunt, illud dicentes Evangelicum, vinum novum in utres novos adjiciunt, & utraque conservantur.* Sed de hoc redibit sermo intra cap. 58. §. 4. cum de Ascitis agam.

III. Ab Epiphanii Tascodrugitis, & Philastrii Passalorinchitis & Ascodrogitis, seu Ascitis, de quibus egi, planè diversi sunt ii, quos Theodoritus Ascodytos, vel Ascodrupetas appellat Lib. 1. Heret. Fab. c. 10. Tum quia istos Marcitis adjungit, non Cataphrygibus. Tum quòd longè diversum errorem eis attingit his verbis: *Dicunt autem, non oportere Divina mysteria, quæ sunt invisibilium signa, per res quæ videntur peragi, nec incorporea per sensibilia & corporea. Esse autem perfectam redemptionem veram ejus quod est cognitionem.* Indè prosequitur, eos Baptismum rejecisse, aliaque inopia dogmata cum Archonticis protelsis fuisse. Aliqui ex recentiori-

tioribus addunt, eos omnia vasa sacra Sacramentis destinata fregisse, & furiosè in frustra comminuisse. Hæc pro studiosi notitia sufficiant, ut indè uberiùs semper colligat, in quot deliria prolabantur, qui à Veritate Religionis resiliunt.

CAPUT XXV.

De Tessarescedecatitidis seu Quartodecimanis.

§. I.

Origo & progressus controversiæ.

I. **T**ESSARESCEDECATITÆ nomen græcum est à *Tessares bedeca* quod quatuor & decem, seu quatuordecim significat: ideo *Tessarescedecatita* apud Latinos idem sunt ac *Quartodecimani*, sic propterea appellati, quia quartodecimâ Lunâ mensis Martii, die quâcumque incideret, Pascha celebrandum esse etiam à Christianis volebant. Ita S. Augustinus L. de Hæres. cap. 29. *Tessarescedecatita hinc appellati sunt, quod nonnisi quartodecimâ Lunâ mense Martio Pascha celebrant, quilibet septem dierum occurrat dies, & si dies Dominicus occurrerit, ipso die jejunant & vigilant.* Idem cum S. Augustino sentit Damascenus Hæres. 50. *Tessarescedecatita, inquit, seu Quartodecimani, qui statò anni die Pascha celebrant, ut quancumque in diem decimaquarta Lune incurrerit, sive Sabbatum sive Dominica fuerit, eâ die jejunent, & festivas celebrent vigilias.*

II. De hoc Philaster duplici loco agit, semel quidem Hæres. 58. dicens: *Sunt qui de die Paschæ saluberrimâ ambigunt, asserentes, quartodecimâ Lunâ celebrandum esse Pascha, non sicut Ecclesia Catholica celebrat & mense Martio semper celebrandum asserunt: & cum hoc faciunt, diem non Dominicam semper custodiunt Paschæ non computantes horas & dies, sed secundâ aut tertiâ aut quartâ aut quintâ, aut sextâ die celebrant: & ex hoc errore non cognoscunt diem Paschæ Domini nostri veram & salubrem unam Orbi terrarum statutam, & confirmatam à Domino cursu numerali Lune mensibus & embolismis, & cum hæc non computant, ignorant, quid celebrant.* Iterum de hoc agens Hæres. 87. *Alia, inquit, est hæresis, quæ asserit cum Judæis debere fieri Pascha. Isti in Galatia & Syria & Phrygia commorantur & Ierosolymis, & cum Judæos sequantur, simili cum eis errore deperunt. Isque hoc & suum Judæi confirmant mendacium, cum pervident, quosdam Christianos indoctos legis*
eorum

eorum magis sequi vanitatem, quam regulam Catholicæ veritatis, & nihilominus illi cum istis concelebrant, ut consortes Judæorum criminis & sceleris manifestantur, atque ab omnibus dignoscuntur. Quibus Philaster videtur velle, priores errores se quidem in ritu ex ignorantia, sed non in dogmate, posteriores verò errasse etiam in dogmate, volentes in hoc servandam esse Judaicam potius vanitatem, quam Catholicam veritatem.

III. De his posterioribus locutum fuisse crediderim S. Epiphanius Hæres. 50. dum ait: *Ex his duabus inter se commixtis Phrygum & Quintillianorum sive Priscillianorum Sectis nova quædam constata est. & in Orbem introducta Quartodecimanorum hæresis. Qui ceteris in rebus cum Ecclesia consentientes, hoc ipso ab omnibus aberrant, quod non illius institutis & doctrinaque consentanea quadam amplexi sunt. Nam & Judaicis insuper fabulis inhaerent: neque tamen paria cum illis eademque sentiunt, Quæ enim dicunt, non norunt, nec de quibus affirmant (1. Timoth. 1. v. 7.) Quippe semel quotannis unum Paschatis diem præfæctè celebrant. Quamquam de Patre, Filio, ac Spiritu Sancto sinceram cum Catholicis opinionem retinent: sed & Prophetas & Apostolos & Evangelistas approbant. Resurrectionem carnis perinde ut illi futuram non dubitant; quemadmodum neque iudicium, vitæque sempiternam. Sed inter hæc tamen non mediocri calamitate conflantur, eò quod id quod Lege scriptum est perperam accipiunt, Maledictus, qui non fecit Pascha quartadecimâ die mensis, &c.* Hæc Epiphanius. Qui cum loquatur de Quartodecimanis ortis ex Phrygibus, Quintillianisque, & qui eâ die celebrandum esse Pascha contendebant, quia sic in Lege præceptum est; propterea par est credere, cum fuisse locutum de illis quos Philaster secundo loco recenset, qui inter hæreticos verè computandi sunt.

IV. Quare in hac controversia duplicem statum arbitror esse distinguendum. Primum, quem initio habuit: Alterum, in quem progressu temporis transivit. Si priorem ejus statum spectemus, videbatur esse controversia de solo ritu & disciplina. Nam sub Aniceto primum exorta, sub Pio, Hygino, Thelesphoro, atque Sixto in Romana Sede successoribus tolerata fuit consuetudo Asianorum Pascha Lunâ quartâ decima in quæcumque incidisset diem celebrantium, quamvis Romana Ecclesia oppositam consuetudinem retineret. Tolerata autem non fuisset, si existimata tunc fuisset ad fidem & dogma pertinens. Hæc tolerantia motus S. Irenæus Victorem Papam oppositum sentientem, & propterea ab Ecclesiis Pascha Lunâ quartadecimâ Judaico more celebrantibus se segregare meditantem, dehortari conatus est his verbis apud

apud Eusebium Lib. 5. Hist. cap. 24. *Sed & Presbyteri illi qui ante Soterem Ecclesiam, cui tu nunc præs, gubernarunt, Anicetum dico & Pium & Hyginum cum Telesphoro & Xisto, neque ipsi unquam observarunt, neque his qui, cum ipsa erant, ut id observarent permiserunt. Ipsi tamen cum hoc minime observarent, pacem nihilominus colebant cum iis, qui ad se venissent ex Ecclesiis in quibus id observabatur.*

Ac deinde subjungit: *Et cum beatissimus Polycarpus Aniceti temporibus Romam venisset, atque inter illos de quibusdam aliis rebus modica esset controversia, statim mutuo pacis osculo se complexi sunt, de hoc capite non magnoperè contententes. Neque enim Anicetus Polycarpo persuadere unquam poterat, ut observare desineret, quippe qui cum Joanne Domini nostri discipulo & cum reliquis Apostolis, quibuscum familiariter vixerat, eum morem perpetuo observasset. Neque item Polycarpus Aniceto persuadere conatus est ut observaret, cum Anicetus eorum qui ante se fuerant Presbyterorum morem sibi retinendum esse diceret. En ex dictis; quomodo ex utraque parte solum majorum consuetudo & observantia opponebatur, nihil de Divina Lege tangendo. Quare tunc censebatur causa meram disciplinam & ritum concernens, non fidem, ideoque hoc non obstante ex utraque parte pax servabatur.*

V. Verùm cum procedente tempore quidam evulgare cœpissent, Pascha Lunâ quartadecimâ celebrandum esse etiam ex præcepto Divino, & in hoc observandam esse Legem Mosâicam etiam à Christianis, controversia hæc meræ disciplinæ & ritus esse desiit, & ad fidei dogma cœpit pertinere. Et hoc puto movisse Victorem Papam, ut à tolerantia suorum Prædecessorum recedens, adversus oppositam sententiam propugnantes, excommunicationem, vel condemnationem, vel sacro (de quo hic agere non est) intenterit. Moveor ex eo, quod Polycrates Ephesiorum Episcopus in litteris quas suo & totius Asiæ nomine ad Victorem & Romæ Ecclesiam dedit (apud Euseb. L. 5. cap. 24.) postquam suam in celebrando Paschate decimaquartâ Lunâ præxim auctoritate & observantiâ majorum fusè munivit dicens: *Hi omnes diem Paschæ quartadecimâ Lunâ juxta Evangelium observarunt: nihil omnino variantes, sed regulam fidei constanter sequentes*, addit hoc se facere quia Deus ita faciendum præcepit his verbis: *Ego, inquam, fratres, quinque & sexaginta annos natus in Domino, qui cum fratribus toto Orbe dispersis, sermones sæpè contuli, qui Scripturam Sacram unam perlegi, nihil moveor illis quæ nobis ad formidinem intentantur: etenim ab illis qui me longè majores erant dictum scio, Obedire oportet Deo magis quàm hominibus,.* Post hæc alia subiungit,

git; quibus asserit, hanc esse sententiam omnium quos convocaverat Episcoporum.

VI. Ex his apparet, tempore Victoris Papæ sententiam de Paschate Lunâ quartadecimâ celebrando habitam fuisse ab ejus propugnatoribus non jam ad merum Ritum, & Disciplinam spectantem, sed ut Dogma Evangelicum à Deo Christianis etiam præceptum, ita ut in hoc Lex Mosaica ab eis esset omnino æquæ ac à Judæis servanda. Hoc permotus Victor talem observantiam amplius non esse tolerandam velut veritati fidei contrariam existimans, toto conatu eam proscribere tanquam hæresim aggressus fuit. Neque enim sola ea hæresis est, quæ Deo loquenti non credit, sed ea etiam quæ pertinaciter credit Deum esse locutum, quando re verâ non est locutus. Sic Apostoli Circumcisionem & alias observantias Legis aliquandiu tolerarunt quidem; sed cùm viderent aliquos eas ut adhuc ad salutem necessarias observandas velle, ac dicere Act. 15. v. 1. *Nisi circumcidamini secundum morem Moysi, non potestis salvari*; coacto Jerosolymis Concilio earum observantiam decreto factio interdixerunt. Quod exemplum imitata Ecclesia Communionem sub utraque specie per multa secula etiam laicis permisit; sed cùm Bohemi duce Joanne Hufs pertinaciter asserere cœpissent, eam esse omnibus de Christi mandato ad Sacramenti veritatem necessariam, laicis illam prohibuit ac solis Sacerdotibus actu sacrificantibus reliquit.

VII. Porro quis primus hunc errorem induxit, Pascha nimirum Lunâ quartadecimâ more Judaico de præcepto Domini à Christianis celebrandum esse, certò statuere non aulin. Auctor Appendicis ad L. de Præscript. cap. 53. hoc tribuit Blasto, qui ut scribit Eusebius L. 5. Hist. c. 15. unâ cum Florino schisma in Ecclesiam fecit. Hi enim, ait Nicephorus L. 4. Hist. c. 3., Romæ à petitione presbyterii excedentes, Marcionis hæresi involuti, Ecclesiasticas sanctiones depravare conati sunt. De hoc Blasto Auctor præcitatus scribit: *Est præterea bis omnibus etiam Blastus accedens, qui latenter Judaïsmum vult introducere. Pascha enim dicit non aliter custodiendum esse, nisi secundum Legem Moysi quartadecimâ Mensis. Quis autem nesciat, quomodo Evangelica gratia evacuetur, si ad Legem Christum redigit? Quibus videtur Blastus observantiam Paschalem juxta ritum Judaicum, non aliter, custodiendam esse: ideoque errorem etiam in fide apud aliquos saltem insinuasit.*

Illum tamen apertè post Blastum propalarunt illi, quos ex Montanistis, Quintillianis, aut Artotyritis hunc errorem amplexos fuisse supra ex Epiphanio & Philastrio observavi: hi enim hoc

velut juris Divini dogma (& non tantum ex Majorum exemplo) evulgare cœperunt (fortè ex nova prophetia aut revelatione; quod ipsis familiare erat) & ut ex Epiphanio dixi, maledictum à Deo pronuntiantes in eos, qui Pascha non secundum Legem Moyſi Lunâ decimâ quartâ celebrarent, turbas excitarunt, quæ Victoris Papæ zelum moverunt. Colligitur hoc ex Paciano Epist. 1. ad Simpronianum de Catholico nomine post initium dicente: *Nam puto, & Gracus Blastus ipsorum est: Theodotus quoque & Praxeas vestros aliquando docuere: ipsi illi Phryges nobiliores, qui se animatos mentiantur à Leucio, se institutos à Proculo gloriantur: Montanum & Maximillam & Priscillam secuti, quàm multiplices controversias excitarunt, de Paschali die, de Paraclete, de Apostolis & Prophetis. Quamvis autem quidam ex Montani sobole in errorem de Paschate inciderint, Montanum tamen ipsum & puriores ejus discipulos eo non laborasse crederem: tum quia inter Montani errores hic non recensetur: tum quia Tertullianus jam Montani aſſecta factus L. de Jejunio c. 14. Pascha se cum Catholicis, quos Psychicos appellat, celebrare testatur: Cur Pascha celebramus annuo circulo mense primo?*

VIII. Hæc sunt quæ Victoris zelum excitarunt, ut pacem cum Asianis amplius habere nollet. Quod licet Irenæo displicuerit, hoc fuit quia ipse & ceteri Episcopi nesciebant, causam non esse amplius in eo statu, in quo erat tempore Polycarpi & Aniceti, sed fuisse in dogma versam, ut ex litteris Polycarpi ad Victorem supra ostendi. Cæterum cum Episcopi qui erant in Palæstina, utpotè proximiores, statum præsentem causæ apertius nosſent, consilii eorum quæ per Asiæ Ecclesias in hac causa evulgabantur, coactâ Synodo Victoris sententiam omnibus Ecclesiis promulgarunt. Ita Eusebius L. 5. Hist. c. 25. *Episcopi verò Palæstina, quos paulò supra memoravimus, Narcisus scilicet (Jerusalemorum) & Theophilus (Cæsareæ) & cum illis Cassius Tyri & Clarus Ptolemaidis Episcopi, & qui simul cum ipsis convenerant, postquam de traditione diei Paschatis, quæ jam inde ab Apostolis ad ipsos continuâ successione manaverat, multa in suis litteris disseruerunt, tandem ad finem epistolæ his utantur verbis. Date operam, ut epistolæ nostræ exemplaria per omnes Ecclesias mittantur, ne nobis crimen impuent, qui animas suas à recto veritatis tramite facile abducunt: Illud etiam vobis significamus, eodem quo apud nos die Pascha Alexandria celebrari. A nobis enim ad illos, & vicissim ab illis ad nos litteræ perferuntur: ita ut uno consensu & simul sacrosanctum peragamus diem. De quo etiam Nicephorus L. 4. cap. 36.*

Asiani autem in sua opposita sententia persistebant, eis patro-

cian-

cinante Ephesiorum Episcopo Polycrate, de quo supra, in eaque perseverarunt usque ad tempora Magni Constantini, cujus pietate ac zelo promovente, tandem in Concilio Nicæno I. Ecclesiæ omnes in celebrando Paschatis die ad unitatem redactæ sunt. De quo in sequentibus.

§. II.

Catholica de die Paschatis decisio.

I. **Q**uamvis Ecclesia in hujusmodi dissidio laborarit, exponit Eusebius Lib. 3. de Vita Constantini cap. 5., ubi hanc unam fuisse ex causis, quæ ad Concilium Nicænum convocandum moverunt, dicit his verbis: *Alius quoque his antiquior suberat morbus longè gravissimus, qui Ecclesias jampridem infestabat, dissensio scilicet de salutari Festo. Quippe alii consuetudinem Judæorum sequi oportere asseriebant: alii tempus ipsum accuratè observandum esse ajebant, nec errantibus assentiendum, qui ab Evangelica gratia hac etiam in parte alieni essent. Itaque cum omnes ubique Populi jamdudum inter se dissiderent, & sacri Religionis nostra ritus conturbarentur (quippe in uno eodemque Festo temporis diversitas maximum dissidium inter seriantes excitabat, cum hi jejuniis & arumis seipsos attererent, illi otio ac lætitiæ indulgerent) mortalium quidem nemo erat, qui huic malo remedium posset adhibere, cum utrimque inter dissidentes velut aquatà lance controversia penderet. Soli Omnipotenti Deo perspicue erat istis malis mederi. Unus porro in terris exstabat Constantinus, qui ad hac bona perficienda idoneus Dei minister esse videretur.*

II. Constantinus igitur, assumpto hoc ministerio, operam impensè dedit, ut etiam super hac controversia in Concilio Nicæno I. judicium ferretur, & finale decretum prodiret. Quod factum est; in eo enim sententia Victoris, & aliorum Romanorum Pontificum, ac totius ferè Occidentis approbata fuit, & sancitum, ut Dominicâ proximè sequente Lunam decimamquartam post æquinoctium vernali illucescentem, festum Paschatis ab universis Ecclesiis celebraretur. Œcumenicum hoc decretum Magnus Constantinus Epistola sua Ecclesiis notum fecit his verbis: *Cum de sanctissimo etiam Pasche die quaestum fuisset, communi omnium sententiâ decretum est, eam festivitatem uno eodemque die ab omnibus ubique celebrari oportere. Quid enim pulchrius, quid honestius nobis esse possit, quam ut hac festivitas, à qua spem immortalitatis accipimus, uno eodemque ordine & certâ ratione ab omnibus inoffensè obser-*

vetur? Deinde subjicit rationes, quibus moti fuere Patres Concilii ad contrarium Judæorum praxi statuendum.

Harum prima est: Quia indignum planè videbatur, ut sacratissimum istud Festum, Judæorum ritum & consuetudinem imitati, ageremus: qui quidem quoniam suas manus detestabili scelere polluerunt, cæco animarum errore irretiti meritò tenentur. In nostra enim situm est potestate, ut illorum more rejecto, veriore ac magis sincero instituto (quod quidem usque à prima Pasionis die hæcenus recolimus) hujus festi celebrationem ad posterorum memoriam propagemus.

Secunda ratio est: Quia si Pascha Lunâ decimâquartâ celebretur more Judæorum, periculum est, ne uno eodemque anno duplex Pascha, altero verò nullum celebretur. Nam qui Lunâ decimâquartâ Pascha celebrabant de æquinoctio nihil curantes, quandoque illud peragebant uno anno post æquinoctium, & altero anno ante æquinoctium, quia in illud tempus Luna decimâquarta incurrebat.

Tertia ratio est: Quia maximum absurdum est, ut in tanto & tam solemnî Religionis nostræ festo regnet inter ejusdem professionis dissensio; maximèque indecorum est, ut iisdem diebus alii jejurent, alii agitent convivia; & post dies Paschatis alii in festis & animorum remissione gaudeant, alii in macerationibus moriantur. Cum enim Christus Catholicam Ecclesiam unum corpus esse voluerit, voluit ut ejus membra tametsi in multa & dispersa loca dispersa sint, uno tamen spiritu invicem conveniant.

Quarta Constantini ratio est omnium Ecclesiarum in hoc decretum conspirantium sententia. Sibi enim persuasum est, ut quod in Urbe Roma, in Italia, in tota Africa, in Ægypto, Hispania, Gallia & Britannia, in Lybia & universa Græcia, in diocesi Asiatica & Pontica, in Cilicia denique unâ & consentiente sententiâ conservatur, omnes lubenti animo acceptent; & quod in locis, ubi major Ecclesiarum numerus est, colitur, quodque sanctissimum institutum est, consilio omnes amplectantur, ut, quod recta ratio postulare videtur, Ecclesia Christi cum Judæorum perjurio nihil habeat commune.

III. Hæc pro sua pietate & pacis zelo Constantinus, concludens: *Quæ cum ita sint, Cælestem gratiam & planè Divinum mandatum libenter suscipite. Quidquid enim in sanctis Episcoporum Conciliis geritur, id omne ad Divinam referendum est voluntatem. Quamobrem ubi ea quæ gesta sunt dilectis fratribus nostris intimaveritis, supradictam rationem & sanctissimi dei observantiam suscipere & constituere debetis, ut cum in dilectionis vestrae conspectum jampridem*

dem à me desideratum venero, uno eodemque vobiscum die sanctam festivitatem peragere possim, utque de omnibus unà vobiscum gaudeam, cernens Diaboli crudelitatem Divinā potentiā nobis operam navantibus esse sublatam, florente ubique terrarum vestrà fide & pace atque concordia. Deus vos servet, fratres carissimi. Hujus Epistolæ exemplum legere est apud Eusebium L. 3. de Vita Constantini à capite 17. usque ad 20. Et apud Nicephorum Lib. 8. Hist. Eccles. cap. 25. & Theodorum L. 1. Hist. c. 10. s. apud quem ibidem c. 9. adest quoque Nicænorum Patrum Epistola Synodica, in qua de die Paschatis hæc scribunt: *Nuntiamus præterea vobis de concordia sanctissimi Paschæ: hoc etiam negotium precibus vestris adjuvantibus, feliciter confectum fuisse, cunctosque qui in Oriente sunt fratres, qui antea cum Romanis & vobiscum, & cum omnibus jam inde ab ultima antiquitate Pascha observantibus minime consentiebant, deinceps vobiscum esse celebraturos.* Hæc Nicæna Synodus Alexandrinæ & cæteris per Ægyptum Lybiam, & Pentapolim Ecclesiis.

IV. Ita Ecclesiæ auctoritate & Imperatoris Constantini brachio dissensio de die Paschatis, quæ per aliquot secula Ecclesiam sciderat, penitus sublata est, & generalis consonantia introducta. Quod fatentur S. Athanasius in Epist. de Synodis Arimini & Seleuciæ, S. Epiphanius Hæres. 70. quæ est Audianorum: & S. Ambrosius Epist. 83. ad Episcopos Æmiliæ eos de celebritate Paschali instruens: *Non mediocris, inquit, esse sapientiæ, diem celebritatis definire Paschalis, & Scriptura Divina nos instruit & traditio majorum: Qui convenientes ad Synodum Nicænam inter illa fidei ut vera ita & admiranda decreta, etiam super celebritate memoratâ, congregatis peritissimis calculandi, decem & novem annorum collegere rationem, & quasi quemdam constituere circulum, ex quo exemplum in annos reliquos gigneretur. Hunc circulum Enneadecaterida (idest decemnovennium seu Cyclum decem & novem annorum) nuncuparunt.*

V. A Nicæni Concilii temporibus summam vigilantiam Ecclesia adhibuit, ne in celebrando Paschate aliquis error obreperet, vel aliqua dissensio inter Christianos suboriretur. Unde quotiescumque de Cyclo Paschali orta fuit dubitatio, exacta illum conficiendi cura Pontifici Romano reservata est, sicut & quæcumque alia de legitima diei Paschatis celebratione controversia. Quem morem etiam ante Concilium Nicænum viguisse constat ex Concilio Arelatensi L. anno 314. sic enim Canone 1. ad Sanctum Silvestrum Romanum Pontificem cum cæteris directo habet: *Primo loco de observatione Paschæ Dominici: ut uno die & uno tempore per omnem Orbem à nobis observetur, & juxta consuetudinem, Literas ad omnes tu dirigas.*

VI. Post

VI. Post Nicænum autem Concilium idem apparet ex facto S. Leonis I., qui anno Christi 444. cum aliquam de sollemnitate Paschalis legitima die controversiam exortam videret, in eam dirimendam sedulo incubuit. Is autem erat difficultatis cardo. Legebat S. Pontifex in Theophili Alexandrini Paschali Cyclo, anno Christi 444. Pascha reiectum ad diem 23. Aprilis. In Occidente vulgò creditum est, vitium esse in Cyclo, nec Paschalem diem eò usque differendum. Super hoc S. Leo Cyrillum Alexandrinum consuluit, necnon Paschasinum Lilybei Episcopum. Uterque Cyclo Theophili confirmavit. Et Paschasinus in Epistola (quæ est inter Opera S. Leonis pag. 239. novæ edit.) id approbat, tum ex computo Hebræorum, tum ex miraculo, quod sub Zozimi Pontificatu accidit, quod in præfata Epistola narrat.

Simile dubium eidem S. Leoni occurrit anno 455., quo anno cum in Cyclo Paschali Theophili dies Paschatis notaretur 8. Kalendas Maji, dubitarunt S. Leo aliique Occidentales, an errarit Theophilus. Qua de re consulere peritos voluit S. Leo, & ad Marcianum Imperatorem Epistolam scripsit, quæ est 64. vel 94. in nova editione. Cumque non multò post à Marciano responsum accepisset, rectè assignatum esse Paschalem diem ad 8. Kal. Maji, acquievit S. Pontifex, & contra suam priorem sententiam dictâ die Pascha eo anno celebrandum indixit Epist. 108. ad eundem Marcianum: *Non quia hoc ratio manifesta docuerit, sed quia unitatis, quam maximè custodimus, cura persuaserit*; de hoc enim à Proterio Episcopo Alexandrino literas quoque acceperat.

VII. Hujus sollicitudinis de festo Paschali legitimâ die celebrando, quæ in Romanis Pontificibus semper viguit, recens exemplum præbuit Gregorius XIII. anno 1582. Is intelligens, ad rectam Paschalis festi celebrationem juxta Sanctorum Patrum ac veterum Romanorum Pontificum præsertim Pii & Victoris, necnon magni Concilii Nicæni, & aliorum sanctiones, tria necessaria conjungenda esse & statuenda: primum certam verni æquinoctii sedem: deinde rectam positionem Lunæ decimæ quartæ primi mensis, quæ vel in ipsum æquinoctii diem incidit, vel ei proximè succedit: tertio primum diem Dominicum, qui Lunam quartam decimam sequitur; adhibitis viris ex omnibus Christiani Orbis regionibus fideralis scientiæ peritissimis, curavit, non solum æquinoctium vernum in pristinam sedem, à qua jam à Concilio Nicæno decem circiter diebus recesserat, restituendum, & decimam quartam Paschalem suo loco, à quo quatuor & amplius dies distabat reponendam; sed eam quoque tradendam rationem quâ caveretur, ut imposterum æquinoctium, & quartadecima Luna propriis sedibus nunquam dimoverentur. Quare

Quare ut vernal æquinoctium, quod à Patribus Nicænis ad 12. Kal. Aprilis fuerat constitutum, pristinam in sedem restitueretur, præcepit, ut de mense Octobris subsequenti anni 1582. decem dies eximerentur inclusivè à tertio Nonas usque ad pridie Idus. Deinde ne deinceps à 12. Kalendas Aprilis æquinoctium recedat, statuit bissextum quolibet quarto anno, ut moris erat, continuari debere, præterquam in centesimis annis, qui quamvis Bissexiles antea fuissent, qualem etiam voluit esse annum millesimum sexcentesium, qui tamen deinceps consequerentur centesimi, Bissexiles non essent omnes, sed solum quartus: itaut in quatuor centesimis Bissexilis esset solus quartus. Tertiò, ut Luna decimaquarta Paschalis rectè inveniretur, loco Aurei Numeri Cyclum Epactarum substituit. Tandem loco Cycli 28. annorum subrogavit Cyclum 26. annorum. Hæc omnia, aliaque constant ex ejusdem Gregorii XIII. Diplomate, quod incipit *Inter gravissimas* dato Tusculi sexto Kal. Maji anno 1582., quod inter ipsius Constitutiones extat ordine 74. Sed hæc ad abundantiam dicta sint, ut appareat magis Romanorum Pontificum vigilantia, ne in tempore Paschatis aliquis error obrepat.

§. III.

Pro Quartodecimanis aliqua.

I. **D**icere poterant Quartodecimani primò, se celebrando Pascha Lunâ quartadecimâ primi Mensis sequi exemplum Christi, qui eadem die, quâ Judæi ultimum Pascha & consequenter Lunâ decimaquartâ cum Apostolis celebravit, ac proinde se reprehendendos non esse.

Respondeo, quòd si exemplum Christi ad hoc trahendum est, fiet, ut sicut Christus secundum Legem circumcidi voluit, & Pascha celebravit agnum comedendo, ac cætera quæ Lex præcipiebat, observavit, hæc eadem Christiani facere possent. Christus ergo hæc omnia tecit, quia, ut ipse protestatus fuit, venerat, non Legem solvere, sed adimplere: quia ea quæ in Lege figuratè fiebant, in ipso erant consummanda. At modò Lege jam consummatâ, & abrogatâ, sicut non in cæteris ita nec in Paschate celebrando Judaicos ritus sequi debemus. Sed sicut Judæi Lunâ quartadecimâ Pascha suam celebrabant, quia eâ die à servitute Ægyptiaca liberati fuerunt: ita Christiani suum Pascha celebrare, debeat Dominicâ die Lunam quartam decimam sequente, quia eâ die resurgente Christo genus humanum à servitute Dæmonis creptus

ptus fuit. Unde Paulus 1. Cor. 5. v. 7. *Pascha nostram*, inquit, *immolatus est Christus: itaque epulemur non in fermento veteri, neque in fermento malitia & nequitia, sed in azymis sinceritatis & veritatis.*

II. Hinc Quartodecimani tueri se non poterant imprecationibus à Moyse factis Deuteron. 27. ūs, qui in hoc verba Legis non custodirent. Nam, ut superius dicebam, & confirmat Epiphanius Hæres. 50. num. 2. *Moses quidem Legislator, cum universam Legem edixisset, mandato divinitus recepto, ut in postremo Deuteronomii Libro scriptum est, imprecationes omnes proposuit, non modò quæ ad Paschatis celebrationem, sed etiam quæ ad Circumcisionem, ac Decimas & Oblationes spectabant. Quare dum unum imprecationis genus devitant, in alias complures semetipsos inducunt. Execrabiles quippe eos oportet esse, qui neque circumcidantur amplius, neque decimas pensitent, neque Ierosolyma quicquam offerendi gratiâ submittant. Si ergo se non execrabiles reputant, quòd ista amplius non servant, cur execrabiles se iudicabunt si Pascha secundum diem à Lege præscriptum non observent?*

III. Dicere tamen poterunt secundo, se Circumcisionem & alia omittere, quia ea legunt in Scriptura Novi Testamenti præsertim in Pauli Epistolis expressè abolita. At quod Pascha celebrandum non sit, ut olim, Lunâ quartadecimâ quâcumque die evenierit, nemo Sacer Scriptor dixit, nec ex Scriptura colligi potest. Imò nec ex Traditione Apostolica. Primò, quia id quod ex Traditione Apostolicâ manavit, idem fuit in omnibus Ecclesiis: Tempus autem celebrandi Paschatis non fuit idem observatum in omnibus Ecclesiis, ut patet.

Secundò. Asiatici morem suum ex Traditione à S. Joanne Apostolo acceptâ derivabant, & hanc Polycrates Ephesiorum Episcopus Victori Papæ opponit apud Eusebium Lib. 5. Hist. c. 24. Ergo vel Apostolorum Traditiones secum ipse pugnabant: vel Romanæ Ecclesiæ consuetudo opposita ex Traditione Apostolica non manavit.

IV. Respondeo, nullam quidem ab Apostolis Legem fuisse scriptam de Paschatis celebrandi tempore: ex iis tamen, quæ de aliis Judaicis ritibus scriptum reliquerunt, colligitur, nec esse in Paschate celebrando Judaicum morem retinendum, cum ob aliam significationem Pascha suum celebrarent Judæi, ob aliam celebrent Christiani.

V. Ad primùm ergo dico, ritum celebrandi Paschatis ex Traditione apud aliquas Ecclesias mansisse; nec propterea sequi quòd eam in omnibus Ecclesiis servata semper fuerit. Nam estò Traditio

tio Apostolica, si ad Fidem spectet, ab omnibus Ecclesiis servari debeat, secus tamen si meram Disciplinam concernat. Sic trina immersio in Baptismate ex Traditione Apostolica derivatè credita fuit; non tamen ab omnibus Ecclesiis nec semper observata fuit: imò in quibusdam Ecclesiis unica tantum immersio fuit præcepta, ut de Hispatiensis constat ex Concilio Toletano IV Can. 5., quia trinâ immersione ad suum confirmandum errorem Ariani abutebantur. Quâ ratione, ut dixi, Ecclesia Communionem sub utraque specie laicis vetuit. Sic Paschatis certâ die observandi astrictam Traditionem ut ad meram disciplinam spectantem, causis supra allatis, abolere potuit.

VI. Ad secundum dico, Traditionem quam ex S. Joanne Asiatici jactabant, non fuisse propriè dictam & quasi lege latam ab ipso, sed meram consuetudinem in exemplo ipsius fundatam. Non enim diffiteor, S. Joannem celebrasse Lunâ quartadecimâ, quâ Judæi celebrabant. Cum enim Apostolis curæ esset Evangelium propagare, ea quæ non erant contra fidem & religionis sanctitatem, nedum in aliis tolerabant, sed interdum observabant ipsi, quatenus ad Evangelii promulgationem & concordiam conciliandam proficere videbatur; hâc ratione S. Paulus votum Nazarenus professus fuit. Ideoque S. Polycarpus, Polycrates, & Asiatici eam consuetudinem S. Joannis & sui temporis virorum Apostolicorum exemplo munire poterant. At Romanæ & aliarum Ecclesiarum disciplina observandi Paschatis Dominicâ Lunam quartam decimam proximè sequente ex Traditione Apostolica propriè dictâ, nempe ex institutione & mandato Apostolorum Petri & Pauli, derivatam habebat. Hinc Polycrates in Epistola ad Victorem apud Eusebium L. 5. Hist. c. 23. consuetudinem quidem urget, sed nullius legis ac mandatî meminit, licet eam Evangelio, & regulis fidei consonam prædicet. Ideoque Eusebius ipse 5. Lib. Hist. c. 23. eam vocat *Antiquam quandam Traditionem*; Traditionem autem quam Romana & aliæ Ecclesiæ servabant appellat *Traditionem Apostolicam*. Ex quibus sequitur, Apostolorum Traditiones contrarias non fuisse; quia una in solo Joannis facta fundata Traditio Apostolica dici non poterat, benè tamen altera, quæ factum & legem Apostolicam supponebat.

Hanc veritatem quamplures Ecclesiæ etiam Asiaticæ ante Nicæni celebrationem Concilii agnovere, quæ proinde ab ea consuetudine celebrandi Pascha Lunâ quartadecimâ jam recesserant, & cum Ecclesia Romana & aliis conveniebant: quod Eusebius L. 3. de Vita Constantini c. 19. fatetur, ubi Epistolam Constantini ad Synodum recitans, inter Ecclesias, quæ celebrationem Paschatis

ut in Urbe Roma observabant, recenset Asianas. His tamen non obstantibus Asianorum consuetudo contraria aliquo tempore tolerata fuit. Sed cum ejus propugnatores ut supra dixi eo devenissent, ut eam tueri vellent tanquam Divino præcepto injectam, & in hoc Legem Mosaicam esse retinendam: propterea in Concilio Nicæno tandem proscripta fuit.

VII. Pro Asianis asserri tertio poterant Constitutiones Apostolorum sic decernentes: *Vos temporum rationes ne subducite, sed eo tempore celebrate, quo fratres vestri, qui ex circumcisione prodierunt. Cum iis itaque Pascha peragite*: ergo Asiaticarum Ecclesiarum disciplina celebrantium cum Judæis Pascha Lunâ quartadecimâ potius ex Apostolica Traditione strictè tali prodivit.

Certè si Constitutiones illæ verè essent Apostolorum, & non potius illis falsò suppositæ, validum pro Asiaticis præberent argumentum. Sed cum à viris doctis velut spurix & apocryphæ rejiciantur, nihil prædicii Asianorum opinioni præbere possunt: eo vel maxime, quod si genuinæ essent, fuissent in publica hominum luce tempore Victoris Papæ; ac illas procul dubio in sui tutelam Victori Romano Pontifici objecissent, ut ab avertendo anathema quod intentabat eum deterrent; & suarum Ecclesiarum consuetudinem nedum exemplo S. Joannis, Polycarpi, & aliorum sanctorum virorum, sed hujus etiam legis auctoritate vindicassent.

VIII. Quia dixi, consuetudinem Romanæ Ecclesiæ, & aliarum quæ cum ea Pascha celebrabant, ex Apostolica Traditione mansisse, contrarium videtur asserere Socrates Lib. 5. Hist. Eccl. c. 22., ubi rem hanc fusè tractans, inter plura ait: *Propositum id fuit Apostolis, non ut de diebus festis Leges servarent, sed ut rationem rectè vivendi veramque pietatem ostenderent. Ac mihi quidem videtur, ut alia multa variis in locis usu quodam invaluerunt, sic etiam Paschale festum apud singulos ex inolita quadam consuetudine peculiarem observantiam habuisse, propterea quòd nullus ex Apostolis, uti dixi, de illo festo quidquam lege sancivit. Quòd verò jam inde à priscis temporibus ex usu potius, quàm ex lege observatio ista profuxerit, et ipsæ declarant. Inde procedit ad diversitatem ostendendam, tum in hoc tum in jejuniis & aliis Ritibus.*

IX. Respondeo primò, ex iis quæ dicit Socrates solùm inferri, quòd nulla extet scripta lex de die celebrandi Paschatis, quod supra dixi: nego tamen Apostolos de hoc nec voce tenus, nec doctrinâ non scriptâ quidquam præcepisse. Assentior itaque Socrati dum dicto capite ait: *Quartodecimani observantiam quartodecimi diei à Joanne Apostolo sibi traditam esse affirmant. Romani verò, & qui Occi-*

Occidentis partes incolunt, consuetudinem qua apud ipsos viget, à Paulo Petroque Apostolis recepisse se dicunt. Neutri tamen ad hujus rei confirmationem scriptum aliquod testimonium proferre possunt. Non assentior tamen, consuetudinem unâ vel alterâ die Pascha celebrandi, ut Socrates putat, æquè legitimam esse, cum consuetudo Romanæ & aliarum Occidentis Ecclesiarum in Nicæno Concilio tanquam ex Traditione verè Apostolica procedens approbata sit, & omnibus Ecclesiis servanda proposita, Asianorum autem disciplina rejecta.

X. Respondeo igitur secundò, in hoc Socrati fidem non esse adhibendam. Cum enim esset Sectâ Novatianus, & Novatiani ut ipse testatur cap. 21. in hoc errarent, aliis uno tempore, aliis diverso, & ritu qui sibi placebat, celebrantibus, ideo Symmistas suos damnare nolens, imò ipsis patrocinari, statuit, rem esse indifferentem de tempore, quo Pascha celebretur. Imò ibidem cap. 22. audacter dicit: *Nugantur itaque, qui Nicænam Synodum Paschalem festum immutasse calumniati sunt. Nam qui in ea Synodo convenerunt, in eo præcipuè elaborarunt, ut Populos, qui à majore numero Ecclesiarum dissidebant, ad unitatem concordiamque revocarent.* Attamen Concilium Nicænum rem non reliquit ut indifferentem, sed Pascha die Dominico post æquinoctium vernali ab omnibus celebrandum tanquam Traditionem Apostolicam statuisset, apparet ex Epistola Episcoporum Palæstinæ in Concilio data, qui postquam de Traditione diei Paschatis, qua jam inde ab Apostolis ad ipsos continuâ successione manaverat, multa in suis literis disseruerant, tandem in fine Epistolæ, his utuntur verbis: *Date operam, ut Epistola nostra exemplaria per omnes Ecclesias mittantur, nec nobis crimen impitent, qui animas suas à recto veritatis tramite abducunt.* Sic apud Eusebium Lib. 5. Hist. cap. 25. Quibus apparet, Nicænos Patres diem celebrationis Paschatis, ut rem ab Apostolis statutam, & veritatis regulam, toti Ecclesiæ proposuisse. Sed de hoc satis locuti sumus.



CAPUT XXVI.

De Alogis, seu Alogianis.

§. I.

Quis fuerint, & cur sic dicti.

I. **A**LOGI seu Alogiani dicti sunt, idest sine Verbo, quia Verbum à S. Joanne initio sui Evangelii celebratum respuebant: & hoc nomine etiam Evangelium Joannis unà cum Apocalypsi repudiabant. Ita S. Augustinus L. de Heresibus c. 30. *Alogiani*, inquit, *propterea sic vocantur, tanquam sine Verbo* (Logos enim græcè Verbum dicitur) *quia Deum Verbum recipere noluerunt, Joannis Evangelium respuentes, cujus nec Apocalypsim accipiant, has videlicet Scripturas negantes esse ipsius.*

II. De his fusè agit Epiphanius Heres. 51. qui num. 1. eos ponit post Cataphryges & Quartodecimanos fuisse exortos, his verbis: *Post Cataphrygum, Quintilianorum, & Quartodecimanorum, Sectas nova quedam in Orbe terrarum erupit heresis.* Contra quam postquam varia dixit, & præcipuè quòd à S. Joanne in Ebione & Cerintho fuerat jam præfocata, eam num. 3. describens: *Hæc igitur, inquit, Alogorum est opinio. Nam ejusmodi eis nomen imponimus, nec à nobis deinceps aliter vocandi sunt. Et vos mecum, à cavissimi, Alogos illos nominate. Quorum heresis Joannis Libros repudiat. Quamobrem cum Verbum à Joanne prædicatum respuant, Alogi, hoc est, à Verbo alieni nuncupandi sunt. Ergo illi à vera doctrina funditus abhorrentes sinceram fidem abnegant, nec Joannis Evangelium aut Apocalypsim approbant.*

Deinde subdit: *Atqui, si Apocalypsi dumtaxat rejectâ Evangelium admitterent, dici id possent subtili quodam & accurato judicio fecisse, ut apocrypha respuerent; quòd pleraque in Apocalypsi altissimus & obscurus sensus habeant: sed cum universos Joannis Libros propriè rejiciant, dubitare nemo potest, quin ii, eorumque similes, illi ipsi sint, quorum in Catholicis Epistolis Joannes meminit, „ Novissima hora est, inquit, & audistis, quoniam Antichristus venit: „ & nunc, ecce Antichristi multi &c. „.* Hæc Epiphanius.

III. Nolim tamen, ut ex his Epiphanii verbis quisquam existimet, eum in opinione fuisse, quòd Liber Apocalypsis non esset verè Canonicus & Divinus, sed apocryphus. Nam talem suspicionem à se depellit infra num. 32. & se juvenibus, ubi cum Alogi

ali-

aliqua ex Apocalypsi impudenter reprehenderent, aliqua irridere-
rent velut fabulosa, eorum audaciam valide redarguit, & conclu-
dit num. 33. *Ex quo omnis illa ad oppugnandam veritatem comparata
ratio corrui; cum Apocalypsis ille Liber Prophetici esse generis, &
à Spiritu Sancto verissimè profectus ostenditur.* Solum ergo minùs
culpabiles Alogos fore pronuntiat, si Apocalypsim rejecissent,
tanquam aliqua apocrypha continentem, obscuros qui in ea latent
sensus non percipientes, quàm dum etiam Joannis Evangelium
respuerent. Et jure quidem. Nam Joannis Evangelium tanquam
genuinum ejus sortum Ecclesia Catholica ab initio suscepit ac
venerata est, ideoque inter Libros Proto-canonicos semper habuit.
At Apocalypsis Librum non statim Ecclesia ut legitimum Joannis
sortum & verè propheticum agnovit, sed de eo aliquandiu dubita-
vit, ut ostendi Tom. 1. hujus Operis c. 3. de Libris Deutero-Cano-
nicis §. 7. Cùmque eo tempore, quo hæc Alogorum heresis surrexit,
Ecclesia de hoc nihil adhuc statuisset, licet major & melior pars
antiquitatis Apocalypsim ut veram revelationem S. Joanni factam
agnosceret, idcirco Epiphanius Alogos illam respuentes minùs
culpabiles pronuntiat.

IV. Quia verò norant Alogi, semel admissò, quòd Evange-
lium præterens Joannis nomen verè esset Apostoli Joannis, se
se absque blasphemix nota illud non posse rejicere, delirando
dixerunt, Evangelium nomen Joannis gerens hunc non habere
auctorem, sed heresiarcham Cerinthum: cùm nisi cæci fuissent,
advertere debuissent, illud à Joanne contra heresim Cerinthi fuis-
se exaratum. Ita refert Epiphanius num. 3. dicens: *Quamquam
illi nonnihil ad excusandam suam audaciam conantur asserere. Pudet
enim palam B. Joanni contradicere; quòd & ipsum inter Apostolos
fuisse numeratum, & à Domino præcipuè dilectum non dubitent: qui
& sacra mysteria pro rei dignitate patefecit, & supra Domini petus
incubuit. Quare aliam damnandorum Apostoli scriptorum causam
commenti sunt. Negant hæc Joannis esse, & Cerintho tribuunt; nec
esse digna putant, quæ ab Ecclesia probentur.*

Hoc delirium corrigere volens Epiphanius num. 4. *Qui enim,
inquit, fieri potest, ut hæc à Cerintho scripta sint, quæ Cerintho
potissimùm repugnent? Hic enim recentem ac nudum hominem esse
Christum asseruit. Contrà Joannes perpetuò fuisse Verbum, atque è
Cælo delapsus, & carnem esse factum pronuntiat. Quocirca statim
aditu ipso deprehenditur, vanam istorum calumniandi licentiam me-
ram esse stultitiam, nec unde redargui possit satis animadvertere.*
Imò contra Cerinthum S. Joannem suum scripsisse Evangelium,
testis est inter alios S. Hieronymus, qui in L. de Script. Eccles. in

Joan-

Joanne: *Novissimus*, inquit, *omnium scripsit Evangelium rogatus ab Asia Episcopis, adversus Cerinthum, aliosque Hæreticos, & maxime tunc Ebionitarum dogma consurgens, qui asserunt Christum ante Mariam non fuisse.*

V. De hujus Sectæ Auctore disceptatur. Ittigius Sect. 2. c. 15. & alii Recentiores Alogorum parentem faciunt Theodotum, non illum Montani discipulum, de quo supra cap. 23. §. 1. & 2. aliqua dixi, sed Theodotum patriâ Byzantinum, arte coriarium, de quo Eusebius Lib. 5. Hist. c. 28. ex antiquo Scriptore dicit, detectionis illius Deum abnegantis parentem & auctorem fuisse, & Christum nudum esse hominem primum asseruisse, ac proinde per Victorem Papam à communione Ecclesiæ ejectum fuisse. Sed ne istis assentiar facit primò, quia S. Augustinus Theodotum Coriarium non hujus hæresis Alogorum (de cujus auctore silet) sed alterius, quam Theodotianorum appellat, inferiùs facit Auctorem. Quòd si Theodotus hujus Sectæ auctor fuisset, non in duas hæreses Alogos, & Theodotianos distinxisset. Secundò, quia S. Epiphanius, qui pariter Alogos à Theodotianis secernit Hæref. 54. num. 1., dum ait, hæresim Theodotianam hæresim Alogorum appendicem fuisse: *Theodotus*, inquit, *nescio quis emerfit, velut appendix quadam illius hæresis, quam Alogorum nomine comprehendimus.* Si ergo Secta, quæ Auctorem habet Theodotum, fuit appendix Sectæ Alogorum; ergo ista ante Theodotum erat, & sic Theodotus poterit quidem dici Sectæ Alogorum propagator, sed non auctor & fundator.

VI. Addo, quòd Alogi dicebantur, quia Verbum Dei negabant, & Joannem, qui in suo Evangelio Verbum Dei celebrat, ejusque Apocalypsim rejiciebant: ex quo infertur, Christum esse Dei Verbum ac Deum, ipsos negasse; & in aliis cum Catholicis sentiebant, teste Epiphanio num. 4., qui Alogorum præfato de Verbo errore relato, subdit: *Nam & illi alioqui nobiscum eadem ac paria sentire videntur.* At Theodotus Christum quidem nudum hominem esse fatebatur; sed Dei Verbum & Joannis Evangelium & Apocalypsim rejecisse non legitur. Insuper Ittigio ipso referente, Theodoti Coriarii alii errores Catholicæ veritati contrarii apud Clementem Alexandrinum sub Eclogarum nomine narrantur: nempe quòd docuit, Filium Dei & Angelos materiales esse: sexus differentiam in singulis dari: Animas etiam, Dæmones corporales esse: ipsi Jesu redemptione opus fuisse, quam columbæ post Baptismum immixtæ beneficio obtinuerit: Deum Patrem in Christo patiente passum esse: à Christo ante passionem Animam Divinam & spiritualem, quam à materiale distinxit, recessisse: astra

astra fatum rebus inducere : & alia verè blasphema , quorum nihil ab Alogis prolatum audivimus . Quomodo ergo censet Ittigius , hunc Theodotum Alogorum ducem & Auctorem extitisse ?

VII. Minus assentiri possum aliis , qui Alogorum Sectæ principatum tribuunt Artemoni cuidam , quem putant Theodoti fuisse præceptorem , & Christum purum hominem esse asseruisse . Cui opinioni adhæret Lambertus Danæus in L. de Hæres. cap. 30. Minus , inquam , assentiri possum . Nam constat Theodotum præceptorem Artemonis extitisse , non è converso . Eusebius enim L. 5. Hist. cap. 28. , ubi Artemonis mentionem facit , expressè dicit , hæresis ponentis Christum esse nudum ac purum hominem primum auctorem fuisse Theodotum , & proinde per Victorem fuisse ab Ecclesia pulsum . Cum enim quidam præfata hæresis Sectatores jactarent , præcos Ecclesiæ Patres ab Apostolis usque ad Zephyrinum eandem de Christo recepisse doctrinam , eamque à Zephyrino , qui Victori successit , fuisse postea adulteratam , refert Eusebius , Scriptorem quemdam Anonymum inter alia eos sic confutasse . Ubi enim ostendit , omnia retrò secula Patrum qui in eis vixerunt testimonio Christum Deum atque hominem semper prædicasse , Verbum Dei concelebrasse Divinitatem ei tribuendo , ait : *Quomodo eos non pudet ejusmodi calumniam adversus Victorem concinnare , cum certò sciant , Theodotum Coriariam , qui defectionis illius Deum abnegantis parens & auctor fuit , primusque Christum nudum esse hominem asseruit , per Victorem à communione Ecclesiæ ejectum fuisse ? Nam si , ut ajunt , Victor eadem sentiebat quæ illorum docet impietas , cur Theodotum opinionis illius auctorem ab Ecclesia removisset ?* Si ergo hujus hæresis Artemonis primus auctor fuit Theodotus , non hic ab illo , sed ille ab isto eam didicit . Quod si , ut ostendi , Alogi anteriores fuerunt Theodoto , à fortiori & Artemoni . Ergo Artemon Alogorum princeps non fuit .

VIII. Quis ergo Alogorum auctor fuit ? Ignorare me fateor . Fortè tuit aliquis , vel aliqui ignoti & obscuri nominis fuere , qui Cerinthis & Ebionis hæresis semina in corde adhuc foventes , Christo Divinitatem eripere conabantur . Sed quia Joannis Evangelium sibi ob stare nimis apertè videbant , in quo Verbum Patris Deus verus in Christo inhabitans describitur , contra Verbum & Joannis Evangelium arma movere cœperunt , negando illud esse genuinum Apostoli foetum , & cum Apocalypsi hæretico Cerintho insanâ arte adjudicando . Quos postea imitati Theodotus & subinde Artemon , erroremque publicè spargentes , turbas in Ecclesia excitarunt ; quare Victor ab Ecclesia Theodotum ejecit . Quo factum fuit , ut Alogorum hæresis , non diù proprium nomen retin-

nuerit, sed in Theodotianam transierit. Ita quasi divinando me loqui compellit silentium Veterum, qui hæresi Alogorum nullum designant Auctorem.

§. II.

Alogorum errores confutati.

I. **P**rimò ergo Alogi negabant Deum Verbum, seu Verbum Deum esse & æternum, quale illud describit S. Joannes in Evangelio. Hinc Damascenus L. de Hæres. n. 51. *Alogi*, inquit, à nobis ita nominati, qui Joannis Evangelium ejusque Apocalypsim rejiciant, propterea quòd Verbum Deum, qui ex Patre progrediendo semper existit &c. In quo visi sunt superasse Cerinthum, is enim sicut & Ebion, Jesum quidem purum hominem esse blasphemabant, sed Verbi Dei Divinitatem, atque æternitatem apertè aggrederi ausi non sunt, ut ostendi cap. 6. §. 3. & cap. 8. Primi tuerunt Alogi, quos deinde imitati sunt Paulus Samosatenus, & Arius, de quibus infra suis locis. Interim dicam cum Athanasio Orat. 1. contra Arianos n. 9. *Pater semper fuit & est, & numquam non fuit: cum enim Pater æternus sit, ejus quoque Verbum & Sapientiam æternam esse necesse est.* Quod doctè ut de more probat S. Thomas in 4. contra Gentes cap. 11.

At quia Alogi, ut postea Ariani, dicebant Verbum Dei non esse Deum, sed factum à Deo, audiat, quisquis sit, S. Augustinum Tract. 1. in Joann. cum sic alloquentem: *Quomodo potest fieri, ut Verbum Dei factum sit, quando Deus per Verbum fecit omnia? Si & Verbum Dei ipsum factum est, per quod aliud Verbum factum est? Si hoc dicis, quia est Verbum Verbi, per quod factum est illud, ipsum dico ego unicum Filium Dei. Si autem non dicis Verbum Verbi, concede non factum, per quod facta sunt omnia. Non enim per se ipsum fieri potuit, per quod facta sunt omnia. Crede ergo Evangelistæ. Poterat enim dicere: In principio fecit Deus Verbum: quomodo dixit Moyses, In principio fecit Deus Cælum & Terram, & omnia sic enumerat: Dixit Deus, Fiat, & factum est. Si dixit, quis dixit? utique Deus. Et quid factum est? Creatura aliqua. Inter dicentem Deum & factam creaturam, quid est, per quod factum est, nisi Verbum? quia dixit Deus: Fiat, & factum est. Hoc Verbum incommutabile, quamvis mutabilia per Verbum fiant, ipsum incommutabile est.*

Et infra: *Evangelista dicit, „In principio erat Verbum,“ & tu dicis, In principio factum est Verbum. Ille „omnia per ipsum facta*

facta sunt „ dicit : & tu dicis , quia & ipsum Verbum factum est . Poterat dicere Evangelista , In principio factum est Verbum : sed quid ait ? „ In principio erat Verbum „ . Si erat , non est factum , ut ista omnia per ipsum fierent , & sine ipso nihil . Ita S. Augustinus Alogis & Arianis acutè jugulum petit . Que pro presenti sufficiant .

II. Videntes ergo Alogi , admissio S. Joannis Evangelio , os sibi in aeternum claudi , in alium errorem prolapsi negaverunt , Evangelium illud S. Joannis esse , ac proinde ullius esse auctoritatis . Sed contra eos omnium seculorum Ecclesia clamat , quæ , ut ait August. Lib. 2. de Conf. Evang. cap. 6. , Joannem in Evangelistis eminentissimum semper prædicavit ; unde Eusebius L. 3. Hist. c. 24. de Joannis scriptis agens , ait : *Et primò quidem Evangelium ipsius universis per Orbem terrarum Ecclesiis notissimum sine ulla dubitatione suscipiendum est .* Ejus conscribendi causam inter alios notat Cyrillus Alex. in c. 1. Joannis fuisse erroribus , qui ab eo tempore de Verbi æternitate apud aliquos oriebantur , occurrere . *Cùm autem (inquit Cyrillus) non parum in his fidelium mentes turbarentur , & simpliciorum animus instar pestis scandali lues depasceretur (putabant enim nonnulli nugis illorum à vera doctrina abducti , in verum naturam tum vix prodisse Verbum cùm homo factus est) qui inter eos sapientià præstabant in unum congregati venerunt ad Salvatoris Discipulum , ipsum nempe Joannem , & morbum , qui fratres invaserat , nuntiarent , atque Hæreticorum nugas detexerunt , & sibi confestim adesse spiritualibus illustrationibus rogarent , ut jam diabolicis retibus involutis salutarem manum porrigeret . Eorum igitur qui perierant & mente corrupti erant dolore tactus discipulus , absurdum item esse ratus nullam posterorum curam habere , ad hujus Libri scriptiorem se contulit : & quacumque ad generationem carnalem & naturalem pertinent reliquit aliis Evangelistis latius enarranda ; Ipse verò ardore quodam animi , in eorum qui talia in medium afferunt petulantiam increbitur dicens „ In principio erat Verbum „ .* Hæc Cyrillus . Ex quibus apparet , quòd Alogi ideo Evangelium Joannis repudiabant , quia videbant , suam infaniam ab eo configi .

III. Alogi tamen prætereuntes hanc veram causam quâ Joannis Evangelium respuebant , alias quasdam ratiunculas opponebant , quas Epiphanius Hæres. 51. refert , & dissolvit , ut infra videbimus . Prima erat discordantia Evangelii Joannis ab aliis Matthæi , Marci , & Lucæ . Nam Joannes prætermittit Joannis Baptiste conceptionem , Beatæ Virginis Annuntiationem , Christi Nativitatem in Bethlehem , Circumcisionem , Magorum adventum , Pueri fugam in Ægyptum , reditum ex Ægypto , Pueritiam sub parentibus exactam , Joannis Baptiste prædicationem , Christi

Jejunium, Diaboli in Deserto tentationem, & alia multa, de quibus alii Evangelistæ scripserunt.

IV. Sed hæc insulsa sunt. Cum enim nec cæteri Evangelistæ omnia narrent quæ ab alio narrata sunt, ut singula Evangelia conferenti constabit, si hæc ratio valeret, omnia explodi deberent. Respondet ergo Epiphanius num. 19., quod summo in errore, ac mentis cæcitate versantur: Etenim Sanctissimus hic Evangelista ordine ac successione quartus, ac tametsi primus esset omnium, scribendi tamen tempore posuimus, quæ ante se præclare erant aliorum operâ digesta repetere noluit: sed nute ea quæ jam dicta fuerant, quæ non erant dicta proposuit. Matthæus quidem ab Abrahamo scribendi initio fucio, post incunabula Christi, & alterum à natali ejus annum narrationem pertexit. Marcus verò ab anno 15. Tiberii, circumscriptis mediis temporis rebus gestis, exorsus est. At Lucas altius ista repetens, ab eo tempore capit, quod Christi ortum antecessit, & tam hujus quàm Joannis in Mariæ atque Elisabeth utero conceptum exposuit.

Joannes denique postremus accedens, altissimè omnium narrationem arcessit, & quæ Christi temporariâ illâ generatione priora sunt, stabilire ac munire instituit. Spiritualia enim sermè sunt, quæ illi memoriæ commendavit, cum quæ ad corpus attinerent, abundè essent aliorum scriptis corroborata. Quamobrem spiritalem de Divino illo dono narrationem aggreditur, quod initio carens omni ab Cælesti in nos Patre transfusus est, & de hujus consilio ac voluntate in B. Virginem illapsus, atque in Virgineo ejus gremio cum carne conjunctum. Cæteri porro ita iisdem illis consentanea dixerunt, ut id quod erat necesse, potissimum spectarent. Joannes verò ejus, quod sibi proposuerat, rationem habuit. Ita fit, ut ex quatuor Evangeliiis, eorum quæ ad Christi carnem & ad Divinitatem attinent, accurata nobis veritas ac certissima constet. Hactenus Epiphanius.

V. Idem sentit Eusebius L. 3. Hist. c. 24., ubi narrat aliorum Evangelistarum historiâ: Proinde, inquit, Joannes quidem res à Christo gestas, priusquam Joannes Baptista custodiæ muncipatus fuisset, Evangelio suo complectitur. Reliqui verò tres Evangelistæ res Christi gestas, ex quo Baptista coniectus est in carcerem, persequuntur. Quod quicumque attentius observaverit, nequaquam Evangelia inter se diffidere posibac existimabit: quippe cum Joannis quidem Evangelium initium actuum Christi, cætera autem Evangelia sequentis temporis historiam contineant. Et seriem quidem ipsam generis Christi secundum carnem à Matthæo & Luca prius traditam Joannes meritò prætermisit. Ab ipsa verò ejus Divinitate sumisit initium, quippe quæ à Spiritu Sancto ipsi tanquam præstantiori fuisset reservata.

VI. Hujus in scribendo inter Evangelistas varietatis ex fine, quem sibi quisque præsstituerat, colligit S. Augustinus L. de Conf. Evangel. cap. 3. his verbis: *Cum Matthæus circa Regis, Lucas circa Sacerdotis personam gereret intentionem, utrique humanitatem Christi maximè commendarunt. Secundum hominem quippe Christus & Rex & Sacerdos effectus est, cui dedit Deus sedem David Patris sui, ut Regni ejus non esset finis, & esset ad interpellandum pro nobis mediator Dei & hominem homo Christus Jesus. Non habuit breviatorem conjunctum Lucas, sicut Marcum Matthæus. Et hoc fortassè non sine aliquo Sacramento, quia Regum est non esse sine comitum obsequio: unde ille qui regiam personam narrandam susceperat, habuit sibi tanquam comitem adjunctum, qui sua vestigia quodammodo sequeretur. Sacerdos autem, quoniam in Sancta Sanctorum solus intrabat, propterea Lucas, cujus circa Sacerdotium Christi erat intentio, non habuit socium subsequenter, qui suam narrationem quodammodo brevaret. Tres autem illi Evangelistæ in his rebus maximè diversati sunt, quas Christus per humanam carnem temporaliter gessit. Porro autem Joannes maximè Divinitatem Domini, quâ Patri est æqualis, intendit &c. Hactenus Augustinus.*

VII. Altera Alogorum objectio erat. Joannes tanquam primum à Christo editum miraculum refert conversionem aquæ in vinum in nuptiis Canæ: *Hoc enim, inquit, initium signorum Jesu in Cana Galilææ.* At Lucas aliud miraculum longè ante à Christo adhuc puero factum recenset, cum scilicet sapientiam suam in medio Doctorum sedens & disputans, magno omnium stupore manifestavit. Rursus Joannes ut secundum miraculum proponit, sanationem filii Centurionis paralytici, cum Lucas alia multa ante hoc facta miracula describat.

VIII. Respondet Epiphanius, conversionem aquæ in vinum referri à Joanne tanquam primum miraculum, non absolutè, idest à tempore quo natus fuit, sed primum post susceptum à Joanne Baptisma, & postquam discipulos assumserat: *Hoc, inquit S. Epiphanius num. 21., primum signum fecit Jesus in Cana Galilææ: non ante Baptismum, ut sæpè dixi; sed tum primum id accidit, postquam à tentatione reversus est, tertiâ die post biduum illud, quo amba apud ipsum basere Joannis discipuli, qui & audierunt illum & secuti sunt. Statim enim post biduum, quo apud illum isti commorati sunt, subjicit, „ Et abiit in Galilæam, & inveniens Philippum dixit, sequere me, „. Deinde „ Nuptiæ factæ sunt in Cana Galilææ „. De hoc miraculo, quomodo fuerit primum, aliqua dixi supra Tom. 4. par. 2. cap. 20. §. 2. num. 24.*

Hâc eadem ratione & ordine sanationem filii Reguli paralytici

lytici vocat S. Joannes secundum, relatè scilicet ad signum in nuptiis patratum, quod appellat primum. Et in hoc sensu Joannes c. 4. v. 54. dicit: *Hoc iterum secundum signum fecit Jesus*, nimirum post primum in nuptiis factum, vel secundum in Galilæa patratum, unde subdit: *Cum venisset à Judæa in Galilæam*.

IX. Tertia Alogorum objectio erat. Joannes duo à Christo celebrata Pascha commemorat, cum unius dumtaxat ceteri Evangelistæ meminerint.

Respondet Epiphanius num. 22., non duo sed tria Paschata Christum celebrasse, his verbis: *Nec illud ineptissimi homines animadvertant, non deo solum in Evangeliiis Paschata comprehendendi: sed ad priora illa duo tertium accedere, in quo Salvator est passus, ut omnino tria sint toti illi prædicationis temporibus tribuendi*. Imò quatuor Paschata Christum sue prædicationis tempore celebrasse, superius Tom. 4. par. 1. cap. 19. §. 5. à num. 40. probabile ostendi, quò Lectorem remitto.

X. Contra Librum Apocalypsis opponebant Alogi, quòd in Apocalypsi legitur c. 2. v. 18. *Et Angelo Thyatiræ Ecclesiæ scribe*. Atqui nulla Thyatiræ Christianorum Ecclesia tunc erat: qui igitur ad eam, quæ nusquam erat, Ecclesiam scripsit?

Respondet Epiphanius n. 33., debuisse illos advertere S. Joannem in eo libro multa prophetice tulisse locutum. Et proinde licet dum scriberet, nulla Thyatiræ Ecclesia esset: quia tamen postea futura erat, & hæreticorum, maxime Phrygum, & Prophetissarum eorundem erroribus inquinanda, ideo S. Joannes spiritu prophetico eam præarguit. Non tædeat audire S. Epiphanium: *Num, inquit, ut illud opponant, nullam jam esse Thyatiris Ecclesiam; planè Joannem afflatu prophetico futura prævidisse significant. Cum enim illic tam hæretici illi, quàm Phryges habitaverint, & eorum fidelium qui simpliciores sunt animas luporum more diripuerint, oppidum universum ad suam hæresim traduxerunt. Qui cum Apocalypsim atque omnem illam doctrinam respuerent, ad evertendam religionem vires suas ac velut exercitus compararunt. Jam verò singulari Dei beneficio his temporibus accidit, ut post centum ac duodecim annos illic Ecclesia cresceret, ad quam alii deinceps accederent. Tunc verò Ecclesia omnis se se in Phrygas exhauserat. Quamobrem Spiritus Sanctus id aperire potissimum studuit: Ecclesiam post Apostolorum, hoc est Joannis ac cæterorum temporum ad errorem esse declinaturam, annis post Ascensum Christi tribus & nonaginta, quo tempore in errorem incidere, atque in Phrygum hæresim velut eliquari illius loci deberet Ecclesia. Unde & coarguendi gratia statim ita Dominus loquitur, Scribe Angelo Ecclesiæ quæ est Thyatiris. Hæc dicit qui*
habet

habet oculos sicut flamma ignis, & pedes ejus similes aurichalco. Novi fidem tuam & caritatem, & ministerium, & opera tua novissima plura prioribus. Sed habeo adversus te, quia permit-
tis mulierem Jezabel seducere servos meos; quæ se dicit Prophe-
tissam docentem manducare idolothyta & fornicari. Et dedi illi
tempus, ut poenitentiam ageret, & non vult poenitere à forni-
catione sua, Num illud videre tandem potestis, de mulieribus
illum loqui, quæ falsâ prophetici spiritus persuasione deceptæ quam-
plurimos deceperunt: hoc est de Priscilla, Maximilla, & Quintilla,
quarum fraus latere Spiritum Sanctum minime potuit, sed per Beati
Joannis os fore ista prædixit, quæ post ejus obitum acciderunt. His
ab Epiphanio devictos Alogos, seu veriùs Amentes, dimittamus,
ad alios similes transituri.

CAPUT XXVII.

De Adamitis, seu Adamianis.

§. I.

Adamitarum origo & mores.

I. **Q**UIS hujus hæresis Auctor fuerit Epiphanius & Augu-
stinus silentio prætereunt. Quemdam Adamum nomi-
ne scribit Damascenus Hæres. 52., Theodoritus tamen
Lib. 1. Hæret. Fab. c. 6. eos conjungit cum Prodicto,
tamquam sobolem ab eo exortam. Nam post Epiphanem Carpo-
cratis filium de Prodicto subdit: *Eum verò secutus Prodictus, eorum
qui Adamitæ dicuntur hæresim instituit: & hunc decreta Carpo-
cratis confirmasse tatetur dicens: Is aperte & palam scortari adjecit
decretis Carpocratis.* Et hoc ex Clemente Alexandr. L. 3. Stromat.
se eruere putat, ut infra dicam.

II. Si hoc verum est, asserere oportet, ab Epiphanio, Augu-
stino, & Damasceno temporis ordinem in eis recensendis non fuisse
servatum, cum non ad Alogorum ætatem, sed magis ad Gno-
sticorum, Valentini, & Carpocratis tempora essent referendi.
Nam qui à Prodicto exierunt, se Gnosticos dici volebant, teste Cle-
mente Alexandr. L. 3. Strom. pag. 438.: ubi post Valentinianos eos
ponens: *Talia autem, inquit, statuunt Prodicti quoque affecta, qui
se ipsos falso nomine vocant Gnosticos.* Et Tertullianus in Scorpiaco
cap. ultimo Prodictum Valentino in errore conjungit, nempe non
eius subeundum pro Christo martyrium. Hæc ratione Theodoritus

tut

tus citato loco refert Adamitas ante Valentinum. Isidorus Lib. 8. Etymol. cap. 5. eos statuit ante Cajanos, & Sethianos immediate post Archonticos. Et re verâ si Prodicum parentem Adamitis tribuimus, multò ætate anteriores eos fuisse fateri debebimus.

III. Si eorum mores ac ritus consideremus, jure pudendos ac turpes eos damnare debemus. Si enim S. Augustinum L. de Hæres. c. 31. consulimus, ipse nobis dicit: *Adamiani ex Adam dicti, cujus imitantur in Paradiso nuditatem, quæ fuit ante peccatum: unde & nuptias averfantur, quia nec priusquam peccasset Adam, nec priusquam dimissus esset de Paradiso, cognovit uxorem. Credunt ergo, quòd nuptiæ futura non fuissent, si nemo peccasset. Nudi itaque mar-tes seminaque conveniunt, nudi lectiones audiunt, nudi orant, nudi celebrant Sacramenta, & in hoc Paradisum suum arbitrantur Ecclesiam.* Ita S. Augustinus.

IV. Si à S. Epiphanio petimus: is Hæres. 52., postquam in eis talpæ cæcitatem prolixè deploravit, ac in dubium vertit, an tales adhuc existant, imò an unquam fuerint: quia tamen eorum fama utcumque in Orbe personabat, eos ita describit n. 2. *Inprimis enim Hæreticos istos, serunt, Ecclesias suas, sive latibula potiùs & cavernas (sic enim Hæreticorum libes appellare conventicula) in hypocaustis (locis igne calefactis vulgò stute) extruere. Quippe subter ignem excitant ad eos vaporandos ac fovendos, qui in illud cubiculum conveniunt. In ingressu vestimentorum custodes pro foribus capsariorum instar apposti sunt. Tum intrantium quisque tam vir quam femina foris vestibus exuens sese toto corpore, perinde ut ex utero matris exiit, nudus ingreditur. Sed qui principes inter illos habentur, per æquè nudi confident, alii in superiore loco, alii in inferiore, promiscuè ac passim. Ad hæc nonnulli ex eorum numero sunt, qui scilicet continentes appellantur, idque præferunt, ac virgines habentur, scque ipsos hunc in modum decipiunt. Jam verò lectiones, ac reliqua id genus obeunt nudi. Quòd si quis, ut dicere solent, in culpam lapsus esse videatur, hunc in conventum suum minimè ampliùs recipiunt. Adamum enim illum esse dicunt, qui de ligno comederit, atque è Paradiso, hoc est Ecclesia sua, exterminandum judicant. Nam Ecclesiam suam Paradisum esse statuant, se ipsos verò Adamum & Evam.* Ita Epiphanius.

V. Si Damascenum audire volumus, dicet nobis Hæres. 52. *Adamiani ab Adamo quodam eâ etate vivente denominati, ridiculum potiùs, quàm veritati consentaneum dogma profitentur. Porro rem hujusmodi sacitiant. Nudi, quales ex utero matris egressi sunt viri perinde ac mulieres conveniunt, atque ita lectionibus, orationibus, ac cæteris religionis officiis vacant. Solitariam autem vitam agentes,* ac

ac continentium instituta servantes, nuptias damnant, Ecclesiamque suam Paradisum esse existimant.

VI. Theodoritus, qui Adamitas Prodicti sobolem fuisse dicit, inter alias turpitudines promiscuum seminarum usum eis affigit. *Prodictus enim, inquit, mulieres esse communes constituit. Quamobrem non solum in conviviiis publicis, candela lumine paulo longius remoto, in quamcumque inciderat, cum ea unusquisque coibat, sed etiam mystica initia ejusmodi incontinentiam existimabant. Cujus rei testem asserit Clementem Alex. Lib. 3. Stromat. pag. 438. ubi ait: Talia autem statuant Prodicti quoque affecta, qui se ipsos falso nomine vocant Gnosticos, se ipsos quidem dicentes esse naturæ filios primi Dei. Nobilitate autem & libertate abutentes vivunt ut volunt, volunt autem libidinose, se nullâ re teneri arbitrati, ut Domini Sabbati, & qui sint quovis genere superiores, filii regales. Regi autem inquit, lex scripta non est. Unde L. 7. Strom. pag. 722. addit, eos etiam superbe dixisse Deum non esse orandum. Ubi enim de variis precandi modis locutus fuit: Hic, inquit, mihi veniunt in mentem quidam, qui diversa sentiunt, nempe qui Prodicti heresim sequuntur, eorumque opinionum quæ docent, non esse orandum. Quem errorem à Philosophis, qui dicuntur Cyrenæici, eos accepisse dicit.*

VII. Ex hæcenus dictis apparet, prælaudatos Patres convenire in hoc, quòd Adamitæ Adamum & Evam ante peccatum imitari volentes, conventus suos in Ecclesia, quam Paradisum vocabant, omnino nudos peregrinasse, & à nuptiis abhorruisse. Solum controversia est, an sicut à nuptiis, ita ab omni carnali coitu abstinerent, & prorsus continentes viverent, ut videtur absolute indicare Damascenus, vel aliqui saltem ex eis, ut dicit Epiphanius: an verò rejecto nuptiarum vinculo liberè se invicem carnaliter miscerent: & insuper, an Deum orarent, ut dicunt Augustinus & Damascenus, an verò non esse orandum assererent, ut dicit Clemens Alex. Et quidem si supponamus, Adamitas Prodicti factum fuisse, ut supponunt cum Theodorito ferè omnes Recentiores, inter quos Natalis Alexander Hist. Eccl. Secul. 2. c. 3. art. 12. & Ittigius Sect. 2. c. 3., asserendum est, eos continentiam quidem à nuptiis servasse, sed promiscua ac effræni libidine invicem se conjunxisse, necnon superbo fastu se filios Dei esse gloriantes, nullâ se egere prece jactarint. Hæc enim duo Prodicti scholæ impia dogmata fuisse, Clemens Alex. testatur. Singula igitur confutanda sunt.

§. II.

Adamitarum errores rejiciuntur.

I. **P**rimus ergo error de nuditate ad imitationem Adami & Evæ ante peccatum se ipso ruit. Nam etsi Adamus & Eva ante peccatum nudi prorsus inceslerint: statim tamen ac in peccatum lapsi fuere, nuditatis pudore suffusi eam tegere studuerunt. Sic enim legitur Gen. 3. v. 7. postquam peccarunt: *Et aperti sunt oculi amborum: cumque cognovissent se esse nudos, consuerunt folia ficus, & fecerunt sibi perizonata.* Peto ergo ab Adamitis: An ipsi originem traxerint ab Adamo & Eva adhuc innocentibus, an ab eis jam peccato obnoxiiis. Puto, primum non dicent: quia Adam non cognovit uxorem suam nec filios genuit, nisi post peccatum, & ejectus è Paradiso, ut habetur Genes. 4. v. 1. Cum ergo decedant ab Adamo & Eva jam peccatoribus, cur nuditatem, de qua parentes sui post peccatum erubuerunt, ipsi servare volunt?

Rursus Adam & Eva ante peccatum nudi incedebant, non in uno loco, sed ubique. Cur ergo ipsi nudi quidem in sua Ecclesia manent, extra illam tamen nudi incedere erubescunt? Fortè quia sua Ecclesia, ut ajebant, erat illis Paradisus? At nunquid eas felicitates quas Adam & Eva in Paradiso, ipsi in sua Ecclesia experiebantur? Nesciebant, Paradisum Adamo & toti ejus posteritati fuisse clausum, & ad ejus custodiam Cherubim cum flammeo gladio, ne quis ingrederetur, fuisse à Deo positum? (Gen. 3. v. 24.) Si sua Ecclesia Paradisus erat, cur eam calore temperare studebant, ne nudata corpora rigerent? Hoc certè in Paradiso non eguisset Adamus. Non in alio Ecclesiam suam assimilare Paradiso possunt, nisi quòd in eam Diabolus serpens ad eos, sicut primos parentes, decipiendos intrabat.

II. Audiant itaque Epiphanium eos ita irridentem: *Cur igitur subter cubiculum illud ignem excitant, ne frigore infestentur? Etenim Adamus & Eva neque in hypocausto degebant, neque ardore ullo atque aestu premebantur, nec ullus eis frigus erat molestus: sed purissimo aere fruebantur, ac mirificè à Deo temperato, qui nec frigoris atrocitate vebementior, nec molestissimo incendii ardore violentus immineret. Victus iisdem ambrosia erat à Deo parata. Locus ipse denique ad omnem erat voluptatem jucunditatemque factus: ita ut neque algori, neque aestui, quemadmodum diximus, essent obnoxii. At illi cum istiusmodi vitæ necessitatibus expositi sint, omnino ridiculi sunt.*

Quin & illud unà considerandum est, quemadmodum ex eo re-
felli

felli omnis istorum error possit. Nam primi nostri parentes, non unā dumtaxat horā, sed perpetuō nudi sine ullo pudore perseverabant. At isti, non quōd pudore careant, propterea nudantur; tametsi ita sibi persuadeant, sed id insatiata libidini tribuunt, quā ejusmodi oculis illecebras objicit. Siquidem omnem illi verecundiam deposuerunt, quā in omnibus Sacris Scripturis est laudata sæpius. ... Caterū post illam horam foris rursum vestes induunt, & Adami esse desinunt. Neque enim is vestium subinde copiam habuit, sed primū ficus folia, deinde pelliceas tunicas. Ita nonnisi longo tempore, quā creati fuerant, vestimentorum usum Divina eos sapientia perducit. Quamobrem omni explodendi ludibrio sunt homines isti, qui sibi Adami conditionem vendicant: in quo partim mentiuntur, partim vera jactitant. Quōd enim Adami non sunt, multis, ut ostendimus, est argumentis perspicuum: quōd autem ab intelligibili serpente ludificentur, id verō ex affectato illorum habitu ac nuditate, pudentoque ac ridendo illo insitato constat. Hactenus Epiphanius.

III. Secundus Adamitarum error fuit, quōd à suis cœtibus nuptias rejicerent. In hoc errore fuere plures alii, ut Nicolaitæ, Gnostici, Marcionistæ, Encratitæ, & alii contra quos superius egi. In Adamianis tamen nuptias damnandi specialis ratio fuit, quia scilicet putabant, Adamum & Evam non fuisse nuptiis conjunctos, nisi post peccatum; & quōd nisi peccassent, nuptiæ non fuissent futuræ. At nisi cæci fuissent, vidissent, nuptias in Genesi à Deo institutas, & à Christo in Evangelio confirmatas Matth. 19. Propterea in adjutorium Adæ Deus ex costa eduxit Evam, & hoc fuisse factum, ut ei esset in uxorem statim Adam ipse cognovit Gen. 2. v. 24, cū primō eam videns dixit, quōd *relinquet homo patrem & matrem & adhærebit uxori suæ, & erunt duo in carne una: & immediatē subjungitur: Erat autem uterque nudus, Adam scilicet & uxor ejus, & non erubescabant.* Licet ergo Adam maritaliter non cognoverit Evam, nisi post peccatum, erat tamen ante uxor ejus nuptiali vinculo conjuncta. Quōd verō etiam in statu innocentie, si in eo perseverassent, futuræ fuissent nuptiæ, ostendi in Theolog. Tom. 6. in 1. p. Qu. 4. de Stat. Hom. Innoc. quoad Corpus Dub. 3. Videantur ibi dicta.

IV. Tertius error ex isto consequens erat, nimirum quōd matres & feminæ apud illos turpiter mutuō commiscerentur. Dum enim omnino nudata corpora reciprocis aspectibus objicerent, & nudi simul familiariter convenirent, incredibile est, ardore libidinis eo mutuō non fuisse accensos: cūque conjugali concubitu eam exsaturare eis non permetteretur, brutorum more invicem non commiscerentur. Etenim si Adam & Eva vix in peccatum lapsi

concupiscentiæ stimulos sentire cœperunt, & cum cognovissent se esse nudos, vel ipsis foliis ficus nuditatem tegere curarunt; quis æstimabit, Adami, non innocentis, sed peccatoris sobolem, unâ cum ejus peccato concupiscentiam origine trahentes, ac nudos invicem conversantes, & nuptias rejicientes carnis castimoniam illibatam custodiisse? Continentiam utique profitebantur, & sic virginitatem colere dictitabant, quia à nuptiali concubitu abstinebant, non quia ab omni illicito congressu temperarent. Ideoque jure se Gnosticos appellabant, quia in hoc errore cum eis conveniebant, quem jam in eisdem & aliis superius impugnavi.

V. Quartò errabant, quia, ut ex Clem. Alex. Lib. 3. Strom. supra retuli, assererebant se naturâ esse filios Dei nulli legi subiectos, tanquam filios regales, pro quibus nulla lex scripta est; & proinde se quæ vellent pro arbitrio facere posse. Hâc insanâ temeritate, quam supra in Valentino rejeci, suos Adamitas Prodicus imbuît. Hos tamen prœlaudatus Clemens dicto L. 3. Strom. sic redarguit: *Primum quidem, quod non faciant omnia quæ volunt: multa enim eos prohibebunt, etsi cupiant & conentur. Quin etiam quæ faciant, non faciunt ut Reges, sed ut masfigia: clanculum enim committunt adulteria, timentes ne deprehendantur, & vitantes ne condemnentur, & metuentes, ne supplicio afficiantur. Quomodo autem res est libera intemperantia, & turpis sermo?* „ Omnis enim qui peccat, est servus., Rom. 6. *Sed quomodo vitam ex Deo instituit, qui se ipsum præbuit dedititium cuicvis concupiscentiæ? cum dixerit Dominus Exod. 6. „ Ego autem dico: Nec concupiscas.,* His & aliis horum insaniam detegit Clemens.

VI. Quintò, Deum non esse orandum effutiebant. Ita Clemens Alex. L. 7. Strom. Hoc errore infectos fuisse non legi, nisi Atheos, vel eos qui Deo curam horum inferiorum eripiebant. Cæterum quotquot Deitatem admiserunt, eique curam & prudentiam Mundi tribuerunt, precibus & sacrificiis Numina sua implorare ab eisque auxilia petere, etiam Barbari, consueverunt. Vel ergo Adamiani Athei erant, vel Deum rebus istis præesse negabant, vel ipsum orandum esse fateri tenebantur; Deum orandum esse ostendit Clemens Alex. L. 7. Strom. citato. Sed in re adeò certa immorari superfluit.

VII. Sextus Adamitarum error fuit, quod martyrium subeundum esse negabant. Contra hunc locutus sum agendo de Gnosticeis, Valentiniæ & aliis. Hunc Tertullianus in Scorpiaco c. ultimo à Valentino traducit ad Prodicum, & proinde ad Adamitas ejus sobolem: loquens enim de Paulo, qui pro Christo multa, & mortem ipsam, passus fuit, ait: *Quod si jam tunc Prodicus, aut*
Va-

Valentinus adfisteret, suggerens, non in terris esse consistendam apud homines, quod nec Deus humanum sanguinem sitiatur, nec Christus vicem passionis, quasi & ipse de ea salutem consecuturus expulcat, statim audisset à servo Dei, quod audierat Diabolus à Domino: Recede Satanas: scandalum mihi es. Quibus apparet Adamitas negallè pro Christo subeundum ellè martyrium, quia nec Deus humanum sanguinem sitit, nec Christus quasi ex nostro sanguine salutem ipse consecuturus esset.

VIII. Nunc à priscis Adamitis ad Recentiores transitum faciam: non defuerunt enim, qui novissimis temporibus turpissimam hanc Sectam excitarint, ut Seculo 15. in Bohemia Pichardus quidam. Refert hoc Æneas Sylvius in Hist. Bohemica c. 41. his verbis „Pichardus quidam ex Gallia Belgica, transmissò Rheno, per Germaniam in Bohemiam penetravit, qui præstigiis, quibusdam fidem sibi concilians, brevi tempore non parvam mulierum virorumque plebem ad se traxit, quos nudos incedere iubens, Adamitas vocavit. Et occupatà Insulâ quâdam amne Lufinicio cinctâ, filium Dei se dixit, & Adam vocari. Connubia eis promiscua fuere; nescias tamen in iussu Adæ mulierem cognoscere. Sed ut quisque libidine incensus in aliquam exarsit, eam manu prehendit, & adiens principem, In hanc, inquit, spiritus meus concaluit. Cui princeps respondit; Ite crescite & multiplicamini, & replete terram. Aiebat cæteros homines servos esse, se verò & qui ex eis nascerentur, liberos. Ex iis quadraginta viri Insulâ exiere, & intrantes vicinas villas, evaginati gladiis super ducentos agrestes interfecere, quos Diaboli filios aserebant. Zischa, iis auditis, quamvis sceleratus, scelus tamen exhorruit. Habet enim hoc natura hominum, ut aliena magis, quàm sua quisque vitia perhorrescat. Neque summa mala diu iuulta manent, ultoremque mali sæpè malum cernere licet. Direxit igitur in eos exercitum, expugnatâque Insulâ, Adamitas omnes gladio delevit, duobus tantùm reservatis, ex quibus gentis superstitionem cognosceret. Audivi & ego ex Ulrico Rosenfii præstanti Regulo, cum agerem in Bohemia, fuisse apud se viros & mulieres ejus Sectæ captivos, & mulieres quidem palam dixisse, non esse liberos, qui vestibus, & præsertim femoralibus uterentur, easque in carcere apud se peperisse, quas cum anno elapso simul cum viris igni tradidisset, ridentes cantantesque flammarum incendia pertulisse. Hæc de recentioribus Adamitis Æneas Sylvius Auctor coævus, postea Pius II. quos Veteribus similes exhibet imo turpiores; nam Veteres in sua Ecclesia tantùm se se

nudabant, hi nudi mares & feminæ ubique incessisse videntur, ut merebantur tamen, deleti.

IX. Præfatos Adamitas redivivos vidit Seculum sextum decimum ab Adamo Pastore excitatos, qui Christum insuper merum hominem professus, eum cum Photino naturâ Deum esse negabat. Matrimonium quoque quasi per se malum damnabat. Fuere & alii Sectâ Anabaptistæ, qui quod nuditatem Adami æmulari gestirent, Adamitarum nomen accepere. De his Lindanus Ruremondensis Episcopus in Dubitatio Dialogo 2. *Tales, inquit, fanaticos vidit Amstelodamus nostra. Hos loco honestissimo natos, & rebus lautis opulentissimos, vidit nudos discursitare nostra Hollandia anno 1535. Horum quidam tam fuere insani capitis, ut consensu arboribus, nudi Cælestem panem frustra expectantes, in terram deciderint semineces.* Ex Nat. Alex. Hist. Eccl. Seculi 15. & 16. cap. 2. art. 3.

CAPUT XXVIII.

De Elcesæis & Sampsæis.

§. I.

Auctor, ortus, progressus.

I. **H**ÆRESIS hæc una est, duobus tamen appellata nominibus, nempe Elcesæorum sive Helcesaitarum, & Sampsæorum. Helcesaitæ seu Helcesaitæ dicti sunt ab hæresis auctore *Helxai*, seu, ut alii volunt, *Helcesai*, non *Elei*, ut mendose irrepit in textum Augustini L. de Hæres. cap. 32. Dictos autem fuisse etiam Sampsæos, existimat Nicetas à puritate quam affectabant. *Sampsæi vocantur, inquit, quasi puri hebraicâ linguâ.* Licet autem quidam putent, vocem illam esse magis Arabicam & Ægyptiacam, quàm Hebraicam, cum tamen in L. 1. Esdræ c. 4. v. 23. fiat mentio cujusdam Scribæ nomine *Samsai*, non videtur Sampsæorum nomen alienum fuisse à lingua Hebraica, vel saltem Syriaca.

II. De facto autem Sampsæos, sive Helcesaitas ab *Offenis* celebri apud Hebræos Sectâ originem traxisse, sentit Epiphanius Hæres. 19., ubi de Offenis hæc habet: *Hi perinde ut illi Judæi sunt & simulandi artifices, atque imprimis callidi. Ferunt istos ex Nabatea, Jouræa, Moabitide & Arcelitide originem traxisse, quæ regiones ultra vallem Salsuginosam posita sunt.... Offenorum porro genus istud, si nomen interpretare, idem est ac firmum & solidum.* Ad hos

postea Elxai se quidam aggregavit, imperante Trajano post adventum Christi Domini. Quod repetit Hæref. 53. ubi: *Sampsæorum*, inquit, in ea regione, qua *Perea* dicitur, hæresis quædam est, qui & *Elcesai* vocantur, de quibus in superioribus hæresibus mentionem fecimus. Hi ultra *Salsum*, sive *Mortuum Mare* habitant in *Moabiti* de ad *torreutem Arnon*, & in ulteriore tractu *Ituræ* ac *Nabaitide*, de quo sapius jam egisse me memini. Faciant enim illi conditores, *Sectæ* suæ ac *magistrum Elxeum*.

III. Ex his apparet, hunc Elxai (sive dicas Elxeum sive Elcesai sive Elcesæum) fuisse natione Judæum sectâ *Ossenum*. Hic postea nec *Judeus* nec *Christianus* Trajano imperante sectam à suo nomine dictam *Elcesæitarum* fundavit, ac falsò se *Prophetam* jactans, librum quem prophetico spiritu dictatum asserbat, ut majorem sibi famam aucuparetur, publicavit. Ita *Epiphanius* Hæref. 19. de Elxai loquens, ait: *Qui cum falsò Prophetam se diceret, librum quemdam velut prophetico spiritu afflatus edidit: Divinâ scilicet sapientiâ plenum. Hujus præterea fratrem Jesaum nomine commemorant. Caterum homo ille moribus perditus, atque impostor fuit. Nam cum genere ac sectâ Judæus esset, ad Legis præscriptum minime vitam suam accommodavit, sed alia omnia loco ejus obrutis, ac sectatores suos in transversum abduxit.*

IV. Procedente tempore Elxai *Ebionitis* se conjunxisse, nosque de Christo errores in eam sectam invexisse, putat *Epiphanius* Hæref. 30., quæ est de *Ebionæis* num. 3. his verbis: *Ac suspicari sanè licet, ab eo tempore quo se illis Elxeus adjunxit falsus quidam Propheta, qui apud Sampsenos & Ossenos atque Elcesæos extitit, ab eodem edoctos confictum de Christo ac Spiritu Sancto nescio quid effutire cepisse. Ut enim ait Hæref. 53. num. 1., utebantur Osseni, Nazaræi, Ebionæi, & præcipuè Sampsæi pseudoprophetico Elxai Libro: Utuntur, inquit, hoc eorum libro & Ossæi, & Ebionæi, & Nazaræi, ut non semel antea dixi, sed Sampsæi potissimum illo nituntur... Quia etiam alium habere se librum prædicant, quem fratri Elxæi (Jesæo ut supra) tribuunt.*

V. Quia verò, ut hætenus vidimus, ars Diaboli fuit perniciosiores hæreses operâ etiam seminarum promovere, hoc *Elcesæitis* non detuit. Hujus enim Sectæ professores duas maximè habebant feminas, quas veluti Deas venerabantur, ut ex *S. Augustino* & *Damateno* inferius dicam. Harum una *Martho* (seu ut vult *Nicetas Maltha*) appellabatur; *Marthana* (seu *Malthana*) altera. Has *Epiphanius* Hæref. 53. num. 1. è stirpe Elxai fuisse dicit: *Ejus cujus stirpe duas ad hoc tempus mulierculas tanquam Deas adorabant, quod ex benedictio semine essent oriunda.* Et infra: *Caterum per id*

tempus audieram, unam è duabus illis feminam obiisse, quæ Martbo nominabatur; superflite adhuc Martbanâ, nisi jam & ipsa decesserit. Deinde honores, quibus eas afficiebant referens: Ambas illas, inquit, quoties domo progressæ aliquò se conferrent, ingens hominum multitudo comitabatur, qui non modò pedum pulverem, sed & sputa morborum ad remedia colligentes, non sinè magno ludibrio ad amuleta & phylacteria referebant. Imò, vide Lector, quò prorumpat insana cæcitas? Qui, ut infra dicam, mortem pro Christo subeundam esse negabant, inquit Epiphanius ibi: Pro Elxai verò stirpe morti se se committere non dubitant.

VI. De hac hæresi S. Augustinus L. de Hæres. cap. 32. ait: *Elcesæus & Sampseus hic tantum ordine suo commemorat Epiphanius, quos dicit à quodam pseudopropbeta esse deceptos, qui vocabatur Elci (verius Elxai) ex cujus genere duas mulieres tanquam Deus ab eis perhibet adoratas. Cætera Ebionæis tenere similia. Damascenus Hæres. 53. Sampsei, inquit, sive Elcesæi, ad hunc usque diem in Arabia degunt juxta Mare Mortuum, Elxæ cujusdam falsi prophætæ discipuli. Ex cujus stirpe Marthus & Marthina feminae duæ ætate nostrâ prodierunt, quas Dearum instar hæresis ista coluit. Eadem, porro cum Ebionæis omnino sentiunt. Quibus ea quæ ex Epiphanio dixi confirmantur. Difficile tamen captu mihi est, quomodo duæ illæ mulieres, quarum unam jam sua ætate obiisse dicit Epiphanius, de altera verò an esset superstes se dubitare, potuerint dici à Damasceno quatuor ferè seculis Epiphanio posteriore ætate suâ prodiiisse: nisi fortè intelligatur, eas ætate suâ prodiiisse, non quoad personas, sed quoad cultum & venerationem apud Elcesæitas sui ævi innovatam vel auctam.*

VII. De tempore quo exorta primò fuit hæc hæresis, difficultas & quidem ardua est. Nam ex una parte omnes præfati Veteres ejus Auctorem faciunt Elxai seu Elcesæi, qui Sectæ Ossenorum Epiphanio teste Hæres. 19. ut dixi se aggregavit imperante Trajano. Quo posito dici debet, hanc hæresim ortum suum habuisse ineunte seculo secundo. Ex alia autem parte præfati Patres post hæreses valdè eo tempore posteriores eam recensent. Scio ad hoc responderi posse, Epiphanium, Augustinum & alios non servasse ordinem temporis. Sed quid respondebitur illis, qui ejus ortum usque ad tempora Origenis, idest usque ad tertium seculum protrahunt? Ita ex Origene refert Eusebius L. 1. Hist. c. 38. *Alius quoquè tunc temporis error exortus est. Helcesæitarum scilicet hæresis, quæ quidem simul nata, simul extincta est. Hujus mentionem facit Origenes in homilia ad populum quâ Psalmum octogesimum secundum exponit his verbis: Quidam, inquit, nuper advenit de se ipse*

ma-

magnificè sentiens, utpotè qui impiam & nefariam Helceseitarum opinionem, quæ adversus Ecclesiam recens exorta est, possit defendere; cuius Sectæ dogmata subinde refert. Idem dicit Nicephorus L. 5. Hist. Eccl. c. 24. Quare Ittigius, qui accuratè hæreses omnes servato ordine temporis disponere studuit, hanc inter ævi Apostolici hæreses ultimo loco propterea recenset. Sed alia quoque exurgit difficultas. Si enim hæresis hæc vix nata extincta fuit, quomodo ad tempora Epiphani, imò & Damasceni, ut ipsi testantur, adhuc perdurabat? Non aliâ viâ utrique occurri posse crederem, nisi dicendo, hanc Sectam post suam primam originem sub Elxæo pluries sepultam, pluries variis in regionibus novis etiam auctam erroribus revixisse, & temporibus Origenis, & Epiphani, & etiam Damasceni alicubi præsertim in Syria exitisse: ubi eam temporibus Origenis quidam Alcibiades Apamæus impugnavit testibus Theodorito Lib. 2. Hæret. Fab. cap. 7., & Nicephoro citato loco.

§. II.

*Elceseitarum errores: de Christo, modo orandi
& sacrificiis.*

I. **P**erique Elceseitarum errores, cum iis quos in antecedentibus hæresibus refutavimus, quamvis specialibus induti fabulis, conveniunt. Quæ de Christo sentiebant, vel jam rejecta sunt, vel adeò ridicula, ut ea exponere idem ac rejecisse sit. In dogmate de uno rerum omnium principio ac opifice cum Catholicis sentiebant, testibus Theodorito L. 2. Hæret. Fab. c. 7. & Epiphaniio Hæret. 53. dicente: *Unum esse Deum asserunt, ac certis usurpatis Baptismis eundem venerantur.* Quibus apparet in modo Deum illum colendi errasse, quia fortè ritu Judaico eum colebant: unde subdit: *Judæis porro in omnibus adhaerant.*

II. Christum puram esse creaturam dicebat Elxai, & de ipso quædam portentosa simul ac ridicula effutiebatur, sicut etiam de Spiritu Sancto. Hæc Epiphanius referens Hæref. 19. n. 4. *Deinde, inquit, Christum veluti vim quondam describit, cujus & mensuras exponit: longitudinis scænos XXIV., hoc est miliaria xcvi. Latitudinis scænos vi. miliaria xxiv. nec minus portentose de crassitudine nugatur, deque pedibus ac cæteris omnibus fabulam pertexit. Ad hæc Spiritum Sanctum esse demonstrat sexu feminam, ac Christi similem, instar simulacri supra nubem, atque inter montes duos stantem.* Quam dementiam Hæref. 30. num. 17. idem Epiphanius

notat, Elxeum Ebionitis instillasse. Hanc & Sampſæos hausisse dicit Hær. 53. num. 1. his verbis: *Christum verbo-tenus consentitur, quem creaturam esse putant, & identidem apparere. Ac primum, Adami corpus fabricasse, rursumque cum ei visum est induere. Ei Christo nomen esse: hujus sororem Spiritum esse Sanctum muliebri videlicet specie. Utrumque verò tam Christum, quàm Spiritum Sanctum nonaginta sex milliarium altitudine, viginti quatuor latitudine constare.*

III. Quis ad hæc risum contineat? Si Christus & Spiritus Sanctus, ille mas iste femina, ille frater iste soror corpora tantæ altitudinis habent, ut nonaginta sex milliaria, tantæ latitudinis ut viginti quatuor spatii impleant, si dicunt eos identidem apparere oportuit, ut corpora tantum spatium occupantia, ut montem quemcumque altissimum superarent, ab aliquibus interdum visa fuerint. Quis ergo ea unquam vidit? Christus ex Virgine natus est, ab hominibus visus est, sed habens corpus magnitudinis, quâ ceteri homines: Spiritus Sanctus in Jesum visus est descendere, sed velut Columba. Ubi ergo immensa illa corpora reliquerunt? Certè non alibi, quàm in stulta Elcesæitarum imaginatione.

IV. Ut hæc declinarent, in alios errores inciderunt. Duos Christos confinxerunt, supernum, & infernum, & hunc descendisse in Jesum. Et sic Christum à Jesu distinguebant, quibus alias stultitias adjiciunt, quas Theodoritus L. 2. Hæret. Fabul. cap. 7. refert, & Nicephorus L. 5. Hist. c. 24., nimirum „ Unum siquidem & ipsi rerum omnium conditorem asserunt: non unum autem Christum, sed plures & diversos. Ac unum quidem sursum esse, alium autem deorsum: quem in multis antea inhabitasse, deinde verò etiam in Mariæ filio Jesu incoluisse dicunt. Jesum verò aliquando ex Deo esse, aliquando Matrem habuisse virginem referunt. Nonnunquam autem ne hoc quidem ajunt. Spiritum porro ipsum quoque transcorporari, atque in diversa ingredi corpora, & unoquoque tempore variè exhiberi sentiunt. Hæc Nicephorus, quæ breviori stylo Nicetas: *Christum creaturam esse, atque in Adam formatum fuisse fabulantur, cujus corpus pro suo arbitratu indueret, posteaque exueret.* Sic plures in unum coacervabant errores: duos Christos confingebant, quorum unum dicebant conscendisse in Jesum, & ita Christum à Jesu distinguebant: Christum esse creaturam asseriebant, quibus cum Cerinthianis & Ebionitis & aliis superius refutatis sentiebant. Jesum vel ex Maria natum dicebant, & insuper eo modo quo Christus in corpus Jesu descendit, antea in alios descendisse, & adhuc

& adhuc descendere pro libito. En eversa omnia Christianæ Religionis mysteria. Unde benè dicit Epiphanius, quòd Christum verbo-tenus confitentur.

V. Ut fidem hisce & aliis nugis adstruerent, refert Theodorus citato loco, & ante ipsum ex Origene Eutèbius L.6. Hist. c.38. *Librum etiam proferunt, quem à Calo delapsum affirmant, eosque qui auscultaverint illi & crediderint, peccatorum veniam consecuturos, & quidem diversam ab illa peccatorum remissionem, quam Jesus Christus impertiit. Quem librum reitert etiam Nicephorus Lib. 5. cap.24. citato. Epiphanius hæresi 53. duos libros eos habuisse dicit: unum à suo magistro Elxai compositum, alium ab ejus fratre; utroque usos fuisse dicit Samæos: Qui cum nec Christiani sint, nec Judæi, nec Gentiles, medii cujusdam generis, sive potius nihil omnino sunt. Quin etiam alium habere se librum prædicant, quem fratri Elxai tribuunt. Ex libris autem Christianorum Secta hæc, inquit ex Origene Eusebius L.6.c.38., ex universo Sacra Scriptura Canone quadam rejicit, quibusdam verò utitur testimoniis, tum ex Vetere Instrumento, tum ex Evangelio. Paulum quidem Apostolum integrum repudiat.*

VI. Quandam orandi formam ab Elxai præscriptam, & ab ea quam Salvator Matth. 6. docuit valdè diversam, in usu Elcesitæ habebant: Ita enim (inquit Epiphanius Hæres. 19. n.4.) *orare jubet: „ Abar, Anid, Moib, Nochile, Daasim, Ane, Daasim, Nochi- „ le, Moib, Anid, Abar, Selam „. Quæ hunc sensum continent: Transseat abjectionis à patribus meis propagata, condemnationis ipsorum, & conculcationis ipsorum, & laboris ipsorum, conculcatione in condemnatione per patres meos ex abjectione quæ præterit in Apostolatu perfectionis.... Quod si quis singulorum verborum interpretationem desideret, eam subjicit Epiphanius hoc modo: Abar transseat, Anid abjectionis, Moib à Patribus meis propagata, Nochile condemnationis ipsorum, Daasim, & conculcationis ipsorum, Ane & laboris ipsorum, Daasim conculcatione, Nochile in condemnatione, Moib per patres meos, Anid ex abjectione, Abar quæ præterit, Selam Apostolatu perfectionis. Hanc inanem precandi formulam ex præfato suo libro, ut fucum faceret Elxai, tradidisse idem Epiphanius refert. Quid hæc prece peteret, nec ipse auctor fortè novit.*

VII. In modo etiam orandi se à Christianis fecernere voluerunt; ubi enim primitiva Ecclesia versâ ad Orientem facie orare consueverat, ipsi Elxai magistri sui præcepto ad Orientem versâ facie orare prohibebant; non tamen quòd absolutè ad Orientem orare non possent, sed quòd semper versâ facie Jerosolymam ora-

rent. Ita Epiphanius Hæres. 19. num. 3. *Nam, inquit, & ad Orientem converso vultu precari prohibet, negatque intentos in eam partem nos esse oportere: sed Jerosolymam versùs undequaque prospicere; ut qui ad Orientem Jerosolymam respiciunt, in eam ad occasum faciem obvertant, qui verò ad Occidentem siti sunt eòdem ad Orientem vertant &c.* Volebat ergo ut omnes versâ Jerosolymam facie semper orarent, ita ut qui Jerosolymam ab Occidente habebant ad Occidentem orarent: qui verò eam ad Orientem respicerent, orarent ad Orientem. Hoc, quod absolute ad merum ritum & disciplinam spectabat, ex malitia tamen & fine illud præcipientis ad dogma referebatur. Volebat enim, ut hoc factò Judaicum morem retinerent, & Judaïsmum in hoc profiterentur, & à ritu Christianorum discederent, sicut qui modò vellet ritus Ecclesiæ ommittere, ut Protestantibus se conformaret, nedum contra Ritus, sed contra Dogma peccaret.

VIII. Porrò Judæos versâ Jerosolymam facie semper orare, consuevisse, imò debuisse, apparet tum ex Danielis cap. 6. v. 10. tum Ezechielis c. 8. v. 15., ubi inter majores abominationes recensetur illa senum, qui verso dorso à Templo, ad Orientem, & ad Solis ortum orabant, quia hoc factò imitabantur Gentiles, qui Solem adorantes, ad Orientem adorabant. Quare S. Hieronymus in dictum caput dicit eos reprehendi: *Eò quod contempto Domino adorarent Solem, idest Domini creaturam, præcipiente ipso Domino per Moysen: quòd nequaquam in morem Gentilium contra Orientem Deum adorare deberent; sed in quacumque fuissent Orbis parte, sive ad Orientem, sive ad Occidentem, sive ad Meridiem, sive ad Septentrionem, adorarent contra Templum, ubi Sancta Sanctorum habitare Dominus credebatur. Quod quidem & Danielem in Babylone fecisse legimus, qui apertis fenestris Cœnaculi sui adorabat Dominum contra Templum, quod erat in Hierusalem.* Hæc Hieronymus. Cum ergo Elxai suos præciperet hoc modo adorare, planum est voluisse ut ritu Judaico adorarent.

IX. Primitiva verò Ecclesia, ut à ritu Judæorum secederet, impleto jam de Templo Jerosolymorum prophetico mysterio, ad Orientem adorare cœpit. Hanc consuetudinem ex Apostolica non scripta traditione derivatam dicit S. Basilii Magni Lib. de Spiritu S. c. 27.: ubi recensens consuetudines, quæ etli non scriptæ suo tempore observabantur: *Ut ad Orientem, inquit, versi prece-mur, quæ nos docuit Scriptura?* Damascenus etiam Lib. 4. Fidei Orthod. c. 12. ait: *Non temerè, nec sine causâ ad Orientem conversi adoramus.* Deinde assignans causas primò dicit: *Quoniam igitur Deus spirituale lumen est ac Christus sol justitiæ & Oriens in Sa-*
cris

cris Litteris appellatur; idcirco pars illa, quæ Sol oritur, ipsi adorationis ergo assignanda est. Deinde aliis expositis causis, nempe quod Paradisus, à quo expulsus Adam è regione Paradisi habitare iussus fuit: Quo fit, ut veteris patriæ desiderio defixis ad eam oculis, Deum adoremus: Rursus quod Moysis tabernaculum & propitiatorium ad Orientem velum habebat: quod Tribus Juda cæteris præstantior ad ortum Solis castrametabatur: quod in Templo Salomonis Porta Domini ad Orientem sita erat; deinde subdit: Quin imò Dominus cùm in Cruce penderet, verso ad Occasum vultu erat: eaque de causa ita adoramus, ut in eum oculos intendamus. Rursus cùm in Cælum reciperetur versùs Orientem serebatur, sicque à Discipulis adoratus fuit, atque ita venturus est, sicut enim in Cælum euntem conspexerunt. Quemadmodum ipse Dominus dixit (Matth. 24. v. 27.), Sicut fulgur exit ab Oriente, & paret usque in Occidentem, ita erit & adventus filii hominis,,. Quocirca quia ejus adventum expectamus, ad Orientem adoramus. Est autem Apostolorum hæc traditio in Sacras Literas minimè relata. Complura enim illi nobis tradiderunt, quæ scriptis consignata non fuere. Ita Damascenus.

X. Prædictis rationibus, quarum alias alii Patres addidere, hanc adjungit S. August. L. 2. de Serm. Domini in Monte cap. 5. Cùm, inquit, ad orationem stamus, ad Orientem convertimur, unde Cælum surgit: non tanquàm ibi habitet & Deus, quasi cæteras mundi partes deseruerit, qui ubique præsens est, non locorum spatiis, sed majestatis potentia; sed ut admoneatur animus ad naturam excellentiorem se convertere, idest ad Deum, cùm ipsum corpus ejus, quod est terrenum, ad corpus excellentius idest ad corpus cælestis convertitur. Convenit etiam gradibus religionis, & plurimùm expedit, ut omnium sensibus & parvulorum & magnorum benè sentiat de Deo. Et ideo qui visibilibus adhuc pulchritudinibus dediti sunt, nec possunt aliquid incorporeum cogitare; quoniam necesse est, Cælum præferant terræ, tolerabilior est opinio eorum, si Deum quem adhuc corporaliter cogitant, in Cælo potius credant esse, quàm in terra, ut cùm aliquando cognoverint, dignitatem animæ cælestis etiam corpus excedere, magis eum quærant in anima, quàm in corpore etiam cælesti &c.

XI. Ad Orientem quoque Veteres Ecclesias & Tempia erigere consueverant. Hinc Tertullianus L. adv. Valentinianos cap. 3. de Ecclesia loquens: *Nostra*, inquit, *Columbæ domus simplex, etiam in editis semper & apertis & ad lucem, amat figuram Spiritus Sancti Orientem Christi figuram.* Et S. Paulinus Epist. modò 32. (aliàs 12.) ad Severum de quadam Basilica: *Prospectus verò Basilicæ*, inquit, *non, ut usitator mos est, Orientem spectat.* Atque adeò tenaces fuere præci illi Fideles in hoc ritu respiciendi Orientem, ut non

solum preces & Ecclesias ad Orientem verterent, sed etiam suorum corpora defunctorum supina in sepulchris facie ad Orientem conversâ collocarent. Atque hoc modo Corpus Christi conditum fuisse, putat Beda in Cap. 16. Marci, ubi ait: *Introeuntes ab Oriente in domum illam rotundam, quæ in petra est excisa, viderunt Angelum sedentem ad meridianam partem loci illius, ubi positum fuerat Corpus Jesu: Hoc enim erat in dextris: quodd nimirum Corpus, quod supinum jaceus caput habebat ad Occasum, dexteram necesse est habere ad Austrum.* Eodem modo condita fuisse Corpora Apostolorum Petri & Pauli, refert Isidorus Hispalensis de Vita & morte SS. c. 79. & 80. *Ibi contra Orientalem plagam &c.* Quod testatur quoque Durandus in Ration. Divin. Offic. cap. 7. dicens: *Debet autem quis sic sepeliri, ut capite ad Occidentem posito, pedes dirigat ad Orientem, in quo quasi ipsâ positione erat; & innuit, quodd promptus est, ut de Occasu festinet ad Ortum, de mundo ad seculum.*

XII. Ritus iste ad Orientem orandi etiam Romæ anno 443. servabatur; sed cum Manichæi & Priscillianistæ tunc Romæ latentes eo abuterentur adorando Solem, S. Leo Magnus ad eos detegendos, ne fideles eorum errori velut communicantes traderentur, talem Ritus interdixit. Ita ad dictum annum refert ex Baronio Spondanus num. 1., Cum, inquit, ex majorum præscripto
 „ Christiani Deum adorare consueverant ad Orientem conversi:
 „ quia tamen etiam id ipsum facitabant, impiè Solem colentes,
 „ Manichæi, interdixit (S. Leo) tunc Catholicis ejusmodi ad
 „ Orientem Solem usum adorandi, ne quod commune cum Manichæis haberent, & ex eo ipsi Manichæi facilius detegerentur.
 Videri potest S. Leo Serm. 7. de Nat. Domini num. 4., ubi colligitur, eum generaliter non damnasle hunc ritum; sed solum in Ecclesia & Basilica S. Petri, quæ cum ad Occidentem verteretur, qui in ingressu ad Orientem adorare volebant, ad Aram seu Arcam terga vertere cogebantur. Hoc S. Leo exponit dicens: *Quod Christiani adeo se religiose facere putant, ut priusquam ad B. Petri Apostoli Basilicam, quæ uni Deo vivo & vero est dedicata, perveniant, superatis gradibus quibus ad suggestum Arcæ superioris ascenditur, converso corpore ad nascentem se Solem reflectant, & curvatis cervicibus, in honorem se splendidi Orbis inclinent. Quibus apparet, eum hunc ritum etiam prohibuisse, quia apud aliquos in superstitionem conversus erat, quali pluris facerent corporalem lucem, quam Deum lucis auctorem.*

XIII. Sed unde digressi sumus revertamur. Elxai, qui Judaicis ritibus alioquin addictus erat, sacrificia omnia velut Deo ingrata rejiciebat. Ita S. Epiphanius Hæres. 19. num. 3. *Sed circula-*

culatoris amentiam attende. Etenim Sacrificia penitus condemnat, & à Deo aliena esse pronuntiat; simul negat illa unquam Deo in lege vel Patribus oblata, & tamen Ierosolymam orantes intueri præcipit: ubi & altare quondam & sacrificia fuerunt. Quibus secum pugnare nebulonem istum, sicut & in aliis, ut infra, demonstrat. Magistrum suum sequebantur Elcesaitæ. Hi ergo si reprobarent sacrificia, quæ suis Diis immolabant Pagani, de hoc laudandi essent: sed cum damnarent sacrificia vero Deo in lege oblata; imò negarent ea unquam fuisse oblata, in primo impii erunt, & in secundo mendaces, cum in Veteri Testamento passim memoria fiat varii sacrificiorum generis, quæ Deo volenti ac præcipienti offerebantur.

XIV. Sacrificia ergo Deo ingrata non fuere, imò tanquam sibi soli debita præcepit: quod probe sciens Damon, illa Deo eripere, & sibi usurpare conatus fuit: quod notans S. Augustinus L. I. contra Adv. Legis & Prophet. c. 18. Unum, inquit, sciant insipientes, tardi ad intelligendum & præcipientes ad reprehendendum, quod Damon sibi sacrificium non exigeret, nisi Deo vero deberi sciret: Falsus enim Deus sic se vult honorari ab eis quos decipit, quomodo verus Deus ab eis quibus consulit; & maximè sacrificium est, quod præcipue debetur Deo. Nam obsequia cætera, quæ Divinitati exhibentur, ausi sunt sibi etiam superbiæ fastu homines arrogare. Rarissimi autem commemorantur, qui sibi ut sacrificaretur, cum regiâ potestate possent, ausi fuerint imperare. Quicumque tamen ausi sunt, per hoc se Deos haberi voluerunt. Sacrificiis autem Deum non egere, quis nescit? Sed nec laudibus nostris eget. Verùm sicut nobis, non illi, utile est laudare Deum; sic nobis, non illi, utile est offerre sacrificium Deo. Ita in Manichæis Elcesaitas confutat Augustinus.

XV. Illos etiam tacito nomine aggreditur S. Doctor L. 10. de Civit. Dei c. 19. his verbis: Qui autem putant, hæc visibilia sacrificia Diis aliis congruere, illi verò tanquam invisibili invisibilia, & majori majora, meliorique meliora, qualia sunt puræ mentis, & bonæ voluntatis officia, profectò nesciunt, hæc ita esse signa illorum, sicut verba sonantia signa sunt rerum. Quocirco sicut orantes atque laudantes ad eum dirigimus significantes voces, cui res ipsas in corde quas significamus offerimus: ita sacrificantes non alteri visibile sacrificium offerendum esse noverimus, quàm illi, cujus in cordibus nostris invisibile sacrificium nos ipsi esse debemus.

Deveniens verò ad Sacrificia veteris Legis cap. 20. ostendit, ea fuisse Deo accepta, quia & illa fuerunt signa veri Sacrificii Christi quo se ipsum obtulit, & cujus Sacramentum est quotidianum Ecclesiæ Sacrificium, dicens: Unde verus ille Mediator, inquantum formam servi accipiens Mediator effectus est Dei & hominum homo Christus

Iesus Iesus, cum in forma Dei Sacrificium cum Patre sumat, cum quo & unus Deus est; tamen in forma servi Sacrificium maluit esse, quam sumere, ne vel hac occasione quisquam existimaret, cuique sacrificandum esse creaturæ. Per hoc & Sacerdos est, ipse offerens, ipse & oblatio. Cujus rei Sacramentum quotidianum esse voluit Ecclesia Sacrificium, quæ cum ipsius Capitis corpus sit, se ipsam per ipsum discit offerre. Hujus veri Sacrificii multiplicia variaque signa erant Sacrificia prisca Sanctorum, cum hoc unum per multa figuraretur, tanquam verbis multis res una diceretur, ut sine fastidio multum commendaretur. Huic summo veroque Sacrificio cuncta Sacrificia falsa cesserunt. His S. Augustinus nedum Elcesaitas mirè contutat, sed & monet recentiores Hæreticos, ne Eucharistiam Ecclesiæ Sacrificium esse inficientur.

§. III.

Elcesaitarum errores de Fide, Virginitate, Incantationibus & Juramento.

I. **F**ACTO vel voce Deum ac fidem coram hominibus negare exterius liberum ac licitum esse, Elcesaitarum à suo Magistro haustus error erat. Hic enim, referente Epiphanio Hæres. 19. num. 3. *Negare Deum sequaces suos edocuit, cum execrandorum idololatriæ sacrorum per simulationem participes esse suavit. Tum luculentius iisdem imposuit, cum ore tenus ejurari posse fidem, nec in eo crimen ullum esse dixit. Hunc morbum insanabilem pronuntiat Epiphanius: Cum enim os ipsum, quo confessio veritatis exprimitur, ad mendacium subornetur; quis istis credat, non vehementer ipsos decipi, cum perspicue Divinis in Literis ex Sancti Spiritus afflatu præscriptum sit. (Rom. 10. v. 10.)* „Corde ad justitiam credi, ore verò ad salutem confessionem fieri,“ Hoc errore eum notat etiam ex Origene Eusebius L. 6. Hist. c. 38. his verbis: *Docet præterea, indifferentem rem esse Christum abnegare; & eum qui sapit, ore quidem tenus in ipso discrimine negaturum esse, sed non ex animi sententia.* Primus qui hunc errorem induxit fuit Simon Magus, quem postea ejusdem furfuris alii secuti fuere: contra quos egi.

II. At non adverterunt erronei isti, quòd Christus Matth. 10. v. 33. dixit: *Qui autem negaverit me coram hominibus, negabo & ego eum coram Patre meo qui in Cælis est.* Ubi dum ait *coram hominibus*, de eo loquitur, qui facto vel voce ipsum exterius negat. Nec eos juvat dicere, se corde eum non negare, sed voce tantum. Nam si licet in corde loqui veritatem in ore mendaci, licet etiam coram

coram persecutoribus retentâ in corde veritate mendacium ore proferre, ut ita intus Christianus sit maneatque, foris verò Paganus evadat: *Quæ sententia* (inquit S. Augustinus Lib. contra Mendacium c. 2.) *Sanctos Martyres exhonorat, immo verò anfert sancta omnino martyria. Justius enim sapientiusque facerent, secundum istos, si persecutoribus suis non se confiterentur esse Christianos, nec eos suâ confessione facerent homicidas: sed potius mentiendo & negando quod erant, & ipsi saluum haberent carnis commodum, cordisque propositum, & illos conceptum animo scelus implere non sinerent.* Ineptè ergo, ne dicam injustè secundum istos egissent Martyres, qui cum possent exterius negando fidem, eâ corde retentâ & propriam tueri vitam, & persecutorum scelus impedire, & hoc sinè injuria Dei, hoc non fecerunt: ac propterea meritò stultos eos (ut alibi dixi ex Lact. L. 5. Divin. Inst. c. 19.) appellassent Pagani, quando cum possent incolumes tribus digitis thura apprehensâ in focum jactare, mallent se ipsos perdere.

III. At contra istos mendacii patronos insurgunt tot millia ex omni sexu & ætate, qui, ut integro Tomo præcedenti demonstravi, ne Christus coram Patre eos negaret in Cœlis, etiam cum vite dispendio confiteri eum maluerunt coram hominibus in terris; & dicent cum S. Augustino L. de Fide & Symbolo c. 1. *In sempiterna iustitia regnaturi à præsentī seculo maligno salvi fieri non possumus; nisi & nos ad salutem proximorum nitentes, etiam ore profiteamur fidem, quam corde gestamus.* Et sanè quantum non solum ipsis, sed universæ Ecclesiæ in confitendo fidem ore quam corde gestabant, proluerint, ea quæ in præcedente Tomo dixi evidenter ostendunt. Quare meritò Tertullianus in Apologet. cap. 27. contrariam sententiam non ab alio quàm à Diabolo, Fidelium salutē & gloriæ Christi invidente, inspiratam fuisse hisce verbis pronuntiat: *Sed quidam dementiam existimant, quodd cum possumus & sacrificare in præsentī, & illæsi abire, manente apud animum proposito, obsequationem salutis præferamus. Datis scilicet consilium, quo vobis abutamur. Sed agnoscimus unde talia suggerantur, quis totum hoc agitet, & quomodo nunc astutiâ suadendi, nunc duriâ saviendi, ad constantiam nostram deiciendam operetur. Ille scilicet spiritus demoniacæ & angelicæ paraturæ, qui noster ob divortium amulus, & ob Dei gratiam invidus, de mentibus vestris adversus nos præliatur, occultâ inspiratione, modulatis & subornatis ad omnem, quam in primordio exorsī sumus, & judicandi perversitatem, & saviendi iniquitatem.* Ita Tertullianus.

IV. In patrociniū sui afferebat Elxai exemplum cujusdam Phinces Sacerdotis, qui sub Dario Rege, adorans Dianam, periculum

riculum vitæ evasit. Refert hoc Epiphanius Hæres. 19. num. 2. his verbis: *Adducit & hujus rei testem Veterator Phineem quemdam Sacerdotem è Levitico genere, de Aaronis ac Veteris illius Phinees stirpe: qui regnante Dario, in captivitate Babylonica Suis, adorata Dianâ, periculum capitis effugit*, Sed jure Epiphanius subdit,, *Ita ejus omnia falsa sunt ac ridicula commenta*. Ubi enim in Sacra Historia legit, hunc Phineem juniorem sub Dario vel unquam extitisse? ubi sub Dario aliquem ex Judæis Dianam adorare coactum fuisse didicit? Duplicis Phinees Scriptura meminit: unius Eleazari filii, Aaronis nepotis, Summi Sacerdotis tertii; alterius filii Heli: neuter tamen nec ullus sub Dario vixit. Nec sub Dario Judæorum quispiam Dianam adorare coactus legitur. Ab eo in causâ Religionis unicum prodiit Edictum, scilicet de non adorando Deu, nisi ad mandatum ipsius. Quâ stante lege solus Daniel instigantibus Satrapis, Dario vel invito, ut legitur c. 6. in Lacum Leonum missus fuit. Cæterum quàm averfi fuerint Judæi à simulanda falsa religione, testantur omnes illi, qui L. 2. Machab. mortem potius subire voluerunt. Et maxime factum Eleazari scribæ ac senis, quod narratur c. 6., qui maluit mori quàm suillas carnes etiam per simulationem gustare.

V. Asferre possunt exemplum Jehu, qui re verâ simulavit se esse cultorem Baal 4. Reg. c. 10. qui tamen à Deo laudatur ibi v. 30. *Quia studiosè egisti quod rectum erat, & placebat in oculis meis, & omnia quæ erant in corde meo fecisti contra domum Achab, filii tui usque ad quartam generationem sedebunt super thronum Israel*.

At respondetur, laudari à Deo Jehu, non propter simulationem, sed quia paruit Deo præcipienti, ut destrueret domum Achab, & ob hoc temporalem ei remunerationem promisit. Et ideo Deus opus bonum quia à se præceptum laudavit, & temporali premio muneravit, non tamen modum & animum quo Jehu illud executus fuit. De hoc egi Tom. 1. in 1. 2. q. 3. de Act. moralit. Dub. 4. §. 3. num. 11., ubi etiam Dub. 7. §. 3. alia exempla, quæ mendacium excusare videntur protuli, & pro veritate respondi. Ac demum materiam hanc fusè tractavi Tomo 1. in 2. 2. Quest. 4. de actu externo Fidei Dub. 3. & 4. quæ videri possunt; dum interim ad ulteriora procedam. Hoc uno concludere placet, quod Elcesaitæ, qui se teneri dare pro Christo vitam negabant, eam dare pro quacumque de stirpe sui Elxai parati erant: ait enim Epiphanius Hæres. 53. *Pro Elxai verò stirpe morti se se committere non dubitant*. Nec mirum: de Christo enim nimis abjectè sentiebant: *Christum* (inquit Epiphanius ibidem) *verbo tenus constitunt, quem creaturam esse putant*, ut superius dixi; & de Elxai eorum magi-

magistro Hæref. 19. n. 3. idem Epiphanius: *Christum*, inquit, licet nomine ipso fateatur, cum ita loquitur, „Magnus Rex est Christus, „: utrum id tamen de Christo Jesu Domino nostro pronuntiaverit, ex fraudolento illo adulterinoque libro, quem de nugis suis edidit, nondum animadvertere potui. Neque enim istud disertè significat; sed Christi nomen simpliciter appellat; quasi alterum, quantum intelligimus, indicet vel expectet (ut Judæi).

VI. Virginitatem insuper & continentiam nullius esse pretii asseriebant: ita nimirum ab Elxai principe suo edocti, de quo Epiphanius Hæref. 19. n. 1. *Præterea*, inquit, *virginitatem odit, continentiam damnat, & ad iuendas nuptias compellit*. In hoc errore Elceseitæ emulabantur Nicolaitas, Gnosticos, & maximè Basilidem de quibus supra: quem etiam nostrorum temporum Heretici amplexati sunt. Contra quos cum fusè egerim in Vera Ecclesia Tom. 2. p. 1. art. 5., & in Colloquiis Theologico-Polemicis Clafs. 1. s. propterea paucis hîc me expediam: eo vel maximè, quia cum Paulum eximium continentie præconem repudient, & Christi ipsius dictis, qui Matth. 19. ut præstantiores pronuntiat eos *qui se castraverunt propter Regnum Cælorum*, eam, quam volunt, adhibent fidem; tempus inutiliter terere existimarem, si ex eorum testimonio contra illos agere vellem.

VII. Quid ergo faciam? Paganos adversus eos movebo, ut videant quanto apud eos in pretio fuerit Virginitas. Romani, qui certè Pagani erant, S. Hieronymo Lib. 1. adv. Jovin. testante, Virgines præ cæteris in honore habebant, cujus maximum signum est, quòd Consules & Imperatores & in curribus triumphantes, qui de superatis gentibus trophæa referebant, solis eis, nempe Virginitibus, de via cedere soliti essent. Vestales Virgines tanti faciebant, adeoque de earum custodienda virginitate zelatores rigidi erant, ut vel ipsa violatæ suspicio reatus esset ad mortem. Unde Claudia Vestalis de hoc falsò accusata, ut suæ innocentie perhiberet testimonium, fertur cingulo duxisse navem, quam multa millia hominum trahere nequiverant. Et referente Valerio Maximo Lib. 8. c. 1. Tatia Vestalis de stupro delata, ut injusti criminis falsitatem demonstraret, de Tyberi cribro aquam hausit, & nec guttâ defluente, publicè asportavit: Deo etiam miraculis attestante, Virginitatem quamvis in Paganis feminis positam sibi placere: ideoque Romani Sacerdotes Vestæ, quæ omnes Virgines, erant, præ cæteris venerabantur. Sybillarum etiam, quas decem Varro fuisse dicit, *insigne Virginitatis fuit, & Virginitatis premium divinatio*. Hæc & alia S. Hieronymus: ex quibus apparet, quanti etiam apud Ethnicos fieret Virginitas. quæ ideo se collegisse dicit,

ut os adversariis obstrueret, qui dicebant hoc genus, nempe Virginitatis servandæ, numquam apud Mundi Sapientes fuisse probatum, & novum dogma contra naturam Religionem nostram prodidisse. Cetera apud eundem S. Hieronymum percurrere relinquo.

VIII. Virginitatem præstantiorem esse nuptiarum usu, idem S. Hieronymus dicto L. r. adv. Jovin. indè ostendit, quòd Adam & Eva licet in Paradiso à Deo conjuncti, in Paradiso tamen virgines permanserunt, & solum ejecti è Paradiso copulati sunt: unde ait: *Ejiciuntur de Paradiso, & quod ibi non fecerunt, in terra faciunt, ut statim à principio conditionis humanæ, Virginitatem Paradisus, & terra nuptias dedicaverit.* Virginitatis præstantiam toto Libro de Sancta Virginitate extollit S. Augustinus, ex quo S. Thomas 2. 2. q. 152. art. 4. sequentes rationes deducit: postquam enim dixit, fuisse errorem Joviniani, qui posuit, Virginitatem non esse matrimonio præferendam, subjungit: *Qui quidem error præcipue destruitur, & exemplo Christi, qui & Matrem Virginem elegit, & ipse Virginitatem servavit; & ex doctrina Apostoli, qui 1. ad Cor. 7. Virginitatem consulit tanquam melius bonum.* Et etiam ratione: *tum quia bonum Divinum est potius humano bono: tum quia bonum animæ præfertur bono corporis: tum etiam quia bonum contemplativæ vitæ præfertur bono activæ. Virginitas autem ordinatur ad bonum animæ secundum vitam contemplativam, quod est cogitare ea quæ sunt Dei. Conjugium autem ordinatur ad bonum corporis, quod est corporalis multiplicatio generis humani, & pertinet ad vitam activam; quia vir & mulier in matrimonio viventes, necesse habent cogitare quæ sunt mundi, ut patet per Apostolum 1. Cor. 7. Unde indubitanter Virginitas præferenda est continentia conjugali.* Ita S. Thomas.

IX. Attamen (inquit idem S. Doctor ibidem ad primum) *meritum non solum pensatur ex genere actus, sed magis ex animo operantis.* Habuit autem animum Abraham sic dispositum, ut paratus esset Virginitatem servare, si esset tempori congruum. Ex quo meritum continentia conjugalis in ipso æquatur merito continentia virginalis in Joanne respectu præmii substantialis, non autem respectu præmii accidentalis. Unde Augustinus dicit in Libro de Bono conjugali c. 21. quòd „ Joannis celibatus, & Abrahæ connubium pro temporum „ distributione Christo militaverunt: sed continentiam Joannes „ & in opere, Abraham verò in solo habitu habebat. „ Insuper ex eodem S. Augustino infert S. Thomas ibi ad 2., fieri posse, ut conjugatus ex parte personæ melior sit, quàm virgo: puta si habeat animum ad virginitatem servandam magis paratum, quàm ille, qui est actu virgo. Vel si tortè ille qui non est actu virgo ha-

beat

beat aliquam excellentiorem virtutem. Hoc ex S. August. L. de Bono Coniugali c. 22. & Lib. de Virginitate c. 44.

X. Monet tamen idem S. Th. ibi in arg. Sed contra ex S. August. Lib. de Virginit. c. 19. Non ita prælerendam esse Virginitatem nuptiis, ut nuptias damnemus; sicut enim Elceicitæ Virginitati contrarii modò apparent, ita ex opposito Severus, Tatianus & Encratitæ, contra quos supra egi, Nuptias ut Diaboli inventum reprobabant. *Nam (inquit S. August. loco mox citato) cum error uterque sit, vel æquare sanctæ Virginitati nuptias, vel damnare: nimis invicem fugiendo, duo isti errores adversâ fronte confligunt, quia veritatis medium tenere noluerunt, quo & certâ ratione, & Sanctorum Scripturarum auctoritate, nec peccatum esse nuptias invenimus, nec eas bono, vel virginalis continentiæ vel etiam vidualis æquamus. Alii quippe appetendo virginitatem, nuptias tanquam adulterium detestandas esse putaverunt: alii verò descendendo connubium, excellentiam perpetuæ continentiæ nihil mereri amplius quàm conjugalem pudicitiam voluerunt; quasi vel Susannæ bonum Maria sit humilitatio, vel Mariæ majus bonum Susannæ debeat esse damnatio.* Ita S. Augustinus.

XI. Magiæ & Incantationibus, necnon Dæmonum invocationibus deditos fuisse Elceicitas scribit Theodoritus Lib. 2. Hæret. Fab. c. 2. his verbis: *Incantationibus autem, & Dæmonum invocationibus & baptisimatibus hi quoque usi sunt in elementorum confessione. Astrologiam autem & Magicam, & Mathematicum errorem amplectebantur, & se ipsos Prognosticos appellabant.* Ita etiam Nicetas refert. Huic errori facem prætulit Simon Magus, quem postea alii & maximè Basilides imitati sunt, contra quos supra egi. Adversus dæmoniacam Magiam insurgit S. Augustinus L. 8. de Civit. Dei c. 17. ostendens summam esse dementiam aliquâ religionem Dæmonibus subdi, à quibus ne illis similes simus, per veram Religionem liberamur; & post multa concludit: *Quæ igitur causa est, nisi stultitia errorque miserabilis, ut ei te facias venerando humilem, cui te cupias vivendo dissimilem, & religione colas, quem imitari nolis; cum religionis summa sit, imitari quem colis?*

Lib. autem 9. de Civit. Dei cap. 22., ubi assignat differentiam inter scientiam Sanctorum Angelorum & scientiam Dæmonum, offendit, istos in cognitione futurorum sæpè falli, non autem Sanctos Angelos, quia hi eo bono quo boni sunt ex toto perfruuntur. *Et ideo certius temporalia & mutabilia ista novērunt; quia eorum principales causas in Verbo Dei conspiciunt, per quod factus est Mundus: quibus causis quedam probantur, quedam reprobantur, cuncta ordinantur. Dæmones autem non æternas temporum causas,*

Quodammodo cardinales in sapientia Dei contemplantur, sed quorundam signorum nobis occulorum majore experientia multò plura quam homines futura prospiciunt. Dispositiones quoque suas aliquando prænuntiant. Denique sæpè isti, nunquam illi omnino falluntur. Aliud est enim temporalibus temporalia, & mutabilibus mutabilia conjectare, eisque temporalem & mutabilem modum suæ voluntatis & facultatis inserere, quod Dæmonibus certâ ratione permixtum est: aliud autem in æternis atque incommutabilibus Dei Legibus, quæ in ejus sapientia vivunt, mutationes temporum prævidere, Deique voluntatem, quæ tam certissima quam potentissima est omnium, spiritus ejus participatione cognoscere, quod Sanctis Angelis rectâ discretione donatum est.

XII. Hoc S. Augustini ratiocinio magis magisque apparet fallacia & vanitas Astrologiæ, quam vocant Judiciariam, quâ aliqui ex sideralibus aspectibus horoscopus formare & futuros cuique eventus præfigere conantur. Si enim Dæmones, quamvis majori cognitione præditi, quia tamen eorum cognitio temporalibus, mutabilibus, & non certis causis innititur, sæpè falluntur: quid præsumet homo, qui præfatas causas nec certò explorare potest, cujus lumen etiam dæmoniaco valde deficiens est? At estò causas illas exactè penetraret, cum tamen incertum dicant ordinem ad eventum, qui ab aliis ignotis causis impediri potest; quomodo de de eo quod eventurum sit, judicium certum formare poterit? Exponit hoc S. August. L. 1. de diversis Quest. ad Simplicianum qu. 1. n. 3. in Esau & Jacob ab eodem patre eodem tempore satis, eadem matre conceptis, eodem tempore natis, & consequenter sub eodem siderali aspectu positis: nonne de utroque eorundem eventus astrologus prædixisset? Et tamen quanta diversitas inter utrumque fuit, quia æterna & immutabilis causa de uno aliter ac de altero disposuerat.

At Astrologorum error (advertit idem S. Doctr. L. 5. de Civit. Dei c. 7.) inde etiam procedit, quòd advertere nolunt, sub eodem siderali aspectu alia plura oriri, quorum tamen diversus eventus est. Cujus naturale & frequens exemplum proponens ait: Nec illud volunt advertere, quòd electo ad seminandum agrum die, tam multa grava in terram simul veniunt, simul germinant, exortâ segete simul herbescunt, pubescunt, flavescunt, & tamen inde spicas cæteris coevas, atque, ut ita dixerim, congerminales, alias rubigo interimit, alias aves depopulantur, alias homines avellunt. Quomodo istis alias constellationes fuisse dicturi sunt, quas tam diversos exitus habere conspiciunt? An eos panitebit his rebus dies eligere, easque ad cæleste negabunt pertinere decretum, & solos sideribus subdeant

homines, quibus solis in terris Deus dedit liberas voluntates ? Quasi dicar: Si Astrologi divinari nesciunt quæ naturaliter eventura sunt, quomodo prædicere audent ea quæ ex libera hominum pendent voluntate, quæ fideribus non subest ? Concludit ergo: *His omnibus consideratis, non immeritò creditur, cum Astrologi mirabiliter multa vera respondent, occulto instinctu fieri spirituum non honorum, quorum cura est has falsas & noxias opiniones de astralibus satis inferere humanis mentibus atque firmare, non horoscopi notati atque inspecti aliquâ arte, quæ nulla est.* Ita S. Augustinus contra Elcesaitas, & alios similes.

XIII. De divinatione & variis eam exercendi modis agit doctè ut de more S. Thomas 2. 2. totâ quæst. 95., ubi art. 1. dicit, quod futura dupliciter prænosci possunt: uno quidem modo in suis causis, alio modo in se ipsis. Causæ autem futurorum aliæ produciunt effectus suos ex necessitate & semper, & huiusmodi effectus possunt per certitudinem prænosci & prænuntiari, sicut Astrologi prænuntiant eclipses futuras: quædam produciunt suos effectus, non ex necessitate & semper, sed ut in pluribus, rarò tamen deficiunt; & per huiusmodi causas possunt prænosci effectus futuri, non quidem per certitudinem, sed per quandam conjecturam, sicut Astrologi per considerationem stellarum quædam prænoscere & prænuntiari possunt de pluviis & siccitatibus, & medici de sanitate vel morte. Quædam verò sunt causæ, quæ si secundum se considerentur, se habent ad utrumlibet, quod præcipue videtur de potentiis rationalibus: & harum effectus in suis causis prænosci non possunt, cum non habeant determinatam inclinationem ad ipsos.

Et idèd, pergit S. Doctor, effectus huiusmodi prænosci non possunt, nisi in se ipsis considerentur. Homines autem in se ipsis huiusmodi effectus considerare possunt solum dum sunt præsentés, sicut cum homo videt Socratem currere vel ambulare: sed considerare huiusmodi in se ipsis antequam fiant est Dei proprium, qui solus in sua æternitate videt ea quæ futura sunt quasi præsentia... Unde dicitur *Isaie 41.* „Annuntiate quæ ventura sunt in futurum, & sciemus, quia Dii cõtis vos,“. *Si quis ergo huiusmodi futura prænuntiari, aut prænoscere quocumque modo præsumserit, manifestè usurpat sibi quod Dei est. Et ex hoc aliqui Divini dicuntur. Unde dicit Isidorus in Lib. 8. Etymolog. c. 9.* „Divini dicti, quasi Deo pleni: Divinitate enim se plenos simulant, & astutiâ quâdam fraudulentia, hominibus futura coniectant,“.

Dicit tamen S. Th. ibidem art. 5. ad 2. *Quid hoc quod Astrologi ex consideratione astrorum frequenter vera prænuntiant, contingit*
du-

dupliciter. Uno quidem modo, quia plures hominum passiones corporales sequuntur: & ideo actus eorum disponuntur ut in pluribus secundum inclinationem cælestium corporum; pauci autem sunt, idest soli sapientes, qui ratione hujusmodi inclinationes moderentur: & idcirco Astrologi in multis vera prænuntiant, & præcipue in communibus eventibus, qui dependent ex multitudine. Alio modo propter Demones se immiscentes. Unde August. in 2. super Genes. ad litt. c. 17. dicit, „ Fatendum est, quando à Mathematicis vera dicuntur, instinctu quodam occultissimo dici, quem nescientes humane mentes patiuntur: quod tamen ad decipiendos homines fit spirituum immundorum & seductorum operatione, qui quædam vera de temporalibus rebus nosse permittuntur. „ Et concludit, „ Quapropter bono Christiano, sive Mathematici, sive quilibet impiè divinantium, & maxime dicentes vera, cavendi sunt; ne consortio Dæmoniorum animam deceptam pacto quodam societatis irretiant. „ Monita hæc ex SS. Thoma & Augustino sufficiant.

XIV. Desipiebant tandem Elcesetæ, quia in Juramento non Deum, sed Aquam, Terram, Salem, Panem, Cælum, Æthera, & Ventum, & alios adhibendos esse in testes dicebant. Ita S. Epiphanius Hæres. 19. n. 1. ubi de Elxai: *Inter alia, inquit, per Salem ac Terram, Pavem, Cælum, Æthera, Ventumque velut Numina degerare jussit. Interdum septem alios testes designat, nimirum, Cælum, Aquam, & Spiritus, Sanctos orationis Angelos, Oleum, Salem, & Terram. Et Hæres. 53. n. 1. ait de Samseis: Aquam magnopere venerantur, ac propemodum instar Numinis habent, quod ab ea propagatam esse vitam asserunt.*

XV. Porro jurare per alium quàm Deum vetitum legitur æquè ac adorare alium quàm Deum. Sic Exodi 23. v. 13. *Et per nomen externorum Deorum non jurabitis.* Et generaliter per quamcumque creaturam jurare vetuit Dominus Matth. 5. v. 33. &c. *Iterum audistis, quia dictum est antiquis: Non perjurabis: Reddes autem Domino juramenta tua. Ego autem dico vobis, non jurare omnino neque per Cælum, quia thronus Dei est; neque per Terram, quia scabellum est pedum ejus; neque per Jerusalem, quia Civitas est magni Regis; neque per caput tuum juraveris, quia non potes unum capillum album facere aut nigrum.* Quod ideo dixit teste S. Hieronymo in dictum cap. 5. Matth., quia *Hanc per elementa jurandi pessimam consuetudinem semper habere Judæi noscuntur, sicut Prophetalis eos frequenter arguit sermo. Qui jurat, aut veneratur, aut diligit eum, per quem jurat. In Lege præceptum est ut non juremus, nisi per Dominum Deum nostrum. Judæi per Angelos, & urbem* Hic-

Hierusalem, & Templum, & Elementa jurantes, creaturas resque cannales venerabantur honore & obsequio Dei. Addit S. Epiphanius Hæres. 19. n. 6., quodd Christus etiam hoc dixit: quodd existere cersi homines deberent (ut Elceseitz) qui alia usurpare in dejerando nomina suaderent.

XVI. Quomodo autem non liceat per creaturas jurare exponit S. Thomas 2. 2. q. 89. art. 6. his verbis: *Duplex est juramentum. Unum quidem quod fit per simplicem contestationem, inquantum scilicet testimonium Dei invocatur. Et hoc juramentum innititur Divinae veritati sicut & Fides; Fides autem est per se quidem & principaliter de Deo, qui est ipsa veritas; secundariò autem de creaturis, in quibus veritas Dei relucet... & similiter juramentum principaliter refertur ad ipsum Deum, cujus testimonium invocatur. Secundariò autem assumuntur ad juramentum aliqua creatura, non secundum se, sed inquantum in eis Divina veritas manifestatur. Sicut juramus per Evangelium, idest per Deum, cujus veritas in Evangelio manifestatur, & per Sanctus, qui hanc veritatem crediderunt & observaverunt. Judæi autem non hoc modo per creaturas jurabant, sed ita jurabant, ut eis Divinum honorem deferrent, ut ibi dicit ad primum.*

XVII. *Alius autem modus jurandi (prosequitur S. Th.) est per execrationem. Et in hoc juramento indacitur creatura aliqua, ut in qua Divinum judicium exerceatur. Et sic solet homo jurare per caput suum, aut per filium suum, aut per aliam rem, quam diligit: sicut & Apostolus juravit 2. ad Cor. 1. dicens „Ego testem Deum invoco in animam meam“. Quod autem Joseph per salutem Pharaonis juravit, utroque modo intelligi potest: vel per modam execrationis, quasi salutem Pharaonis obligaverit Deo: vel per modum contestationis, quasi contestando veritatem Divinae justitiæ, ad cujus executionem Principes terræ constituntur. Ita S. Thomas rem hanc exponit.*

XVIII. Similiter, ne ex illis Christi verbis *Ego autem dico vobis, non jurare omnino*, deducat aliquis, omnino non licere, idem S. Thomas dicta q. 89. art. 2. ostendit, Juramentum secundum se esse licitum & honestum; tum ex origine, quia est introductum ex fide, quâ homines credunt, Deum habere infallibilem veritatem, & universalem omnium cognitionem & provisionum. Tum ex fine, quia juramentum inducitur ad justificandos homines, & ad finiendum controversias, ut dicitur Hebr. 6. Juramentum autem cedit in malum ei, qui malè utitur eo, idest sinè necessitate, & cautela debita. Et ibidem ad 1. inducit S. Augustinum L. de Mendacio cap. 15. dicentem: *Apostolus in Epistolis suis jurans ostendit,*
quo-

quomodo accipiendum esset, quod dictum est „ Dico vobis non jurare omnino „: ne scilicet jurando ad facilitatem jurandi perveniatur, & ex facilitate jurandi ad consuetudinem, & à consuetudine in perjurium decidatur: Et ideo non invenitur jurasse nisi scribens, ubi consideratio cautior non habet linguam præcipientem. Ita ex S. August. S. Thomas qui dictâ q. 89. plura alia de Juramento resolvit, quæ Lectori videnda relinquo; Cum rei præsentis solum sit statuere, quòd jurare per creaturas Elcefeitarum more non liceat.

CAPUT XXIX.

De Theodotianis seu Theodotiis.

§. I.

Theodoti lapsus & hæresis.

I. **A**UCTOREM hujus Sectæ, à quo nomen accepit & errorem, S. Augustinus Hæres. 33. *Theodotionem* appellat. At S. Epiphanius Hæres. 54., Theodorus L. 2. Hæres. Fab., Auctor Append. ad Lib. Præscript. Tertulliani c. 53., & Eusebius L. 5. Hist. c. 28. cum vocant *Theodotum*. Theodotus iste (de quo supra cap. 26. §. 1. n. 5. aliqua dixi) Patriâ Byzantinus, arte Coriarius, professione Christianus, literis apprime eruditus fuit. De hoc Epiphanius: *Theodotus*, inquit, iterum nescio quis emerfit, velut appendix quædam illius hæresis, quam Alogorum nomine comprehendimus, quæ Joannis Evangelium, & Deum illum Verbum, quod à principio ibidem fuisse dicitur, necnon & Apocalypsim respuit. A quo Theodotiani nomen acceperunt... Theodotus igitur iste Byzantio oriundus, quæ hodie Constantinopolis dicitur, arte Coriarius erat, homo apprime literis eruditus. Theodorus verò ait: Etiam Theodotus Byzantinus Coriarius, idem cum eo (Artemone) sentiens alii sodalitati præfuit. Theodotus autem iste alius fuit à Theodoro Argentario, qui Coriarii potius discipulus fuit. Sic enim apud Eusebium L. 5. c. 28. legitur de Asclepiodate, & Theodoro Argentario: *Ambo autem discipuli erant Theodoti illius Coriarii.*

II. Causa defectionis Theodoti Coriarii fuit, quòd vigente persecutione captus, & à Judice interrogatus Christum negavit: cùmque de hoc argueretur, in sui excusationem dixit, se hominem negasse, non Deum, atque inde Christum esse purum hominem effutire cœpit. Ita de Theodoro S. Epiphanius citato loco: *Qui*, inquit, cum aliis plerisque ineunte persecutione comprehensus (quæ-

nam

nam verò ea persecutio fuerit nondum comperi) sed tum ab Urbis Præfecto cum pluribus correptus, cum de omnibus quæstio ob Christi nomen haberetur, ceteri siquidem Dei famuli reportatâ victoriâ caeleste præmium consecuti sunt, martyrio pro Christo persuncti: At ille Christum negans, & à scopo veritatis excidens, transgressor est factus: Quâ ex re cum probro omnium appetitus pudorem sustinere non posset, relicta patriâ, profugus Romam contendit, & illic habitavit.

Sed & Roma à quodam agnitus in eandem ignominiam incidit; cum qui illum ob insignem eruditionem noverant, ob id eum incusarent, quòd homo excellenti doctrinâ præditus à veritate excidisset. Quare ad sui excusationem vanum dogma commentus est, atque ita iactare cepit. Ego, inquit, non Deum negavi, sed hominem. Interrogatus, quem demum hominem? Christum, inquit, hominem negavi. Hinc prædicandâ falsæ hujus opinionis occasionem accepit, ut & Theodotiani, quorum ille auctor extitit, qui nudum hominem esse Christum asserunt, atque ex humano semine genitum. Hactenus Epiphanius.

III. In hac defectionis Theodoti Coriarii causa conveniunt: Auctor Appendicis ad L. de Præscript. c. 53. Accedit, inquit, bis Theodotus hæreticus Byzantinus, qui postea quàm pro Christi nomine comprehensus negavit, in Christum blasphemare non desistit; doctrinam enim introduxit, quâ Christum hominem tantummodo diceret, Deum autem illum negaret: ex Spiritu quidem Sancto natum, ex Virgine, sed hominem solitarium atque nudum, nullâ aliâ præ cæteris, nisi solâ justitiæ auctoritate. In quo ab Epiphanio solum dissentit, quòd Christum non ex humano semine, sed ex Spiritu Sancto ex Virgine natum, Theodotum asseruisse dicit. Quod & Theodoritus Lib. 2. Hæret. Fab. in Artemone Theodoti in errore socio asserit. S. Augustinus L. de Hæres. c. 33. Theodotiani à Theodotione (in Maurina edit. Theodoto) quodam instituti, hominem tantummodo Christum asseruerant. Quod dicitur idem Theodotus propterea docuisse, quia in persecutione lapsus isto modo se casus sui devitare putabat opprobrium, si non Deum negasse, sed hominem videretur.

Damascenus etiam Hæres. 54. Theodotiani, inquit, à Theodoto Coriario Byzantino dicti. Hic græcis artibus apprime institutus cum aliis quibusdam in ea, quæ tunc sæviebat, persecutione, comprehensus, cum socii ejus omnes propter Deum martyrium subiissent, fidem solus ejuravit. Ob idque probis appetitus, id excogitavit, ut Christum nudum esse hominem assereret, ne crimini sibi verteretur, quòd Deum abnegasset. Ferè eadem refert Philaster Hæres. 50.

IV. Cùm ergo, ut supra cap. 26. §. 1. indicavi, Theodotus iste errorem suum primus (Romæ quidem) evulgare cœpisset, Victor tum Romanus Pontifex, novitate commotus, cùm Romana præfertim Ecclesia ab Apostolis usque ad ea tempora Christum verum Deum & hominem illibatè confessà fuisset, ut apud Eusebium L. 5. Hist. c. 28. ostendit ignotus Auctor (quem Cajum esse putat Photius Cod. 43.), Theodotum ab Ecclesiæ communione ejecit. Idem refert Theodoritus L. 2. Her. Fab. dicens: *Eum beatissimus Victor Romanorum Episcopus abdicavit & excommunicavit, cùm utique decreta Ecclesiæ conatus esset adulterare.*

V. Cajus, seu quilibet sit Auctor apud Eusebium Lib. 5. c. 28., postquam dixit, Theodotum ob prava dogmata quæ Romæ spargebant, fuisse per Victorem ab Ecclesia ejectum, subiungit: *Ac de Victore quidem ita res se habet. Qui cùm decem annis sacerdotium administrasset, Zephyrinus ei successor substitutus est anno Principatus Severi circiter nono.* Ex hoc certum quidem fit, Theodotum sub Victore jam tactum hereticum errorem suum Romæ feminasse, sed æquè incertum manet tempus, quo in persecutione lapsus hæresim evulgare cœpit: & adeò incertum, ut Epiphanius ipse illi ætati vicinior dicere non erubuerit, se nescire in qua persecutione lapsus fuerit: *Quanam verò hæc persecutio fuerit, nondum comperi.* Ita Hæres. 54. num. 1. Non enim fuisse persecutionem sub Severo contendunt aliqui: quia hæc excitata fuit anno Imperii ejus decimo, qui secundum aliquos fuit annus Christi 202., quo anno Victor jam obierat: unde si in hac persecutione Christum Theodotus negasset, non potuisset suam hæresim Romæ pandere sub Victore sed sub Zephyrino, contra ea quæ supra ex antiquis retuli. Censent ergo alii, Theodotum probabiliter primò fuisse lapsum in persecutione sub Marco Aurelio Commodo Antonino, qui post ann. Christi 180. Imperium suscepit. Sub hoc enim Principe adhuc in Christianos persecutio alicubi favitiâ Præsulum continuavit, & anno 187. Romæ aliqui martyrium passi leguntur. Unde aliqui lapsum Theodoti, & ejus hæresis initium consignant anno 192. & ultimo imperii Commodi. Mihi tamen tutius videtur cùm Epiphanio repetere: quanam fuerit persecutio, in qua Theodotus Christum negavit, nondum saltem certò comperi.

VI. Hujus Theodoti Coriarii discipuli fuerunt Asclepiodotus & Asclepiades, & Theodotus alter Argentarius, de quo infra sermo erit. De his Cajus apud Eusebium Lib. 5. c. 28. hoc factum narrat: *Erat quidam Natalis nomine, confessor, qui non ita pridem, sed nostra ætate vixit. Hic fortè in fraudem inductus est ab Ascle-*
pio-

piodoto, & altero quodam Theodoto Argentario. Ambo autem isti discipuli erant Theodoti illius Coriarii, qui primus ob banc doctrinam, seu potius insaniam à Victore, ut dixi, tunc temporis Episcopo, ab Ecclesie communione remotus est. Hi persuaserunt Natali, ut accepto salario hæresis illius Episcopus crearetur, eâ scilicet conditione, ut mensuros centum quinquaginta denarios ab illis acciperet. Sociatus igitur illorum partibus, sæpè à Domino corripiebatur in somnis. Clementissimus enim Deus & Dominus noster Iesus Christus, eum qui passionum suarum testis extiterat, perire extra Ecclesiam nolebat. Sed cum nocturnas ejusmodi visiones negligeret Natalis, utpotè honore primæ apud illos Sedis, & turpis lucri cupiditate (quæ multis mortalibus exitio est) inescatus, tandem à Sanctis Angelis per totam noctem flagris castus, & gravissimè verberatus est. Aded ut primo diluculo consurgens, saccum induerit, & cinere conspersus confestim cum lacrymis ad pedes Zephyrini Episcopi sese abjecerit, non solum Cleri, verè etiam secularium vestigiis advoctus; & Christi misericordis Ecclesiam ipsam quoque misericordem stentibus suis commoverit atque concusserit. Multisque precibus usus, ostensis etiam vibicibus plagarum, quas pro Christi confessione pertulerat, vix tandem ad communionem admissus est. Hæc narrat etiam Theodoritus L. 2. Hæ. Fab. in Theodoto.

VII. Quis hujus Theodoti Coriarii fuerit exitus, ignoratur. Duratio hæresis sub ejus nomine brevis, ut Epiphanius Hæres. 54. num. 1. dixerit: *Sam verò sitne hodie superstes hæc hæresis, planè nescimus: quæ quidem librorum monumentis ad nostram memoriam commendata ad nos pervenerunt, ea narrabimus.* At licet Theodotianorum nomen brevi extinctum fuerit; error tamen superstes diu mansit. Illum enim proprium sibi fecerunt Paulianistæ à Paulo Samosateno edocti, quos postea secuti sunt Ariani, & nostris temporibus Sociniani.

§. II.

Theodotianorum errores.

I. **P** Ræcipuus Theodoti & suorum error ex dictis fuit, quod Christum purum hominem esse volebant. Quem errorem cap. 6. §. 3. in Cerintho, & c. 8. §. 2. in Ebione supra refutavi. An verò eum ex humano semine, an de Spiritu Sancto conceptum asseruerint; hoc secundum ut dixi asserit Auctor Appendicis ad Lib. Præscr. Tertull. ; primum verò dicit Epiphanius. Utrumque tamen verum esse potest, cum Theodoti discipuli (quæ errantium indoles est) in erroribus non convenirent. Ut enim apud Euse-

bium L. s. c. 28. sæpè laudatus Auctor ait : *Si quis exemplaria illorum undique conquisita simul inter se contulerit, inveniet profectò illa inter se plurimum dissentire. Quod & Theodorus sæpè citato loco repetit dicens : Sed aliter quidem Theodotum, aliter verò Asclepiadem, & aliter Hermophilum, aliter verò fecisse Apollonidem. Quin etiam unumquemque eorum sua propria correxisse, adeò ut exemplaria plurimum inter se dissentirent.*

II. Eò autem temeritatis devenerunt, ut Sacras Scripturas in iis maximè quæ eorum erroribus adversabantur, adulterare & ad suum dogma trahere conarentur. Quod laudatus Auctor apud Eusebium L. s. c. 28. detestatus : *Quanta porro, inquit, audacia sit ejusmodi facinus, ne ipsos quidem ignorare credibile est. Aut enim Sacras Scripturas à Sancto Spiritu dictatas esse non credunt, ac proinde infideles sunt : aut semetipsos Spiritu Sancto sapientiores esse existimant, ac proinde quid aliud sunt, quàm Dæmoniaci ? Quæ Theodorus confirmat. Quæ verò Sacra Scriptura loca suo errori favere putabant, ea retinebant. Unde Philaster Hæres. 50. Isti, inquit, utuntur capitulis Scripturarum, quæ de Christo veluti de homine edocent ; quæ autem de Deo dicunt, ea verò non accipiunt. Unde Epiphanius Hæres. 54. de Theodoto ait : Quæ ad erroris sui patrocinium accommodata reperit, non casto ac sincero mentis judicio, sed ut impietatis suæ speciem aliquam & colorem quaereret, undique accersita collegit.*

III. Contra hunc errorem, Christum esse nudum hominem asserentem, plura cillant dicenda, quia tamen dum agerem contra Cerinthum & Ebionem ea protuli, ideò ne inutiliter eadem repetam, ad ibi & alibi etiam dicta Lectorem remissio, ea solum hic resellam ex Epiphanio, quæ Theodotus in sui erroris patrocinium adducebat.

Primo ergo utebatur illo Domini dicto Joann. 8. v. 40. *Nunc autem queritis me interficere, hominem, qui veritatem vobis locutus sum.* Cui Epiphanius num. 2. *Verum, inquit, quod in eodem loco Christus usurpavit, infelix ignorat, Veritatem quam audiavi à Patre meo, : Quibus Patrem suum appellat Deum, non hominem utique. Nam si ab homine illud audisset, nequaquam veritatis testimonio gloriaretur, ut ab hominibus veritatem se accipere diceret. Sed ideò ista dixit, ut esse se Deum ostenderet, à Patre initio genitum, hominemque nostra causâ factum ; itaque quod ad carnem attinet, interfectum, ut Divinitate perpetuò viveret.*

S. Augustinus quoque Tract. 42. in Joannem ad illa verba *Queritis me occidere hominem*, in persona Domini ait : *Non dico Filium Dei, non dico Deum, non dico Verbum, quia non moritur*

Verum

Verbum: hoc dico quod videtis, quia & quod videtis potestis occidere, & quem non videtis offendere. Porro quia Judæi gloriabantur Patrem se habere Deum, respondit eis Jesus v. 42. Si Deus pater vester esset, diligeretis utique me: ego enim ex Deo processi & veni: neque à me ipso veni, sed ille me misit. Ex his idem S. Augustinus sic infert: Ergo ab illo processit ut Deus, ut aequalis, ut Filius unicus, ut Verbum Patris: & venit ad nos, quia Verbum caro factum est, ut habitaret in nobis: Adventus ejus, humanitas ejus: mansio ejus, Divinitas ejus: Divinitas ejus quò imus: humanitas ejus quò imus. Nisi nobis fieret, quò iremus, numquam ad illum manentem perveniremus. Ita S. Augustinus.

IV. Addebat, inquit Epiphanius (Theodotus) nullam se in eo peccatum habuisse, quòd Christum negasset, quandoquidem ita Christus ipse locutus est Matth. 12. v. 31. „ Omnis blasphemia remittetur hominibus, & qui dixerit verbum in Filium hominis remittetur ei. Qui autem blasphemaverit in Spiritum, non remittetur ei. „ Respondet tamen Epiphanius: *Sed nimirum miserrimus homo non intelligit, Christum Dominum, cùm eorum qui in se olim contumeliosi fuerant, & ad penitentiam se se traduxerant, confirmare salutem cuperet, ne ullam adversus eos pœnam constitueret, pro sua incredibili humanitate ac clementia oraculum illud edidisse. Quod autem nonnullos fore cognosceret, qui in Spiritum Sanctum insurgerent, ac blasphemias appeterent; quique ad servilem conditionem redigerent & creatum atque à Dei naturâ alienum esse dicerent, quò hunc errorem excluderet, adjecit „ Qui autem blasphemaverit in Spiritum Sanctum, non remittetur ei neque hic neque in futuro seculo „. In quo non eos qui se blasphemarunt laudare voluit: sed præscientiam suam humanitatemque monstravit, quæ eorum, qui post blasphemiam penitentiam suscepissent, stabiliendæ salutis consuleret. Etenim in alio loco dixit Lucæ 12. v. 9. „ Qui negaverit me coram hominibus, negabitur coram Patre meo „. Item „ negabo illum „. Contra „ Qui me confessus fuerit, confitebor ipsum coram Patre meo „. Hactenus Epiphanius. Quomodo ergo allerere ex testimonio Christi poterat Theodotus, se non peccasse Christum negando, quando Christus ipse dicit, se qui eum negavit negaturum? aut quomodo sibi blandiri poterat de venia, qui crimen suum novâ ac penitenti confessione non delevit, sed in negatione contumax perstitit? Si Petrum negantem secutus fuit, cur non fuit etiam secutus penitentem?*

V. Cur autem Christus dixerit, peccatum in Filium hominis remissionis capax esse, secus verò peccatum in Spiritum Sanctum, hoc fuit, quia illud ex ignorantia, istud ex pura malitia procedit.

Ita

Ita exponit S. Hieronymus in cap. 12. Matth. dicens : *Qui verbum dixerit contra Filium hominis, scandalizatus carne meâ, & me hominem tantum arbitrans, quod filius sim fabri, & fratres habeam Jacobum & Ioseph & Judam : & homo vorator, & potator vini sim, talis opinio absque blasphemia, quamquam culpâ non careat erroris, tamen habet veniam propter corporis vilitatem. Qui autem manifestè intelligens opera Dei, quam de virtute negare non possit, eadem, stimulatus invidia, calumniatur, & Christum Deique Verbum, & opera Spiritus Sancti dicit esse Beelzabub, isti non dimittetur, neque in præsentī seculo, neque in futuro.* Hæc Hieronymus. Quod maximè dicere poterat Christus de Scribis & Phariseis, quos ailoquebatur, & quos præciebat in blasphemia usque ad finem fore perfituros. De peccato in Spiritum Sanctum quomodo sit irremissibile agunt Patres & Expolitores. Videri potest, si placet S. Thomas 2. 2. q. 14. art. 1., ubi exponit quid sit peccatum in Spiritum Sanctum, & art. 5., ubi exponit quomodo sit irremissibile.

VI. Tertiò arguebat Theodotus ex illo Deuteron. 18. v. 15. *Prophetam de gente tua & de fratribus tuis sicut me suscitabit tibi Dominus Deus tuus : ipsam audies.* Quibus Moyses de Christo prænuntiat fore de gente sua de fratribus suis sicut se ipsum : atqui Moyses purus homo erat, non Deus ; ergo qui à Deo suscitatus est Christus, ite non Deus erat, sed homo, utpotè à Judæis ipsis oriundus, sicut & Moyses.

Respondet Epiphanius num. 3. *Nescit impius ille desertor Theodotus, quam egregiè unaquæque dictio suâ cautione munita sit. Nam quòd è fratribus illum Dominus excitavit, eò referendum est, quòd à Maria sit genitus: quo sensu illud accipieudum est, „Ecce Virgo in utero habebit, & pariet filium: Virgo inquam manens, in utero habebit, non ex viri semine; filiumque pariet, sætum atque carne præditum, & à Virgine genitum. Ad hæc, „Nomen ejus vo-„ cabunt Emmanuel, quod interpretatur nobiscum Deus, „ Est enim homo Deus à Patre, nullo neque principio, neque tempore genitus, & ex Maria factus homo, quatenus carne præditus advenit.*

VII. Opponebat quartò Theodotus, Lucæ 1. v. 35. dici ab Angelo nuntiante Mariæ Christi conceptum *Spiritus Sanctus superveniet in te*, non verò *Spiritus Domini erit in te*: ex quo inferbat, eam non habuisse in utero Deum, sed purum hominem, licet Spiritu Sancto superveniente conceptum. Attamen ut bene notat Epiphanius stolidè discurret. Debuisset enim advertere ea quæ idem Angelus prosequitur, nimirum : *Et virtus Altissimi obumbrabit tibi: ideoque & quod nascetur ex te Sanctum, vocabitur Filius Dei.* Ubi illa causalis *Ideo*que demonstrat, quòd ille qui su-

perveniente Spiritu Sancto & virtute Altissimi obumbrante ex ea nasciturus erat Sanctus, non erat purus homo sed simul Altissimi Filius: Verbum nempe ab æterno genitum, quod ex ea carnem sponte suâ esset sumpturum. Et propterea non dixit Spiritus Sanctus erit, vel *ingredietur in te*: ne putaretur, quod Spiritus Sanctus, non Verbum & Filius Dei ex ea carnem sumfisset. Dixit autem *Spiritus Sanctus superveniet in te*, ut indicaret, hoc Filii Dei ex ea carnem sumturi Sacramentum, non viri, sed solius Spiritus Sancti operâ fore perficiendum.

VIII. Opponebat quintò varia Scripturæ loca, quibus Christus homo dicitur. Et primò illud Isaïæ 53., ubi de Christo dicit v. 3. *Vidimus eum & non erat aspectus, & desideravimus eum: Despectum & novissimum virorum, virum dolorum &c.* Secundò, illud Apostoli 1. ad Timoth. 2. v. 5. *Unus enim Deus, unus & mediator Dei & hominum homo Christus Jesus.*

Sed præfatis locis, ut observat Epiphanius, probatur utique, Christum fuisse hominem, quod Catholica Fides confitetur, non tamen ostenditur, eum simul Deum non fuisse: imò contrarium evincitur. Isaïas enim eum describit hominem abjectum, virum dolorum, qui dolores nostros portavit, vulneratus est propter iniquitates nostras; sed postea v. 8. subdit: *Generationem ejus quis enarrabit?* Si homo nudus esset ex Maria genitus, illius utique generatio enarratu facilis esset. Sed quia ipse Joann. 8. v. 58. asseruit: *Amen amen dico vobis, antequam Abraham fieret, ego sum.* Testatus fuit, se ante generationem ex Maria, qua carnem sumeret, aliâ generatione jam ante Abraham, ex quo secundum carnem prodierat, extitisse; quâ autem, nisi Divinâ & æternâ à Patre, de qua S. Joannes c. 1. Propterea non dixit *antequam Abraham fieret ego factus sum*, sed *ego sum*; quod proprium Verbi est, à quo omnia facta sunt, ipsum verò à nullo est factum, quia Deus est, qui solus dicere potest: *Ego sum qui sum.* Exodi 3. v. 14.

Nec oppositum sentit Paulus. Imò mentem suam magis aperiens Rom. 8. v. 5. *Nam etsi, inquit, sunt qui dicuntur Dii, sive in Cælo sive in terra (siquidem sunt Dii multi & Domini multi) nobis tamen unus Deus Pater ex quo omnia & nos in illum: & unus Dominus Jesus Christus per quem omnia & nos in ipsum.* Igitur si Christus est per quem omnia, & nos per ipsum: nudus profecto homo de Maria natus censendus non est.

IX. Præter errorem, quem in Theodoto ex Epiphanio, Theodorito, & aliis supra retulimus, quo Christum nudum hominem fatebatur; alii, ut c. 26. §. 1. n. 6. indicavi, Catholicæ veritati contrarii ipsi affinguntur, quos refert etiam Gulielmus Cave in Hist.

Hist. Literaria Seculi Gnostici pag. 52. velut ex ejus excerptis apud Clementem Alexandr. collectos, nempe Christum à Patre ante Mundum conditum creatum fuisse, ut Mundus per eum crearetur. Hunc esse quidem imaginem Patris perfectissimam, ei tamen substantiâ dissimilem, & dignitate inferiorem. Solum Deum Patrem esse immaterialem, Filium autem omnesque Angelos, Dæmones, & Animas materiales, subtili tamen materiâ constantes, licet nobis invisibili, alias Animæ & Dæmones poenas ignis Inferni sentire non possent. Christum à primo rerum initio incarnatum fuisse. Ipsi Jesu redemptione opus fuisse, quam Columbe post Baptismum immixtæ beneficio obtinuit. Deum in Christo patiente passum vel à Christo ante passionem recessisse, ante passionem traxisse Divinitatem suam, recedente scilicet essentiâ, quâ indutus fuerat in Jordane. Astra, seu potius Angelos astra moventes fatum quoddam rebus & humanis actionibus inducere: adeoque Christum carnem induisse, ut ab isto fato & agendi necessitate in se credentes liberaret.

X. Hæc & alia, si verè Theodoti sunt, blasphemix sunt ab Hæreticis antecedentibus haustæ, & supra rejectæ, & in subsequentibus maximè Paulianistis & Arianis propagatæ, ut videbimus; idèoque in eis sigillatim refutandis Lectorem non detinebo, sed partim ad supradicta, partim ad dicenda interius remittam. Dixi tamen si Theodoti sunt; quia in eis aliqua apparenter suo principali errori contraria & repugnantia videntur. Si enim, ut referunt Epiphanius & alii Veteres, Theodoti error præcipuus erat, quod Christus nudus homo esset ex Maria & semine viri genitus, quomodo coherere potest, quòd fuerit à Patre ante Mundum conditum creatus & ab ipso conditus Mundus: esse Patris imaginem perfectissimam, etsi eo inferiorem, ab initio rerum incarnatum, & alia sublimia, quæ de Christo velut à Theodoto dicta supra narravi? Cæterùm quæ de animabus, esse scilicet materiales, dicebat, dixerant etiam Montanistæ & alii supra impugnati, de quo egi etiam Tom. 6. in 1. p. q. 1. Dub. 4. §. 1. Angelos esse corporeos, quinvis aliquorum Veterum opinio fuerit, contrarium tamen tenendum esse ostendi Tom. 5. in 1. p. q. 2. de Natura Angelorum Dub. 1. §. 2. Ideoque in præfens hæc dimittenda sunt.



CAPUT XXX.

De Melchisedecianis.

§. I.

De Auctore & eorum hæresi.

I. **D**E duobus Theodotis ambobus hæreticis hætenus meminimus: imo Montani aliccia c. 23. §. 1., altero patriâ Byzantino arte Coriario Sectæ Theodotianorum auctore, de quo Cap. præcedente. Superest tertius Trapezita, Argentarius professione, à quo Melchisedeciana hæresis prodit: talis nuncupata ex errore, quem circa personam Melchisedech profitebatur: Unde Theodoritus L. 2. Hæret. Fab. ait: *Incæpit autem hæc hæresim Theodotus artificio Argentarius.* Et Auctor Append. ad Lib. Tertull. de Præscr. c. 53. *Alter, inquit, post hunc (Coriarius scilicet) Theodotus hæreticus erupit, qui & ipse introduxit alteram Sectam, & ipsum hominem Christum tantummodo dicit ex Spiritu Sancto ex Maria Virgine conceptum pariter & natum, sed hunc inferiorem esse quam Melchisedech.*

II. Porro cum iste Theodotus Argentarius discipulus fuerit alterius Coriarii, ut supra ex Lib. 5. Eusebii c. 28. dictum est, ubi hic Theodotus sodalis & condiscipulus Asclepiodoti dicitur, & discipulus Theodoti Byzantini, qui unâ cum Asclepiodoto Natalem Confessorem decepit; probabile est, quod volens specialem Sectam supra eam quam à Magistro hauserat instituere, aliquid Christo dedit, aliquid ei detraxit? Nam Christum & ipse nudum esse hominem asserbat; sed ubi magister eum ex viri femine conceptum dicebat, iste ex Spiritu Sancto conceptum fuisse volebat: Christo autem detraxit, quia ipsum Melchisedech posuit inferiorem. Ita P. La Quien in Notis ad Damascenum super hanc hæresim ex Opusc. de Hæresibus MSS. quod apud se habere testatur: *Coriarii, inquit, istius Theodoti discipuli fuerunt Asclepiades, Hermophylus, Apollonius & Theodotus Trapezita, qui cum specialis Sectæ auctor inaugurari gestiret, hæresim istam statuminavit. Quatenus Theodotum quidem istum auctorem habuerunt, Theodotiani vocantur. Quia verò Melchisedech virtutem quamdam Divinam maximamque esse imaginantur, Melchisedeciani; Hinc Epiphanius Sectam hanc à Theodotianis avulsam putat Hæresi 55. dicens: Qui Melchisedecianos appellari se se volunt, ac, nisi fallor, à Theodotianis avulsi sunt.*

sunt, Melchisedecum illum, de quo in Scripturis mentio fit, cum primis celebrant, & præclaram quamdam esse virtutem arbitrantur. Quem etiam in supremis atque inexplicabilibus locis constituunt. Neque solum virtutem illum esse quamdam asserunt, sed ipso etiam Christo majorem esse dicunt.

III. His explicatum manet hujus hæresis systema. Quibus consentiunt ceteri Patres: SS. Augustinus L. de Hæres. c. 34. dicens: Melchisedeciani, Melchisedech Sacerdotem Dei excelsi non hominem fuisse, sed virtutem Dei esse, arbitrantur. Et Damascenus Hæres. 55. Melchisedeciani Melchisedecum ita venerantur, ut virtutem quamdam eum esse jactent, non purum hominem, & ad ejus nomen cuncta referre non dubitent. Theodoritus etiam citato loco: postquam dicit, Theodotum & alios Coriarii discipulos inter se non convenisse, subdit: Melchisedecianos autem dicunt eorum esse partem: in una autem re tantum dissentire, quod Melchisedech potentiam quamdam & Divinam & maximum existimarent, ad ejus autem imaginem Christum esse formatum. Philaster etiam Hæres. 52. de Melchisedecianis: Addunt etiam (inquit) Melchisedech Sacerdotem virtutem Dei magnam esse, & nomina quædam diversa hominum adferunt, à Fide Catholica deviantes. Nomina scilicet parentum Melchisedech, patris nimirum Hieracle, matris verò Astaroth vel Asterie. Ita Epiphanius Hæres. 55. n. 2. ait: Enimverò nonnulli utriusque Melchisedeci parentum nomina commemorant: sed ea nusquam expressis Scripturæ verbis & in utroque Testamento declarantur. Sunt qui Hieraclem patrem, matrem verò Astaroth sive Asteriam dicant. Sed in hoc, ut infra dicam, secum ipsi pugnant.

IV. Tradit Epiphanius num. 8., hujus hæresis sectatores consuevisse oblationes facere Melchisedeco, utpotè apud Deum internuntio, ejus interventu Deo offerre par esse putantes: Jam verò, inquit, in ejusdem Melchisedeci nomine etiam oblationes suas eadem Secula celebrat, quem apud Deum internuntium esse prædicat. Quamobrem hujus, ajunt, interventu offerre Deo par est: id quod justitia sit princeps, & ad id ipsum à Deo in Cælo constitutus: utpotè spiritalis, ac Dei filius: Itaque primum ei debemus offerre, ut per eundem pro vobis represententur, ac vitam per eum consequamur. Etenim Christus, ajunt, ubi id electus est, ut nos ad unam banc scientiam ex multiplici viarum divortio revocaret, & idcirco à Deo unicus & selectus est, quoniam nos à cultu simulacrorum avertit, & iter ostendit. Unde & Apostolus à Deo missus istud ipsum nobis aperuit (Hebr. 7. 4.) magnum esse Melchisedecum, & Sacerdotem in æternum manere. Intuemini, inquit, quantus est ille. Tam quam

riam „ quod minus est, à majore benedicitur „ *ub id, inquit, Abrahamo Patriarchæ benedixit, ut potè eo major: ejus nos mystic sumus, ut ab illo benedictionem impetremus.* Hactenus Epiphanius.

Ecce quomodo dignitate unici Mediatoris spoliabant Christum, ut eam in Melchisedech transferrent: & Christum nil aliud egisse, & ad nil aliud electum dicebant, quàm ut ostenderet nobis viam, quâ per Melchisedechum perveniremus ad Deum. Quod confirmat etiam Auctor Append. ad L. Præf. Tertulliani c. 53. ubi ostendit, Christum esse inferiorem Melchisedech: *Eo quodd dictum sit de Christo „ Tu es Sacerdos in æternum secundum ordinem Melchisedech „. Nam illum Melchisedech præcipue gratiæ cælestem esse virtutem: ed quodd agat Christus pro hominibus deprecator & advocatus ipsorum factus, Melchisedech facere pro cælestibus Angelis atque virtutibus. Nam esse illum usque aded Christo meliorem, ut apator sit, amator sit, agenealogicus sit, ejus neque initium, neque finis comprehensus sit, aut comprehendi possit.* Ita inani interventu ac mediatione Melchisedech potius, quàm Christi salutem sperabant, contra dictum Pauli 1. ad Timoth. 2. v. 5. *Unus enim Deus: unus & mediator Dei & hominum homo Christus Jesus.* Et Petri Act. 4. v. 12. *Non est in alio salus: nec enim aliud nomen est sub Cælo datum hominibus, in quo oporteat nos salvos fieri.* Sed de hoc magis infra.

V. De tempore quo emerfit hæc hæresis, non est admodum laborandum. Cùm enim à Theodoto Argentario Theodoti Coriarii discipulo excitata fuerit, hæresi Theodotianorum coarva censenda est, licèt aliquot annis posterior; Ideoque si Theodotiani sub Victore Pontifice eruperunt, ut dictum est, Melchisedeciani vel sub finem Episcopatus Victoris, vel initiis Zephyrini anno 201. emerfisse dicendi sunt.

Quamdiù verò duraverit, non constat, cùm Scriptores de hoc fileant. Continuasse tamen, vel renovatam ab aliquo ignoto Auctore S. Hieronymi ætate, videtur indicare ipse Epist. ad Evangelium (aliàs Evagrium 126. modò inter Epistolas Criticas Tom. 2. pag. mihi 570.) ubi de quodam anonymi Auctoris manuscripto sibi ab Evangelo transmissio loquens: *Misisti, inquit, mihi volumen, & nescio, utrum tu de titulo nomen subtraxeris; an ille qui scripsit, ut periculum fugeret disputandi, auctorem noluerit confiteri. Quod quum legissem, intellexi famosissimam Quæstionem super Pontifice Melchisedech illuc plurimis argumentis esse perductam, ut docere conatus sit, eum qui benedixerit tanto Patriarchæ, diviniore fuisse natura, nec de hominibus æstimandam.* Et ad extremum ausus est dicere, Spiritum Sanctum occurriffe Abrabæ, & ipsum esse qui sub

tium dierum & finem vitæ novimus, sed Deo soli qui æternus est convenit.

Quartò, idem Paulus dicit: *Melchisedech assimilatus Filio Dei manet Sacerdos in æternum*: quod maximè convenit Spiritui Sancto quem Filii Dei imaginem Græci vocant, non homini.

Quintò, ibidem v. 13. de Christo dicit: *Tu es Sacerdos in æternum secundum ordinem Melchisedech*. Sacerdotium ergo Christi æternum fuit, quia à sacerdotio Melchisedech tanquam archetypo derivatum fuit.

Sextò, si Melchisedech homo fuit, Abraham non est dicendus Pater creditum, sed Melchisedech. Tum quia ab isto benedictus fuit, tum quia cùm esset Rex & simul Sacerdos, habuit fidelem Populum sibi subditum ante Abrahamum. Hæc præfatus Auctor pro Melchisedecianis.

II. Catholica tamen Fides semper tenuit, Melchisedech purum hominem fuisse ut cæteros, ac solum præfatis encomiis honorari, quia typum & figuram gessit Sacerdotii Christi. Porro Melchisedech hominem fuisse ut cæteros, Scriptura proponit tum Gen. 14. v. 18. *At verò Melchisedech Rex Salem proferens panem & vinum (erat enim Sacerdos Dei Altissimi) benedixit ei (Abrahæ)*. Tum Hebr. 7. v. 1. ubi Paulus eadem repetens: *Hic enim, inquit, Melchisedech Rex Salem Sacerdos Dei summus, qui obviavit Abrahæ regresso à cade Regum, & benedixit ei: cui & decimas omnium divisiit Abraham*. Quibus de Melchisedech persona nil aliud dicitur, nisi quòd fuerit Rex Salem, & Sacerdos Dei. Utrumque autem hominis dignitatem retet. Imò eodem Paulo teste Hebr. 5. v. 1. Sacerdos homo esse debet: *Omnis namque Pontifex ex hominibus assumtus pro hominibus constituitur in iis quæ sunt ad Deum, ut offerat dona & sacrificia pro peccatis*. Quis autem sit inter Sacerdotes Maximus, dixerat c. 4. v. 14. *Habentes ergo Pontificem Magnum qui penetravit Cælos Jesum Filium Dei*. Et cap. 6. v. 20. *Ubi præcursor pro nobis introivit Jesus secundum ordinem Melchisedech Pontifex factus in æternum*. Christus ergo, non Melchisedech, est Pontifex & Sacerdos in æternum, à quò Melchisedech sacerdotium sublimatum fuit, & cujus tota excellentia ex Christi sacerdotio, cujus typum gerebat, processit.

III. Quoad ea quæ opponunt ex Lib. Qu. Vet. & Novi Test., dico, ea ex parte Auctoris nullius esse auctoritatis. Nam Liber ille S. Augustini fœtus non est, ut Eruditi omnes consentiunt propter multa, quæ à S. Augustini stylo & doctrina aliena sunt, & maximè in re præfenti. Nam opinionem de Melchisedech quam Auctor ille propugnat, verus Augustinus, ut supra ostendi, inter hare-

hæreses recenser. Ad rationes ergo, quibus Auctor ille innitur, respondendum est.

IV. Ad primum dico, Melchisedech dici Regem Justitiæ & Pacis, non quasi horum bonorum auctor esset, sed ut ostendatur, inquit S. Thomas in dictum Caput Lect. 1., eum etiam in nomine esse typum Christi: *Nomen enim Melchisedech, interpretatur Rex Justitiæ; Et significat Christum, qui fuit Rex. Hierem. 23.* „ Et regnabit Rex & sapiens erit, & faciet iudicium & justitiam in terra „. *Nec solum dicitur Justus, sed etiam Rex Justitiæ, quia factus est nobis sapientia & justitia* „ 1. Cor. 1. *Aliud quod dicitur de ipso est conditio: unde dicitur, Rex Salem, quod est Rex pacis. Hoc autem convenit Christo* „ Ipse enim est pax nostra „ Ephef. 2. & Psalm. 81. „ Orietur in diebus ejus justitia, & abundantia pacis „. Ita S. Thomas.

V. Ad secundum dico, Melchisedech dici sine patre, sine matre, sine genealogia, non quia verè non habuit. Ita Epiphanius Hæres. 55. n. 1. *Melchisedech homo utique fuit. Patris verò ac matris expers dicitur, non quod ambobus illis carnerit, sed quod nulla sit illorum in Divinis literis expressa mentio.* Subdit tamen n. 2. *Nonnulli utriusque Melchisedechis parentem nomina commemorarunt: sed ea nusquam expressis Scripturæ verbis & in utroque Testamento declarantur. Sunt qui Heraclum patrem illius appellatum, matrem verò Astaroth seu Asteriam dicant.* Et num. 6. dicit, Samaritanos putasse, patrem Melchisedech fuisse Sem filium Noe. Sed hoc tanquam fabulam rejicit; quia quocumque computo factio, Sem ad ætatem Melchisedech pervenire non potuit, qui sexcentis & ultra annis ante obierat. S. Hieronymus tamen Epist. ad Evangelium hanc opinionem absolute non rejicit (quæ est Judæorum) cum supponatur, ab ortu Sem usque ad generationem Abrahamæ solos trecentos nonaginta annos fluxisse, quibus Sem in vivis etiam esse poterat. Verum hoc posito, jam non erit verum id quod dicit Paulus, nempe Melchisedech esse sine patre, sine matre, sine genealogia, in quo isti adeo gloriantur. Nam si Sem ejus pater fuit, jam habuit patrem, matrem, & genealogiam, quæ omnia in Scripturis traduntur. Nec etiam Melchisedechi parentum nomina Scriptura reticuit, quasi esset vir justus & pius ex meretricio concubitu ortus esset, quod putant Judæi. Nam ut idem Epiphanius num. 7. observat, hoc etiam dato, non esset cur matris nomen Scriptura reticeret. *Nam & Raab meretrix fuit, & ejus nihilominus Scriptura meminit. Sed & Zambri & Chasibtha adulterium ibidem expressum, quavis alienæ stirpis hæc esset, nec Israelitarum ex genere originem traheret.*

VI. Cur autem Sacræ Literæ Melchisedech parentum nomina omiserint, variæ causæ assignantur. Primam tradit S. Hieronymus Epist. supra laudatâ ad Evangelium dicens, Melchisedech dici sinè patre &c. *non quodd absque patre & matre fuerit, quum Christus quoque secundum utramque naturam & patrem habuerit & matrem: sed quodd subito introducatur in Genesi occurrisse Abraham à cæde hostium revertenti: & nec ante nec postea ejus nomen feratur adscriptum.* Quod dicit etiam S. Thomas 3. p. q. 22. art. 6. ad 3. Aliam causam assert Philaster Hæresi 144., nimirum Melchisedech à Scriptura dici sinè patre, sinè matre; quia licet à patre & matre carnem acceperit, studium tamen religionis ab eis non acceperat, quo sensu dixit Christus Petro Matth. 16. *Caro & sanguis non revelavit tibi.* Unde Philaster ait: *Hic igitur beatus Melchisedech, cum de alienigenis, idest Chananæis impiis fuisset editus, contentâ impietate parentum, cum capax Legis Divinæ cælestisque esset, & suo studio, ut Dei imago, inquisito Dei mysterio, contemptis impiis parentibus, non solum cognoscere Christum Dominum ante in mandato, insuper etiam ejus cæleste mysterium meruit intuens & intelligens celebrare.* Cum ergo Melchisedech describatur in Genesi, non qualis erat ex carne, sed qualis ex spiritu, nempe Sacerdos Dei summi, offerens sacrificium quod sacrificii Eucharistici typus erat, omittendi erant ejus parentes, qui nullam in hoc partem habuerant.

Tertiam rationem assert S. Thomas in c. 7. ad Hebr. Lect. 1., nempe Melchisedech dici sinè patre, sinè matre, sinè genealogia, quia spiritualiter typus erat Christi, & ut ejus nativitatem tum temporalem, tum æternam exprimeret: in temporali enim habuit matrem, sed non patrem; in æterna habuit patrem, sed non matrem, & in hac, quæ est ineffabilis, genealogiam non habet: ideoque Isaïa 53. dicitur: *Generationem ejus quis enarrabit?*

VII. Ad tertium respondeo, quodd de Melchisedech dicitur *non habens initium dierum neque finem vitæ*, non ad Melchisedech personam, sed ad Christum, cujus Sacerdotii ipse typum gerebat. Unde Hieronymus laudatâ Epist. ad Evangelium ait: *Affirmat autem Apostolus, quodd Aaron sacerdotium, idest Populi Judæorum, & principium habuerit & finem: Melchisedech autem, idest Christi & Ecclesiæ, & in præteritum & in futurum æternum sit, nullumque habuerit autorem.* Et post multa concludit: *Totumque quodd sequitur in laudes Melchisedech ad Christi typum referri, cujus profectus Ecclesiæ Sacramenta sunt.* Ita etiam Theodoritus in cap. 7. Epist. ad Hebr. de Melchisedech: *Est ergo ratione, inquit, est sinè patre & sinè matre & sinè genealogia, neque initium dierum nec vitæ finem*

finem habens, Divina enim Scriptura nihil horum nos docuit. Dominus autem Christus naturā & verē habet unumquodque horum. Est enim sine matre ut Deus, ex solo enim est Patre genitus. Sine patre autem ut homo, ex sola enim matre virgine per partum editus est. Sine genealogia est ut Deus: non enim habet opus genealogiā, qui est ex æterno Patre genitus. Non habuit initium dierum, est enim æterna generatio. Neque vitæ habet finem: immortalem enim habet naturam. Idem dicit S. Th. in cap. 7. ad Hebr. Lect. 1. Qui omnia quæ Paulus de Melchisedech dicit, de Christo dicta exponit, cujus in Sacerdotio typus ille erat.

VIII. Ad quartum dico, Melchisedech assimilatum esse Filio Dei, non ratione substantiæ, quo pacto ei assimilatur Spiritus Sanctus; sed ratione sacerdotii, & sacrificii. Ubi notat S. Th. ibi, quod cum Paulus dicit: *Assimilatus autem Filio Dei, ostendit similitudinem quantum ad sacerdotium. Sciendum est tamen, quod solet dici quod posteriora assimilantur prioribus, & non è converso. Et ideo ne credatur, quod sacerdotium Christi sit posterius sacerdotio Melchisedech, hoc removet Apostolus: quia etsi Christus in quantum homo natus sit post eum, & ex tempore, tamen in quantum Deus & Filius Dei est ab æterno.* Theodoritus etiam citato loco: *Ea de causa, inquit, non Dominum Christum, sed Melchisedech Christo (Filio Dei) assimilavit. Ille enim est hujus typus. Hic verò typi veritas.*

IX. Ad quintum ex dictis patet, Christum dici Sacerdotem in æternum secundum ordinem Melchisedech, non quia sacerdotium Christi sit participatio sacerdotii Melchisedech & ab eo derivatum, sed ritu & similitudine, quanta inter figuram & veritatem, corpus & umbram intercedere potest. Sacrificium enim Melchisedech Christi sacrificium Eucharisticum adumbravit. Ut S. August. L. 1. de Civit. Dei c. 22. præclare dicit: *Ibi quippe primum apparuit sacrificium, quod nunc à Christianis offertur Deo toto Orbe terrarum; impleturque illud, quod longè post factum per Prophetam dicitur ad Christum; qui fuerat adhuc venturus in carne. Tu es Sacerdos in æternum secundum ordinem Melchisedech; non scilicet secundum ordinem Aaron: qui ordo fuerat auferendus, illucescentibus rebus, quæ illis umbris prænotabantur. Quod & S. Cyprianus Epist. 43. dixerat.*

X. Scopus itaque Pauli fuit probare, Christum secundum ordinem Melchisedech Sacerdotem, Leviticis Sacerdotibus superiorem esse. Quia tamen multifariam major est dignitas Christi, quàm Melchisedech præ Levitis: ideo ejus præstantiam Apostolus v. 2. & sequentibus explicare voluit. Scilicet Levitæ per suum sacerdotium non poterant consummatos reddere homines, idest justos

justos coram Deo: at Christus salvare potest accedentes per semetipsum ad Deum: illi fuerunt Sacerdotes Veteris Testamenti, hic Novi & melioris: illi moriebantur, hic in æternum vivit: illi temporarium habebant sacerdotium, hic æternum: illi peccatores, hic à peccatoribus segregatus: illi prius pro propriis, deinde pro Populi peccatis, hic non pro suis, quæ nulla habuit, sed tantum pro Populi: illi quotidie, hic semel: illi hostias, irracionales nimirum, hic se ipsum obtulit: illi à Lege, hic post Legem: illi finè iurejurando, hic cum iurejurando: illi homines, hic verò Sacerdos est Filius Dei. Hisce prærogativis extollit Paulus supra Levitas Christum Sacerdotem, quibus non extollit Melchisedech. Nunquid igitur iste erit præstantior illo, & typus excellentior veritate, umbra corpore?

XI. Ad sextum tandem respondeo, Abrahamum singularem quædam & eximiâ ratione Patrem credentium prædicari; tum quia mortalium primus fuit, cui venturi Christi promissio facta est, per cujus fidem & gratiam omnes gentes erant benedicendæ; tum quia Hebræi Populi fuit parens, apud quem unum publicus veri Dei cultus usque ad Christi adventum viguit. Melchisedech tamen Abrahamo præstantior fuit, quia Rex & Sacerdos, præfigurans sacerdotio suo sacerdotium æternum Christi.

XII. Tandem Melchisedech fuisse hominem, non Spiritum Sanctum, aut Angelum, auctoritate Patrum qui ipsum præcesserunt probat S. Hieronymus dictâ Epist. ad Evangelium, ubi relatâ oppositâ sententiâ: *Verti me*, inquit, *ad Hyppolitum, Irenæum, Eusebium Cæsariensem, & Emissenum, Apollinarium quoque nostrum, & Eustatium qui primus Antiocheus Ecclesiæ Episcopus contra Arium clarissimâ tubâ bellicum cecinit; & deprehendi eorum omnium opiniones diversis argumentationibus ac diverticulis ad unum computatam pervenisse, ut dicere, Melchisedech fuisse hominem Chanaanum, Regem Urbis Hierosolymæ, quæ primum Salem, postea Iebus, ad extremum Hierusalem appellata sit: nec mirum esse si Sacerdos Dei Altissimi describatur, absque circumcissione, & legalibus ceremoniis, & genere Aâron: cum Abel quoque, & Enoch, & Noë placuerint Deo & victimas obtulerint: & in Job volumine legimus, quod & ipse oblato manerum fuerit, & Sacerdos, & quotidie pro filiis suis hostias immolavit.*

XIII. Hæc S. Hieronymus refert & probat, in hoc tamen dissentiens, quod Salem, cujus Rex erat Melchisedech, non fuisse censet eam quæ postea dicta est Hierusalem, sed oppidum juxta Scythopolim, quod usque hodie appellatur Salem, & ostenditur ibi Palatium Melchisedech, ex magnitudine ruinarum veteris operis ostendens magni-

gniscentiam. Ac subinde in hujus comprobationem aliquibus allatis, subiungit: *Hæc ab eruditissimis Gentis illius didicimus, qui tantum non recipiant, Spiritum Sanctum vel Angelum fuisse Melchisedech; ut etiam certissimum hominis nomen adscribant*. Epiphanius tamen Hæres. 55. n. 2. in hoc non multum laborandum esse putat. Nam de Urbe Salem: *Nonnulli, inquit, eam esse censent, quæ nunc Jerusalem, olim Jebus vocabatur; alii Salem alteram in agro Sicimitico esse putant, quæ Neapolim ex adverso respicit. Sed sive hinc, sive illinc venisse dicatur, non longè ambo hæc loca à se invicem distant*.

CAPUT XXXI.

De Bardefanitis.

§. I.

Bardefanis conditio & gesta.

L. **B**ARDESANITÆ seu Bardeſianitæ à quodam Bardeſane seu Bardeſiane auctore eorum hæresis nomen accepere. De hoc (quem *Bardeſianes* vocat) refert Epiphanius Hæresi 56. his verbis: *Proximè ab illis Bardeſianes quidam numerandus est, à quo Bardeſianistarum hæresis initium accepit. Hic è Mesopotamia oriundus ex urbe Edeſſa principio longè optimus vir fuit, ac libros quamplurimos conscripſit, cùm adhuc sanà atque integrâ mente eſſet. Quippe in Eccleſia Catholica verſabatur, utriuſque linguæ, Græcæ videlicet & Syriacæ peritus. Cùmque Abgaro Edeſſenorum Regulo viro ſanctiſſimo familiaritate conjunctus eſſet, ac cum eo concorditer ſe in omnibus gereret, & ejuſdem diſciplinæ eſſet particeps, poſt ejus obitum ad Antonii Cæſaris uſque tempora perſeveravit, non Pii, ſed Veri. Idem adverſus Abidam Aſtologum contra ſutum pluribus diſputavit. Nec aliqua pauca illius monimenta ſeruntur relictæ fidei conſentanea. Quin etiam Apollonio Antonini familiari, ut ſe Chriſtianum negaret ſuadenti, acquieſcere noluit: ac propemodum inter fidei Confeſſores relatus eſt. Etenim pietatis patrocinio fortiſſimè ſuſcepto, ſapienter inprimis reſpondit: negavitque mortem ſeminare, cujus, eſſi Imperatori non reſiſteret, ſibi nihilominus neceſſitas immineret. Ita vir ille præclariffimis ornamentis præditus bacſenus fuit, donec infelici fato ſuum illum in errorem incidit; ſimiliter atque egregia navis, quæ infinitis onuſta mercibus, ad portum illiſa, non modò jacturam veram omnium facit, ſed & veſtoribus exitium adfert*.

adfert. His Epiphanius in infelici Bardesianis lapsu exemplum proponit legenti, ne quis de sua virtute & constantia temerè sibi blandiatur, ne quod Bardesiani, & Origeni, & Tertulliano accidit, sibi eveniat, & ad Pauli monitum ad Philippenſes c. 2. v. 12. scribò attendat: *Cum metu & tremore vestram salutem operamini. Deus est enim, qui operatur in vobis velle & perficere pro bona voluntate.*

II. Eadem refert de Bardesane Eusebius L. 4. Hist. c. 30.: in hoc tamen ab Epiphanio dissentiens, quòd cum ab initio Valentini sectatorem fuisset dicit. Postquam enim ejus laudes texuit: quòd nimirum fuerit vir disertissimus sermone Syriaco, & acerrimus in disputando: quòd adversus Marcionem & alios variarum opinionum auctores patriâ linguâ dialogos, & infinita alia Opuscula, acerrimus Fidei nostræ defensor, à discipulis suis in græcam linguam postea translata, & Librum de Fato conscripserit, aliaque multa occasione persecutionis ediderit, subjungit: *Atque hic primum quidem sectator fuit Valentini: postea verò cum doctrinam illam improbavisset, & pleraque ejus dogmata fictas esse fabulas convicisset, ipse quidem sibi visus est ad rectiorem sententiam transivisse: vetustissimi tamen atque inoliti erroris sordes non penitus exterſit.* Quibus videtur Bardesanes pristinum errorem sincerè & animo penitus nunquam exuisse.

In eandem sententiam venit S. Hieronymus Lib. de Script. Eccl. c. 33. ubi: *Bardesanes*, inquit, *in Mesopotannia clarus habitus est, qui primum Valentini sectator, deinde confutator, novam hæresim condidit. Ardens ejus à Syris prædicatur ingenium, & in disputatione vehemens, scripsit infinita adversus omnes penè hæreticos, qui ætate ejus pullulaverant. In quibus clarissimus ille est & fortissimus Liber, quem M. Antonino de Fato tradidit, & multa alia super persecutione volumina, quæ sectatores ejus de Syra lingua verterunt in Græcam. Si autem tanta vis est & fulgor in interpretatione, quantam putamus in sermone proprio?* Ita Hieronymus. Quibus verificatur S. Augustini dictum in Psalm. 124. *Non fecerunt hæreses, nisi magni homines: sed quantum magni, tantum mali mores.* Non enim mores erant tales qui susceperent pacem, ut colles jussitiam: sed illi dissensionem susceperunt à Diabolo patre suo. Ex istis fuit Bardesanes, qui sive lapsus, sive relapsus, acri ingenio huc illucque elatus, dissensionem tandem suadente Diabolo molitus fuit.

III. Ex hæcenus adductis colligi potest tempus, quo vixerit Bardesanes, & quo hæresim suam cœperit evulgare. Eum enim imperante Antonino Vero, sive verè sive specie Catholicum, perseverasse, demonstrant tum Liber contra Fatum, quod ei in-

scripsit ; tum plurima , quæ contra tunc emergentes hæreses edidit Volumina , ac proinde sub Marco Aurelio Antonino Philosopho circa ann. Christi 172. sub Soteris Pontificatu . Defecisse verò ac suam hæresim condere cœpisse post annum Domini 174. sub iisdem , nempe M. Aurelio Antonino Philosopho Imperium & Sotere Romanam Sedem tenentibus .

Ejus hæresim non diù in se ipsa durasse credibile est , quamvis in Priscillianistis postea ex parte saltem revixisse videatur . Bardeſanis interitum , genus , & tempus silentio prætereunt Scriptores Veteres . Solum Theodoritus Lib. 1. Hæret. Fab. ei filium nomine Harmonium Græcis literis apprime eruditum tribuit his verbis : *Dicunt autem etiam Harmonium , qui fuit ejus filius , Athenis in Græca lingua fuisse institutum . An verò patrem in errore secutus fuerit , ipse non memorat .* Sozomenus tamen L. 3. Hist. c. 16. dicit eum paterni erroris , vel in totum , vel in partem fuisse hæredem ; quin & alios ex Philosophis addidisse , super origine animæ , corporum corruptione & regeneratione , seu metempsychosæ . Scripsisse insuper Harmonium metricos Hymnos , quos quia suis erroribus infectos S. Ephræm Syrus novis Hymnis emendavit . Hæc ex Sozomeno .

§. II.

Bardeſanis errores .

I. **B** Ardeſanem hæreticum factum seu hæreticum se manifestasse , Valentini hæresim quam ante scripto rejecerat resumendo , & suam addendo , solum post Abgari Edeſſenorum Reguli obitum , probabile est . Non enim vir sanctus sibi familiarem tolerasset hominem , quem erroribus inquinatum detexisset . Ejus errores fuere , quòd diversa principia & productiones rerum confingerit : quòd Mortuorum resurrectionem negaverit : quòd cum Novo & Veteri Testamento apocrypha quædam adhiberet . Ita Epiphanius Hæres. 56. num. 2. his verbis : *Nam cum ad Valentinos miserrimè se applicasset , ex eorum improbitate pestiferum illud virus ac solum contraxit . Multa hic perinde & alia principia & productiones invexit . Mortuorum resurrectionem sustulit : itaque privatam hæresim condidit . Porro Legis ac Prophetarum Libros , adeoque Vetus ac Novum Testamentum ; necnon apocryphos quosdam adhibet .*

II. De primo , quem Epiphanius ei attingit , errore , nempe de pluribus principiis , seu Æonibus Valentini , dubitatur . Nam omnes prænarati Auctores dicunt , Valentini dogmata , inter quæ hoc de pluribus principiis seu Æonibus præcipuum erat , à Bardeſane
fuisse

fuisse rejecta, imò tanquam fabulosa impugnata: quomodo ergo in hunc eundem errorem incidit? Hoc dubium tamen tollitur, si cum Eusebio & Hieronymo supra relatis dicatur, Bardesanem, Valentini quidem dogmata libris impugnasse, sed ex eis aliqua corde retinuisse, quæ postea patefecit, aliqua ex eis detrahendo, aliqua de novo afferendo. Cum enim: *Primùm Valentini sectator fuerit, ipse quidem visus est ad rectiorem sententiam transivisse; vetusti tamen atque involuti erroris sordes non penitus extinxit* (inquit Eusebius). Si ergo vetusti erroris labem extinxit quidem, sed non penitus, signum est, quòd aliqua de hoc Valentini errore abiecit, aliqua retinuit, sic, ut dicere potuerit Epiphanius, quòd Bardesanes privatam hæresim condidit, & S. Hieronymus, quòd novam hæresim condidit: quod non dixissent, si omnia quæ Valentinus, & eodem modo docuisset. Verùm cum, in quo Bardesanes à Valentino recesserit, ignoremus, nil aliud addere possumus, nisi cum S. Augustino Lib. de Hæres. cap. 35., quòd Bardesanes postea, *quomòvis non per omnia, in Valentini hæresim lapsus est*.

III. Error statuens, non unum, sed plura principia, supra in Valentino cap. 9. & aliis rejectus est. Quare cum Epiphanius Hæres. 56. num. 3. dicam: *De pluribus verò principiis, quoniam adversus alios, qui in eodem errore versantur, jampridem multa diximus, longam hoc loco disputationem non instituam. Sed illud ex Apostolo dumtaxat in memoriam revocabo* (2. Cor. 8. v. 6.), Nobis unus est „ Deus Pater, ex quo omnia, & nos in ipsum: & unus Dominus „ Jesus Christus, propter quem omnia & per quem omnia, & „ nos per ipsum „. *Quomodo igitur Deorum illa multitudo principiorumque constabit?* „ Et unus, inquit, Dominus Jesus Christus, propter quem omnia, & per quem omnia, & nos per ipsum „. *Quamobrem unus est tantummodo Conditor, neque plures Dii sunt, Æqueque plures. Sic enim dixit* (v. 5.), „ Si sunt multi, qui dicuntur Dii, „ *quam particulam,* „ Qui dicuntur „, *adjecit, ideo, ut non esse re verà significaret. Sed cum propter eos, qui ab Ethnicis esse dicuntur, quosque illi Deos constituunt, puta Solem, Lunam, Sidera, reliquaque id genus; istud protulerit, nullum aberrantium hominum opinioni locum reliquit.* Hæc Epiphanius, quæ Bardesanem Novum Testamentum admittentem lethaliter feriunt.

IV. Iisdem armis secundum ejus errorem de Mortuorum resurrectione aggreditur num. 2. Epiphanius dicens: *Quod enim ad Mortuorum excitationem attinet, licet de ea sapius in aliis hæresibus disputatum sit, non gravabor iterum paucis ad eum refellendum eodem de re differere. Nam si Vetus Testamentum & Novum admittis, nonne & corrupisse veritatis viam, & à verissima Domini vita abbre-*
rere

vere manifestè convinceris? Siquidem Princeps ipse Dominus; uti nobis resurrectionis arrhabo quidem esset, ac primogenitus è mortuis, nostrâ causâ mortuus est, ac resurrexit: neque specie tenus est passus: utpotè qui sit sepultus, ejusque corpus nonnulli gestaverint. Testis est Josephus Arimatbæensis. Testes illæ mulieres, quæ ad monumentum unguenta detulerunt. Testes centum illæ Albes libræ, non eam inanem opinionem atque imaginem fuisse. Testes denique Angeli, qui id mulieribus declaravit,, Surrexit, inquit, non est hic,,. Quid queritis viventem cum mortuis? neque verò dixit, non est mortuus, sed surrexit, qui in carne passus spiritu perpetuò vivit, ac secundum Divinitatem suam perpeffionis omnis est expertus. Qui è supremis ortus, & à Patre genitus perpetuò existit. Idem tamen novissimis temporibus ex Maria Virgine homo fieri voluit, ut Paulus testatur his verbis (Galat. 4. v. 4.), Factus ex muliere, factus sub Lege,,. Numquam ne illam Scripturæ sententiam exaudisti (1. Cor. 15. v. 35.) ,, Oportet corruptibile hoc induere incorruptionem, & mortale ,, hoc induere immortalitatem,,? At non tibi Isaias Propheta persuasit, cum ita loquitur,, Et mortui resurgent, & excitabuntur qui in monumentis sunt,,? Ad hæc Dominus ipse (Matth. 15. v. 45.) ,, Resurgent, inquit, hi in vitam æternam, & isti in supplicium?,, Non illud denique Abelis post mortem cum Deo colloquium recordaris, atque non illius animam, sed sanguinem supplicare dicat, ac Deum clamoribus interpellare? (Gen. 4. v. 10.) Sanguis porro nequaquam anima est, sed in sanguine anima potius inest: Quippe sanguis adspectabile corpus est; anima verò, cum visum omnem effugiat, in sanguine residet. Ita dogmatis tui, à Bardeſiano, pravitas ipsius veritatis eversa penitus concidit. Hactenus Epiphanius errorem hunc funditus evertens. Qui plura optaverit adeat supra dicta Cap. 1. contra Simonem §. 6. contra Cerinthum cap. 6. §. 4. Cap. 9. §. 4. contra Valentinum &c. Si verum eſſet quod Auctor sub nomine Prædestinati cap. 35. dicit, quòd Bardeſianes naturam corporis dixerit eſſe malam, hinc fortè cogitari poſſet factum fuiſſe, ut corporis resurrectionem negaret.

V. Quòd verò Bardeſianes præter Libros Canonicos utriusque Testamenti adhiberet etiam alios Libros apocryphos, ut Epiphanius dicit, mirandum non est: hæc enim Hæreticorum ars frequenter fuit, ut ſuos errores, quibus Canonicos refragari videbant, tuerentur, vel Sacros à Canone expungere, vel apocryphorum auctoritate ſe munire, & Sacros Codices eſſe falſatos ex eis offendere. Hoc in Manichæis deſteſtatur S. Auguſtinus L. 11. contra Fauſtum c. 2. dicens: *Ubi ſic manifeſtâ veritate iſti præſocantur, ut obſeſſi dilucidis verbis Sanctarum Scripturarum, exitum in eis fallâ-*

fallacia sua reperire non possunt, id testimonium quod prolatum est, falsum esse respondent. O vocem à veritate fugacem, in amentia pertinacem! Usque adeò invicta sunt, quæ adversus vos de Divinis Codicibus proferuntur, ut non sit aliud quod dicatis, nisi eos esse falsos. Deinde alia subiungens, addit: Tu es ergo regula veritatis? Quidquid contra te fuerit non est verum? An hæc & alia, quæ ibi contra Manichæos dicit Augustinus, intorqueri possint contra, modernos A catholicos, qui vel Libros, qui contra se faciunt, è Canone expungunt, vel etsi admittant, suo privato iudicio in contrarium sensum ab eo quem Ecclesia intelligit, interpretari volunt, iudicet prudens ac pius.

VI. Alio errore ab aliquibus notatur Bardesanes: Quòd scilicet hæresi Valentini de suo adderet, fato subijci conversationes hominum; ac putant se ex S. Augustini auctoritate fulciri, qui de Bardesane dicit Hæres. 56. *Addens de suo, ut fato adscriberet conversationes hominum.* Verùm cum nec Epiphanius, nec Eusebius, nec Hieronymus, nec Theodorus hoc errore eum notent, imò contrarium potius evincant, dum asserunt à Bardesane editum fuisse librum contra Fatum, & Antonino Lucio Vero Imperatori oblatum, cuius fragmentum adhuc extat apud Eusebium L. 6. Preparat. Evang. c. 10.: in quo distinguens homines à brutis, ista quidem necessitate duci asserit, illos verò proprio arbitrio regi multis ostendit: propterea verisimile non videtur, eum fuisse in errore, quem tanto ardore & efficacîa impugnavit. Unde Baronius ad ann. 175. n. 19. censet, illa verba non esse Augustini, sed in ejus textum alicujus incitiâ irrepsisse, cum in veteribus Manuscriptis desiderentur: ideoque PP. Maurini in sua editione illa verba omiserunt.

VII. Lambertus tamen Danæus in Origene de Hæres. censet, Bardesanem in disputatione habitâ cum Abida Astrologo & Fati propugnatore, cujus meminit Epiphanius, hujus argumentis, quamvis falsissimis cecidisse, & propriam deferendo sententiam. Fatum approbasse. Sed præfati Patres non dicunt, Bardesanem cum Abida voce disputasse, sed scripto, Librum contra eum edendo, quem postea Imperatori obtulit. Non ergo Abida cecidit, sed in sua sententia permansit.

VIII. Diodorus Tarsensis apud Photium Cod. 223. pag. 662. sentit, Bardesanem à Fato & fiderali potestate animas quidem exemisse, sed non corpora: sic enim dicitur ibi Diodorus *suam dum Fati opinionem convellit, etiam Bardesanis sententiam resellit: quæ ipsa ut ex damidio ab illa rescissa, ita seminisana etiamnum remansit. Nam etsi animam quidem à Fato, & à natalitia notatiqne*

quæ

quæ dicitur, liberam dimittit, arbitrii libertatem illi conservando: corpus tamen & quæcumque ad corpus spectant Fato gubernanda subijcit. Divitias, inquam, egestatem, morbum, vitam, mortem, & quæ in nostra non sunt potestate, eaque omnia Fati esse effecta tradit. Hæc Diodorus de Bardesane. Quæ non improbabilia de tali homine judicare. Qui enim post impugnata, & quidem valide, Valentini hæresim, eam postea quasi moderando, in parte admittere non erubuit; incredibile non est, quòd postquam sententiam de Fato prorsus rejecit, eam postea dimidiando, ex parte quidem abjecerit, ex parte autem admiserit. Sed hoc meliori judicio dijudicandum relinquam.

IX. In mei præsentis argumenti robur pro firmitate Catholicæ veritatis cum Epiphanio num. 3. sic claudam: *Ceterum cum sincera fides undique surta tecta custodiatur, in eaque fidelium salus ac firmitas sit positum, facile universarum hæreseon conficta mendacia dissolvuntur. Quemadmodum & hæreticus iste disiectus est, qui se miserrimum in statum redegit, & à vita penitus alienavit. Etenim Propheta (Isaias c. 54. v. 11.) ita Sanctam Dei Ecclesiam alloquitur: „ Ponam carbunculum lapidem tuum, & fundamenta tua sap-
„ phyrum, & muros tuos lapides electos, & propugnacula
„ jaspidem „. Deinde subjicit v. 17. „ Omnis vox, quæ adversus
„ te confurget, omnes illos vinctes; contra te verò non prospe-
„ rabitur „. Nihil enim est quod veram fidem expugnare possit,
„ quia „ Super Petram ædificata est: & portæ inferi non pravele-
„ bunt adversus illam „. Quod eidem Deus Verbum, Rex, in-
„ quam, ipse ac Sponsus, ac Dominus promisit (Matth. 16. v. 18.).* Hæc attende Lector, & videbis contra omnes hæreses Christi promissum impletum, & in futurum etiam implendum. De his vide Hieronymum in Cap. 54. Isaïæ.

CAPUT XXXII.

De Noetianis.

§. I.

Noeti conditio, errores, & exitus.

I. **N**OETIANI à quodam Noeto dicti sunt. Ita S. Augustinus Lib. de Hæres. cap. 36. *Noetiani à quodam Noeto. S. Epiphanius Hæres. 57. Post hunc (Bardesanem nempe) alius quidam hæreticus Noetus nomine prodiit, neque multis ab hinc annis: sed ante hoc ferè centum ac triginta, in Asia oriundus, urbe*
Ephæ-

Epheſo. Quibus, & tempus quo vixit, de quo infra, & patriam reſciat. Apud Philaſtrum Hæref. 53. *Noetianus* mendose legebatur, in nova autem editione Fabritii *Noetus* ponitur. Licet autem Noetum hunc genere Aſianum, patriâ Epheſium fuiſſe dicat Epiphanius; Damascenus tamen Hæref. 57., cæteroquin Epiphanium ſequi alluctus, cum patriâ Smyrnenſem facit: *Noetus hic Smyrnenſis ex Aſia fuit*. Et ante ipſum Hippolytus Portuenſis Martyr in Libro contra Noetum ipſi tributo: *Alii quidam*, inquit, *doctrinam ſubintroducunt, ſuâ diſcipuli cujuſdam Noeti, qui genere quidem Smyrnenſis fuit non multo ante*. Idem ſentit Theodoritus L. 3. Hæf. Fab. cap. 3. *Noetus autem erat genere quidem Smyrnenſis*. Inò Epiphanius ipſe in Synopſi Libri 2. Tom. 1. ait: *Noetus hic Smyrnenſis ex Aſia fuit*. Unde Noetum patria Smyrnenſem fuiſſe non eſt dubitandum.

II. Circa tempus, quo Noetus vixit, cum ut ſupra dixi S. Epiphanius aſſerat, tempore quo ipſe ſcribebat, ante ſerè centum ac triginta annos Noetum prodiſſe; & Panarium ſuum de Hæreſibus inchoaverit anno Chriſti 374. Valentis & Valentiniani Imperii anno XI.: ſit, hæreſim ſuam Noetum inchoaſſe circa annum Domini 244. Quod concordare videtur cum iis quæ de Sabellio infra dicam, omnes enim Scriptores & Patres in hoc conveniunt, quòd Sabellius Noeti diſcipulus fuerit, ab eoque eundem errorem hauſerit. Porrò cum Sabellius innotuerit ſub Pontificatu Xiſti & Stephani I., ut tradit Dionyſius apud Euſebium L. 7. Hiſt. c. 7. Gallieno imperante circa ann. Domini 259. ſequitur, Noetum paucis ante annis agnitum fuiſſe. Hoc ſolum difficultatem mihi ingerit, quòd S. Hippolytus ſupra relatus dicit, quòd *Noetus fuit non multo ante*. Cum enim S. Hippolytus communiter credatur floruiſſe anno 220. vel 222. ſi Noetus hæreſim ſuam prodidit ſolum anno 244.; non video, quomodo potuerit Hippolytus dicere, quòd Noetus non multo ante fuit: cum potiùs ejus ætate nondum hæreſis prodierit, nec Noetus Hippolytum, ſed Hippolytus Noetum præceſſerit. Dici poſſet cum Lamberto Danæo in Opus. de Hæreſ. c. 36., hæreſim hanc ſub Noeto primùm innotuiſſe ſub Pontificatu Soteri, & Imperio Marci Antonini & Luci Veri circa annum 173., octuageſimo & quarto anno antequam à Sabellio recoqueretur. Hanc tamen difficultatem viris eruditis, Hippolyto librum illum adverſus Noetum adjudicantibus, enodandam relinquo.

III. Duos errores effudit Noetus. Unum, quo dicebat, unam ac eandem Perſonam eſſe Patrem & Filium & Spiritum Sanctum, ideoque Patrem eſſe paſſum. Alterum, quo aſſerebat ſe eſſe Moyſen: fratrem verò ſuum, quem in errore ſocium habebat, eſſe

Aaronem (non *Eliam*, ut apud Philastrium Hæres. 53. fortè mendosè legitur). Ita Epiphanius Hæres. 57. num. 1. ubi postquam dixit, quòd Noctus *alieno spiritu afflatus ea dicere ac docere ausus est, qua nec Propheta, nec Apostoli, nec Ecclesia ab initio tenuit, ac ne cogitavit quidem*. Subjungit: Igitur velut quādam elatus *insaniā, passum esse Patrem non dubitavit asserere. Sed & majori quādam arrogantia ac vecordia elatus, se se Moysen, fratrem verò suum Aaronem esse dixit*. De primo Noeti errore testatur etiam S. Augustinus Hæres. 36. dicens: *Noetiani à quodam Noeso, qui dicebat, Christum eundem esse Patrem & Spiritum Sanctum*. Theodoritus L. 3. Hæret. Fab. c. 3. de Noctianis ait: *Unum dicunt esse Deum & Patrem omnium opificem, latentem quidem quando voluerit, rursus autem apparentem, quando placuerit, & eundem esse invisibilem, & videri, & genitum & ingenitum: ingenitum quidem ab initio: genitum autem, quando nasci voluit ex Virgine: impatibilem & immortalem: rursus patibilem & mortalem. Cum enim esset impatibilis, crucis, inquit, passionem suā spontè sustinuit. Eum & Patrem & Filium nominant, prout usus exegerit, vel hoc vel illud appellantes. Noeti autem appellati sunt, qui hanc hæresim secuti*. Ita Theodoritus.

De utroque Noeti errore loquitur etiam Hippolytus in præcitato libro contra Noetum his verbis: *Dixit hic, Christum esse eundem Patrem, ipsumque Patrem genitum esse & passum . . . Ajobat hic se esse Moysen, & fratrem suum esse Aaron*. Damascenus quoque Hæres. 57. de Noeto: *Is, inquit, in currum furoris elatus . . . Filio-Patrem, aut Patri-Filium asserere Christum ausus est, eundem Patrem ac Filium & Spiritum Sanctum præstiteri, se verò Moysen esse, fratremque suum Aaronem venditare*.

IV. Adeò atrocis blasphemiae rumore ad Ecclesiam Sinyrnæ perlato, Noetum presbyteri advocant, monentque, ut ab inaudita blasphemia retractatione recedat. Ita Epiphanius: *Inter hæc, inquit, beatæ memoriæ presbyteri ejus rei sumā permoti hominem advocant, deque his omnibus interrogant, utramnam tam contumeliosam in Patrem dogma proposuisses. At ille coram Presbyterorum confessa productus, insidiari primò, quòd ante ipsam nemo atrox illud atque exitiale virus evomisset: Inde dimilius & pervicacior factus, discipulos, quorum primi decem fuere, sibi aggregare curavit. Quo audito iterum Presbyteri congregati, Noetum unà cum discipulis, quos in errore pertinaces cognoverunt, à fidelium communione ejecerunt*. Ita Epiphanius prosequitur: *Postea verò cum rabiem suam nonnullis, ut ita dicam, aspersisset, ac decem serè homines sibi adiunxisset, majorem in superbiam atque insolentiam elatus, atque*

atque audacior factus, palam hæresim suam disseminavit. Proinde rursus iidem illi Presbyteri, tam ipsum, quam qui se ad eum infelicitè aggregarant, arcessunt, atque iisdem de rebus sciscitantur. Ille cum grege suo frontem perficans audaciter contradicere capit. Ac quid, inquit, mali feci? Unum Deum veneror, unum novum; nec præter ipsum alterum natum, passum, mortuum. Ad quam opinionem cum constanter adhæreret, eum pariter atque ejus discipulos ab Ecclesia pellunt. Hæc Epiphanius. Similia habet Hippolytus Martyr in asserto Libro contra Noetum.

V. Porro quod ibi dicit Epiphanius, Noetum primò negasse, quia nemo ante illum tam atrox virus evomisset, intelligi debet restrictè; vel quod nemo ibi Smyrnæ id docuisset, vel quod nemo publicè & de hoc specialem Sectam faciendo errorem illum professus fuerit. Cæterum fuisse in schola Montani blasphemiam, præconceptam, patet ex iis quæ supra cap. 23. §. 2. n. 7. dixi de Præsea ex Auctore Append. ad L. de Præscr. Tertull. c. ultimo, qui hæc eandem labe infectus fuit. Hinc Theodoritus L. 3. Hæret. Fab. c. 2. de Montanistis: *Nonnulli autem eorum, inquit, tres Personas Divinitatis sicut & Sabellius negarunt, eundem esse dicentes Patrem, & Filium, & Spiritum Sanctum, quemadmodum Arianus Noetus*. Imò cap. sequenti dicit, quod Noetus renovavit hæresim, quam quidam Epigonius nomine primus peperit; Cleomenes autem acceptam confirmavit. Ex quibus apparet, Noetum hujus hæresis non fuisse inventorem, sed potiùs propagatorem seu renovatorem.

VI. Non diu tamen supervixit homo infelicitissimus, sed brevè unà cum fratre nequitie suæ consorte è vivis excessit, Fidelium communionem & Ecclesiasticam sepulturam, ut merebatur, privatus. Ita Epiphanius num. 2. *Moritur deinde paulò post cum fratre suo; neque tamen aut ille pari ac Moyses olim, aut ejus frater eadem quæ Aaron honorificentia sepulti sunt: tanquam enim desertores abiecti sunt, nec ab illo Catholicorum sepulture mandati: extincto tamen auctore extinctus non fuit error, sed ab illius assecclis iisdem argumentis roboratus: Post hæc (prosequitur Epiphanius) qui corruptam ab eo doctrinam hausserant, istud ipsum dogma corroborarunt, iisdem, quibus ipsorum magister initio, verbis adducti*. Aliqua tamen non minùs impia Calistum quendam addidisse, refert Theodoritus L. 3. Her. Fab. c. 4. dicens: *Eam post Noetum defendit Calistus, qui etiam excogitavit quadam additamenta impietati dogmatis*. Quæ autem ista fuerint, non dicit.

VII. Brevis etiam fuit sub Noeti nomine hujus hæresis duratio, sive quia in subsequentiū hæresum, & præsertim Sabellianæ,

nomen transiit, unde Theodorus citato loco agens de Nepote cap. 7. dicit, suâ ætate nullam sub Noeti nomine hæresim extitisse. Sive quia ista sicut & omnes aliæ veritate prævalente suffocata remansit. Quare Theodorus (quod mei præsentis Operis argumentum mirè confirmat) postquam singulatim ostendit, omnes hæreses ad sua usque tempora exortas, vel penitus evanuisse, vel vix alicubi reperiri; Catholicam tamen veritatem toto Orbe dominari, & super hoc Prophetarum attulit vaticinia, addit: *Hæ autem prædictiones per Ecclesiam finem accepere. Hæreticorum autem doctrina, partim quidem radicibus evulsa est, partim autem à semiaridis arboribus nihil differt, in paucis urbibus & vicis manens, & eorum qui illa composuerunt imbecillitatem & falsitatem ostendens. Dominus enim dispergit ac dissipat signa ventriloquorum, & divinationes à corde, & statuit verba Filii sui, & consilium Angelorum suorum verum esse ostendit, & dissipat consilia gentium, & infirmat cogitationes populorum. Consilium autem Domini manet in æternam. Cogitationes cordis ejus in generationem, & generationem. Beatus ergo populus, cujus est Dominus Deus ejus, populus quem elegit in hæreditatem suam.* Hæc, quæ Theodorus de hæresibus ad sua usque tempora, fiduciam nobis augent, hoc idem Deo patrocinate Catholicæ veritati, hæresibus nostrorum temporum evenitum.

§. II.

Errores Noeti confutati.

I. **P**rimus Noeti error ex dictis Trinitatem Personarum à Deo auferebat, asserendo, unam eandemque Personam esse Patrem Filium & Spiritum Sanctum, & proinde Filio pro nobis passio Patrem quoque esse passum assererat: quâ ratione ejusmodi errore infecti *Patripassiani* postea dicti fuere. Circa hoc duo extremi errores fuere. Unus nesciens componere cum unitate naturæ Divinæ Trinitatem Personarum, ut tueretur naturæ Divinæ unitatem, Personarum Trinitatem negavit. Et hic error fuit Noeti & Sabellii. Alter verò nesciens Trinitatem Personarum conciliare cum unitate naturæ, ut salvaret Trinitatem Personarum, sustulit naturæ unitatem. Et hic fuit error Arii. Veritas autem Catholica in medio stans, & Trinitatem Personarum in Deo semper admisit, & simul Unitatem naturæ strenuè propugnavit.

II. Indè autem Noeti error, unde ortus fuit ab opposito error Theodoti, de quo supra. Quia enim Theodotus legebat in Scripturis

pturis Christum hominem, in solâ humanitate hærens eum nudum esse hominem assererat; sic Noetus audiens in eisdem Christum Divinam habere naturam cum Patre & Spiritu Sancto, ad hanc solam respiciens, Christum Filium unum & eundem cum Patre & Spiritu Sancto esse affirmabat; non ad alia Scripturarum loca, quibus distinctio Christi Filii à Patre & Spiritu Sancto aperte demonstratur. Ita discurret Epiphanius Hæres. 57. num. 2. de Noetianis dicens: *Sic igitur simplex quiddam Deo, uniusque formæ tribuunt, ac Theodotum imitantur. Nam ut iste ad unum extremum declinans, nudum hominem Christum esse differuit: sic ille (Noetus) aliud ad extremum desciscens, eundem esse Patrem, Filium, & Spiritum Sanctum, uniusque Personæ statuit: & hunc ipsum passum ac natum esse existimavit. Sed neque Theodoti sectatores veri aliquid elocuti sunt, neque Noetus, aut Noeti discipuli, qui Anoetus, hoc est insipiens, quod ad vim ingenii & facultatem pertinet, potius est dicendus, cum utrosque ac ceteros omnes à veritate aberrantes Sacræ Literæ redarguant.*

III. Propterea Noeto coram Presbyterorum concilio dicenti: *Unum se Deum colere*; responderunt (apud Epiphanium n. 1.) *Et nos unum quoque Deum colimus: sed quemadmodum legitime illum colere novimus. Itidemque Christum habemus unum, sed quemadmodum novimus, unum Christum Dei Filium, passum quomodo passus est, mortuum quomodo mortuus est. Qui & resurrexit, & in Cælum ascendit, & ad Patris dexteram manet, & venturus est iudicare vivos & mortuos. Hæc nos ab Scripturis Sacris accepta profitemur, quæ & novimus.* Ita Catholici illi Smyrnenſes Presbyteri: idest Christum Dei filium esse passum, mortuum, sed quomodo Sacræ Scripturæ docent eum esse passum, & mortuum, nempe solum ipsum non Patrem!

IV. At: Noetiani dicebant, se etiam unum Deum fateri: addebant tamen: si Christum confitemur Deum: igitur ipse est Pater; si est Deus: passus verò est Christus Deus, Pater igitur est passus, Pater enim erat ipse. Verùm hæc aperta insania est. Si enim Christus est Filius, ut Noetiani admittunt, non potest ipse esse sui Pater: Etenim (inquit Epiphanius n. 3.) *quis fieri potest ut idem Pater sit ac Filius? Nam si Filius est, necesse est alicujus sit Filius, à quo sit genitus. Sin Pater est; se ipsum generare nihil potest. Neque enim idipsum, quod Filius dicitur, se ipsum genuit, sed est à Patre genitus.*

Præterea hoc manifestè passim Scripturæ testantur. Pater ipse de Cælo Christum filium suum esse; & quidem personam à se distinctam testatus est, semel quidem in Jordane Matth. 3. v. 16.

& 17. ubi baptizatus Christo dicitur: *Et ecce aperti sunt ei Cæli: & vidit Spiritum Dei descendentem sicut columbam, & venientem super se. Et ecce vox de Cælis dicens: Hic est Filius meus dilectus, in quo mihi complacui.* Quod repetit Lucas c. 3. v. 22. Et iterum in monte Thabor Matth. 17. v. 5. & *Ecce vox de nube dicens: Hic est Filius meus dilectus, in quo mihi bene complacui: ipsam audite.* Quæ S. Petrus, qui fuit præsens, & audivit Epist. 2. c. 1. v. 17., de Christo ait: *Accipiens enim à Deo Patre honorem & gloriam, voce delapsa ad eum hujusmodi à magnifica gloria: Hic est Filius meus dilectus, in quo mihi complacui, ipsam audite.* Et hanc vocem nos audivimus de Cælo allatam, cum essemus cum ipso in monte Sancto. Super quæ Epiphanius non dixit, inquit: *Ego sum filius meus, audite me, sed Hic est Filius meus, ipsam audite*, ut ostenderet Pater, Filium Personam esse à se distinctam. Et intra idem Epiphanius n. 4. *Ad hæc, inquit, Pater ad Jordavem de Cælo loquutus est: Filius verò ad Jordavem descendit: Spiritus Sanctus inter utrumque sub columba specie apparuit, & in hunc illapsus est. Quamquam Spiritus Sanctus minimè carnem suscepit, neque corpus induit. Sed ne Filius cum Spiritu Sancto coalescere confuudique crederetur, sub imagine columbe videndum se præbuit: uti nimirum Spiritus cum singulari ac propria persona cerneretur.* Sic ergo ibi Personarum Divinarum distinctio manifestè demonstrata fuit: Patris nempe à Filio, & Spiritus Sancti ab utroque.

V. Se alium esse à Patre Christus ipse testatur maxime Joan. 16., ubi v. 5. se à Patre missum dicit & ad ipsum redire: *Vado ad eum qui misit me.* v. 16. *Vado ad Patrem.* Et v. 28. *Exivi à Patre, & veni in mundum: iterum relinquo mandum & vado ad Patrem.* Hæc certè non diceret, si ipse esset Pater. Se quoque alium esse à Spiritu Sancto ibidem demonstrat ubi v. 7. dicit: *Expedit vobis ut ego vadam: Si enim non abiero Paraclitus non veniet ad vos: Si autem abiero, mittam eum ad vos.* Item v. 14. *De meo accipiet.* Unde Epiphanius ait: *De Spiritu verò Sancto sic loquitur, „ Si ego abiero, ille Spiritus veritatis, „ Sed multò illud apertius, „ Ego vado, & ille venit. Neque verò dixit: Ego vado, & ego venio. Sed iisce vocibus, „ Ego, & ille, „ tam Filium hypostasi suâ constare, quàm Spiritum Sanctum itidem suâ, demonstrat.* Item, „ Spiritus veritatis qui à Patre procedit, de meo accipiet, „ Quibus verbis ostendit, & hypostasi Patri propriam, & Filio, & Spiritui Sancto esse tribuendam. Ita S. Epiphanius.

Accedit S. Augustinus Tract. 94. in Joan., ubi excitatâ questione, quomodo potuerit Christus dicere, *Si non abiero, Paraclitus non veniet ad vos*, quasi præsentia Christi impediret S. Spiritus adven-

adventum: eaque solutâ dicendo, verba Christi sic esse intelligenda: *Non potestis capere Spiritum, quamdiu secundum carnem persistitis nusse Christum . . . Christo autem discendente corporaliter, non solum Spiritus Sanctus, sed & Pater & Filius affuit illis spiritaliter.* Postea subiungit: *In nullo autem credendus est esse Pater sine Filio & Spiritu Sancto, aut Pater & Filius sine Spiritu Sancto, aut Filius sine Patre & Spiritu Sancto, aut sine Patre & Filio Spiritus Sanctus, aut Pater & Spiritus Sanctus sine Filio: sed ubi eorum quilibet unus, ibi Trinitas Deus unus.* Oportebat autem ita insinuari Trinitatem, ut quamvis nulla esset diversitas substantiarum, singillatim tamen commendaretur distinctio personarum, ubi eis, qui recte intelligunt, nunquam videri potest separatio naturarum.

VI. Adducebant pro se Noetiani verba Christi Joan. 10. v. 30. *Ego & Pater unum sumus;* Sed debuissent ad antecedentia respicere, ubi dixerat: *Pater meus, quod dedit mihi, majus omnibus est, & nemo potest rapere de manu Patris mei.* His, quis non videt, Christum fateri se esse Patrem, sed aliam personam à Patre, à quo accipit. Ideoque cum subiunxit: *Ego & Pater unum sumus.* Declarasse quidem se esse unum in naturâ cum Patre, non tamen in persona. Unde S. Hippolytus L. contra Noetum: *Si autem, inquit, dicat: Ipse dixit, „Ego & Pater unum sumus,„ advertat animum, & intelligat, quod non dixit, „Ego & Pater unum sum,„ sed unum sumus. Illud enim sumus non dicitur de uno; sed sic dixit, quia duas personas demonstravit, unam autem potentiam seu virtutem; quam ei dederat Pater per originem, quâ ab eo procedit.* Hoc præter multa advertit Tertullianus in Lib. contra Praxeam eodem, quo Noetus, errore infectum c. 22., ubi ad illa verba *Ego & Pater unum sumus,* ait: *Hic ergo jam gradum volunt figere stulti, imò cæci qui non videant. Primum, Ego & Pater, duorum esse significationem: debinc in novissimo sumus, non ex auius esse persona quod pluraliter dictum est: tum quod unum sumus, non unus sumus. Si enim dixisset, quod unus sumus, potuisset adjuvare sententiam illorum: Unus enim singularis numeri significatio videtur. Adhuc cum duo masculini generis, unum dicit neutrali verbo, quod non pertinet ad singularitatem, sed ad unitatem, ad similitudinem, ad conjunctionem, ad dilectionem Patris qui filium . . . Unum sumus dicens, ego & Pater, ostendit duos esse, quos æquat, & iungit.* Ita Tertullianus, ubi addit S. Augustinus in Collat. cum Maximino Ariano num. 14. *Quando dicitur unum sunt, etsi non dicatur quid unum, intelligitur una substantia.* De hoc egi Tom. 4. in 1. p. Qu. 1. de Trinit. Dub. 2. §. 2. à num. 18.

VII. Addam tamen, per hæc verba *Unum sumus,* voluisse Chri-

Christum duos prævenire errores, Sabellii & Nocti unum, Arian alterum, ut alterum quidem à Patre faceret Filium, sed Patri æqualem. Quare pulchrè S. August. Tract. 71. in Joann. *Audi, inquit, Sabelliane: usque aded non ipse Pater, sed alter est Filius, ut enim Arianus inæqualem asserat Patri. Audi Ariane. Usque aded Filius æqualis est Patri, ut Sabellianus eundem dicat & Patrem. Tu addæ quem tollis, tu adimple quem minuis, & nobiscum ambo confistitis: quia nec tu tollis, nec tu minuis eum, qui alter est à Patre ut convincas Sabellianum, & æqualis Patri ut convincas Arianum. Utrisque enim clamat, Ego & Pater unum sumus, . . . Quod ait unum, audiant Ariani: quod ait sumus, audiant Sabelliani: & nec illi æqualem, nec illi alterum negando sint vani.*

VIII. Quia verò Noctiani negabant pluralitatem Personarum in Deo, clamantes ex Scripturis, unum esse Deum; ideo eorum voces ita comprimit Epiphanius num. 4. *Quis non asserat, unum Deum esse Veritatis Patrem Omnipotentem, à quo Unigenitus Filius verè progressus est, Deus Verbum, Verbum, inquam, in propria Persona consistens, & à Patre re verà finè ullo initio ac tempore genitum? Unum itaque Deum cantè & prudenter Ecclesia predicat; Patrem videlicet & Filium, Quoniam, inquit, ego in Patre, & Pater in me est. Et ambo unum sumus, . . . hoc est, una Divinitas, & voluntas una, & una dominatio. Ceterum ex Patre Spiritus quoque procedit, sæapte constans hypostasi, ac re ipsa perfectus Veritatis Spiritus, qui illuminat omnia, qui à Filio accipit: Veritatis, inquam, Spiritus, Spiritus Patris, Spiritus Christi, . . . Itaque unam Ecclesia Divinitatem agnoscit: estque Deus Veritatis Pater, perfectus Pater, hypostasi suâ præditus: perfectus Filius, suam peræquè habens hypostasin; perfectus denique Spiritus Sanctus, & suam sibi hypostasin vendicans: una Divinitas, unaque dominatio. Quibus de causis Deum unum Sacra Litera pronuntiant, nimirum consubstantialem Triadem, ac semper existentem, cui eadem identitas, idemque dominatus attribuitur. Ita Epiphanius Catholicam de Trinitate doctrinam Noctianis opponit.*

IX. Opponebant insuper Christi verba Joann. 14, ubi petenti Philippo, *Domine, ostende nobis Patrem*, respondit: *Philippe: Qui videt me, videt & Patrem . . . Non creditis, quia ego in Patre, & Pater in me est? . . . Pater autem in me manens, ipse facit opera. Dicendo igitur: Qui videt me videt & Patrem; & rursus: Ego in Patre & Pater in me est, quid aliud demonstrat, nisi se esse Patrem factum visibilem per hominis speciem?*

X. Sed ineptè discurrunt Noctiani. Si enim Christus Filius erat in Persona Deus Pater, debuisset dicere *Ego sum Pater*: sed se ipsum

ipsum distinguens à Patre dixit, qui videt me, & inde videt & Patrem. Duo ergo sunt Filius & Pater, quorum tamen unus naturâ & potentiâ per circumfessionem manet in altero: & ideo subjunxit *Ego in Patre*, non *Ego Pater*; & *Pater in me est*, non dixit *Pater idem ac ego est*. Quare, inquit Epiphanius num. 10. cum ipse Pater minimè sit sed Filius, verè istud usurpavit, *Qui videt me*, videt & Patrem, ad refutandam Arii blasphemiam, quæ Filium alienat à Patre. Verba hæc *Qui videt me*, videt & Patrem exponens S. Augustinus Tract. 70. in Joann. Non quodd, inquit, ipse esset Pater & Filius, quod in Sabellianis, qui vocantur etiam Patripassiani, Catholica fides damnat: sed quòd tam similes sint, ut qui unum noverit, ambos noverit. Solemus enim de simillimis duobus ita loqui eis qui unum illorum vident & qualis est alius voluit nosse, ut dicamus: *Vidistis illum*, illum vidistis. Sic ergo dictum est, *Qui me videt*, videt & Patrem, non utique ut ipse sit Pater qui Filius, sed quòd à Patris similitudine in nullo prorsus discrepet Filius.

XI. Similiter Tract. 71. subdit: Item si quoniam dixit, Pater in me manens ipse facit opera, propterea putatur non alius esse Pater, alius ipse; audiatur quod dixit, Quæcumque Pater facit, hæc & Filius similiter facit, & intelligatur, non bis unus, sed duo unum. Verùm quia sic æqualis alter alteri, ut tamen alter ex altero, ideo non loquitur à semetipso, quia per quem & cum quo facit, non est nisi ab ipso. Hæc & alia peracutè ut de more S. Augustinus.

S. Hippolytus quoque contra Noctum ait: Cum enim Christus in omnibus se Filium dixisset & demonstrasset, non tamen cognoverant eum, neque virtutem ejus intelligere & intueri potuerunt. Et hoc Philippus cum capere non posset, quoad videre licebat, volebat videre Patrem. Cui Dominus dixit, Philippe, tanto tempore vobiscum sum, & non cognovisti me? Qui vidit me, vidit Patrem, Id est si me vidisti, per me potes Patrem cognoscere. Per imaginem enim, quæ similis est, potest facillè Pater cognosci. Sin verò imaginem, quæ est Filius, non cognovisti, quomodo vis Patrem videre? Hæc Hippolytus: qui deinde ostendit, Filium esse alium à Patre, quia in eodem cap. Filius dicit se missum esse à Patre, & ad Patrem ire. Quibus addi possunt alia loca, quibus Christus Filius rogat Patrem, ut Matth. 26. v. 39. Pater si possibile est, transeat à me calix iste. Lucæ 23. v. 46. Pater, in manus tuas commendo spiritum meum. Joann. 14. v. 16. Ego rogabo Patrem, & alium Paraclitum dabit vobis. Non rogaret autem Patrem, si ipse esset Pater: quia nemo rogat se ipsum. Sed hæc sufficiant. De eis redibit sermo cum de Sabellianis agemus.

XII. Alter Nocti error, nempe se ipsum Moysen esse, fratrem suum verò Aaronem, seu (ut apud Philastrium) Eliam, contemnendus potius & irridendus est, quàm impugnandus. Quia verò id fortè concepit ex opinione quâ quidam putarunt, Moysem nondum mortuum esse, sed quemadmodum Enoch & Eliam, vivum translatum, cui opinioni fuisse visi sunt Ambrosius Lib. 1. de Cain & Abel. c. 2., Hilarius in c. 20. Matth., Hieronymus in c. 9. A nos, Nyssenus L. de Vita Moysis, quamvis nec præfati Patres verè hoc sentiant, & communis sententia sit Moysen reverà mortuum esse, & solùm ubi sepulcrum ejus sit ignorari; ita enim Deuteron. c. 34. v. 5. *Mortuusque est ibi Moyses servus Domini in terra Moab, jubente Domino, & sepelivit eum in valla terræ Moab contra Pbgor: & non cognovit homo sepulcrum ejus usque in præsentem diem. Moyses centum & viginti annorum erat, quando mortuus est.* Aaronem quoque mortuum esse in monte Hor describitur Num. 20. à versu 26. Deuteron. c. 10. v. 6. & c. 32. v. 50. Si ergo Moyses & Aaron mortui sunt; quomodo se Moysem, & fratrem suum Aaronem esse venditabat Noctus? An quia in eo uterque surrexerat? At unde hoc & quo signo demonstrabat? Apage insaniam!

CAPUT XXXIII.

De Valesiis.

§. I.

Eorum Auctor, error, & mores.

I. **V**ALESIOS quendam nomine Valentem genere Arabem suæ Sectæ Auctorem habuisse, ex quo ejus sectatores in Bacathis Philadelphensæ Provinciæ sedem habuerint, suspicatur Epiphanius Hæresi 58. his verbis: *Sapenumero de Valesiis audivimus; ita tamen ut de illorum auctore Valente, ubinam is gentium fuerit, aut audenam excitatus fuerit, quæ illius dicta, quæ præcepta ac sermones extiterint, nondum comperire potuerimus. Quamquam ex ejus nomine, quod Arabicum est, nonnulla nobis suspicio est, in eadem illum opinione fuisse, atque ipsius hoc tempore versari sectam, quam esse nonnullorum diximus, qui in Bacathis Philadelphensæ Provinciæ ultra Jordauem habitant. In eandem suspicionem venit Damascenus Hæresi 58. dicens: Valesi. Hi sunt qui Bacathi, quod Arabiæ Philadelphiensis primarium oppidum est, habitant. Nicetas autem L. 4. Theod. Orthod. assertivè: Valeus,*
in-

inquit, *quidam Arabs natione fuisse fertur, ex quo evenit, ut ejus heresis in Bacathis pullularet. Eam tamen, non Valesiorum, sed Valentiorum appellant. Aliqui tamen non ab Auctore, sed ab operatione, & errore eam Eunuchorum vocitant. Verum ut ait Epiphanius: Ab ejus loci incolis Gnostici nominantur. Quamquam minimè Gnostici sint, & ab iis opinionibus varietate dissentiant.*

II. Equè incertum est tempus, quo hæc heresis determinatè emerferit: cum enim Epiphanius ipse illi ætati vicinior ob inopiam documentorum hesitanter loquatur, & subinde pauci de ea scripserint; proinde multa in obscuro latent. Sunt ergo qui existiment, Sectam hanc ex Origene initia habuisse vel saltem ex facto ejus, qui, ut fugeret pericula incontinentiæ (teste Eusebio Lib. 6. Hist. c.8. Nicephor. L.5.c.8. & aliis) se ipsum eviravit. Hinc Ricciolius p. 3. Chronol. Reform. catal. 2. post heresim Origenis collocat Valesianos sub anno Domini 249. Quam opinionem apertè ructur Lambertus Danaus in Opusc. de Hæres. cap. 37. ubi ait: „ Extitisse verò, & primùm innotuisse videtur post Origenem, „ cujus seculo variæ per universam Arabiam hereses ortæ sunt, „ quemadmodum ex historiis apparet, & cujus exemplo Valesii „ suam fortassè sententiam & errorem confirmarunt „ Deinde enarratâ Origenis eviratione prout eam Eusebius describit, statim subiungit, „ Quod Origenis factum hi fortassè secuti, in omnibus „ Christianis idem locum habere voluerunt. Unde nisi me fallit „ conjectura, hujus heresis ortus sub Anthero Romano Episcopo, & Juliano Philippo Imperatore collocandus est circa annum à Christo passio 216., qui est annus à Christo nato 249. Et ita Danaus cum Ricciolio circa hujus heresis exordium concordat.

III. Si tamen Canonibus vulgò dictis Apostolorum fides habenda est, apparet, in primitiva Ecclesia hunc errorem fuisse ante Origenem proscriptum. Sic enim Can. 22. legitur: *Si quis abscidit semetipsam, idest, si quis amputavit sibi virilia, non fiat Clericus, quia suus homicida est, & Dei conditionis inimicus.* Can. 23. *Si quis cum Clericus fuerit, absciderit semetipsam, omnino damnatur, quia suus est homicida.* Et Can. 22. *Læicus semetipsum abscindens annis tribus communioni privetur, quia suæ vitæ insidiator extitit.* Ita ex editione Pithœi. Quod si adhareamus Beveregio in Notis ad eosdem volenti, hos Canones editos esse occasione heresis Valesiorum, & hos violasse Origenem se ipsum evirando, oportebit dicere heresim hanc ante Origenem sumsisse initia. Unde Prateolus Valesianæ heresis ortum collocat anno 198. sub Severo Imperatore, & Victore Papa. Quibus omnibus fit, ut omnino

statui non possit certò, quo determinato tempore hæresis hæc ortum habuerit.

IV. Præterire nolo id quod ex Procopio refert Evagrius L. 4. Hist. c. 22., nempe Justiniani Imperatoris ævo Abasgos gentem ad Euphratem sitam virilia sibi abscindere consuevisse, quo putant aliqui, eos Valesiorum hæresim innovasse. Falluntur tamen, nam hæc non fuit hæresis, nec Christianorum Secta, sed Barbarorum atque Ethnicorum, quales tunc erant Abasgi, consuetudo, ut evirati majori in estimatione haberentur. Quam tamen consuetudinem tempore Justiniani conversi ad fidem, eo præcipiente, omiserunt. Ita Evagrius citato loco de Abasgis ait: *Refert præterea idem Scriptor (Procopius) Abasgos per idem tempus ad mansuetiorem cultum translatos Christianam Religionem suscepisse, & Eunuchum quemdam Palatii Euphratam nomine, qui natione Abasgus erat, ab Imperatore Justiniano ad eos missum esse, qui interdiceret, ne cuquam deinceps in ea gente virilia ferro abscinderentur, neve eis inferretur natura. Ex his enim ut plurimum eligebantur ministri Imperialis cubiculi, quos vulgò Eunuchos vocant. Tunc etiam Justinianus, cum Ecclesiam in honorem Deiparæ apud Abasgos ædificasset, Sacerdotes illis constituit. Atque exinde Abasgi Christianæ legis doctrinam accuratissime didicerunt.* Ita Evagrius. Ex quibus etiam patet, Abasgos, non ex motivo Religionis se evirasse & quidem omnes, ut Valesios, sed ex motivo humano, ut majori in pretio haberentur, & aliquos tantum, ut hodie etiam apud Mahumetanos in more est.

V. De Valesiorum moribus hoc scripto proditum est, quòd omnibus virilia amputabant: & hæc erat præcipua eorum Sectæ tellera: non enim in suam societatem nisi eviratos homines admittebant: hospitibus quoque ad eos divertentibus, idem faciebant; renuentes verò, vinculis & manicis alligatos, vi evirabant. Ante evirationem nemini licebat de animatis comedere.

Postea omne ciborum genus ei permittitur. Hæc omnia colligimus ex Epiphanio, qui Hæres. 58. de Valesiis, ait: *Universi porro castrati sunt... Quemcumque verò in suam disciplinam receperint, quamdiu nondum ei exsecta virilia sunt, ab animatis abstinet. Postquam autem sive illi persuaserint, sive violenter exsecuerint, tunc demum, quasi ab omni certamine liber, atque extra periculum omne positus, ne ciborum usu ad libidinum voluptates inflammetur, quòd-cumque ciborum genus permittitur. Neque verò suos eo modo dumtaxat afficiunt, sed etiam peregrinos sæpè transeuntes, & ad se se divertentes: quemadmodum frequenti de illis rumore spargitur. Hos enim intus correptos, & manicis ac vinculis alligatos violenter membris*

bris suis mutilant. Hæc sunt quæ Epiphanius se accepisse dicit de illis; quorum cum & nomen & domicilium nesciverit, non alios quam Valesios esse persuadet.

VI. Ab initio nondum agniti, Ecclesias cum Catholicis adibant, detectâ verò postea eorum amentiam, à fidelium consortio ejecti sunt. Ita Epiphanius ibidem: *Principio itaque Ecclesiam plerique frequentabant, quod eò usque tenuit, donec, amplificatâ diffusâque illorum insania, ab Ecclesiæ consortio segregati sunt.* Damnatos fuisse in Synodo Achajæ scribit Auctor Prædestinati L. 1. c. 37. *Tam trigesimam & septimam hæresim, inquit, Valesii incurrunt, qui infelices & se ipsos castrant & hospites suos. Hoc modo dicunt illud impleri, „ Qui se castraverunt propter Regnum Cœlorum „.* Alia quoque hæretica docere dicuntur & turpia: sed quæ illa sint, nec ipse Epiphanius commemorat, nec uspiam potui reperire. A Synodo damnati sunt Achajæ.

VII. Ex hæcenus dictis liquet, palmarem & characteristicum Valesiorum errorem fuisse, quod nemini nisi membris visibilibus abscissis ingressus in Regnum Cœlorum pateret, ideòque omnibus illorum Sectæ ea abicinderentur. Ex quo alius per legitimam consequentiam nascebatur error, quòd scilicet apud eos illicitæ & abominabiles forent nuptiæ, quem in superioribus refutavi (ut in Severo, Tatiano, Encratitis &c.) Si enim eviratio in eorum sententia ad salutem necessaria erat; ergo non evirati, & uxorati non erant capaces Regnum Cœlorum intrandi.

Aliis erroribus fuisse inquinatos, tradit S. Augustinus Hæres. 57. qui tamen fuerint, sibi non constare: *Alia quoque hæretica, inquit, docere dicuntur & turpia: sed quæ illa sint, nec ipse commemoravit Epiphanius, nec uspiam potui reperire.* Damascenus Hæres. 58. ait: *Habent autem & alia quedam erroris referta dogmata: atque in primis Legem & Prophetas abnegant, quasdamque obscenitates adiungunt.* Addit Nicetas: *Eadem itaque Valesii quoque de Principiis & Potestatibus cum Archonticis, Sethianis, & cæteris hujus farinae sentiunt.* Quod indicat & Epiphanius per illa verba: *Ac de Principatibus & Potestatibus cæterisque in hunc modum sentiunt.* Corporum etiam resurrectionem negasse aliqui dicunt. Sed quicumque alii fuerint Valesiorum errores, sive quòd Legem & Prophetas rejecerint, quòd de Principatibus & Potestatibus similia prioribus Hæreticis docuerint, & quòd turpia ut licita admiserint, & demum quòd resurrectionem negaverint; cum hæc omnia in superioribus hæresibus examinata fuerint & reprobata; solum eorum palmare dogma hic refutandum superest.

§. II.

Valesiorum error profligatur.

I. **V**alesiorum igitur præcipuus & singularis error, ne dicam infania, fuit: Neminem posse in Regnum Cælorum pervenire, nisi membra virilia re ipsâ exsecuerit, ac se Eunuchum fecerit. Hic error ipsum Deum hominis conditorem directe ferit, qui hominem cum omnibus suis membris etiam virilibus formavit, & ad eorum actum feminam in adjutorium dedit, ut ita humanum genus propagaretur. Ideoque eis benedicens ait Gen. 1. v. 23. *Crescite & multiplicamini, & replete terram.* Ne autem dicant, hoc contigisse in statu innocentie, quando nullum libidinis & incontinentie aderat periculum, noverint, hoc idem à Deo dictum fuisse post diluvium Noe & filiis ejus Genes. 9. v. 1. *Benedixitque Deus Noe & filiis ejus: & dixit ad eos: Crescite & multiplicamini, & replete terram.* Nec solum hominem, sed & cetera animantia prætatis membris donavit, imò eorundem abscissionem adeò exhorruit, ut animalia, à quibus talia membra abscissa fuissent, sibi offerri in sacrificium nollet, & talem abscissionem fieri prohiberet: ita enim Levitici 22. v. 24. legitur: *Omne animal, quod vel contritis, vel tasis, vel sectis, ablatisque testiculis est, non offeretis Domino: & in terra vestra hoc omnino ne faciat.* Quod ergo Deus in homine & animantibus condidit; quo carere nolebat sibi in sacrificium offerenda, carere homines jubebit, ut ad Regnum Cælorum admittantur? Rursus si Eunuchos in Ecclesiam Dei nolebat admitti, idest nolebat populi Judaici privilegium frui: unde Deuteron. 23. v. 1. *Non intrabit Eunuchus attritis, vel amputatis testiculis, & abscisso veretro, Ecclesiam Dei:* hos putabimus solos in Regnum Cælorum fore admittendos?

II. At non solum Deo, sed & Gentibus ipsis atque Ethnicis exosi & contemtibiles erant Eunuchi. Ideoque Lampridius in Alexandro Severo scribit, hujusmodi eviratos homines esse Reipublicæ ac Principum perditionem: unde Alexandrum maxime commendat, quod Eunuchos nec in officiis habuerit, nec in ministerio, imò quotquot ab Eliogabalo in Aula retenti fuerant, ejecerit & amicis suis dono dederit, datâ facultate, si ad bonos mores non redissent, eos occidendi absque auctoritate Judicis: vocans eos tertium genus hominum, nec videndum, nec in usu habendum à viris, sed vix à feminis tolerandum. Hinc Domitianus, licet aliunde moribus Princeps turpissimus, ab Ammiano Lib. 18.

lau-

laudatur, quòd lege latâ Eunuchos fieri vetuisset. Et contra execratur Lib. 14. Semiramidem veluti primam, quæ in hoc vim iniecit naturæ, eam mutilando. Domitiani legem contra Eunuchos Hadrianus confirmavit, crimen capitale adiciens medico qui exciderit, & ei qui sese excidendum finè Præsidis licentiâ obtulerit, ut legitur Lib. 48. Digest. Tit. 8. Ad Legem Corneliam de Siccariis, & Veneficis. Cujus Legis meminit Justinus Martyr in Apologia 2. ad Antoninum Pium. Quam Legem Christiani Imperatores, & præcipuè Justinianus Novellâ suâ Constitut. 142. Tit. 25. De his, qui Eunuchos faciunt Collat. 9. c. 1., novis pœnis adauxit.

Et meritò quidem. Nam jus naturæ dicat, non esse evitendum quod, ut supra dixi, à Deo sapientissimè ac providentissimè est constitutum, ejusque opificium servandum esse integrum ad finem propter quem illud instituit, nempe speciei humanæ propagationem & conservationem: quæ omnia per evirationem ut patet violantur. Hoc novit Assyrius ille Rex apud Lucianum de Dea Syra, qui reficiens Columbanum juvenem pulcherrimum accusatum de violato thalamo cum Stratonice Regina uxore sua, suâ propria manu sibi virilia abscidisse, ne ob familiaritatem cum præfata Regina, in suspicionem violatæ fidei maneret: *O Columbane, inquit, cur magnum hoc malum perpetrasti? Cur autem te ipsum indigno adeò facinore solus virorum deformasti? Non ita prorsus laudo hæc, ô infelix, qui talia quidem sustinisti, qualia utinam neque te pati, neque me aspicere nunquam contigisset.* Ita Rex, etiam barbarus, juvenis illius evirationem tanquam naturæ legi contrariam detestatur, quam Valesii necessariam ad Regni Cælorum consecutionem insanè omnibus præscribebant.

III. Videamus modò, quo spiritu acti ad hoc consilium ut se ipsos evirarent Valesii proruperint. Ut scilicet, ajebant, vitemus incontinentiæ periculum, abscindimus membrum libidinis ministrum, sequentes ipsius Christi præceptum Matth. 18. v. 8. *Si autem oculus tuus vel pes tuus scandalizat te, abscinde eum & projice abs te: bonum tibi est ad vitam ingredi debilem vel claudum, quàm duas manus, vel duos pedes habentem mitti in ignem æternum: & si oculus tuus scandalizat te, erue eum, & projice abs te: bonum tibi est cum uno oculo in vitam intrare, quàm duos oculos habentem mitti in gehennam ignis.* Hisce verbis aberrare tueri se arbitrabantur Valesii, dum quod ipse præceperat adimplebant.

IV. Eos tamen S. Epiphanius Hæres. 58. num. 2. redarguit, quòd si propterea quòd scandalo sunt membra virilia amputanda judicant, omne membrum à corpore abscindendum erit, cum nul-

nullum sit, quod aliquando scandalum non afferat, & præcipue abicindere sibi deberent cor, ex quo ipso Christo teste Matth. 15. v. 18. omnes cogitationes malæ, fornicationes, adulteria exeunt: *De corde enim exeunt cogitationes malæ, homicidia, adulteria, fornicationes &c.* Sic ergo Epiphanius: *Quod si, inquit, membrum illud unum quod scandalizat relinquendum non sit, consequens est nullum ut prorsus relinquatur. Etenim membra nos omnia scandalizaverunt. Quis autem est, qui cor suum in omnibus scandalum obiciens avellere atque amputare possit? Quippe ex interioribus, inquit, exeunt fornicationes, adulteria, libidines, & id genus cætera. Ecquis igitur cor suum abrumpet?*

Deinde illos hoc discursu perstringit: vel corpus resurget, vel non resurget: si non resurget, quid attinet unum solum membrum auferre? si resurget: ergo imperfectum resurget, cum potius resurgere deberet illud membrum quod non peccavit, quam alia, quæ non abscissa peccarunt: *Si, inquit, ut nonnullorum fert impietas & amentia, corpus minimè resurgit, quid tandem nostrâ refert, quod ab illis asseritur? Cum enim universa membra Cælestæ Regni minimè ingredi possint, quid attinet uno solo mutilari membro, cum id alia nequaquam perficiant? Jam verò si corpus excitatur (uti verè accidit) esine ut in Regno Cælorum mancum aliquid sit, aut mutilum? Nonne turpis quædam Cælestis illius Regni futura species est, si truncata membra ad sempiternam illam gloriam admittantur? Præterea si membrum illud quod scandalum præbet, abscissum fuerit, amputatum utique est, ac proinde non peccavit. Quod cum ita sit, primum omnium resurgere ipsum oportet quod minime peccaverit.*

V. At quia Valesii hoc se facere dicebant, ut sic vitarent fornicationes, adulteria, quia Apostolo teste fornicarii & adulteri Regnum Dei non possidebunt; noverint, à Regno Dei arceri nedum adulteros & fornicarios opere & effectu, sed eos etiam qui licet opere non pollint, animo tamen & voluntate tales esse velint si possent: *Eunuchus enim verus est, non qui non potest, sed qui non vult dare operam voluptati* (inquit Clemens Alexandr. Lib. 3. Pædagogi c. 4.) Eviratio autem aufert quidem potentiam ad effectum voluptatis, sed non aufert, imò auget voluptatis amorem: unde Ecclesiastici 20. v. 2. dicitur: *Concupiscentia spadonis devirginebit juvenulam.* Et c. 20. v. 21. *Videns oculis & ingemiscens, sicut spado complectiens virginem & suspirans.* Quapropter S. August. L. 6. contra Julianum cap. 14. *Utique, inquit, concupiscere viventis sentientisque naturæ est, ita ut non desit concupiscentia quam spadonum quoque castitas frænct, minus quidem laboriosa, quia ubi mate-*
riam,

riam, de qua operetur, non invenit, minus adversus eam libido con-
surgit. Est tamen, pudicèque comprimitur, ne concumbendi quam-
vis irritus ipse conatus, in eam turpitudinem veniat, propter quam
Calligonum Valentiani junioris Eunuchum gladio novimus ultore pu-
nitum, meretricis confessione convictum. Neque enim & in Libro
Ecclesiastici adhiberetur indè similitudo & diceretur,, Vicens oculis
& ingemiscens, quasi spado complectens virginem & suspirans,, :
nisi & ipsi moverentur concupiscentiæ carnalis affectibus, licèt desti-
tuti carnis effectibus. Hæc S. Augustinus. Et Epiphanius Hær. 58.
n. 4. de Eunuchis ait : *Quin etiam vehementiori cupiditate flagrabat.*
Etenim spado non à sua cupiditate abstinere, sed eam perficere non
posse à sapiente dicitur,, Concupiscentia spadonis, inquit, devir-
ginabit juvenculam,,.

VI. Hoc idem fusè exaggerat S. Basilii (seu quisquis alius)
L. de Virginitate Tom. 3. noviss. Edit. n. 61. his verbis,, Qui au-
tem non intellexerunt illud, *Et sunt Eunuchi, qui se ipsos ca-*
straverunt propter Regnum Cælorum, semetipsos absurdè ca-
straverunt, hoc ipso facinore lasciviam suam eminùs incusantes.
Nam qui instrumentum amoris carnalis projiciunt, ne, si ad-
sit, operetur, eos manifestum est cupiditate quidem ad concu-
bitum ferri, detractis autem sibi armis, non quòd nolint, sed
quòd non possint, virginitatem colere. Divina autem Lex,
non actionem, sed cogitationem judicat, quisquis non factò
mœchatus est, sed vidit ad concupiscendum, jam mœchatus
est (Matth. 5. v. 28.). . . . Quare post abscissionem, incontinen-
tiores illos meritò quis dixerit. Nam cum se continere non
possint ac propterea metuant ne deprehendantur in flagitio, ut
licentiam habeant libidine ad arbitrium utendi, servi quidem
voluptatis, sed nolentes perfectionem operis impedimentum
sibi esse futuræ deinceps ac perpetuæ voluptatis, abscisso actio-
nis argumento licenter insaniunt ad concubitus,,. His & aliis
Valesios arguit Basilii, dum vitandæ incontinentiæ specie, re ve-
râ autem, ut incontinentiæ liberius vacarent, genitalia sibi ab-
scindebant : ideoque jure dicit Augustinus cum Damasceno, quòd
quædam turpia facinora docebant, & inducebant.

VII. Nec eis prodesse poterant Christi verba Matth. 18. *Si*
manus, vel pes tuus, si oculus tuus scandalizat te, abscinde eum &
projice abs te. Nam in primis Christus ibi non dicit : si virilia tua
scandalizant te, abscinde ea ; sed si manus, si pes, si oculus. Cur
ergo Valesii manus pedes cum eis scandalo erant, non abscinde-
bant ; cur oculos, per quos intrat libidinis æstus, cur ipsum cor
primam cupiditatum originem non eruebant, non abiciebant ?

Audiant ergo S. Jo. Chrysoſt. Homil. 59. aliàs 60. eos his verbis monentem: *Non de membris hæc dicit. Absit: sed de amicis, de propinquis, quos quasi vice membrorum habemus. Hoc etiam supra dixit (c. 4.) & nunc dicit. Nihil quippe ita noxium ut consuetudo pravorum. Nam quæ necessitas non potest, sæpè amicitia potest, tum ad damnum, tum ad utilitatem. Ideoque eos qui nobis noxii sunt, cum multa vehementia abscindere jubet, hos subindicans qui scandala afferrent. Eodem modo præfata Christi verba exponens S. Augustinus, Serm. 81. *M. dō, inquit, audisti Evangelium, amputa, projice abs te, quisquis tibi carus est, quisquis tibi pro magno habetur à te, tamdiu tibi magnus sit, tamdiu dilectum tuum membrum sit, quamdiu non cæperit scandalizare, idest mali aliquid suadere. Sicut enim in phycis licet omne corporis membrum carum sit, si tamen putreficere incipiat, illudque servari absque totius corporis perniciæ non possit, à medico abscinditur: Ita in morali disciplina, ubi de animæ salute agitur, quidlibet etsi carissimum & instar oculi dextri, si animæ in perniciem cedere cæperit, abjiciendum ac eruendum est.**

§. III.

Danæi calumniæ dissipatæ.

I. **Q**Uæ hætenus de Valeſiis diximus, in nos & Romanam Ecclesiam calumniosè intorquere conatur Lambertus Danæus in suo Opusc. de Hæresibus c. 37. ubi vult, Cœlibatum Sacerdotum & Monachorum se ipsos mysticè castrantium, & nuptias abhorrentium, à Valeſiorum errore fuisse desumptum, & doctrinæ quam dæmoniacam appellat Paulus 1. Tim. 4. v. 4. verissima femina ac melle. Inde observans, quod de Valeſiis dicitur, nempe, quodd multa turpia & inhonesta fieri concedunt, subdit, *Quod omninò consequi necesse est. Nam qui conjugium, quod à Deo institutum est, damnat, is omnem incontinentiam, & fornicationem toleret & permittat, necesse est. Id quod videmus accidisse in Papatu, ubi Presbyteris legitima conjugia non licent, sceleratissima autem stupra conceduntur: Ita nimirum ulciscitur Dominus Verbi sui contemptum, & stultas vel potius blasphemias hominum in ipsius sapientem ordinationem voces, uti in his exemplum peripicue videmus.* Ita Danæus, ut de more.

II. Sed quis hic non videt, eum odio in Catholicam Ecclesiam obsecratum tot evanere mendacia quot verba? Hoc pluribus jam

jam ostendi contra alterum sue Sectæ hominem, tum in Vera Ecclesia Tom. 2. p. 1. art. 5. tum in Colloquiis Theologico-polemicis Classe 1. Cæterum ne Danæum irresponsum dimittam: dicat mihi. Unde colligit, quòd Ecclesia Catholico-Romana damnet nuptias? nonne ipsa Valesios, Severianos, & alios nuptias damnantes, veluti dæmoniæ doctrinæ professores proscribit? nonne ipsa matrimonium ad dignitatem Sacramenti extollit, quod Danæus cum suis recusat? Laudat Virginitatem cum Paulo 1. Cor. 7. sed Nuptias in eis qui voluerint adprobat. At, inquires, eas aliquibus interdicit Presbyteris & Monachis: fateor. At quia hi liberâ suâ voluntate elegerunt se totos Domino mancipare, à quo cum distrahatur conjugium, quia teste Paulo 1. Cor. 7. v. 32. &c. *Qui sine uxore est, sollicitus est quæ Domini sunt, quomodo placeat Deo. Qui autem cum uxore est, sollicitus est quæ sunt mundi, quomodo placeat uxori, & divisus est. Et mulier innupta & virgo cogitat quæ Domini sunt, ut sit sancta corpore & spiritu. Quæ autem nupta est, cogitat quæ sunt mundi, quomodo placeat viro: propterea iis, qui uni Deo totâ vitâ vacare voluerunt, Ecclesia ab initio nuptias interdixit, non eas damnans ut in se malas, sed quia ei, qui se totum Deo vovit, contrarias. Sicut enim ei qui fidem dedit uxori, vivente ipsâ nuptias cum alia inire nefas est: ita & multò magis ei, qui fidem semel dedit Deo, nefas erit fidem dare uxori, & infidelis erit, si audeat. Et hoc est quod damnavit Paulus 1. ad Tim. 5. v. 12. in illis junioribus viduis, quæ postquam fidem Deo voverant, volebant nubere: *Hubentes, inquit, damnationem, quia primam fidem irritam fecerant.**

III. Si verò, ut reor, hætenus dicta Danæum non moveant, audiat quæso Christum Matth. 19. v. 12. dicentem: *Sunt Eunuchi qui se ipsos castraverunt propter Regnum Cælorum.* Ubi certè non loquitur de illis qui amputatione virilium se castrant, ut Valesii faciebant, sed qui castitatis proposito impotentes se reddunt ad nuptialem omnemque corporalem copulam, & hos Christus laudat, quia propter Regnum Cælorum hoc faciunt: quia tamen ad hoc non omnes habent vires ac donum, addit: *Qui potest capere capias.* Ubi S. Hieronymus: *Quasi hortantis, inquit, vox Domini est, & milites suos ad pudicitia præmium concitantis, Qui potest capere capiat, qui potest pugnare pugnet, superet ac triumphet.* Prænovit ergo Christus in Ecclesia sua futuros, qui absque contumelia nuptiarum amore Regni Cœlestis se castrarent, idest redderent se ad opus nuptiale non physicè, sed moraliter impotentes. Qui ergo sunt isti? Dicit Epiphanius Hæresi 58. num. 4. *Qui nam illi esse possunt, nisi egregii illi primùm Apostoli, tum Monachi,*

nachi, ac reliqui virginitatis cultores; cujusmodi fuisse Joannes & Jacobus Zebedei filii, qui in virginitate persistentes, ac neque membra sua propriis amputantes manibus, neque copulati nuptiis: sed animo ac pectore dimicantes certaminis illius coronam ac gloriam summam cum admiratione reportarunt? Secundum quos infinita hominum millia, quæ in hoc mundo monasticam vitam amplexa sunt, in Monasteriis Virginumque cœnobiis ejusdem certaminis decus adepta sunt. Quæ videlicet nullam cum mulieribus consuetudinem habuerunt, sed omnibus suis numeris absolutum certamen obierunt. Hæc Epiphanius quarti seculi Scriptor de infinitis hominum utriusque sexus millibus, qui à nuptiis abstinentes propter Regnum Cælorum vitam cælibem illibate servarunt.

IV. Quod ad hæc Danaus? Dicetne, quia hoc in Ecclesia Catholica in Divini Verbi contemptum continuatur, è cælibatu procedere diversa stupra, adulteria &c. & hoc esse Dei ultionem? Dicet planè. Sed multiplici titulo mendaciter. Primò enim quomodo cælibatus est in Verbi Dei contemptum, quando Christus ipse illum verbo suo indicavit: *Sunt Eunuchi qui se ipsos castraverunt propter Regnum Cælorum*? Secundò, quomodo dicit ex cælibatu sequi stupra? Dicere etiam poterit ex lege sequi furta, & homicidia, & ex nuptiis adulteria. Si ergo transgressiones legum, & violationes nuptiarum, non legum & nuptiarum vitio tribuit, sed malitiæ & transgressorum vitio; cur transgressionem cælibatus ipsi Cælibatui adscribit, & non potiùs vitio eorum qui carnis fragilitate victi fidem quam dederunt irritam faciunt? Rursus an respiciens ad paucos qui illum frangunt, cælibatum damnat, & non respiciens ad tot millia, qui illum illibate custodiunt, illum potiùs non commendat? Sanè si propter aliquorum à cælibatu lapsus cælibatum eliminare vult, propter conjugatorum adulteria, etiam conjugia damnet necesse est.

Sed Danaus, qui liuceos oculos habet ut cælibum lapsus scrutetur, cur non videt etiam pœnas in Conciliis Generalibus, Provincialibus & Sacris Canonibus contra tales fidei Deo datæ violatores? Quam fronte audet dicere, quòd in eis stupra, fornicationes, sacrilegia tolerat, quando novit eis paratos carceres, suspensiones, privationes munerum, irregularitatem & alia id genus? Sed satis contendit cum homine, qui nil aliud quam maledicere, & suam secessionem à vera fide imposturis tegere in proposito habet. Plura in supra citatis locis à me dicta Lector videre poterit.

CAPUT XXXIV.

De Catharis seu Novatianis.

§. I.

De Novato & Novatiano.

I. **C**athari, inquit S. Augustinus Hæres. 38., qui hoc se ipsos nomine, quasi propter munditiem superbissimi atque odiosissimi nominant. Catharus enim seu Catheros, à verbo Græco *Catbero*, quod idem est ac *purgo*, mundo ortum habuit. Hæreticorum enim ars sæpè fuit, ut simplicibus illuderent, aliquo specioso nomine se ipsos tegere; unde sicut alii, de quibus supra, quamvis omnium insipientissimi, *Gnostici* idest *scientes*, sese appellabant, ita isti se se puros ac mundos venditantes, cum fœdi essent ac impuri, *Cathari*, idest puri nomen assumerant. Hos nostro ævo imitati sunt ex Anabaptistis, qui se Catharos, idest ab omni labe mundos deprædicant, adeo in Oratione Dominica, omittant verba illa *Dimitte nobis debita nostra*, quasi ipsis Apostolis sanctiores, quos Christus Dominus ita orare docuit. Hos ita detestatur Chrysostomus Homil. 14. in c. 4. ad Ephesios: *Ubi sunt qui dicuntur Cathari, idest mundi, qui omni sorde pleni ita se audeant nominare?* Et meritò quidem nam, ut ait S. Joannes Epist. 1. c. 5. v. 8., *Si dixerimus quoniam peccatum non habemus, ipsi nos seducimus, & veritas in nobis non est.*

II. Initio tamen non Cathari, sed Novatiani à Novato eorum Auctore dicti fuere. Ut enim ait S. August. citato loco: *Novatum sectantes hæreticum, unde etiam Novatiani appellantur.* Postea verò elati, Cathari nomen propter munditiem superbissimè sibi arrogarunt. Hinc Theodorus Lib. 3. Hæres. Fab. de Novato (quem Navatum vocat) agens: *Qui suæ autem, inquit, Sectæ affectæ erant, eos non solum Novatianos, sed etiam Catharos, hoc est mundos appellavit.* Et S. Hieronymus in c. 1. Epist. ad Titum ait: *Et qui Novati schisma sectantur, nomen sibi munditiæ præsumere.* Quare censent aliqui, inter quos Danæus Hæres. 38., Novati assecclas nomen hoc sibi præ elatione arrogasse, & Catharos ex Novatianis velut rivum è fonte, sicut è Carpocratianis Gnosticos derivatos fuisse. Vulgò tamen Novatiani, & Cathari pro eisdem sumuntur.

III. Novatus ergo huius hæresis auctor extitit, & innotuit tempore Cornelii Papæ, Cypriani Carthaginensis Episcopi, & Decii

Decii Imperatoris circa ann. Domini 253. Hunc Novatum videntur nonnulli confundere cum Novatiano qui licet Novato coævus, diversus tamen ab eo fuit, quia natione Afer, Novatianus Romanus. Novatus auctor Sectæ Novatianorum, Novatianus ejus adjutor & Sectæ ac schismatis propagator. Hoc æquivoco laborasse visi sunt Eusebius L. 6. Hist. c. 43., Theodoritus L. 3. Hæret. Fab. qui Novatum Romanæ Ecclesiæ Presbyterum faciunt, & Epiphanius ipse tum in Synopsi Libri 2. Tom. 1. ubi Hæref. 13. *Cathari*, inquit, *Novatum Romanum secuti sunt*: tum Hæref. 59. *Proximi ab illis (Valesiis) Cathari quidam exorti sunt à Novato, ut fama percrebuit. Novatus porro Romæ persecutionis illius tempore fuit, quæ eam antecessit, quam Maximinus excitavit; quæ Decii, ut opinor, aut Aureliani fuit.* De Novatiano autem nec ibi nec alibi unquam meminit. Quod indicium est, cum Novatum & Novatianum pro uno eodem accepisse.

IV. S. Cyprianus tamen, Epist. 49. ad Cornelium, Novatum à Novatiano apertè distinguit. Sic enim Epistolam inchoat: *Et cum diligentia & cum dilectione fecisti, frater carissime, festinatè ad nos mittendo Nicephorum Acolythum, qui nobis & de Confessoribus regressis gloriosam latitiam nuntiaret, & adversus Novatiani & Novati vocas & perniciosas ad impugnandam Christi Ecclesiam machinas plenissimè instrueret.* Idem sentiunt Cornelius Papa Epist. ad Fabium. Pacianus Epist. 2. ad Sympronianum ubi ait, Novatianum Novati infantiæ se accommodasse: & Epist. 3. Novatianum adversus Cornelium schisma excitasse, adjutum velario opere Novati Africani presbyteri. Anastasius item Bibliothecarius in Cornelio dicens, quod sub ejus Episcopatu Novatus Novatianum extra Ecclesiam ordinavit. Vetus quoque Auctor de Pontif. Romanis apud Valesium in Notis ad Lib. 6. c. 43. Eusebii scribit: *Eo tempore supervenit Novatus ex Africa, & separavit ab Ecclesia Novatianum.* S. Hieronymus L. de Script. Eccl. c. 70. Novatianum facit Romanæ urbis presbyterum, Novatum verò hæresis auctorem Cypriani presbyterum. Tandem Eusebius ipse in Chronico ad ann. 253. *Novatus*, inquit, *Presbyter Romam veniens Novatianum & ceteros Confessores sibi socios fecit, eò quod Cornelius penitentes apostatas recepisset.* Liqueat ergo, Novatum & Novatianum fuisse duas personas distinctas; in condenda tamen eadem Secta unum fuisse, Novatum quidem auctorem, Novatianum verò socium & adiutorem: ideoque ab utroque ejusdem Sectæ professores nomen sumentes dictos fuisse Novatianos: Cyprianus tamen Epist. 73. ad Jubajanum eos qui Novatianum sequebantur vocat *Novatianos*. Ut verò clariùs hoc appareat, Novati & Novatiani genus & gesta

gesta aperiām. Quamvis autem de utroque & schismate ab ipsis excitato Tomo præcedente c. 10. §. 1. locutus fuerim, in commodum tamen Lectoris, ex ibi dictis non pauca hic repetere existimavi.

V. Novatus igitur, à quo prima hujus hæresis semina, Afer genere fuit, humili & obscurâ progenie natus, cujus pater in vico degens paupertate & miseriâ consumptus interiit, cui nec sepulturam dare filius dignatus fuit. Ita S. Cyprianus in prælaudata Epist. 49. ad Cornelium data, dicens: *Pater etiam ejus in vico fame mortuus, & ab eo in morte postmodum nec sepultus*. Uxorem duxerat, quam prægnantem calce in ventre percussam abortire coegit: *Uterns uxoris, inquit, calce percussus, & abortione properante in parricidium partus expressus*. Insatiabili avaritiâ raptus, nec viduis, nec pupillis, nec ipsi Ecclesiæ pepercit: *Spoliati ab illo pupilli, fraudata vidua, pecunia quoque Ecclesiæ denegata, has de illo exigunt pœnas, quas in ejus furore conspiciamus*. Tot criminum, & filii nascituri parricidii gravitate non territus, adjecit aliud. Cum enim esset Ecclesiæ Carthagenensis presbyter, egit ut infcio Cypriano illius urbis Episcopo quidam Felicissimus sibi in moribus similis Diaconum fieret; nec interim cessans discordias inter fratres serere, eosque ab Episcopo schismate separare. Hæc Cyprianus ibidem exaggerans: *Idem est, inquit, Novatus, qui apud nos primum discordia & schismatis incendia seminavit, qui quosdam isthic ex fratribus ab Episcopo segregavit, qui in ipsa persecutione ad evertendas fratrum mentes alia quadam persecutio nostris fuit*. Ipse est, qui Felicissimum satellitem suum Diaconum, nec permittente me, nec sciente, suâ factione & ambitione constituit. Hæc Cyprianus. An verò Novatus ipse manus imponens, an ut ab alio imponerentur curans, Felicissimum Diaconum constituerit, non dicit. Certum quidem est, hunc Felicissimum à Novato in Diaconum ejusque gregalem fuisse diversum ab illo, qui adversus Cyprianum schisma tecit, de quo Epist. 40. ad Universam Plebem. Nam qui ex parte Novati erat & Diaconus ordinatus, veniam lapsis cum Novato dandam esse prorsus negabat. Ex opposito autem alter absque ulla pœnitentia pacem lapsis dandam esse contendebat, ut ex præfata Epistola constat.

VI. Tandem tot facinorum conscientiam pressus sibi timere, coepit Novatus: videns etiam Africanos Episcopos ad Concilium convenire paratos, ut cognitâ causâ pro meritis cum damnarent, licet urgente persecutione hoc perficere non potuerint. Ita S. Cyprianus: *Hanc conscientiam criminum jam pridem timebat, propter hoc se non de presbyterio excitari tantum, sed & communicatione, pruberi pro certo tenebat: & urgentibus fratribus imminabat cogni-*

tionis

tionis dies, quo apud nos causa ejus ageretur, nisi persecutio ante venisset. Quam iste voto quodam evadenda, & lucranda damnationis excipiens, hæc omnia commisit & miscuit: ut qui ejici de Ecclesia & excludi habebat, judicium Sacerdotum voluntaria discessione præcederet, quasi evasisse sit pœnam, prævenisse sententiam.

Ex Africa ergo Novatus secedens, & Romam navigans, illuc discordiæ & schismatis semina secum asportavit, in illius Ecclesiæ agro jecit, & adjuvante Diabolo in copiosam messem crexit. Vacaverat Romana Petri Cathedra, Fabiano martyrio coronato. Illuc ergo se contulit eo etiam animo, ut suâ præsentia, vel sibi, vel alicui ex suis, quos sibi antea conciliaverat, Cathedram illam adjudicaret. At spe frustratus, electo jam Cornelio, totum se dedit, ut schisma adversus eum excitaret, ad quod paratum inveniens Novatianum Romanum presbyterum, illum excitavit, eique se adjungens ad schisma & hæresim primas manus dedit: Romam quoque (inquit S. Cyprianus) ad evertendam Ecclesiam navigans, similia & paria molitus est, à Clero portionem plebis avellens, fraternitatis sibi benè coherentis & se invicem diligentis concordiam scindens. Planè quoniam pro magnitudine sua debeat Carthaginem Roma præcedere, illic majora & graviora commisit. Hæc omnia Cyprianus in Epist. 49. citata ad Cornelium.

Eadem compendio refert S. Pacianus 4. seculi Auctor Epist. 3. ad Sympronianum, ubi de Novati opera ad schisma Romæ per Novatianum conillandum, ait: Romam venit. Et cum apud Carthaginem urgentibus in Ecclesia fratribus, dies cognitionis ipsius immineret, & hic latitavit: nec multò post Novatianum istum Episcopatu Cornelii auxilium (nam sibi speraverat) cum aliquantis, ut in tali re solet, ex sua parte fautoribus, nutantem impellit, dubitantem fovet, ut magnum aliquid speret, hortatur. Invenit aliquos ex eorum numero, qui tempestatem persecutionis illius evaserunt; apud quos hanc ipsam de lapsis receptis Cornelio constaret invidiam; dat eorum Epistolas ad Novatianum. Ille ex auctoritate Epistolarum, sedente jam Romæ Episcopo, adversum fas Sacerdotii singularis, alterius Episcopi sibi nomen assumit.

VII. Nunc ad Novatianum transeo, de quo (quamvis sub Novati nomine) ex Epistola Cornelii Papæ ad Fabium Antiochenæ Ecclesiæ Præfulem agit Eusebius L. 6. Hist. c. 43. Fuisse Novatianum patriâ Romanum constat, quia ibi eum appellat Ecclesiæ Romanæ presbyterum, non tamen ex parentibus Christianis natum, & Christianâ pietate educatum, sed Ethnicis superstitionibus ab infantia imbutum, colligitur ex Cornelio, qui de ejus audaci temeritate, quâ Episcopatum Romanum ambebat, loquens,

ait:

ait : *Exponamus deinceps, quibus operibus, & cujusmodi con-
fessione confusus, ad Episcopalem locum aspiraverit. An idem fortasse
quod ab initio in Ecclesia versatus est, & multa pro ejus defensione
certamina subivit, multisque & gravissimis periculis religionis causâ
conflictatus est ? minime id quidem.* Deinde causam ejus conversio-
nis & suscepti baptismatis Satanam fuisse, à quo erat oppressus,
Energumenus enim erat, enarrans, subjungit : *Quippe cui causam,
atque initium credendi præbuit Satanâs in ipsum ingressus atque in
ipso aliquandiu commoratus. Cùmque ab exorcistis secretetur, in mor-
bum gravissimum collapsus ; dum jamjamque moriturus creditur, in
ipso, in quo jacebat, lectulo persusus, baptismum suscepit : si tamen
hujusmodi baptismum suscepisse dicendus est.*

Hæc ultima verba indicant, Baptismum susceptum in lecto,
& à graviter decumbente, fuisse tunc temporis suspectum, sive quia
qui in lecto baptizabatur, cùm mergi à baptizante non posset, ut
ritus tunc ferebat, aquâ dumtaxat perfundebatur, ideoque talis
Baptismus ininus solemnis, & minus perfectus habebatur. Sive
quia talis Baptismus non sponte, sed potius mortis metu ab homi-
nibus, qui sui non satis compotes essent, suspectus videbatur.
Ideoque tales, qui *Clinici* vocabantur, ad presbyterii gradum pro-
moveri vetabantur Canone 12. Concilii Neocesariensis : *Si quis in
ægritudine constitutus fuerit baptizatus, Presbyter ordinari non de-
bet. Non enim fides illius voluntaria, sed ex necessitate ; nisi forte
postea ipsius studium & fides probabilis fuerit, aut hominum raritas
cogat.* Attamen S. Cyprianus Epist. 76. æquè verum Baptismum
esse docet, qui per aspersionem in lecto fit, atque qui per immer-
sionem fit in Ecclesia.

VIII. Post Baptisma modo dicto susceptum, tantum abfuit,
ut fidei & pietatis signa Novatianus demonstrarit, quin potiùs
contraria prætulit. Nam ab infirmitate liberatus, nec Sacramen-
tum Confirmationis suscepit, nec postulavit. Ita Cornelius : *Sed
neque postquam liberatus est morbo, reliqua percepit, quæ juxta Eccle-
sasticam regulam percipi debent : neque ab Episcopo consignatus est.
Hoc autem signaculo minime percepto, quo tandem modo Spiritum
Sanctum potuit accipere ? Dispensatione tamen, ut dicam, factus
presbyter, ingruente persecutione latebras quæsit, & licet roga-
tus à Diaconis ut pro debito sui muneris fratribus subveniret,
presbyterum se esse negavit, nec à cubiculo, in quo se incluserat,
persecutionis metu exire voluit. Ita Cornelius prosequitur : *Qui
persecutionis tempore præ metu ac nimia vivendi cupiditate presbyte-
rum se esse negavit. Admonitus enim & rogatus à Diaconis, ut ex
cubiculo, in quo se ipsum incluserat, egressus, fratribus auxilio in-**

digentibus succurreret, tantum absuit; ut hortantibus Diaconis morem gereret. Quin potius ira & indignatione percitus abiit, ac discessit. Neque enim Presbyterum se amplius velle esse respondit, sed alterius Philosphie desiderio teneri.

IX. Præfatis impedimentis non obstantibus, præter Ecclesiasticam regulam, ex gratia & dispensatione Episcopi Romani (fortè S. Fabiani, vel alterius ex Cornelii Prædecessoribus) reclamante licet Clero, Novatianus, ut dixi, presbyterio initiatus fuit. Ita Cornelius: *Nam cum egregius ille vir Ecclesiam Dei reliquisset, in qua post susceptum Baptismum presbyteri gradum fueras consecutus, idque per gratiam Episcopi, qui manus illi imponens eum ad presbyterorum ordinem eiecit. Cui cum universus Clerus, multi- que ex populo refragarentur, eo quod non liceret quemquam ex iis, qui urgente vi morbi in lectulo perinde ac ille perfusi fuissent, in Clerum assumi, postulavit ab iis Episcopus, ut hunc solum ordinari à se paterentur. Utinam autem vel ab hoc solo ordinando abstinuisset. Sunt qui velint, absque transitu per inferiores Ordines & Subdiaconatum ac Diaconatum eum ordinasse, quod verisimile putant, ex oppositione quam instituit S. Cyprianus Epist. 52. ad Antonianum, ubi de Cornelio dicit: *Non iste ad Episcopatum subito pervenit, sed per omnia Ecclesiastica officia promotus, & in Divinis administrationibus Dominum sæpè promeritus ad sacerdotii sublime fastigium cunctis religionis gradibus ascendit.**

X. Quod Romanum Episcopum movit ad superandos super uno Novatiano obices, quibus à presbyterio jure arcebat, fuisse puto singularis eruditionis specimen ac eloquentiæ quod Novatianus præferebat. Erat enim in Philosophicis scientiis apprime peritus, ex quibus Stoicam specialiter professus fuisse creditur. Factus etiam Christianus ad Divinas literas se convertens, sui in eis profectus plura scriptis testimonia dedit; adeò ut S. Hieronymus Scriptoribus Ecclesiasticis Novatianum annumerarit. De eo enim c. 70. *Scriptis autem, inquit, de Pascha, de Sabbato, de Circumcisione, de Sacerdote, de Oratione, de Cibis Judaicis, de Instantia, de Attalo, multaque alia: & de Trinitate grande volumen, quasi Epitome Operis Tertulliani faciens, quod plerique nescientes Cyprianis existimant. Imò ante schisma ipse scripsit Epistolam, quæ sub nomine Presbyterorum & Diaconorum Ecclesiæ Romanæ inter Cyprianicas legitur num. 31. apud Pamelium, quam commemorat Cyprianus ipse Epist. 52. dicens: *Additum est etiam Novatiano tunc scribente, & quod scripserat suâ voce recitante, & presbytero Moyse, tunc adhuc Confessore, nunc jam martyre subscribente, ut lapsis infirmis & in exitu constitutis pax daretur. Quibus apparet, No-**

Novatianum tunc fuisse exterius Catholicum, & ab errore, quem postea effudit, alienum. Quod ei facto hæretico objicit Cyprianus vel alius ei coævus in L. ad Novatianum hæreticum. Mirum ergo non est, quòd Episcopus Romanus Novatiani eruditione, pietate, & tunc sanâ fide permotus, ipsum ministerio aptum existimarit, & ad presbyterium prædilexerit.

XI. Nihilominus Romani Cleri Novatiani ordinationi resistentia præfagium fuit eorum, quæ postea ejus ambitio contra Ecclesiam machinata fuit, & quâ sub ovina pelle prius latitans lupum postea se manifestavit. Hujus primum argumentum exhibuit, cum factus jam presbyter, urgente persecutione, ut supra dixi, in cubiculo se abscondit, & rogatus à Diaconis, ut indigentibus fratribus, sive in carcere detentis, sive in periculo constitutis, vel Eucharistiam vel alia spiritualia caritatis opera exhibendo subveniret, se presbyterum esse apertè negavit. Tunc enim estò non adhuc lupum, mercenarium tamen se manifestavit, qui videns lupum venientem dimittit oves & fugit, quia mercenarius est. Estò autem Ecclesiam tunc non deseruerit, brevè tamen eam deseruit. Qui enim, ut supra dixi, à Dæmone in Ecclesiam intrusus fuera t, à Dæmone ab Ecclesia ejiciendus erat.

§. II.

Novati & Novatiani schisma.

I. **N**OVATUS, ut supra dixi, videns se ab Episcopis Africanis communionem ob sua ibi patrata scelera damnamum, Romanam aufugit. Mutatâ tamen regione non mutavit hominem, sed, ut ait Cyprianus *sax & ignis ad conflanda seditionis incendia, turbo & tempestas ad fidei faciendâ naufragia, hostis quietis, tranquillitatis adversarius, pacis inimicus*, vix illuc adventans, unionem, & caritatis vinculum, quo fideles sociabantur, discordiâ frangere, tentavit. Nec incasum: Inveniens enim alios sui similes, contra Clerum aliquos de populo excitat, ut electionem Cornelii in Episcopum, de qua tunc agebatur, impediret. Ac videns Novatianum Episcopatus ambitione æstuantem, inito cum illo fœdere, cum præ se ut optasset, viam non detegeret, eam pro Novatiano sternere, & suffragantium partem à Cornelio segregare, malis artibus motus est.

II. Verùm cum illius ac Novatiani conatus irriti evassent, Cornelius enim ad Pontificatum legitime electus, & fortè etiam consecratus fuit, graves contra ejus personam accusationes spargere,

gere, & schisma parare cœperunt. Omissis inhonestis & turpibus, de quibus eum calumniabantur; dicebant, eum in persecutione libellum ab Ethnicis acceperisse, cum Episcopis qui idolis sacrificaverant communicasse, & alia quæ S. Cyprianus Epist. 52. ad Antonianum refert, & ut calumnias his verbis refutat: *Quod autem quædam de illo inhonesta & maligna jactantur, nolo mireris, cum scias, hoc esse opus semper Diaboli, ut servos Dei mendacio laceret, & opinionibus falsis gloriosum nomen infamet, ut qui conscientia sua luce clarescunt, alienis rumoribus sordidentur. Explorasse autem collegas nostros scias & verissimè comperisse, nullâ illum libelli ut quidam jactant, labe maculatum esse, sed neque cum Episcopis qui sacrificaverunt communicationem sacrilegam miscuisse, sed eos demum, quorum causa audita, & innocentia comprobata sit, conjunxisse nobiscum.* Hac Cyprianus, qui deinde protequitur eum purgans de facto Trophimi: *Nam & de Trophimo, de quo tibi scribi desiderasti, non ita res est, ut ad te pertulit rumor, & mendacium malignorum. Nam sicut Antecessores nostri sæpè fecerunt, colligendis fratribus nostris, carissimus frater noster Cornelius necessariò succubuit, & quoniam cum Trophimo pars maxima plebis abscesserat, redeunte nunc ad Ecclesiam Trophimo, & satisfaciente, & pœnitentiâ deprecationis errorem pristinum consistente, & fraternitatem, quam nuper abstraxerat, cum plena humilitate & satisfactione revocante, audita sunt ejus preces, & in Ecclesiam Domini non tam Trophimus, quam maximus fratrum numerus, qui cum Trophimo fuerat, admissus est: qui omnes regressuri ad Ecclesiam non essent, nisi cum Trophimo comitante venissent. Sic tamen admissus est Trophimus, ut laicus communicet, non secundum quod ad te malignorum litteræ pertulerunt, quasi locum Sacerdotis usui pet: sed & quòd passim communicare sacrificatis Cornelius tibi nuntiatus est, hoc etiam de apostatarum fideis rumoribus nascitur. Neque enim possunt laudare nos qui recedunt: aut expectare debemus ut placeamus illis, qui nobis displicentes, & contra Ecclesiam rebelles, sollicitandis de Ecclesia fratribus violenter insistant.* His & aliis Antonianum monet Cyprianus, ne audiat & credat ea, quæ contra Cornelium spargebantur.

III. Nihilominus talibus, estò salus, rumoribus multi leves corde, Novato & Novatiano sollicitantibus fidem adhibentes, abdicato Cornelio, ad Novatianum accessere: ex quibus nedum plures de populo, sed & de iis etiam quidam, qui in persecutione ob fidei Confessionem clarissimi erant, inter quos numerantur Maximus, Urbanus, S. donius, & Celerinus: hi enim, & maximè Celerinus, omnia genera tormentorum pro fide sustinuerant. Horum autem à Cornelio secessu maximam Romanæ plebis partem

ad

ad Novatianum traxit. Sed inde cognito Novatiani dolo, ipso derelicto gemebundi & poenitentes ad Ecclesiam redierunt. Ita scribit Cornelius in præcitata Epistola ad Fabium apud Eusebium L. 6. c. 43. dicens: *Maximus Ecclesie nostra presbyter, & Urbanus ambo ex fidei confessione egregiam jam secundo laudem adepti: Sidonius etiam & Celerinus, vir qui cuncta tormentorum genera per Dei misericordiam fortissime sustinuit, ut qui fidei suae constantiâ infirmitatem corporis sui roborans, adversarium penitus debellavit. Hi omnes cum illum tandem cognovissent, & fraudem ejus ac versutiam, perjuriam quoque atque mendacia, & abhorrentem ab omni societate feritatem, & lupinam quandam in eo amicitiam deprehendissent, ad Sanctam Ecclesiam reversi sunt: cunctasque illius prestigias ac nequitiam, quam jampridem intra se occultans se se interim submittebat, praesentibus aliquot Episcopis ac Presbyteris & laicis compluribus evulgaverunt: ingemiscetes ac dolentes, quod à fraudulenta illa malignaque bestia induciti, aliquanto temporis spatio ab Ecclesia recessissent.*

IV. Præcipua, & quidem diabolica, quâ Novatianus, ut simplicibus illuderet, utebatur versutiâ, erat dicere, se solius Dei & Ecclesiæ zelo ab obedientia Cornelii retraxisse, cum compertum ei fuerit illius Ordinationem irritam & nullam fuisse, utpotè hominis libellatici, sacrificatoris, inhonesti & totius Ecclesiasticae disciplinae everforis, ideoque prorsus indigni, ut sederet in loco Petri. Hæc autem se dicere, non quia Sedem illius concupisceret, aut ambitione moveretur, juramento tremendisque sacramentis affirmabat. Ita refert Cornelius supra relatus: *Qui tremendis quibusdam sacramentis affirmaverat, se Episcopatum non concupiscere. Qualis autem esset ejus animus factum demonstravit. Repente, subiungit Cornelius, tanquam ex machina quadam in medium projectus, Episcopus apparuit. Mox enim qui ei favebant, pronuntiata adversus Cornelii Ordinationem sententiâ, Novatianum ipsum dissidii totius auctorem, plebis seductorem, ac schismaticorum principem, Romanum Pontificem proclamarunt.*

V. Nec minus fraudulenta & turpis ejus Ordinatio fuit, quam S. Cornelius citato loco ita describit: *Is qui se doctorem & Ecclesiastica disciplina propugnatorem ferebat, cum Episcopatum sibi à Deo minime concessum, rapere ac vindicare conaretur, duos deploratae salutis homines sibi socios adjuunxit, ut eos in exigentiam ac vilissimam Italiae partem mitteret, atque illinc accitos tres Episcopos, homines planè rudes ac simplices, fraudulentâ quâdam molitione deciperet, constantissime affirmans, ipsos quamprimum Romam proficisci oportere, ut unius undecumque orta discordia, ipsorum unâ cum aliis*
Epi-

Episcopis interventu atque arbitrio sedaretur. Qui cum advenissent, homines, ut jam diximus, simplicioris ingenii, nec in his perditorum hominum artibus ac fallaciis satis triti: eos ille à quibusdam sui similibus, quos ad id comparaverat, inclusos borà decima, temulentos & crapulâ oppressos, adumbratâ quâdam & inani manuum impositione, Episcopatum sibi tradere per vim cogit: eumque nullo sibi jure competentem per fraudem atque insidias vindicat. Hæc fuit Novatiani in Episcopum Romanum ordinatio à tribus Episcopis temulentis & crapulâ oppressis, ac proinde quid agerent nescientibus, per fraudem & vim extorta.

Unus tamen ex eis agnito errore accessit poenitens ad Cornelium, qui cum ad communionem laicam recepit: alios verò duos Novatiani partes fortè secutos deposuit, & in eorum locum alios instituit. Ita ipse Cornelius subiungit: *Nec multò post unus ex illis Episcopis ad Ecclesiam rediit, delictum suum cum lamentis ac fletibus confitens. Quem nos, cum universus populus pro illo intercessisset, ad communionem laicam suscepimus. Reliquis etiam duobus Episcopis successores ordinavimus, eosque in locum eorum direximus.*

VI. De tali sua licet inani Ordinatione Novatianus tumens, omne studium ac sollicitudinem, ut omnes ad sui obedientiam traheret, adhibebat, ac eò facinoris pervenit, ut cum Sacram Eucharistiam populo traderet, jurare per corpus & sanguinem Christi singulos cogeret, se suas partes non deserturos. Ita hoc tanquam facinus omnium, quæ ab ipso commissâ sunt, longè gravissimum subiungit idem Cornelius & scribens: *Etenim oblatione factâ portionem singulis dividens; dum eam tradit, miseros homines benedictionis loco jurare cogit, manus ejus, qui portionem accepit, ambabus suis manibus comprehensas retinens, nec prius dimittens, quam jurati ista dixerint (ipsi enim utar illius verbis) Jura mihi per Corpus & Sanguinem Domini nostri Jesu Christi, te nunquam meas partes deserturum, nec ad Cornelium esse rediturum. Ita miser ille non prius gustare finitur, quam sibi ipse malum imprecatus sit. Et cum panem illum accipiens dicere debuisset Amen, ejus loco dicit: non revertar deinceps ad Cornelium. Quis ad tam atrox insanæ ambitionis facinus non exhorreat? Is erat Novatianus, qui se Episcopatum non concupiscere tot Sacramentis, ut dixi, assererat.*

VII. Dum talia Novatianus Romæ gereret, alias orbis Ecclesiæ de sua in Episcopum Romanum Ordinatione certiores Legatis & literis reddere non omisit. Legatos misit ad Sanctum Cyprianum Carthaginensem Episcopum cum famosis contra Cornelium & ordinationem ejus libellis. At S. Cyprianus nec cum schismaticis communicavit, nec Novatiani ordinatioem approbavit, nec con-

confectis in Cornelium calumniis aures præbere voluit, ut constat ex Epistola ipsius ad Cornelium data quæ est 41. Miserat S. Cyprianus Caldonium & Fortunatum Romam, ut literis ipsius & præsentia suâ pacem Ecclesiæ procurare niterentur. Sed cum irrito conatu id tentassent, augerique vidissent in dies schismaticorum contumaciam, ad Sanctum Cyprianum reversi sunt: qui de Cornelii Ordinatione legitimè certior factus, literas ad ipsum dedit, quibus probatam sibi ejus Ordinationem testaretur. Didicerat enim totam Ordinationis Cornelii seriem, & eorum quæ post ipsam evenerant, à Pompejo & Stephano Episcopis. Id constat ex Epist. 42. ejusdem S. Cypriani ad Cornelium.

Nec Carthagine solum, sed per Africam universam unitatem Ecclesiasticam stabilire ac tueri conatus est S. Cyprianus, datis ad singulos Coepiscopos literis, quibus eos hortatus est, *ut Ecclesiæ Catholicæ radicem & matricem agnoscerent, ac tenerent*: Et communionem jungeretur Cornelio legitimo Pontifici. Ex quorum rescriptis, Ordinationis illius *& origo necessaria, & ratio justa, & gloriosa quoque innocentia* comprobata est, ut ex Epist. 45. ejusdem Cypriani ad Cornelium.

VIII. Porro cum Novatianus, ut supra tetigi, Confessores aliquos à Cornelio & Ecclesiâ abstraxisset, schismaticos è martyrii candidatis eos efficiens, ut suæ factioni auctoritatem conciliaret: existimans S. Cyprianus plurimum ei detractum iri, si isti ad communionem cum Cornelio non redirent, ad ipsos per Mettium Subdiaconum literas prius cum Cornelio communicandas dedit, ut ex Epistola 43. ad Cornelium & Epist. 44. ad Maximum, Nicestratum & cæteros Confessores. Plurimum profuerunt hæ litteræ: siquidem Maximus, Urbanus, Sidonius & Macarius Confessores, ac plerique Catholici, qui se eis adjunxerant, se circumventos ac deceptos fuisse gementes, & confessati se animo semper in Ecclesiâ fuisse, ad Cornelium accessere. Quos ille benignè suscipiens, Maximum quidem Presbyterum in sui gradus honorem restituit: cæteros cum ingenti populi suffragio recepit, ut ex ejusdem ad Cyprianum Epist. inter Cyprianicas 46.

IX. Confessores ad Ecclesiam reversi, de reditu suo & pace cum Cornelio inita, datâ ad eum Epistolâ, quæ est 50., S. Cyprianum certiores fecerunt, quibus ille Epist. 51. vicissim gratulatus est. Huic Confessorum ad unitatem reditui plurimum profecere S. Cypriani tum literæ, tum & maximè egregius de Unitate Ecclesiæ Liber, quem schismati opposuit, & priusquam Confessores ad Ecclesiam redirent scripsisse, verba prope finem posita satis iudicant.

X. Paulò ante Confessorum reditum miserat Novatianus magnificam legationem in Africam, quam Novatus, Evaristus, Nicostratus, Primus, ac Dionysius schismatici susceperant, de qua monitum voluit Cyprianum Cornelius per Nicephorum Acolytum, qui postridie adventus Novati, & ceterorum schismaticorum, Carthaginem pervenit, ut ex Cypriani Epist. 49. Qui tamen, præmonitis à Cypriano Episcopis, per Africam vagantes nullum suæ legationis fructum reportarunt. Dum tamen hi seductores per Africam frustra divagarentur, Romæ schismaticorum factio notabiliter minui cœpit. Complures enim cognitâ Novatiani vafritie ad Cornelium redierunt, inter quos prælaudati Confessores Maximus Presbyter & alii supra recensiti.

XI. Literas etiam dederat ad Ecclesiam Alexandrinam Novatianus, quibus callidè contestabatur, se invitum electum fuisse, ut eo verborum fuco detestandum schismatis facinus cooperiret. Cui tamen S. Dionysius Alexandrinus tunc Episcopus in hæc verba respondit: *Si quidem invitus, ut asseris, eò adductus es; id nobis ostendes tuâ spontè redemmo. Satius quidem fuerat quidvis pati, ne Ecclesia Dei discinderetur. Nec minùs gloriosum fuisse idcirco subire martyrium, ne Ecclesiam scinderes, quàm ut ne idolis sacrificares. Imò illud meo quidem iudicio illustrius fuisset. Hic enim pro sua unius anima: ille pro omni Ecclesia martyrium quis sustinet. Si tamen vel nunc persuaseris fratribus, aut eos coegeris, ut ad concordiam redeant, majus tibi meritum erit, quàm culpa. Et hæc quidem non imputabitur: illud verò prædicabitur. Quòd si fratribus parere recusantibus id efficere non potes, tuam ipse animam serva. Opto te paci studentem in Domino bene valere.* Epistola hæc legitur apud Eusebium L. 6. Hist. c. 45. Et quidem omnium cordibus inferenda.

XII. Novatiani tamen cor hujus salutaris moniti capax non erat: qui enim ambitione & artibus locum violenter invaserat, eisdem ne illum dimitteret detinebatur. At quod ipse detrectabat, Deus Ecclesiæ suæ consulens Cypriani & Catholicorum operâ sensim perficiebat. Paulatim enim etiam à suis ita derelictus Novatianus fuit, ut penè solus remanserit. Quare Cornelius sæpè recensitâ ad Fabium Epistolâ: *Scias, inquit, porrò illum jam nudatum, ac penè solum remansisse, fratribus quotidie eum deserentibus, & ad Ecclesiam redeuntibus.* Et tandem Romæ solemniter fuisse excommunicatum, & ejus excommunicationem generaliter approbatam, scribit Cornelius in fine Epist. ad Fabium apud Euseb. L. 6. c. 43. ubi recenset nomina, tum Episcoporum, tum Urbium à quibus excommunicatio lata & approbata fuit. Romæ quidem anno 253. à sexaginta Episcopis, & totidem Presbyteris sub Cornelio
lata,

lata, & in Italia confirmata: cui in Africano Concilio 42. Episcopi adhaerunt.

XIII. Mansisse Romæ Novatianum, & Novatum in Africam rediisse, ambos destitutos sed in errore obstinatos ad mortem usque, communis opinio est. De eorum exitu Patres silent. Utrumque tamen martyrem sui gregales faciunt. Novatum sub Valentino passum scribit Socrates Lib. 4. Hist. cap. 28. Cui tamen utpotè Novati partibus addicto fides habenda non est. De Novatiano idem dicebant sui: negat tamen S. Pacianus in Epist. 2. ad Sympronianum, ubi addit, quòd si passus vel occisus esset, adhuc martyr non esset: *Porrò etiamsi passus est aliquid Novatianus, non tamen etiam occisus: etiamsi occisus, non tamen coronatus. Quidni? Extra Ecclesiæ pacem, extra concordiam, extra eam Matrem, cujus portio debet esse qui martyr est. Audi Apostolum, „ Etsi tradidero corpus meum ad comburendum, caritatem autem non habeam, nihil mihi prodest, „* Hoc pacto decessit etiam Novatus. Uterque æterno igni damnatus: ut quorum impietas fuit una, & una esset utriusque communis poena.

XIV. De tempore, quo primùm hæc hæresis apparuit, facile ex dictis colligi poterit. Etenim Novatus duobus Philippis imperantibus, & eodem anno, quo Donato, Carthaginensi Episcopo vitâ functo, datus fuit successor S. Cyprianus; quo anno Felicissimus schisma adversus eum excitaverat, qui fuit annus Domini 248. Fabiano Summo Pontifice. Licet autem sub duobus Philippis Ecclesia in pace floruerit, sub Maximino tamen ab anno 236. gravis exarserat persecutio. Ex hac occasionem hæresim suam excitandi sumxit Novatus. Cùm enim videret, in persecutione Maximini lapsis veniam in mortis periculo petentibus ab Ecclesia concedi, novum dogma prodere ausus fuit, quo docebat, lapsis nullo tempore veniam esse indulgendam. Propter hoc aliaque Novati facinora eum in Synodo damnare Africani Patres decreverant; Sed exortâ à Decio novâ persecutione anno 250. & ultimo Fabiani Papæ, convenire Patres non potuerunt, & Novatus Romam aufugit.

Novatianus postea primùm apparuit schismaticus eo anno, quo Cornelius in Episcopatu Romano Fabiano mortuo successit, qui fuit annus Domini 251. & Decii 2. Tunc enim Novatianus Novato etiam incitante, adversus Cornelii electionem insurgere, & schisma ordiri cœpit ac hæresim. Hujus estò Novatus prima semina in Africa jecerit, ampliatur tamen fuit Novatianus.

Diutissimè autem Novatianorum Secta perduravit. Etenim S. Paciani ætate, qui claruit circa annum Domini 370. Valentiano & Valente imperantibus, erant adhuc Episcopi Novatiani,

quorum unus erat Sympronianus , ad quem S. Pacianus tres dedit Epistolas . Imò etiam sub Innocentio I. qui loco Anastasii in Petri sede suffectus fuit Arcadio & Honorio imperantibus anno scilicet 402. Novatianorum reliquias adhuc superstitibus fuisse, colligitur ex ejus Epistola ad Victricium Episcopum Rothomagensè in qua cap.8. docet, venientes à Novatianis non esse rebaptizandos : *Ut venientes à Novatianis, vel Montonsibus per manus tantum impositionem suscipiantur* . Post hæc tempora Novatianorum nomen, prorsus delituit .

§. III.

Novatianorum error palmaris .

I. **P**rimarius & fundamentalis Novatiani error fuit: quòd eos, qui in persecutione (Decii) lapsi fuerant , vel fidem abnegando , vel libellos accipiendo , Ecclesia nullam potestatem haberet iterum recipiendi , & veniam eis indulgendi . Hunc errorem suggessit ei ambitio & invidia in Cornelium : ut enim eum nimie lenitatis accusare posset , extremum rigorem excogitavit . Ita refert Eusebius Lbi.6.Hist. cap.43. in initio,ubi postquam ea narravit quæ Dionysius Alexandrinus circa lapsos sanctè ac piè constituebat , ait : *Novatus (Novatianus) Ecclesia Romana presbyter arrogantia adversus eos elatus , quasi nulla spes salutis ipsis posthac superesset ; tametsi omnia explerent , quæ ad sinceram conversionem , puramque confessionem pertinent , propria cujusdam Sectæ eorum qui tumore mentis elati se ipsos Catharos cognominarunt , auctor extitit .*

II. Socrates tamen sectâ Novatianus hunc errorem emollire conatus . Lib. 4. Historiæ c.28. hæc habet : *Novatus (veriùs Novatianus) Ecclesiæ Romane presbyter ideo dissidium fecit , quòd Cornelius Episcopus fideles , qui tempore persecutionis à Decio Imperatore contra Ecclesiam excitati idolis sacrificaverant , in communionem suscepisset . Hanc igitur ob causam cum secessisset , ab Episcopis qui idem cum illo sentiebant , ad Pontificatum evectus , scripsit ad omnes ubique Ecclesias , ne eos qui Dæmonibus immulaverant , ad sacra mysteria admitterent . Sed ut hortarentur quidam ees ad poenitentiam : indulgentiam autem criminum relinquere Deo , peris quem jus arbitriumque est crimino remittendi .*

III. Ex his oritur dubium , an Novatianus lapsis spem ademerit obtinendi veniam & indulgentiam solum ab Ecclesia , etsi poenitentes ad eam accefferint ; an verò ademerit spem veniæ obtinendæ etiam à Deo . Hoc secundum colligitur ex S. Cypriano (seu alio eorvo) Lib. ad Novatianum , quem ita inchoat : *Cogi-*

tanti

tanti mihi, & intolerabiliter animo astanti, quidnam agere deberem de miserandis fratribus, qui vulnerati non propria voluntate, sed Diaboli facientis irruptione, adhuc usque, hoc est per longam temporum seriem agentes, pœnas darent: ecce ex adverso obortus est alius hostis, & ipsius paternæ pietatis adversarius hereticus Novatianus, qui non tantum, ut in Evangelio significatum est, sicut Sacerdos, vel Levites jacentem vulneratum præteriret, sed ingeniosâ ac novâ crudelitate sauciatum potius occideret, adimendo spem salutis, denegando misericordiam Patris, respuendo pœnitentiam fratris. Quod verus Cyprianus videtur supponere Epist. 52. ad Antonianum tum Epist. 57. ad Cornelium. Verum sive Novatianus lapsus spem ademerit obtinendi veniam à sola Ecclesia, ei potestatem ad hoc denegando, sive etiam à Deo, hæreticus & contra Deum fuit blasphemus, ut statim ostendam.

IV. Eò usque autem processit Novatiani feritas, ut non solis in idololatriam, sed etiam in alia crimina post Baptismum lapsis spem omnem veniæ saltem ab Ecclesia obtinende eriperet; hæc enim potestate Ecclesiam spoliabat: An verò ad omnia delicta, an solum ad graviora, puta mœchiam, adulterium, homicidium & similia, dubitatur. Censent aliqui, Novatianum cuiusque peccati dimittendi facultatem ab Ecclesia abstulisse, Novatianos autem ut invidiam declinarent, hanc distinctionem excogitasse. Sed ut ut res fuerit: Epiphanius Hæresi 59. num. 1. generaliter dicit, Novatianum dixisse: *Qui autem post Baptismum delinqueret, nullam erga eum misericordiam addiberi posse*. S. Cyprianus, à quo Epist. 57. ad Cornelium Novatianus appellatur *misericiordiæ hostis, interfectior pœnitentiæ, doctor superbiæ, veritatis corruptor, proditor caritatis*: & Epist. 67. ad Stephanum de Martino Arelatensi, qui Novatiani se adjunxerat, ait: *Tenens heretica præsumtionis durissimam proavitatem, ut servis Dei pœnitentibus & dolentibus, & ad Ecclesiam lacrymis ac gemitu & dolore pulsantibus, Divinæ pietatis & lenitatis paternæ solatia & subsidia claudantur, ne ad fovenda vulnera admittantur vulnerati, sed sine spe pacis & communicationis relictæ ad luporum rapinam, & prædam Diaboli proficiantur*. His Cyprianus ostendit, quibuscumque peccato obstrictis veniæ clausam apud Novatianos fuisse januam.

Sed & Pacianus Epist. 3. ad Sympronianum ait: *Traçtatus omnis Novatianorum, quem ad me confertis undique propositionibus destinatis, Symproniane frater, hoc continet; quòd post Baptismum pœnitere non liceat: quòd mortale peccatum Ecclesia donare non possit, imò quòd ipsa pereat recipiendo peccantes*. Imò & Afclepiades Sectâ & ipse Novatianus apud Socratem Lib. 7. Hist. c. 25. Attico

ei obijcienti: *Novatianos minime probo, qui ob levia delicta laicos à communione excludunt.* Respondit: *Præter sacrificium idolorum, sunt & alia multa peccata ad mortem, ut loquuntur Scripturæ, propter quæ vos quidem Clericos, nos verò etiam laicos à communione removemus, soli Deo potestatem condonandi illis relinquentes.*

V. Verùm quocumque modo Novatianus & sui assenserent, peccata aliqua esse irremissibilia, injuriæ & blasphemæ erant in Deum, qui Divo Paulo testante ad Ephes. 2. *Dives est in misericordia...* & cum essemus mortui peccatis convivificavit nos in Christo &c. Et D. Petro Ep. 2. c. 3. n. 9. *Nolens aliquos perire, sed omnes ad penitentiam reverti.* Qui per Ezechielem cap. 33. v. 11. dicit: *Nolo mortem impij, sed ut convertatur impius à via sua & vivat.* Qui David adultero, qui Ninivitis penitentibus pepercit: qui denique sic dilexit Mundum ut Filium suum unigenitum daret ut omnis qui credit in eum non pereat, sed habeat vitam æternam: non enim misit Deus Filium suum in mundum ut judicet mundum sed ut salvetur mundus per ipsum. Ita Christus ipse loquitur Jo. 3. v. 16. & 17. Et hoc præcipue de Mundo peccatis involuto dixit Matth. 9. v. 13. *Non enim veni vocare justos, sed peccatores:* quod repetit Lucæ 5. v. 31. *Non egent qui sani sunt medico, sed qui male habent: non veni vocare justos, sed peccatores ad penitentiam.* Propterea neminem ad se contrito corde venientem peccatorem rejecit, sed omnes absolvit, omnibus peccata dimisit, ut mulieri peccatrici, Petro eum abneganti, Discipulis omnibus eum in passionem deferentibus, Latroni secum in Cruce pendenti, & pro crucifixoribus ipsis, ut tantum peccatum eis dimitteret, Patrem suum rogavit. Nec solum ad se venientes peccatores suscepit, sed eos sponte vocavit ut Zachæum, ac Matthæum: ideoque se Pastori assimilavit, qui nonaginta novem ovibus relictis, ad querendam unicam quæ fecisset rat, sponte processit, protestatus eam inventam se magis gaudere, quam supra nonaginta novem justis, qui non erraverunt, & non indigent penitentia Matth. 18. v. 11. Lucæ 15. v. 7.: ubi etiam hoc explicat parabolâ Patris, de redeunte filio prodigo ac desertore, specialiter exultantis.

VI. Hæc aliaque suæ misericordiæ signa, dum nobiscum versaretur in terris Christus per se ipsum exhibuit. Reversurus autem ad Patrem, eandem plenam indulgenti facultatem, vel non indulgenti, prout ipsi judicaverint, iis quos vice sui relinquebat, indulgit. Hanc primò promisit Petro, quem loco sui Pastorem & Caput Ecclesiæ constituit Matth. 16. v. 19. *Et tibi dabo claves Regni Cælorum. Et quodcumque ligaveris super terram erit ligatum & in Cælis, & quodcumque solveris super terram, erit solutum &*

in

in Cælis. Hanc in cæteris Apostolis contulit Ecclesiæ cap. 18. v. 18. Amen dico vobis : *Quæcumque alligaveritis super terram, erunt ligata & in Cælis, & quæcumque solveritis super terram, erunt soluta & in Cælo*. Hanc specialiter quoad remittenda vel retinenda peccata post resurrectionem confirmavit Joann. 22. v. 23. dicens : *Quorum remisseritis peccata remittuntur eis, & quorum retinueritis, retenta sunt*. Hæc plenâ potestate solvendi & ligandi, remittendi, & retinendi sibi concessâ à Christo usâ semper est Ecclesiæ, aliqua peccata condonando, aliqua retinendo, nec prius, quàm publicâ impletâ pœnitentiâ remittendo: idèdque sicut schisma Novatianorum rejicit, nolentium lapsos quacumque pœnitentiâ exactâ esse admittendos; ita schisma Felicissimi eos etiam nullâ peractâ pœnitentiâ admittentis, detestatur. Quid ergo ad hæc Novatiani?

VII. Dicent, ademtam esse Ecclesiæ hanc facultatem erga eos, qui post susceptum Baptismum fuerint lapsi, vel aliquo gravi crimine onerati. At hujusmodi absolvendi baptizatis à quocunque crimine facultas, à quo Ecclesiæ eripitur, nisi à Novatianis? A Christo certè non; quin potius ipse illam Ecclesiæ concessit erga eos qui Ecclesiæ subditi essent: nemo enim iudex auctoritatem habet solvendi aut ligandi, nisi eos, qui suo Tribunali sunt subditi. Quo noto autem homines fiunt Ecclesiæ subditi, nisi per Baptismum? Imò in eos, qui Baptismo Christi incorporati sunt, magis manifestari debet ejus bonitas & clementia: sic enim ipse protestatur Matth. 15. v. 24. dicens: *Non sum missus nisi ad oves quæ perierunt domus Israel*. Et Matth. 10. v. 6. ad eas mittens Apostolos: *Ite potius, inquit, ad oves quæ perierunt domus Israel*. Si ergo præcipua cura Christi fuit salvare oves, quæ perierant domus Israel, & ad eas specialiter misit Apostolos; minoris curæ illi erunt, qui per Baptismum sui facti sunt, ut pro eis si ceciderint nullum adsit remedium? Non ita certè intellexit Petrus qui Act. 8. v. 22. Simone Mago jam baptizato, gravissimi tamen criminis reo, promissit à Deo veniam, si pœnitentiam egisset: *Pœnitentiam itaque age ab hac nequitia tua: & roga Deum, si fortè remittatur tibi hæc cogitatio cordis tui*. Non ita intellexit Paulus, qui Corinthium illum jam baptizatum, quem ob publicum incestum 1. Cor. 5. v. 5. Satane tradiderat, idèst communionē privaverat, postea 2. Cor. 2. v. 7. pœnitentem ipsum suscipi jussit. Ita Philaster Hæres. 82. *Paulus, quem abjecerat eum suscipi post tempus jubet. Amissionem itaque dignitatis possunt perpeti tales, non detrimentum salutis*. Quibus alludit ad canonicas pœnitentias, quibus tunc subiciebantur talium criminum rei, qui tamen à spe salutis omninò non excidebant.

VIII. In contrarium opponebant Novatiani dictum Pauli Hebr. 6. v. 4. *Impossibile est eos, qui semel sunt illuminati, gustaverunt etiam donum cœlestē, & participes facti sunt Spiritus Sancti; gustaverunt nihilominus bonum Dei verbum, virtutesque seculi venturi, & prolapsi sunt; renovari ad pœnitentiam, rursus crucifigentes sibi metipsis Filium Dei, & ostentui habentes.* Et cap. 10. v. 26. *Voluntariè enim peccantibus nobis post acceptam notitiam veritatis, jam non relinquitur pro peccatis hostia.* Ex quibus inferebant, lapsis post Baptismum nullum superesse salutaris pœnitentiæ locum.

IX. Respondet S. Epiphanius Hæres. 59. n. 2., Paulum in primo textu loqui de renovatione faciendâ per novum Baptismum: *Nam re verâ, inquit, qui semel renovati ceciderunt renovari ampliùs non possunt. Neque enim nascetur ampliùs Christus, ut pro nobis in crucem agatur. Neque Dei Filium in cruce suspendere quispiam potest, qui id ultra perpeti nequit. Neque alteram quis usurpare lotionem potest, quòd unus Baptismus sit, unaque renovatio. Verùm horum omnium remedium statim Apostolus subjicit, ut & Ecclesia medicinam faciat, & illius membris consulat. At itaque v. 9., Confidimus autem de vobis, carissimi, meliora & viciniora salutis. Non enim injustus est Deus, ut obliviscatur boni operis vestri, in quo videt, quemadmodum & instaurationem illam secundam fieri non posse omniùs pronuntiaverit; neque tamen à salute illos excluderit, quos peccati sui pœniteret: sed & salutis propinquos esse dixerit, & Deum rectè ab iis factorum esse susceptorem, qui delictorum suorum absolutam pœnitentiam cepissent, seque aded converterent animumque mutarent.*

Quamobrem cum Divinus sermo, tum Sancta Dei Ecclesia perpetuò pœnitentiam approbat; non quòd mollior ac dilutior sit, aut pigriores illos faciat, qui in illo stadio decurrunt; sed ut Dei gratiam humanitatemque non rejiciat, ac cujusque causæ modum ac rationem consideret. Ut enim is, qui virginitatem amisit, quod ad corpus attinet, repræsentare illam non potest, cum id minimè natura patiatur: ita qui post Baptismum in majora quædam crimina prolapsus est, periuræ ac qui virginitate excidit, secundum habet in continentia commendationis gradum: sic ille post Baptismum graviore obstructus scelere secundum habet sanitatis genus. Quod tametsi cum tantâ quantâ priùs virtute minimè conjunctum sit, non est tamen à consequenda vitæ spe ac salutis alienum. Igitur eorum, qui in capeffenda pœnitentia laborant, fructum ac præmium Divinus sermo non rejicit. Hactenus Epiphanius.

X. Igitur qui post Baptismum in grave crimen lapsus semel innocentiam baptismalem amisit, eam quidem per pœnitentiam am-

amplius recuperare non potest, sicut nec qui semel amisit Virginitatem, per continentiam iterum virgo restitui potest . Sicut autem per posteriorem continentiam castus & continens fieri potest : ita per poenitentiam post lapsum Dei gratiâ iustus & salvus effici potest . Et ideo D. Paulus dicit quidem semel lapsum per poenitentiam non posse innovari, dicit tamen, Deum non esse iniustum, ut obliviscatur boni operis, idest poenitentiae illius . Et hoc quia ut docet S. Thomas 3. p. qu. 48. art. 1. ad 5. *Baptismus* (per quem homo innovatur) *habet virtutem ex passione Christi, sicut quadam spiritualis generatio cum spirituali morte precedentis vitae* „ Statutum autem est hominibus semel mori „ (Hebr. 9.) & *semel nasci : & ideo semel tantum debet homo baptizari . Sed poenitentia habet virtutem ex passione Christi, sicut spiritualis medicatio, quae frequenter iterari potest .* Ita S. Thomas .

XI. Ad alterum Pauli textum ex Cap. 10. dico, Paulum ibi aperte loqui de haereticis, qui post acceptam notitiam veritatis deserunt collectionem, idest Ecclesiam: pro istis enim quamdiu sic manent, non relinquitur pro peccatis hostia . Videant hoc Novatiani. De quibus & eorum errore cum locutus etiam sim Tom. 3. in 3. p. Tract. de Poenitentia Qu. 1. Dub. 1. §. 2. ; & insuper cum ibid. q. 10. per totam de Poenitentia publica ejusque ordinibus discesserim, ad ibi dicta Studiosum mitto .

XII. Quia verò quamvis Novatiani nedum à fide lapsos, sed & moechos, adulteros, raptos, aliorumque criminum reos reparationis poenitentiam incapaces esse dicerent, & contra Ecclesiam quae illos post poenitentiam recipiebat blaterarent, ipsi tamen omnes cujusvis criminis obnoxios, & maxime Ecclesiae rebelles, si eorum societati se se adjungerent, absque ullâ praeiâ poenitentiae admittebant; ideo eos ita coarguit S. Cyprianus Ep. 52. ad Antonianum: *Nec sibi in hoc novi haeretici blandiantur, quod se dicant Idololatri non communicare, quando sint apud illos & fraudatores, & adulteri, qui teneantur idololatriæ crimine, secundum Apostolum dicentem: Omnis fornicator, aut immundus, aut fraudator, quod est idololatria, non habet hereditatem in Regno Christi & Dei .* Et S. Pacianus Epist. 3. ad Sympronianum Novatianos sic ad hominem premit: *Nos, inquit, in Ecclesiam lupos recipimus, qui haereticorum ora vitamus? An potius Novatiani, qui cum ipsi sint rapaces lupo paulò inferiores oculos reformidant? Nos consentimus malis, nos pecem tangimus, nos tenebris cubaremus, nos idola & Be-lial jungimus? Aut illi qui Evaristum, qui Nicostratum receperunt, caterosque ab Ecclesia recedentes linguâ, manu, moribus inquinatos? Nos tam adulteris & furibus convenimus; an illi qui Novatum vita sua*

sua & capiti pratulerunt, qui post interceptam pecuniam pupillorum atque viduarum, miseri parentis & partus uxoris parricidam, non modò non penitentem, verùm etiã gloriantem? Hæc quæ Pacianus in Novatianos, an intorqueri possint in prætenso Reformatores, qui Ecclesiam cujus sunt desertores calumniis infamare non cessant, dum ipsi Luthero vel Calvino vel sibi metipsis adherentes, veris sunt irretiti criminibus, judicet pius ac prudens.

XIII. Et ne mendacem me quis accuset: ecce Lambertus Daneus ex prætensis Reformatis unus, qui cap. 38. de Novatianis (qui etiã se Catharos nuncupabant) agens, Catharorum Recentiorum causam suscipiens, ait „Posterior atas ad prægravandam „bonam Sacrosancti Evangelii causam, homines vere Evangelicos infami Catharorum nomine calumniata est, quos eisdem „etiã Waldenses, Pauperes de Lugduno, Arnaldistas ab Arnaldo quodam. . . Denique eos Tollepinos vocavit „. Hæc Daneus. Qui deinde dicit ex Novatiana hæresi fluxisse venenum meriti bonorum operum addens „Recepta tamen est hæc hæresis „& repetita interpolato nomine à Pelagianis: deinde à Papistis „retenta: quia omnes hi meritum operum nostrorum defendunt, „. Ita Daneus.

XIV. Cui breviter respondeo. Ad primum, quo Waldenses, seu Pauperes de Lugduno homines verè Evangelicos appellat, me non mirari: nam Evangelici erant, seu Evangelici nomen falsò affectabant, sicut ipse Daneus. Nam & ipsi de abstinentia à cibis in Quadragesima, de auriculari Confessione, de Confirmatione, de Romano Pontifice, de Sanctorum imaginibus, de Indulgentiis & aliis dogmatibus eadem cum Daneo, & suis asserbant: & propterea in Romana Synodo ut hæretici jure damnati anno 1170. fuere, sicut in Tridentina Daneus & sui. Unum tamen dicebant Waldenses, quod non puto à Daneo ut Evangelicum probandum: nempe, urente carnis libidine omnem carnalem commixtionem, tam inter viros, quàm inter feminas esse licitam. Arnaldistæ autem multa in Deum creatorem blasphemabant: unde nescio quomodo Evangelicos ac suos appellare possit Daneus.

Quod verò secundo loco dicit, doctrinam de merito bonorum operum à Novatianis, seu Catharis hausitam, ad Pelagianos transiisse, & à Papistis retentam esse, vel ex ignorantia, vel ex animo calumniandi procedit. Sibi enim arrogare meritum operum propriis & naturæ viribus, Catharorum quidem & Pelagianorum audax præsumptio fuit: at meritum concedere bonis operibus ex Christi meritis, & ejus gratia factis, doctrina Catholica semper fuit ab Ecclesia recepta, & à solis Luthero, Calvino & suis, falsis

falsis principiis rejecta, ut ostendi in Vera Ecclesia Tom. 2. p. 1. art. 9. & Tom. 3. in 1. 2. Tract. de Merito Iusti q. 1. Dub. 2. Verè quidem ego dicere possum, Danæum & alios errorem negandi Ecclesiæ auctoritatem, dimittendi peccata, contemnendi confirmationis Sacramentum, & Martyrum reliquias, à Novatianis accepisse. Sed hæc satis.

§. I V.

Alii Novatianorum errores.

I. **P** Refato suo primario alios addebant errores Novatiani. Illicitas secundas nuptias asserabant, easque tam in maribus, quam in feminis ceu adulteria detestabantur; ideoque eos qui post Baptismum secundas contraxissent nuptias à sua communione arcebant. Hunc errorem in Montanistis supra Cap. 23. §. 4. rejeci. Aliqua tamen hic adjiciam. De Catharis ait S. Augustinus L. de Agone Christiano cap. 31. *Viduas suas uri cogunt, quas nubere non permittunt. Non enim prudentiores habendi sunt, quam Paulus Apostolus, qui maluit eos nubere quam uri* (1. ad Timoth. 5. v. 14.) Ideoque Concil. Nicenum Can. 8. Catharis, ut in Ecclesiam recipiantur, mandat scripto promittere, se æquè cum bigamis & eum lapsis communicaturos. S. Epiphanius Hæres. 59. num. 4. dicit, ad secundas nuptias damnandas motos fuisse Pauli Epist. 1. cap. 3. v. 2. ad Timoth. scribentis : *Episcopum irreprehensibilem esse oportere, unius uxoris virum, continentem* : similiter Diaconum & Presbyterum : cui respondet Epiphanius (cuius verba quia valdè favent sacrorum Ministrorum continentiae & celibatui contra Novatores, per extensum referam) : *Ita enina, profectò se se res habet, ut post Christi in Orbem terrarum adventum, eos omnes, qui secundum priores nuptias mortuâ uxore alteri se se nuptiis illigarint, sanctissima Dei disciplina rejiciat : propterea quod incredibilis est sacerdotii honor ac dignitas. Atque istud ipsum Sacrosancta Dei Ecclesia eum omni provisione diligentiaque servat. Quin eum insuper, qui adhuc in matrimonio degit, ac liberis dat operam, tametsi unius sit uxoris vir, nequaquam tamen ad Diaconi, Presbyteri, Episcopi, aut Hypodiaconi Ordinem admittit ; sed eum dumtaxat, qui ab unius uxoris consuetudine se se continuerit, aut ea sit orbatus : quod in illis locis præcipuè fit, ubi Ecclesiastici canones accuratè servantur. Hæc ennis Epiphanius. Qui subinde ostendit, quòd si alicubi aliter fiat, hoc fit non ex Canonum auctoritate, sed vel ex hominum ignavia, vel ex necessitate, quia tot non inveniuntur qui populi*

multitudini satisfacere possint. Pergit deinde ostendens, Ecclesiam à Spirito Sancto edoctam statuisse in Sacris Ministris continentiam, ut soli Deo penitus vacent; & alia, quæ omitto: tum quia rei præsentis non sunt, tum quia de eis fusè egi, tum in Vera Ecclesia, tum in Colloquiis Theologico-polemicis Classe 1.

II. Revertendo igitur ad præsens argumentum: secundas nuptias illicitas fecisse solos Catharos Novatiani sobolem, censet Theodoritus Lib. 3. Hæret. Fab. cap. 5. Imo hunc errorem solis in Phrygia morantibus tribuit Socrates Lib. 5. Hist. c. 22., addens, eos qui in Occidente erant bigamos recepiſſe, qui verò Constantino-poli debebant absolute nec recepiſſe, nec rejeciſſe. Nemo tamen præter ipsum hæc distinctione utitur: imò S. Epiphanius S. Augustinus tum in L. de Hæref. c. 38. tum in L. de Agone Christi. cap. 31. tum Theodoritus citato loco omnibus Novatianis, seu Catharis hunc errorem affingunt.

III. Martyres, eorumque Reliquias contempniſſe Novatianos Alexandrix, refert S. Eulogius apud Photium Cod. 280. pag. 1617. *Hoc facere*, inquit, *Novatianos Alexandria contra Martyres blaterantes. Comparituri autem in ultimo Judicii die non habebunt sui defensionem, nec aperire os, nec movere labra poterant, quia hoc tempore contra Christi Martyres linguam exaceruerunt.* Et post pauca subdit: *David de justificatis tribulatione loquens ait, Custodit Dominus omnia ossa eorum, unum ex his non contringetur, ostendit, ossa illa vitam dare posse, & accedentibus medicinam præbere. Hac enim ipsa ossa, quæ à Christo nunc conservantur, sibi invicem unita anima conjungentur, & mercedem simul certaminum accipient &c.* Audiant hæc moderni Hæretici, qui Sacra Martyrum ossa cum Novatianis contemnunt.

IV. Ulterius in hoc versabantur errore, quòd venientes, seu redeuntes ad eorum Sectam iterum baptizabant. Cum enim existimarent universam Ecclesiam esse corruptam, eò quòd lapsos & peccatores ad communionem reciperet; inde fiebat, ut venientes ad eorum Sectam iterum baptizarent, reputantes nullum Baptisma extra illam datum. Quare Dionysius apud Euseb. Lib. 7. Hist. cap. 8. de Novatiano ait: *Qui præterea sacrum lavacrum oblitterat; fidemque & confessionem quæ Baptismum præcedit evertit.* Instructionem, & Catechismos aliosque ritus ante Baptismum fieri solitos omittebat, ut dicam. Et S. Cyprianus Epist. 73. ad Jubajanum: *Novatianus*, inquit, *simiarum more, quæ cum homines non sint, homines tamen imitantur, vult Ecclesia Catholica antiquioris semper sibi & veritatem vindicare, quando ipse in Ecclesia non sit: immo adhuc insuper contra Ecclesiam rebellis & hostis extiterit....* *Quid si*

in Ecclesia baptizatos rebaptizandos foris extra Ecclesiam Novatianus existimat, à se incipere debuerat, ut prior extraneo & hæretico Baptismo rebaptizaretur, qui post Ecclesiam imò & contra Ecclesiam baptizandos foris opinatur. Quibus S. Cyprianus Novatianum reprehendit, non quòd putaret, Baptismum extra Ecclesiam collatum esse nullum; in hac enim opinione seu errore, Cyprianus ipse erat, ut ostendi Tom. 2. in 3. p. Tract. de Bapt. Qu. 4. Dub. 3. sed quia suam Ecclesiam solam esse Catholicam & veram præsumebat.

V. Baptisma tamen Novatianorum in substantialibus cum Baptismo Catholicorum conveniebat, illud enim in nomine, SS. Trinitatis, cujus fidem illæsam custodiebant, conferre consueverant, licet aliquam fidei confessionem ante Baptismum, ut ex Dionysio dixi, fortè omitterent; sicut nec Chrismatis unctionem in Baptismo præmittebant. Sic Theodorus his verbis: *lisque qui ab ipsis tinguntur Sacrum Chrisma non præbent.* Hoc Danaus ipse fatetur Opusc. 38. quem morem dicit fuisse tunc in Ecclesia receptum, „ Et certè ex Fabriani Episcopi Romani actis & vita „ discimus, magnum tunc fuisse Chrismatis in Baptismis usum, „ quando ille ipse præcepit quotannis confici, vetuit autem com- „ buri, & est in Can. Literis de Consecr. dist. 3. Idem apparet ex „ Tertulliani scriptis. Sed quo Scripturæ fundamento Patres „ Chrisma in baptizando quæso sanxerunt „? Ita spiritu hæretico claudit Danaus. Si fatetur, Ecclesiam ab antiquis temporibus statuisse, ut Chrisma in Baptismo adhiberetur, & eo usos fuisse Patres, quâ auctoritate ipse ac sui ritum hunc à Baptismo rejecerunt? An quia Scriptura id non præcipit? Sed Scriptura præcipit tamen in his quæ ad ritum pertinent obediendum esse Ecclesiæ.

VI. Nedum autem Chrisma à Baptismi collatione Novatiani explorere: sed & Sacramentum Chrismationis seu Confirmationis prorsus omittebant, nec baptizatis conferebant. Indicat hoc Dionysius supra relatus de Novatiano addens: *Et Spiritum Sanctum penitus ab illis fugat.* Originem hujus omissionis à Novatiano ipso fluxisse credendum est, qui ut ex Cornelio supra laudato apud Euseb. Lib. 6. cap. 43. retuli: *Neque ab Episcopo consignatus est.* Hoc autem signaculo minimè percepto, quo tandem modo Spiritum Sanctum potuit accipere? Hæc ratione antiqua Ecclesia statuit, ut Novatiani ad eam venientes non rebaptizarentur quidem, sed tamen Manuum Impositione confirmarentur, vel Sacro Chrismate inungerentur. De manuum impositione sola loquuntur Nicænum Can. 8., Laodicænum Can. 7., & Constantinopolitanum I., & Innocentius I. De unctione etiam loquitur Theodorus citato loco

dicens,, Quocirca eos etiam qui ex hac hæresi corpori Ecclesiæ conjunguntur benedicti Patres ungi iusserunt,, . In hac hæresi moderni Acatholici quoque convenientes, Confirmationem à numero Sacramentorum delent, ut ostendi Tom.2. in 3.p. Tract. de Confirm. qu.1. Dub.1.

VII. De die celebrandi Paschatis concordēs non erant. Alii enim contendebant, illud celebrandum esse cum Judæis Lunā 14. Martii in quacumque diem incideret. Alii die Dominicā sequenti cum Catholicis. Sive autem unā, sive aliā die celebraretur, pro re adjaphora habebatur, ut scribit Socrates L. 5. Hist. c.22. Quamvis idem Socrates eodem Libro c.21. supponat, Novatianos in Synodo Pazenſi statuisse celebrandum Pascha die 14. Et hoc statutum Sabbatum quemdam ex Judæo factum Christianum, & Sectā Novatianum, innovare conatum fuisse, aliis tamen ejusdem Sectæ refragantibus, exceptis Novatianis Galatiæ & Phrygiæ idem cum illo sentientibus.

VIII. Tandem Novatiani superbiā, & animi duritiæ omnes hereticos superarunt. Elatione obcecati se solos puros ac mundos jactabant, ceteros velut immundos & corruptos contemnentes: ideòque, non rejecto tamen Novatianorum à suæ Sectæ auctore accepto nomine, aliud addidere: *Catbaros*, idest puros ac mundos se vocitantes: quo fiebat, ut ceteros tanquam impuros ad se accedere dedignantur, ac duritiæ cordis, etiam humiles ac pœnitentes, peccatores admittere recusarent: similes prorsus Phariseis, nec timentes maledictum à Deo per Isaiam c.65. v.5. in eos fulminatum: *Qui dicunt recede à me, non appropinques mihi, quia immundus es: isti sumus erunt in furore meo, ignis ardens totā die*, Scire nolentes quia *Deus superbis resistit, humilibus autem dat gratiam* (Jacobi 4. v.6. 1. Petri 5. v.5.) & quòd *Domum superborum demolietur Dominus*. At quia Phariseos æmulari volebant, attendant quid evenerit Phariseo illi, de quo Christus ipse Luca 18. v.10. &c. *Duo homines, inquit, ascenderunt in templum ut orarent: unus Phariseus, & alter Publicanus. Phariseus stans, hæc apud se orabat: Gratias ago tibi, quia non sum sicut ceteri hominum raptores, injusti, adulteri, velut etiam hic Publicanus. Jejunio bis in Sabbato, decimas de omnium quæ possideo. Ita orabat Phariseus. Et Publicanus à longè stans volebat nec oculus ad cælum levare: sed percutiebat pectus suum dicens: Deus propitius esto mihi peccatori. Quid evenit? Christum audiant: Dico vobis, Descendit hic justificatus in domum suam ab illo: quia omnis qui se exultat, humiliabitur, & qui se humiliat exaltabitur. Norint ergo Novatiani, peccatores quos humiliter pœnitentes ipsi superbe rejciunt, à Deo*

miſe-

misericordiam consecuturos, se autem Pharisaico spiritu intumescere fore à Deo & à Christo rejiciendos. Sed hosce superbos dimittamus.

CAPUT XXXV.

De Angelicis.

§. I.

Qui fuerint, & quæ eorum error.

I. **H**ORUM ignotus est Auctor, imò & eorum nomen satis obscurum. Ab eis propterea breviter se expedit Epiphanius Hæres. 60. dicens: *Audita à nobis est Angelicorum hæresis, ac solum ejus nomen accepimus, neque cujusmodi illa demum hæresis sit, compertum habuimus. Quod eo fortasse contigit, quòd cùm aliquando prodisset, desit postea, ac tandem penitus extincta est. Illud verò nomen, quam ob causam obtinuerit, ignoramus. Nam cùm hæretici quidam conditum ab Angelis Mundum esse dixerint, utrumnam hæc Sæccla quòd idem asseveraret eodem sit affecta nomine, certò affirmare non possum. An potius quòd in Angelicum se se ordinem arroganter referrent, atque excellentem quamdam vitæ rationem insituerent, ne hoc quidem pro comperto assero. An postremò ab loco quodam eam appellationem sortiti sint; quoniam quidem regio quædam est ultra Mesopotamiam, quæ Angelina dicitur. His Epiphanius profitetur, omnia de hac hæresi sibi esse ignota: ignotam causam nominis, causam erroris: & quòd vix enata desierit, & fuerit extincta.*

II. S. Augustinus tamen Angelicos dictos asserit ab Angelorum cultu. Ita L. de Hæres. c. 39. *Angelici in Angelorum cultum inclinati, quos Epiphanius jam omninò desecisse testatur. Damascenus etiam Hæres. 60. Angelici, inquit, hi omninò non supersunt bodie. Ita verò dicti sunt: vel quòd se Angelici ordinis esse jactarent, vel quòd Angelos invocarent. Theodoritus in Cap. 2. Epist. ad Coloss. dicit, suâ atate superstites fuisse in Phrygia & Pisidia profani cultus Angelorum reliquias sic: Qui legem defendebant eos etiam ad Angelos colendos inducebant dicentes, fuisse legem per eos datam. Mansit autem diù hoc vitium in Phrygia & Pisidia. Quo circa Synodus quoque, quæ convenit Laodicea, quæ est Phrygiæ Metropolis, lege prohibuit, ne precarentur Angelos. Et in bodiurnum usque diem licet videre apud illos, & eorum finitimos Oratoria Sancti Michaelis.*

III. Iu-

III. Hujus hæresis Auctorem nemo prodidit. Vigiſſe maxime in Phrygia & Piſidia ex Theodorito vidimus. Tempus quo emerſit incertum eſt. Aliqui ut Ricciolius 3. p. Chronol. Tom. 2. Catal. 2. eam conſignant ſub anno Domini 255. Eam quoque Natalis Alexandre Hiſt. Eccl. Sec. 3. c. 3. art. 6. medio ſeculo tertio circiter exortam putat. Alii eorẽam eam faciunt hæreſi Melchisedecianorum, ideoque prius exortam, nempe circa initium ſeculi tertii, Iſidorus L. 8. Etymol., Honorius Auguſtadun. L. de Hæreſi, & Rhabanus Lib. 2. de Inſt. Cleric. c. 58., eadẽ Epiphanius Auguſtinus & Damascenus eam poſt Catharos receſcant.

IV. Seculo ſexto Monophyſitæ quidam, dicti etiam Angelici ſeu Angelitæ ab Angelio Alexandria regione emerſerunt, de quibus Theodorus Presbyter Conſtantinopol. Lib. de Receptione Hæreticorum apud Cotelierium Tom. 3. Monum. Eccl. Græc. Sed hi diverſi omnino ſunt ab illis, de quibus agimus. Nam hi Angelitæ dicti ſunt, non ab errore quo Angelos ſuperſtitioſe colerent, ſed ab Angelio loco ſic dicto. Unde idem Theodorus: *Porro, inquit, Angelitæ ab adverſariis vocati ſunt ex loco Alexandria dicto Angelio, in quo collecti adem habentes, qui primi inter eos ſunt congregantur.* De his Nicephorus L. 18. Hiſt. cap. 49. dicit, habuiſſe primum Sectæ ducem quendam Severum, à quo etiam dicti ſunt, ſicut Angelitæ ab Angelleo, loco Alexandria, in quo ſuos coetus habebant. Errabant autem circa Trinitatem, dicebant enim, alium, eſſe Patrem, alium Filium, alium Spiritum Sanctum, non eſſe autem horum quemque per ſe ipſum naturam, ſed habere communem Deum, ſive Deitatem in eis exiſtente, atque de ea Deitate indiviſibili modo participantem quemlibet eſſe Deum. Unam autem ſubſiſtentiam opinantur eſſe Patrem, Filium, & Spiritum Sanctum, communem verò ipſum Deum & naturam. Hæc ex Nicephoro. Ab his quoque diverſos fuiſſe puto alios Angellicos, quos in Sicilia fuiſſe idolorum cultores, ſcribit S. Gregorius Magnus Lib. 3. Epiſt. modò 60., quamvis Patres Maurini in Notis eoſdem fuiſſe putant ac eos, de quibus ſupra Nicephorus, & à cultoribus idolorum diſtinctos.

V. Errabant igitur Angelici, de quibus modò agimus, ſecundum Epiphanium, vel quia Angelos colerent ut Mundi Conditores (aut Legis datores juxta Theodoritum) vel quia ſe in Angelicum ordinem arroganter reſerrent. Secundum Auguſtinum autem & alios, quia Angelos colebant, & venerantur. In hoc exultat omnium Proteſtantium nomine Danaeus, & conatur offendere, Angelicorum veterem hæreſim in Catholicos Romanos (ſeu ut vocat Papiſtas) Angelis cultum præſtantes tranſiſſe, & ab eis reno-

renovatam fuisse. Sed quàm turpiter hallucinetur cum suis, ostendi in Vera Ecclesia Tom. 2. p. 2. art. 14. §. 3. & Tom. 16. Theolog. Qu. 5. de SS. Intercess. Dub. 3. Ut tamen Danxi impostura hic appareat, aliqua §. sequente dicam, seu potius repetam.

§. II.

Angelicorum error à Catholico dogmate scernitur.

LDANÆUS hoc Opusc. 39. solitâ audaciâ hæc scribit „ Quam-
 „ quam autem non est latissimè propagatum hoc virus,
 „ tenacissimè tamen in hominum animis semel sparsum inhaesit:
 „ adeò ut Papistæ etiamnum hodie hunc errorem retineant, &
 „ colant Angelos. Esse verò antiquissimum, & jam inde ab Apo-
 „ stolorum & Apostolicorum virorum ætate repetitum ex eo ap-
 „ paret, quòd Paulus in Epist. ad Coloss. 2. v. 18. cultus Angelo-
 „ rum jam meminit, & rejicit. Quæ sententia ex Platonica Sectæ
 „ & Philosophiæ fontibus hausta, primum à Simonianis in Eccle-
 „ siam inuenta est, sed ab Apostolis explosa; demum horum
 „ Angelicorum industria recruduit, ut ad Simonem Magum tan-
 „ quam ad proprium auctorem & parentem revocari debeat.
 „ Hanc autem hæresim maximè in Phrygia & Pisidia viguisse,
 „ scribit Theodoritus Cyri Episcopus, adeò ut Laodiceana Syno-
 „ do (est autem illa Laodicea Metropolis Phrygiæ) sit vetitum,
 „ ne Christiani precarentur Angelos „. Hucusque DANÆUS.

II. Porro si hoc discursu intenderet hæresis damnare Angeli-
 cos, qui Angelos colebant eo modo & cultu, quo Simon Magus
 & alii Apostolorum temporibus, ab eo non disentirent. Illi enim
 colebant Angelos tanquam Mundi Conditores, Legislatores, eis-
 que sacrificia offerebant: colebant insuper non solum bonos, sed
 etiam malos, nempe Dæmones, atque ita colebant, ut derelicto
 Christo, per eos solos Deo quem invisibilem supponebant reconciliari,
 & ad eum accedere posse sperarent. Tales erant, à quibus ut
 caverent, Colossenses monebat Paulus citato loco. Postquam enim
 eap. 1. eos hortatus fuerat, ut in solum Jesum Filium Dei spem
 ponerent, quia ipse est imago Dei invisibilis . . . in quo condita sunt
 universa in Cælis & in terra, visibilia & invisibilia, sive Throni sive
 Dominationes, sive Principatus, sive Potestates: omnia per ipsum &
 in ipso creata sunt. Et ipse est ante omnes & omnia in ipso constant.
 Et ipse est Caput Corporis Ecclesiæ, qui est principium primogenitus
 ex mortuis, ut sit in omnibus ipse primatum tenens. Quia in ipso com-
 placuit omnem plenitudinem inhabitare. Et per eum reconciliare
 omnia

omnia in ipsum, pacificans per sanguinem Crucis ejus sive quæ in terris, sive quæ in Cælis sunt. Videns surrexisse aliquos, qui sive ex Legge, sive vanis Philosophiæ rationibus eos à Christo eripere, & ad Angelorum cultum trahere cap. 2. v. 18. *Nemo*, inquit, *vos seducat, volens in humilitate & religione Angelorum, quæ non vidit ambulans, frustra inflatus sensu carnis suæ: & non tenens caput, ex quo totum corpus per nexus & conjunctiones subministratum, & constructum cre- scit in augmentum Dei.*

III. Is ergo erat cultus Angelorum, quem damnabat, & à quo cavere jubebat Paulus, cultus scilicet non tenens Christum Caput universæ Ecclesiæ, per quem reconciliati sumus Deo, eoque posthabito, totum tribuens Angelis ab ipso creatis, & docens per ipsos solos, non per Christum nos ad Deum invisibilem accedere posse. Ita Pauli mentem exponunt Chrysostomus Hom. 7. in c. 2. ad Coloss. *Erant quidam qui dicerent, non oportere nos per Christum adduci, sed per Angelos. Illud enim est majus, quàm ut id possimus assequi. Et Theodoritus in dictum Caput: Qui Legem defendebant, eos etiam ad Angelos colendos inducebant dicentes fuisse Legem per eos datam . . . dicentes, universorum Deum nec cerni, nec comprehendi, nec ad eum posse perveniri, & oportere per Angelos Divinam sibi benevolentiam conciliare. Hoc autem dixit. In humilitate & cultu Angelorum. Humilitatem præferebant: sed re verà insolentiæ vitio laborabant. Contra quos Concilium Laodicenum anno 372. Can. 35. statuit: Non oportet, Christianos derelictâ Ecclesiâ Dei abire, & ad Angelos idololatriæ abominandæ congregationes facere, quæ omnia interdicta sunt. Quicumque autem inventus fuerit occultæ huic idololatriæ vacans, anathema sit: quoniam derelinquens Dominum nostrum Jesum Christum Filium Dei, accessit ad Idola. Quæ exponens Ionas: Antiqua, inquit, illa quorundam hæresis fuit, ut non Christum nobis patronum, aut interpretem apud Deum adbibendam esse, sed Angelos affirmarent. Cum ergo Synodus hæc Laodiceæ Phrygiæ Metropoli coacta sit, & in Phrygia maximè essent Angelici, perspicuum est, præfatum Canonem contra ipsos fuisse editum, ac proinde eorum errorem fuisse, quòd colerent Angelos cultu idololatræ, & derelicto Christo spem suam omnem in Angelis ponerent. Et hic fuit error, à quo ut caverent Colossenses Paulus monebat: quem errorem Simoniani tunc, & alii seductores apud simplices spargebant, haustum sortè ex Ethnica & Platonica Philosophia, ut quos illi Genios, isti Angelos appellarent, atque iisdem solemnibus ac sacrificiis colerent.*

IV. Hæc si Danæus sepositâ calumniandi libidine advertere voluisset, non dixisset certè, quòd *Papistæ etiamnum hodie hunc erro-*

errorem retineant, & colant Angelos. Quâ enim conscientia dicere potuit, nos derelinquere Christum ut colamus Angelos, qui totam spem nostræ salutis unice in Christo tanquam nostro Mediatore, & à quo Angeli ipsi ut nos adjuvent accipiunt, collocamus? Colimus certè Angelos, sed cultu inferiori, non Latriæ tanquam Dominos ac Deos, sed Dulciæ tanquam Dei ministros, legatos, nuntios & custodes nostros: colimus, eis tamen sacrificia non offerimus, sed soli Deo & Christo; rogantes eos ut sacrificia & preces nostras ad Deum perferant, juxta illud quod vidit Joannes in Apoc. cap. 8. v. 3. *Et alius Angelus venit & stetit ante Altare habens thuribulum aureum: & data sunt illi incensa multa, ut daret de orationibus Sanctorum omnium super altare aureum, quod est ante thronum Dei, & ascendit fumus incensorum de orationibus Sanctorum de manu Angeli coram Deo.* Ob hæc officia, quæ pro nobis gerunt, Angelos grati animi ergo veneramur: sicut & Danæus ministrum Regis, qui ejus preces ad Regem deferret, veneraretur, ejusque Legatum coheret, nec quidquam cultui Regi debito se detrudere existimaret, imò se in eis colere & venerari Regem, & propter Regem honorem eis impertiri. Si ergo hanc distinctionem in cultu civili & politico approbat, cur non in religioso & sacro? Religiosus est cultus Angelis præstitus, non ut à religione elicitus, sed ut imperatus, inquit Amesius è Danæi schola Tom. 2. Bellarm. enervati Lib. 6. c. 5. §. 33. *Honoranda sunt creatura Dei ex religione erga Deum, non ex religione erga ipsas. Religio, ut scholastici loquuntur, imperat, non elicit istum honorem.* Si ergo quamvis eadem caritate quâ diligimus Deum, diligamus & proximum, non inde infertur, quòd diligamus proximum super omnia, & propter se, sicut Deum diligimus: ita etsi eadem religione veneremur Deum & Angelos, non infertur, nos pari honore Angelos venerari, ac Deum.

V. Audiat Danæus, quid S. Augustinus (quem velut patronum allegat) scribat contra Faustum similia ei impropertantem Lib. 20. c. 21. *Colimus ergo Martyres eo cultu dilectionis & societatis, quo in hac vita coluntur sancti homines Dei, quorum cor ad talem pro Evangelica veritate passionem paratum esse sentimus. Sed illos tantò devotius, quantò secularius post certamina superata: quantò enim fidentiore laude prædicamus jam in vita feliciore victores, quam in ista adhuc pugnantes. At illo cultu, qui Græcè Latria dicitur, Latine uno verbo dici non potest, cum sit quadam Divinitati propria servitus, nec colimus, nec colendum docemus, nisi unum Deum. Cum autem ad hunc cultum pertineat oblatio sacrificii, unde idololatria dicitur eorum, qui hoc etiam Idolis exhibent, nullo modo tale aliquid offerimus, aut offerendum præcipimus, vel cuiquam Martyri, vel*

cuiquam sanctæ animæ, vel cuiquam Angelo: & quisquis in hunc errorem delabitur, corripitur per sanam doctrinam, sive ut corrigatur, sive ut caveatur. Etiam ipsi enim Sancti, vel homines, vel Angeli exhiberi sibi nolum, quod uni Deo deberi norunt.

Inde adest exemplum Barnabæ & Pauli, qui Lycaoniæ non sunt passi se adorari ab iis, qui eis velut Dii immolare volebant Act. 14. & alterum exemplum Angeli nolentis adorari à Joanne Evangelista Apocal. 19. v. 10., & c. 22. v. 9. Cum enim Joannes, eum non Angelum esse existimasset, sed ipsum Christum, ac Dei Verbum; & proinde eum adorare vellet cultu & adoratione soli Deo Verbo Incarnato debita, non permisit Angelus; sed ei dixit: *Deum adora.* Hæc duo exempla idem Sanctus Augustinus profert etiam L. 10. de Civit. Dei c. 19. & idem confirmat. L. de Vera Relig. c. 55. Quòd si etiam dicatur, S. Joannem voluisse adorare ipsum Angelum; tactum hoc probat, Joannem existimasse Angelos aliquo cultu licet inferiori ei qui soli Deo debetur adorari posse; illum autem recusasse Angelum, non quia illum sibi indebitum & illicitum reputaret, sed quia, ut ait S. Gregorius Homil. 8. in Evangelia Angeli post Incarnationem Verbi Humanitatem ad tantam dignitatem elevatam non amplius veluti naturâ Angelicâ inferiorem respiciebant: *Quid est, inquit, quod ante Redemptoris adventum Angeli ab hominibus adorantur & tacent (ut Gen. 18. ab Abrahamo, & Gen. 19. à Loth) postmodum verò adorari refugiunt, nisi quòd naturam nostram, quam priùs despexerant, postquam hanc super se assumptam conspiciunt, prostratam sibi videre pertimescunt? Nec jam sub se velut infirmam contemnere ausi sunt, quam super se videlicet in Cæli Rege venerantur. Nec habere dedignantur hominem socium, qui super se adorant hominem Deum.*

VI. Doctores verò à Daniele citati Lactantius L. 2., Arnobius L. 3., & Theodoritus L. 5. Divin. Decret. Epitome, quorum tamen verba non refert, vel loquuntur de malis Angelis seu Dæmonibus ut Lactantius L. 2. c. 15. vel de cultu Angelis tanquam Diis exhibito, ut Arnobius L. 3., quod etiam Theodoritus loco citato asserit dicens, Angelos autem nec ut Græcorum Poetæ & Philosophi in Deos referimus: de eis tamen in sequentibus honorificè loquitur, & hominibus adeò favorabiles à Deo constitutos describit, ut nemo nisi stupidus aliquo honore bonos Angelos dignos non existimet. Propterea Eusebius Lib. 3. Demonstr. Evang. pag. 106. *Accepimus, inquit, esse quasdam post supremum Deum Potestates naturâ incorporeas, intelligentes, rationales, omnisque virtute præditas, quæ circum Regem Universi choros exerceant: quarum plures etiam usque ad homines ipsius Patris nutu quâdam salutari dispositio-*
ne

ne mittantur, quasque & cognoscere & venerari pro ratione graduque dignitatis edocti sumus, ut soli Deo qui Rex est Univerſi adorationis honorem tribuamus. Boni ergo Angeli honorem & venerationem ſuſcipiunt, non adorationem, quam ſoli Deo reſervari volunt. Fugientos autem Dæmones eſſe dicit, qui *vel quàm maximè Deorum appellationes & cultus ſibi ipſi arrogant*. Ita Euſebius.

Ambroſius etiam Lib. de Viduit. ait: *Obſecrandi ſunt Angeli pro nobis, qui nobis ad præſidium dati ſunt. Martyres obſecrandi... poſſunt pro peccatis rogare noſtris*. Et Hilarius in Pſalm. 129. de Angelis ait: *Sunt enim efficientes ſpiritus in miniſterium miſſi propter eos qui hæreditabunt ſalutem. Interceſſione itaque horum non natura Dei eget, ſed infirmitas noſtra. Miſſi enim ſunt propter eos qui hæreditabunt ſalutem, Deo nihil ex his quæ agimus ignorante: ſed infirmitate noſtrâ ad rogandum & promerendum ſpiritualis interceſſionis miniſterio indigente*. Ecce in aperto poſitum Danxi putidum mendacium. Non ab Angelicis hæreticis edocti, ſed ab antiquo Eccleſiæ uſu teſtantibus præcipuis Patribus, & infirmitatis noſtræ indigentia didicimus, invocare, obſecrare, & venerari & colere cultu eis proprio tanquam noſtros apud Deum Interceſſores Angelos, tanquam *Orationes deprecantium ad Deum deferentes* (inquit Hilarius). Quod ſi his ſe indigere Danæus non putat, abeat, & ſibi conſulat; Alia enim nos vocant.

CAPUT XXXVI.

De Apoſtolicis.

§. I.

Qui, quando fuerint, & in quo erraverint.

I. **A**poſtolicis (inquit S. Auguſtinus L. de Hæref. cap. 40.) qui ſe iſto nomine arrogantiffimè vocaverunt, ed quidd in ſuam communionem non recipere utentes conjugibus, & res proprias poſſidentes, quales habet Catholica (Eccleſia) & Monachos & Clericos plurimos. Sed idem iſti hæretici ſunt, quoniam ſe ab Eccleſia ſeparantes, nullam ſpem putant eos habere, qui utuntur his rebus, quibus ipſi carent. Encratitis iſti ſimiles ſunt: nam & Apotaſtica (ideſt Renuntiatores) appellantur. Sed & alia, neſcio quæ propria, hæretica docere perhibentur. Ita S. Auguſtinus.

S. Epiphanius verò Hæref. 61. de eis hæc habet: *Alii ſecundum illos dici ſe Apoſtolicos voluerunt, qui & Apotaſticos, hoc eſt*

Renuntiatores se ipsos nominant. Hoc enim diligenter observant, ne quidquam possideant. Idem porro à Tatiani dogmatibus, velut avulsione quoddam propagati, hoc est ab Encratitis, Tatianis, & Catharis, qui omnes præcipuè legem repudiant: habent illi diversa à nostris Sacramenta, & mysteria. De inopia rerum omnium gloriantur, ac Sacrosanctam Dei Ecclesiam ascititiis superstitionibus temerè dividunt, ac labefaciunt, & à Divina clementia excidunt. Neque enim eum qui semel prolapsus sit recipiunt amplius; atque eadem omnino de nuptiis, caterisque id genus cum superioribus illis sentiunt. Cumque Cathari receptis dumtaxat Scripturis adhaerescant, isti Andrea ac Thoma (ita enim vocant) Aëlis, potissimum nituntur, suntque ab Ecclesia Regula prorsus alieni.

II. Ex his colligitur primò, hanc Sectam fuisse ramum avulsam à Tatianis, Encratitis & Catharis. Dixi ramum avulsam, quia in aliquibus quidem cum illis conjungebatur, in aliquibus autem abscissà erat, ut indicant Augustinus, & Epiphanius supra relati: Quibus accedit Damascenus Hæres. 61. dicens: *Apostolici, qui & Apotactici idest Renuntiantes, in Pisidia dumtaxat eruperunt. Illos solos admittunt, qui se bonis abdicaverint. Encratitis affines sunt, etsi quædam alia ab illis præterea statuunt.* Ex Tatiano & Encratitis prodierit, scribit Timotheus Presbyter in Lib. de Recept. Hæretic. Tom. 3. Monum. Eccl. Græcæ, dum ait, Auctorem hæresis suæ habuisse unum è discipulis Justini Philosophi & Martyris, adjuncte illum post Sancti Justini martirium abscessisse ab Ecclesia, atque excogitasse hanc heresim. Certum autem est, ut supra dixi agens de Tatiano, eum iuisse S. Justini primò discipulum & eo mortuo factum apostatam & hæreticum. In eo tamen, quòd bonis omnibus renuntiandum esse dicebant, ideoque se Apotacticos vocitabant, à Tatiano recedebant, & specialem Sectam cudebant; cum hic error nec apud Tatianos, aut Encratistas, neque apud Catharos legatur.

III. Proinde quis ex præfatarum hæresum professoribus novum hunc & alios ut dicam errores addiderit, silentio premitur. Ab aliquo ex regione Phrygiæ, vel Ciliciæ, vel Pamphylia ortum habuisse, aut Pisidiæ, ex Epiphanio & Damasceno supra relatis colligi potest, cum in iis regionibus hanc heresim viguisse dicant. Dancus tamen Opusc. 40. putat ex Plinio, cœpisse hanc heresim in ea Pisidiæ parte quæ ad Homonadum gentem, & Pamphyliam pertinet, quæ latius propagata Pamphyliam, Ciliciam, & Phrygiam ipsam infecit. Homona autem seu Homonida ex Plinio, oppidum fuit Isauriæ in Pamphylia Selgæ finitimum. Populos Homonadenfes, vocat Baudrand in Lexico. Sed quidquid sit de loco unde

unde prius erupit, de sua ætate dicit Epiphanius Hæres. 61. n. 2. *Habitant illi in exigua quadam regione Phrygiæ, Ciliciæ, ac Pamphylia.*

IV. Circa tempus, quo emerfit, quidam eam putant Angelicis fuisse cœvam, unde Ricciolius p. 3. Chronol. Catal. 2. eam ad ann. 261. sexennio post Angelicos refert, ac de facto post istos eam ponunt SS. Augustinus Epiphanius & Damascenus. Verum quia, ut sæpè vidimus, præfati Patres non semper servant ordinem temporis, idèd alii antiquiorem eam faciunt. Apostolicos erupisse, Severi Imperatoris & Victoris Papæ temporibus anno 199., censet Prateolus. Danaus autem ejus ortum anno Christi 188. con- signat: ait enim (vaserrimè, ut mox videbimus), „Nec mirum
 „est, eosdem tam brevi tempore toties novis nominibus se vo-
 „casse, Tatianos, Encratitas, Apostolicos, quia cùm statim
 „priorum error deprehensus & ab Ecclesia damnatus esset, inter-
 „polandus & fucandus erat, quum iterum Ecclesiæ propinaretur.
 „Itaque nomina mutabant homines astuti & diabolici, uti nomi-
 „ne priori abdicatedo, aliud novum & plausibilius introducerent,
 „& quasi priori appellatione oblitteratâ, nullum errorem ipsi se-
 „qui vel reponere viderentur. Tenebras enim eâ ratione me-
 „lius simplicioribus hominum mentibus offendeant. „Hæc Da-
 „naus, artificiosè præludens ad ea, quæ infra dicturus erit, nempe
 „Apostolicorum errorem sub hoc specioso nomine transisse ad Mo-
 „nachos, & alios sub Papatu paupertatem & calibatum profitentes.
 „Cùm potius hoc sibi ac suis hanc artem applicare debuisset, qui ut
 „Lutherum & Calvinum jam damnatos declinent, speciosum no-
 „men *Evangelicorum* tibi allumfere, errorem tamen retinentes, ac
 „in dies augentes. Ad rem præsentem ergo. Si velimus, Aposto-
 „licos, ut ipse Epiphanius censet, à Catharis etiam aliquid acce-
 „pisse, oportebit eorum ortum post medium seculi tertii cum Ric-
 „ciolio differre.

V. De tempore, quo hæc Secta duravit, si Danaum audimus, durat adhuc in Monachis & aliis possessioni rerum & matrimonio renuntiantibus. At si veritatem ex Patribus hauriamus, Epipha- nii tempore adhuc durasse ex dictis apparet: cum enim dicat: *Habitant illi in exigua quadam regione Phrygiæ &c.* signum est suâ ætate adhuc extitisse, sicut etiam tempore S. Basilii Magni, ut apparet ex ejus Canone 1. & 47., ubi tradit, hujus hæresis sectato- res ad Ecclesiam venientes iterum baptizandos. At cùm in sexta Synodo in Trullo enumeratis hæreticis, quorum baptisma non est admittendum, Apostolici seu Apotaetici omittantur, eos jam de- fuisse conjici potest, quamvis dici possit, cum Eustathianis, & Acria-

Aerianis progressu temporis confusos mutato nomine adhuc perstitisse, & in Synodo Gangrensi sub Sylvestro Papa damnatos fuisse. Sed de hoc loquendi occasionem infra nobis dabit Danæus.

VI. Apostolici, ut ex Epiphanio dixi, cum essent proles à Tatianis, Encratitis, & Catharis avulsa, aliquos errores ab istis haustos profitebantur, & suum etiam proprium habebant. Cum Catharis lapsos recipiendi potestatem Ecclesiæ denegabant. Cum Tatiano & Encratitis Legem repudiabant, utpote à Deo malo latam: matrimonia pro illicitis habebant, & utentes conjugis in suam communionem non admittebant. Sacramenta & mysteria diversa & diverso modo ac Ecclesia Catholica celebrabant. Addit Epiphanius, in hoc à Catharis recessisse, quod cum Cathari receptis dumtaxat Scripturis adhaerescant; isti *Andrea & Thoma* (ita enim vocant) *Actis potissimum utantur, suntque ab Ecclesia regula prorsus alieni*. In quo Encratitas sequebantur, de quibus in Hæres. 47. num. 1. idem Epiphanius ait: *Inter primarias Scripturas habent Andrea ac Joannis Acta, necnon Thoma & apocryphos alios*.

VII. Hunc veluti errorem merito rejicit Epiphanius. Quare Philaster Hæres. 88. inter hæreses numerat etiam eam quæ apocrypha idest secreta dicitur, & cui ex hæreticis multi subscribunt; qui cum relictis Scripturis Canonicis volunt solum illa apocrypha legere, studiosè contraria Canonicis Scripturis sentiunt, & paulatim dogmatizantes contra eas & Apostolicas dispositiones sentiunt. Inter istos refert Manicheos, Gnosticos, Nicolaitas & alios quamplures; & de Actis Andrea, quæ scilicet fecit veniens de Ponto in Græciam, multa prodigiosa jactabant Manichei, quæ discipulos Apostolum sequentes conscripsisse perhibebant. De ejusmodi Actis meminit S. Augustinus L. 1. contra Adv. Legis & Prophet. c. 20., & L. de Fide contra Manicheos qui Evodio tribuitur cap. 38. Sed cum hæc Acta auctorem habuisse dicat Leucium sectam Manicheum; diversa fuere ab illis, quibus Encratitæ & Apostolici utebantur. Cum enim Encratitæ integro ferè seculo sectam Manicheorum præcesserint, non poterant habere Acta à Manicheo postea conficta. Potius ergo erant illa Andrea Acta, quæ Innocentius I. in Epist. ad Exuperium scribit fuisse à Nexocharida & Leopide Philosophis conficta, de quibus supra memini Tom. 5. cap. 3. §. 2. num. 8.

De Actis Thomæ eadem occurrit difficultas, cum eadem S. Augustinus in Lib. contra Adimantium supponat à Leucio Manichæo composita, ideòque Encratitarum ævo nondum fuerant in lucem edita. Ex his aliqua retuli Tom. 5. c. 6. §. 2. n. 5.

VIII. Cujuscumque auctoris fuerint Acta Andrea & Thomæ, qui-

quibus Apostolici nitebantur, nullius auctoritatis erant; sed pernicioſa, vel ſaltem apocrypha. Sicut & alia ſub nomine Apoſtolorum ſuppoſita, de quibus egi Tom. 1. Tract. de Libris Relig. Chriſt. c. 5. ſ. 3. Unde Euſebius L. 3. Hiſt. c. 25. de Actis Andreæ, Thomæ, Joannis, & aliorum Apoſtolorum nomina præferentibus, ait: *Quos quidem Libros nullus unquam, qui continuatâ ab Apoſtoliſ ſucceſſione in Eccleſia docuit, in ſcriptis ſuis commemorare dignatus eſt. Sed & ipſam dicendi genus longè ab Apoſtolica ſimplicitate diſcrepat. Senſus quoquè ipſe, & qua ibidem traditur fides, cum à vera & Catholica doctrina plurimum quantam aberret, hæc Hæreticorum hominum figmenta eſſe manifeſtè coarguit. Quo circa ne quidem inter ſpurios collocandi ſunt hi libri, ſed tanquam abſurdi & impii prorsus repudiandi.* Ita Euſebius. Quare Gelafius I. in Canone Romano anno 494. omnes ad apocrypha amandavit.

§. II.

Monachatus deſenſio.

I. **P**Ræter ſupradictos ab anterioribus hæreticis hauſtos errores, quos ſuis in locis rejeci, duos alios ſpecialiter profitebantur, quibus à cæteris diſcerni volebant. Unus erat, quòd omnes illius Sæctæ continentiam à nuptiis profiteri tenebantur: alter quòd omnium bonorum poſſeſſionem abdicabant. Quæ duo adèd neceſſaria ad ſalutem eſſe prædicabant, ut qui ea non obſervarent, omni ſalutis ſpe eſſent deſtituti, & quaſi anathema ab eorum cœtibus excluderentur: propterea ſe Apotaſticos, ideſt Renunciatores vocitantes.

Lambertus Daneus, cujus ſtudium eſt omnia undique expiſcari, ut Eccleſiam Catholicam Romanam calumniis oneret ac impoſturis, non veretur afferere, præfatos duos errores apud nos adhuc fructificare mutatis nominibus in Monachis, & aliis à conjugio, & temporalium poſſeſſione ſe abdicantibus. Ejus verba, ſeu veriùs mendaces impoſturas, quas Opuſc. 40. evomit, referam. Poſtquam enim dixit, Apoſtolicorum hæreſim in Tatianis & Encratitis radices ſuas egiſſe, addit multos poſtea palmites produxiſſe, Quotquot enim ſunt cælibum Monachorum in Papatu „ genera, tot ſunt hujus hæreſeos adhuc furculi & propagines „ aſtu Satane interpolatæ & transplantatæ mutatis nominibus. „ Hæc enim hæreſis univerſi Monachiſmi; in primis autem Fra- „ trum, qui dicuntur Mendicantium, fundamentum eſt. Hi præ- „ cipuè hæc tria tanquam omninò neceſſaria volunt, nempe pau-
 perta-

„pertatem, continentiam, & ut nihil proprium possideant, cælibatum, & obedientiam, ut docet Thomas Aquinas in 2. 2.

„Nec mirum est, Monachos ex hæreseon colluvie sua vota & regulas confarcinasse, quando gravis auctor & Orthodoxus Theodorus Cypri Episcopus Lib. 1. c. 9. Historiæ scribit, eos quædam ex Judæorum & Samaritanorum deliriis ad se transfuisse, quæ eam hodie religiosè ne dicam superstitiosè observant. In primis autem Apostolicorum hæreticorum fascino hac nostrâ ætate & velut extremâ mundi senectâ illecti videntur Jesuitæ Monachi, quos ad vivum nobis hodie referunt & repræsentant. Quod si Isidoro credimus, secuti sunt hi Angelicos hæreticos.

Et infra postquam dixit, quod Apostolicorum hæresis Pamphylia, Cylicia & Phrygia infecit, subdit, Denique universum terrarum Orbem, ut in Papatu videmus. Ita verò paulatim hoc venenum invaluit, & unâ cum ætate accrevit, ut Gangrensi Synodo (est autem Gangra Paphlagoniæ civitas) circa Nicenæ Synodi tempora reprobari, damnarique oportuerit, sed tamen propterea non fuit extinctum. Nam & à Monachis Cellulariis retentum est, & falso nomine hodie à Fratribus Mendicantibus omninò recoctum apponitur & laudatur. Apostolicos suo seculo vocatos esse, scribit Bernardus in Cantica Cantic. Serm. 66. hæreticos, qui erant Donatistis similes, & nullam Ecclesiam Apostolicam agnoscebant, ubi non esset vita Apostolica. Hisce encomiis Monachatum celebrat Acatolicus iste.

II. At deploranda perditionis hominis cæcitas! Præmittit ipse verba S. Augustini, qui Apostolicos à Monachis secernit, illos hæreticos declarat & damnat, istos verò laudat & Catholicos pronuntiat, & discriminis causam assignat: ipse autem vel non attendens, vel attendere nolens, utrosque confundit. Iterum ergo legat, & si vult percipiat: *Apostolici*, inquit Augustinus, *qui se isto nomine arrogantissime vocaverunt, eod quod in suam communionem non recipiunt utentes conjugibus, & res proprias possidentes, quales habet Catholica Ecclesia Monachos & Clericos plurimos. Sed ideo illi hæretici sunt, quoniam se ab Ecclesia separantes, nullam spem putant eos habere qui utuntur his rebus, quibus isti carent.* Admittit ergo S. Doctor in Ecclesia Catholica Monachos & Clericos plurimos conjugii non utentes, & res proprias non possidentes, sed istos ab Apostolicis hæreticis distinguit, quia nec propterea ut illi ab Ecclesia se separant, nec spem salutis adimunt eis qui utuntur rebus quibus ipsi carent. Dicat ergo mihi Danæus: Monachi & Men-

Mendicantes quibus hodie Ecclesia abundat, propterea-ne separant se ab Ecclesia, & spem salutis adimunt iis qui in conjugio vivunt, & divitias possident? Puto, hoc dicere non audebit. Quâ fronte ergo eos cum hæreticis Apostolicis audet confundere, quos Augustinus sæcernit, & antiqua Ecclesia tanquam Catholicos admittebat? Dicam ego, & verè: Apostolici hæretici erant, quia ipsi conjugio & rerum possessioni renuntiantes, cæteros eis utentes blasphemabant, & ab Ecclesia ideò se separarunt. Ergo ab opposito hæretici etiam erunt illi, qui usum conjugii & rerum proprietatem omnibus volentes, eis, qui talibus rebus spontè propter Deum renuntiant, maledicunt, & Ecclesiam deserunt. Tales sunt Danæus & cæteri moderni Reformati; ergo ipsi sunt hæretici, errori Apostolicorum oppositum errorem tenentes.

III. Audiant ergo Danæus & suæ Sectæ additi Epiphanium, qui Apostolicorum errori Catholicam Ecclesiæ doctrinam contraponens, ait: *Habet quidem renuntiationem Ecclesia; sed non ideò detestandas nuptias existimat. Habet bonorum omnium inopiam; sed non adversus illos insolenter effertur, qui ea justè possident à parentibus accepta, quibus tam sibi quàm aliis indigentibus subveniant. Ad hæc à ciborum usu temperant multi, sed non contra eos, qui illis utuntur, superbè se gerunt.* „ Qui enim manducat, non manducantem non contemnat: & qui non manducat, manducantem „ non judicet. Christo enim manducat & bibit „ (Rom. 14. v. 3.) *„ Jamne vides (Danæ) eandem in Ecclesia concordiam, eandemque spem ac fidem, quæ unicuique secundum propriam vim, propriumque laboris certamen gratificare studet?*

Indè adducens pulchram similitudinem: *Etenim, inquit, Sancta Dei Ecclesia navì cuidam similis est. Navis porro non ex unica tabula, sed ex diversis coagmentatur. Habet enim ex uno quidem ligno carinam, sed non uno ac simplici modo: anchora deinde alterius generis sunt. Tum peritonea, tabulata, statumina, ac puppis laterum transtrorumque partes, vela, remones, phalangas, manubria, clavos, ac reliqua omnia vario ex materia genere coagmentantur. At unaquæque istarum Hæreseon unico ligno constans, Ecclesiæ notam ac characterem præ se non habet. Quid ad hæc Danæ, placet ne ista similitudo?* Audi quæ sequuntur.

Contra, Dei Ecclesiæ honestas nuptias admittit, ac veneratione prosequitur. Honestæ enim nuptiæ sunt & torus immaculatus „ (Hebr. 13. v. 4). Habet & continentiam, & quidem singularem, eamque commendat, utpotè quæ certamen quoddam suscipit, vitamque ipsam quasi potentior despicit. Nec minùs virginitatem habet, eamque magnopere prædicat, quasi cum virtute conjunctam, levissi-

inque pennâ pradiam. Nec ei defunt certi homines qui mundo renuntiarent: nec adversus eos qui adhuc in mundo versantur, arroganter insolefcunt, sed in ipsis delectantur. Quales olim Apostoli fuerunt, omnium scilicet rerum possessione vacui. Imò & Salvator ipse Dominus omnium, cum in hac carne viveret, nihil ex hisce terrenis rebus possidere voluit. Neque tamen idcirco mulieres illas rejicere voluit, quæ sibi ac suis Apostolis ministrarent. Ita enim scriptum est: „ Quæ quidem secutæ fuerunt illum à Galilæa, ministrantes ipsi „ & iis, qui cum eo erant, de suis facultatibus, (Lucæ 8. v. 3.). Hoc exemplar tenet Ecclesia Catholica Romana. Habet continentes à nuptiis, sed qui nuptiis vacantes non contemnunt: habet & nuptos, sed qui à nuptiis abstinentes non aspernantur. Habet omnibus terrenis renuntiantes, habet & terrena possidentes, qui tamen non se mutuò contumeliis afficiunt, sed mutuò se se invicem juvant, dum uni spiritualia, alteri temporalia ministrant. Ita ex multis lignis, quæ tibi mirâ unione consentiunt, non ex uno tantum ligno Ecclesiæ Catholicæ navis compacta est.

IV. Modò Danaus, qui Ecclesiam suam ex uno tantum ligno, idest ex solis conjugatis & possidentibus constare vult, refutandus est; quod facili negotio præstabo ejus calumnias dissipando. Et quòd Monachi & Mendicantes Religiosi non sint rami ex Apostolicorum hæresi, sed ex doctrina & tacto Christi fructificantes, ex hæcenus dictis manifestè apparet. Quòd si Danaus vult scire originem Ordinum Mendicantium, eam discat à Sancto Thoma, quem ipse citat, audietque dicentem in 2. 2. q. 188. art. 7. in corp. eam mansisse à Christo, & à primis ejus discipulis religiosè servatam: quod repetit etiam in Caput 16. 1. ad Cor. Lect. 1. Et certè si Danaus ad Evangelia, & Acta Apostolorum, necnon ad Epistolas Pauli attendere voluisset, coactus fuisset asserere, nec Christum nec Apostolos nec primos eorum discipulos bona temporalia possedisse; quin si qui possidebant, ea vendentes, eorum pretium ad pedes eorum detulisse, ut particularibus cujusque indigentis communi subsidio subveniri posset. Hoc vitæ institutum profitentur Monachi & Mendicantes. Quid ergò contra eos blaterat Danaus?

V. Dicit, Theodoritum Lib. 1. Hist. cap. 9. referre, Monachos quædam ex Judeorum & Samaritanorum deliriis ad se transfuisse; quæ etiam hodie (addit ipse) supersticiosè observantur. At si Danaus Theodoritum legisset, ab hoc objecto abstinuisset. Quinam ergo erant illi Monachi? Erant sequaces Melitii seu Meletii ejusdem in Thebaide urbis Episcopi Arianismo & aliis criminibus infecti, ac proinde jurisdictione privati. Non mirum ergo si
Mo-

Monachie ejus reliquæ nec sanam doctrinam fidei haberent, nec à Samaritanorum & Judæorum quibusdam superstitiosis ritibus recederent. At quâ conscientia ex aliquorum Monachorum damnabili vita & moribus, audet Danaus totum ordinem Monasticum damnare? Si ita est, omnem cœtum Episcoporum, Apostolorum imò & Angelorum, damnare oportebit, cum nullus sit cœtus, ex quo aliquis proditor, vel desertor non eruperit. Legat Theodoritum L. 4. Hist. c. 28., ubi plures Monachos laudibus celebrat, & L. 5. Divin. Decret. Epitome c. de Abstinencia, ubi ait: *Porro autem vita Monastica non est ex necessitate, sed libera animi voluntate suscepta. Et hoc ex Apostolicis legibus didicimus.* Et postquam hoc pluribus Scripturæ locis probavit, concludit: *Encratarum ergo, seu Abstinencium errorem Divina etiam decreta pulchrè convincunt. Dei autem Ecclesia adversatur quidem fabulis Hæreticorum: Divina verò decreta sequitur.* En Theodoritum in Encratitis Apostolicos hæreticos damnantem, Monasticam verò vitam ut Dei decretis conformem laudantem. Quid ad hæc Danaus?

VI. Minus autem ei prodest Synodus Gangrensis, quam si legisset, certè in sui præsidium non attulisset. Synodus ergo illa cui 17. Episcopi interfuerunt, coacta præcipuè fuit anno 325. contra Eustathium Sebastenum Episcopum, qui inter alios errores, ut declarat Epistola Synodica, accusabat nuptias, & docebat, quòd nullus in conjugali positus gradu spem habeat apud Deum: & divites fideles, qui non renuntiant omnibus quæ possident, nec ipsi apud Deum spem ullam habeant; ut docebant Apostolici hæretici. Quæ illius Synodi Patres sub anathemate reprobarunt. At non reprobarunt voluntariam continentiam, & voluntariam abdicationem bonorum majoris perfectionis gratiâ in iis, qui à spe salutis nec conjugatos nec divites excludunt. Imò maxime commendant, subiungunt enim: *Hæc autem scripsimus, non qui in Ecclesia Dei secundum Scripturas sanctum propositum continentia eligunt vituperantur: sed eos, qui abutuntur proposito in superbiam, & extolluntur adversus simplices, abscindimus; & damnamus eos, qui adversum Scripturas & Ecclesiasticas regulas nova introducunt præcepta.* Nos autem & virginitatem cum humilitate admiramur, & continentiam, quæ cum castitate & religione suscipitur, approbamus, & renuntiationem secularium negotiorum cum humilitate recipimus: & nuptiarum castum vinculum honoramus, & divitias cum iustitia & operibus bonis non spernimus. Hæc Patres Gangrenses. Eadem, apud Ecclesiam Catholicam semper professi sunt & modo etiam profitentur. Nuptiis & temporalibus bonis spoliati in humilitate vivunt, nec tamen conjugio utentes & divitias possidentes sper-

nunt, aut condemnant, sed eis tanquam fratribus in spiritualibus inferviunt. Tales apud nos sunt Monachi & Mendicantes, qui nuptiis & bonis temporalibus renuntiarunt. Melius ergo Danæo fuisset, si à Synodo Gangrensi suæ miseræ causæ patrocinium non implorasset. Sed hæc est hostium veritatis non infrequens fors, ut arma, quæ ad eam impugnandam assument, in ipsos retorquantur.

VII. Minus Danæum juvant quæ ex S. Bernardo Serm. 66. in Cantic. adducit. Quomodo enim Bernardus qui Monachi institutum amplexus nuptiis ac bonis terrenis renuntiaverat propter Christum, talia facientes damnare poterat? Loquitur ergo de quibusdam suæ vel anterioris ætatis hæreticis, qui abstinentium à nuptiis, à certis cibis, & alia contra ea quæ scripta sunt tanquam necessaria & ab Apostolis instituta prædicabant; ideòque se Apostolicos (verius Apostaticos) vocitantes. Ita eos S. Bernardus describit: *Nempe jactant se esse successores Apostolorum, & Apostolicos nominant: nullum tamen apostolatus sui signum ostendunt.* Hæc autem non nostris Monachis & Mendicantibus, sed Luthero, Calvino, & aliis ad literam applicanda sunt, qui se Evangelicos, & Reformatores Ecclesiæ, ac verè Apostolicos dictitarunt, & adhuc dictitant: cum tamen apostolatus sui & missionis ad tam grande opus signum nullum ostendant, ut dixi in Vera Eccl. Tom. 1. c. 2. §. 3. Solùm enim ostendere possunt, Lutherus defectionem suam à Monachatu, & apostasiam ab Ecclesia, in quo alii sui gregales eum sequuti sunt. Unde Lutherus, ut suæ à Monachatu defectionis speciosum titulum afferret, in Monachatum invehere cœpit, quẽ alii ejusdem furfuris, & modò Danæus, imitati sunt. E contra verò S. Bernardus vitam Monasticam summis laudibus effert, ut ejus Opera evidenter legenti manifestant; loca enim huc adducere non vacat. Sed de hoc inferius repetam cap. 92.

§. III.

Rerum temporalium possessio Christianis non vetita.

I. **N**unc ad Apostolicos revertor. Eorum error contra nuptias, cum superius refutatus sit, tum c. 22. §. 3. in Tatianis tum c. 33. in Valestis §. 2. & 3., ubi alia Danæi mendacia rejeci, ideò hic omittitur. Alter verò eorum proprius, quo scilicet bona temporalia possidentibus omnem spem salutis denegabant, hic examinandus erit & reprobandus.

II. Hunc errorem putabant Apostolici se hausisse à Christo, qui

qui Lucæ 14. v. 33. dixit: *Qui non renuntiaverit omnibus quæ possidet, non potest meus esse discipulus*. Et Matth. 19. v. 24. *Facilius est camelum per foramen acus transire, quàm divitem intrare in Regnum Cælorum*; quæ repetit apud Marcum c. 10. v. 25. Hæc doctrinâ ab Apostolis imbuti primi fideles omnibus quæ possidebant renuntiabant, ut legitur Act. 2. v. 44. *Omnes etiam qui credebant, erant pariter & habebant omnia communia, possessiones & substantias vendebant, & dividebant illa omnibus prout cuique opus erat*. Et cap. 3. v. 34. *Quotquot enim possessores agrorum, aut domorum erant, vendentes afferebant pretia eorum quæ vendebant & ponebant ante pedes Apostolorum; dividebatur autem singulis prout cuique opus erat*. Ioseph autem qui cognominatus est Barnabas ab Apostolis (quod est interpretatum filius consolationis) Levites, & Cyprius genere, cum haberet agrum, vendidit eum, & attulit pretium, & posuit ante pedes Apostolorum. Ab opposito autem: cum, ut legitur c. 4., Ananias quidam & Sapphira uxor ejus vendidissent agrum & solam partem pretii posuissent ad pedes Apostolorum, aliâ secretò retentâ, à Petro de hac fraude à Deo monito increpiti, ad pedes ejus mortui ambo corruerunt. Quo facto apparet, bonorum omnium renuntiationem eis, qui volunt ejus sequaces fieri, esse rigoroſè præceptam, dum tantâ ultione punit eos, qui eam exactè non implent.

III. Afferebant insuper aliud Christi dictum Matth. 10. v. 9. ubi mittens discipulos ad Evangelizandum, eis dixit: *Nolite possidere aurum, neque argentum, neque pecuniam in zonis vestris: non peram in via, neque duas tunicas, neque virgam*. Ex quibus Wiclefius interebat, Ecclesiasticis eisque, qui Apostolis in munere Evangelico succedere, interdictam esse bonorum temporalium possessionem. Et maximè quia Christus ibidem v. 24. subjicit: *Non est discipulus super magistrum, nec servus super dominum suum: sufficit discipulo, ut sit sicut magister ejus, & servus sicut dominus ejus*. Cum ergo Christus Magister optimus & Dominus omnium, cujus viri Evangelici sunt discipuli, & Prælati Ecclesiastici, imò Christiani omnes servi, nihil in hoc Mundo temporalium possederit, ne sint ipso majores, nihil prorsus hujus Mundi possidere debent.

IV. Addebant insuper, in Veteri Lege Sacerdotes & Levitæ exclusos fuisse à portione hæreditatis, quæ universo populo dividenda erat post ingressum in Terram promissionis, ut habetur Numer. 18. ubi Sacerdotes & Levitæ de solis primitiis & oblationibus vivere subentur, unde v. 20. legitur: *Dixitque Dominus ad Aaron. In terra eorum nihil possidebitis, nec habebitis partem inter eos: ego pars & hæreditas tua in medio filiorum Israel. Filiis autem Levi*

Levi dedi omnes decimas Israelis in possessionem pro ministerio, quo serviunt mihi in Tabernaculo fœderis. Quod repetitur in Deuteronomio c. 18. v. 1. Non habebunt Sacerdotes & Levitæ, & omnes qui de eadem Tribu sunt, partem & hereditatem cum reliquo Israel, quia sacrificia Domini, & oblationes ejus comedent. Et nihil aliud accipient de possessione fratrum suorum: Dominus enim est hereditas eorum, sicut locutus est illis. Si ergo Sacerdotes & Levitæ ob eorum sacrum ministerium nihil proprium habere poterant; sed de oblatis, decimis, ac primitiis unice vivere debebant: quanto magis Sacerdotes & Ministri Ecclesiæ Christi, quorum figura tantum & umbra erant Ministri Veteris Legis, debebunt ab omnibus terrenis abstracti suo vacare ministerio? Quod indicavit Christus ipse Matth. 10., ubi postquam injunxit, ne aurum, aut argentum possiderent, subjunxit: Dignus est enim operarius cibo suo, volens, ut de sibi dietim oblati viverent. Quod ab Apostolis fuisse impletum, Acta & Epistolæ Apostolicæ clarè demonstrant. Hæc erant Apostolicorum, & postea Wicleffitarum præcipua fundamenta: quibus sigillatim respondendum erit.

V. Ad id ergo quod primo loco assertur dico, Christum illis à Lucæ allatis verbis non exigere à suis discipulis realem omnibus quæ possident renuntiationem, sed nimum erga ea amorem, quo propterea quæ ad Deum & salutem pertinent, non curent. Ea enim dixit occasione parabola, quam præmiserat de cœna, ad quam ex invitatis accedere recusarunt excusantes se; unus quòd villam, alter quòd juga boum emit, & alius quòd uxorem duxit. Sicut ergo non propter hoc voluit, ut qui haberent uxorem ei renuntiarent, sed ne amore uxoris detenti vocationem ad cœnam idest ad Regnum Dei respuerent, aut negligerent: ita nec voluit, ut temporalia bona ea in re abdicarent, sed ne propter illorum inordinatum amorem ea, quæ ad salutem & Regnum Dei necessaria sunt, omitterent. Ita exponit S. Ambrosius in c. 14. Lucæ. Et eadem ratione quando ibidem v. 26. dixit: *Si quis venit ad me & non odit patrem suum & matrem & uxorem & filios & fratres & sorores, adhuc autem & animam suam, non potest meus esse discipulus*: non voluit, omnia præfata esse odio habenda, & in re dimittenda; sed solum casu quo ista dilectioni Dei obstarent; cum magis quàm omnia præfata diligendus sit Deus: ideoque apud Matthæum c. 10. v. 37. legitur Christum dixisse: *Qui amat patrem aut matrem plus quàm me, non est me dignus, & qui amat filium aut filiam super me, non est me dignus*. Vult ergo, ut amor terrenorum non anteponatur amorì Cœlestium, nec plus temporalia ista diligantur, quàm ipse Deus.

VI. Omnia hæc confirmat S. Augustinus Ep. 89. modò 157. ad Hilarium, ubi ad illa Christi verba: *Qui non renuntiat omnibus quæ possidet, non potest meus esse discipulus*, ait: *Profectò renuntiat etiam divitiis suis, si quas habet: aut sicut omninò non diligens, totas distribuat indigentibus, & superfluis exoneretur sarcinis: aut sic, ut plus diligens Christum, spem ab eis transferat in ipsum, atque ita utatur illis, ut faciliè tribuens & communicans thesaurizet in Cælo; paratusque sit, quemadmodum parentes & filios & fratres & uxorem, hoc modo & istas relinquere, si talis conditio propòsita fuerit, ut nisi dimisso Christo, eas habere non possit. Iude de aliis contrarium facientibus subdit: Et multi sunt tales, qui etiam putant, sibi ad augendas opes suas, & multiplicanda delectamenta terrena, religionem debere suffragari Christianam. Sed non sunt tales divites Christiani, qui licet ista teneant, non tamen ab eis ita teneantur ut hæc Christo autepouant, quia veraci corde seculo renuntiaverunt, ut nullam spem in talibus ponant. Et post aliqua: Nec tamen, inquit, quia præceptum est eis, ut oderint pro Christo & animas suas, vendendas eas habent, aut illatis sibi manibus effundendas: sed parati sunt eas amittere pro Christi nomine moriendo, ne mortui vivant Christum negando. Sic etiam divitias, ad quas vendendas parati non fuerunt manente Christo, ad perdendas eas debent parati esse pro Christo, ne cum eis pereant perditò Christo. Deinde sic profequitur: Quibus autem non provenit corona martyrii, neque illius perfectionis de vendendis rebus suis complium tam grande, tamque præclarum receperunt, & tamen à damnabilibus immunes criminibus esurientem Christum paverunt, sitienti potum dederunt, nudum vestierunt, peregrinantem susceperunt, non sedebunt quidem cum Christo sublimiter iudicaturi: sed ad ipsius dexteram stabunt misericorditer iudicandi. Ex his S. Augustini verbis apparet, Christianum licet divitias possidentem aptum esse Regno Regnorum, dummodo paratus sit pro Christo, si oportuerit, eas sicut etiam vitam relinquere, vel eis utatur ad pauperum sublevamen.*

VII. Sed quia divitiarum amor inordinatus aded in multis prævalet, ut ipsi potius quàm Deo serviant, & ad eas comparandas & augendas Legem ejus contemnant; propterea dicit Christus: *Facilius est camelum per foramen acus transire, quàm divitem intrare in Regnum Cælorum*. Non quia impossibile sit divitem in Regnum Cælorum intrare, ut putabant Discipuli dicentes: *Quis ergo poterit salvus esse?* sed quia homo suis cupiditatibus serviens, ac viribus suis confidens, hoc sibi impossibile facit. Unde Christus respondit: *Apud homines hoc impossibile est, apud Deum omnia possible sunt*. Hinc S. Augustinus citatâ Epistolâ: *Audiant, inquit,*

divites „ Quod hominibus impossibile est, Deo facile est „ & sive manentes in divitiis suis, atque ex eis bona opera facientes, sive illis venditis, & per indigentias pauperum distributis, intrent in Regnum Cœlorum, gratia Dei tribuant, non propriis viribus bonum suum. Nimia enim cupiditas est, quæ divites à Regno Cœlorum excludit, non divitiæ, quam cum homo viribus suis vincere non possit, ideo homini est impossibile, non Deo. Propterea idem S. Doctor attendens, quod Apostolus 1. Timoth. 6. v. 17. non excludit à Regno Cœlorum divites, sed solum modum præscribit, quo illud consequi valeant, dicens: Divitibus hujus seculi præcipe, non superbè sapere, neque sperare in incerto divitiarum, sed in Deo vivo (qui præstat nobis omnia abundè ad fruendum) bene agere, divites fieri in bonis operibus, faciliè tribuere, communicare, thesaurizare sibi fundamentum bonum in futurum, ut apprehendant veram vitam. Hæc, inquam, attendens S. August. Epist. citatâ: Puto, inquit, quod ista præcipient, divites instruebat, non fallebat Apostolus: qui non ait: Præcipe divitibus hujus Mundi, ut veniant omnia quæ habent, deus pauperibus, & sequantur Dominum, sed „ non superbè sapere, neque sperare in incerto divitiarum „. Ista superbia divitem illum, qui jacentem ante januam suam contemnebat pauperem justum, & ista spes in incerto divitiarum, quâ se propter purpuram, byssum, & epulas splendidas beatum putabat, non ipsæ divitiæ perduxerunt ad inferni tormenta.

VIII. Igitur à Regno Cœlorum excludunt, non divitiæ, sed superbia, spes in illis & earum inordinatus amor. Hoc & ipsi Apostoli attenderunt, cum dixerunt *Quisnam poterit salvari?* ait idem Augustinus in Psalm. 51. scilicet: *Non facultates, sed cupiditates. Viderunt enim etiam ipsos pauperes, etsi non habentes pecuniam, tamen habere avaritiam; & ut noveritis, non pecuniam in divite, sed avaritiam condemnari, advertite quod dico. Respicis illum divitem stantem juxta te, & fortè in illo est pecunia, & non est avaritia: in te non est pecunia, & est avaritia.* Inde loquens de mendico Lazaro ab Angelis sublato, ait: *Quid sublatus est?* In sinum Abraham. Lege Scripturas, & invenies divitem Abraham. ut noveris, quia non divitiæ culpantur: habebat Abraham multum auri, argenti, pecorum, familia, dives erat, & in ejus sinum Lazarus pauper sublatus est: In sinum divitis pauper: an potius ambo Deo divites, ambo à cupiditate pauperes? Inde transiens ad Doech, ait: *Quid ergo in hoc Doech culpatur Scriptura?* non dixit, *Ecce homo qui fuit dives; sed „ Ecce homo qui non posuit Deum adiutorem suum, sed speravit in multitudine divitiarum suarum „. Non quia habuit divitias, sed quia in ipsis speravit, & in Deo non speravit,*

est, ided damnatur, ided punitur, ided movetur de tabernaculo &c.

IX. Sed inquis. Si dives Legem observans aptus est Regno Dei, cur Christus juvenem illum, qui à sua juventute mandata Dei se custodisse testatus fuerat, ob hoc solum quod vendere omnia bona sua & dare pauperibus, non invenit paratum, tristem abire permisit; addens facilius transire per foramen acus camelum quam divitem intrare in Regnum Cœlorum?

Respondeo primò, Christum juvenem illum abire permisisse, non quia dives esset, sed quia nimio divitiarum amore detentus erat, aded ut eas Christo & vitæ æternæ præferret. Ita S. Augustinus Tract. 34. in Joann. *Tristis abscessit, & non est secutus: quæsit Magistram bonum, interpellavit Doctorem, & contempsit docentem: tristis abscessit, ligatus cupiditatibus suis: tristis abscessit habens grandem sarcinam avaritiæ super humeros suos* (cui accedit Chrysostomus Hom. 63. aliàs 64. in Matth.) unde quia eam noluit deponere, tanquam ineptum Regno Dei, nec illum sequi paratum, abire permisit. Avari enim à Paulo 1. Cor. 6. v. 10. annumerantur iis, qui Regnum Dei non possidebunt.

X. Respondeo secundò, Juvenem illum interrogatum à Christo de observantia præceptorum substantialium Legis, sinè quibus nemo potest ad vitam ingredi, non solum se paratum exhibuit; sed respondit: *Omnia hæc custodivi à juventute mea; & quæsit, quid adhuc mihi deest?* Cum verò Christus ei reponeret, *Si vis perfectus esse, vade & vende quæ habes, & da pauperibus, & habebis thesaurum in Cælo.* His auditis abiit tristis; quibus solum se imparatum ostendit ad ea, quæ in Lege Christi statum perfectionis constituunt, non ad ea quæ substantiam tangunt. Ita S. Augustinus Epist. 157. aliàs 91. sæpè citatâ, ubi ad quosdam qui putabant, vendere omnia, eaque dare pauperibus, esse præceptum novum Legis Evangelicæ hæc dicit: *Cui enim Dominus hoc præcepit? Profectò illi diviti, qui vita æternæ consequendæ consilium quærebat accipere. Hoc enim Domino dixerat, Quid faciam, ut vitam æternam consequar,?* Ille autem non ei respondit, *si vis venire ad vitam vade, vende omnia quæ habes, sed, Si vis venire ad vitam, serva mandata.* Quæ juvenis, cum sibi à Domino & Lege commemoratâ se servasse dixisset, & quæsisset, quid adhuc sibi deesset, responsus accepit, *Si vis perfectus esse, vade, vende omnia quæ habes & da pauperibus.* Et ne illa quæ multum amabat, hoc modo perdere existimaret, *Et habebis, inquit, thesaurum in Cœlis.* Deinde addidit, *Et veni, sequere me:* Ne cuiquam, cum hæc fecerit, aliquid prodesse existimetur, si non sequitur Christum. At ille quidem tristis abscessit, qui viderit, quemadmodum illa Legis

mandata servaverat, puto enim, quod se arrogantius potius quam veriùs servasse responderat. Veruntamen Magister bonus mandata Legis ab ista excellentiore perfectione distinxit. Ibi enim dixit, Si vis venire ad vitam, serva mandata, : Hac autem, Si vis perfectus esse, vade, vende omnia quæ habes &c., Cur ergo negamus divites, quamvis ab illa perfectione absint, venire tamen ad vitam, si mandata servaverint, & dederint, ut detur illis, & dimiserint, ut dimittatur illis? Hactenus S. Augustinus.

XI. Quod verò in Actibus Apost. dicitur, primitivos illos fideles vendidisse omnia bona sua, & pretium ad pedes Apostolorum posuisse, studio majoris perfectionis, & consilio Apostolorum, non præcepto Christi hoc faciebant, ut liberati à sarcinis negotiorum secularium levibus humeris sequerentur Christum ex August. Serm. 252. (aliàs 5. de Diversis) c. 3. Alia etiam ratio Apostolis fuit, hunc vivendi modum fidelibus in Jerusalem degentibus instituendi (inquit S. Th. 3. contra Gen. c. 135.) *Qui prævidebant per Spiritum Sanctum, quod non diù in Jerusalem simul commorari deberent: tum propter persecutiones & injurias eis inferendas à Judæis: tum etiam propter instantem destructionem Civitatis & Gentis. Unde non fuit necessarium, nisi ad modicum tempus fidelibus providere: & propter hoc transientes ad Gentes, in quibus firmanda & perduratura erat Ecclesia, hunc modum vivendi non leguntur instituisse.* Ita S. Th.

XII. Nec obstat, quòd Ananias & Saphira, quòd partem prædii venditi retinuerint, morte ob id puniti fuerint; hoc enim fuit, quia cum totum prædii pretium Deo jam consecrassent, per fraudem postea partem ejus sibi occultaverunt: ideoque Petrus Act. 5. v. 4. *Non es mentitus, inquit, hominibus, sed Deo. Quare S. Jo. Chrysost. Homil. 12. in Acta Ananiam increpans: Vide, inquit, hoc in crimen vocari, quòd cum illas pecunias sacras fecisset, de illis subripit? An non inquit, poterat illis venditis ut propriis uti? Nam prohibitus es? Cui subripis postquam promisisti?* Punitus ergo fuit Ananias, non quia pretium agri retinuit, sed quia postquam Deo totum sacraverat, partem sacrilegè Deo abstulit.

XIII. Cæterum fuisse à Christo admissos eos quoque, qui suorum bonorum partem, vel etiam totum fideliter retinerent, constat primùm in Zachæo, qui princeps erat Publicanorum & dives, ut ait Lucas cap. 19., non tamen omnia dispensavit pauperibus, sed dimidium tantum, dicens v. 8. *Eccce dimidium bonorum meorum, Domine, do pauperibus, & si aliquem defraudavi reddo quadruplum.* Nec tamen propterea Christus, qui apud eum divertebat, à spe Regni Cœlestis ipsum exclusit: quia meruit audire *Hodie salus domui huius facta est.* Secundum constat in Josepho ab Arimathæa, qui

qui accessit ad Pilatum & petiit corpus Jesu . Hic enim dives erat, & simul discipulus Jesu & Regni Cœlestis spem habens . Ita Matthæus cap. 27. v. 57. *Venit quidam homo dives ab Arimathea nomine Jesepph, qui & ipse discipulus erat Jesu* . In Lazaro etiam constat & fororibus ejus: divites enim erant, & Castelli possessores, & Christi nedum discipuli, sed speciali amore dilecti, nec tamen de iis legitur quòd bona sua abdicarint .

XIV. Quòd verò etiam qui in primitiva Ecclesia veniebant ad Fidem bona quæ habebant retinerent, constat ex Edictis Imperatorum Ecclesiam persequentium, quibus Christum ejurare nolitibus privatio bonorum & Fisco applicatio inter alias pœnas statuitur . Hoc de Valeriano testatur S. Cyprianus Epist. 82. ad Successum, qui refert, ejus rescriptum ad Senatum, inter alia sic præcepisse: *Senatores verò & viri egregii, & equites Romani, dignitate amissâ etiam bonis spolientur Casariani quicumque vel prius confessi fuerant, vel nunc confessi fuerint confiscantur* . Et infra: *Sed & huic persecutioni quotidie insistent Praefecti in Urbe, ut si qui oblati fuerint, animadvertantur, & bona eorum Fisco vendicentur* . Quod confirmat Eusebius L. 2. de Vita Constantini c. 30. referens hujus pii Imperatoris legem, quâ statuit ut *Quicumque bonis spoliati sunt & omnium facultatum multatione percussi, miseriam adhuc vitam egerunt: ut hi quoquè pristinis domiciliis, ac familiis & facultatibus restituti, Dei beneficentia leti persuantur* . Et cap. 35. agens de bonis Martyrum & Confessorum & eorum qui in exilio obierunt, statuit, ut etsi Fisco addicta fuerint, ea cognatis propinquiorebus adjudicentur . Christiani ergo, Martyres, & Confessores bona temporalia tunc possidebant .

XV. Demùm bona temporalia possidentes ac divites à Christo non rejici, colligit S. Epiphanius Hæres. 61. num. 3. & 4. ex cò quòd licet ipse & Apostoli forent omnium temporalium possessione vacui; non tamen idcirco mulieres illas rejicere voluit, quæ de suis facultatibus sibi ac Apostolis ministrabant . Et hoc voluisse etiam futuro tempore in sua Ecclesia, scilicet ut essent divites & possidentes, qui indigentibus subvenirent, ostendunt ea, quæ Matth. 25. v. 34. in finali judicio dicturus est: *Venite benedicti Patris mei, possidete paratum vobis Regnum à constitutione Mundi: esurivi enim & dedistis mihi manducare: sitivi & dedistis mihi bibere, hospes eram & collegistis me, nudus eram & cooperuistis me* . Unde ait Epiphanius: *Quæ omnia quomodo tandem facere possuissent, n si iusti ex laboribus, atque ex privatis facultatibus jure comparatis eadem illa præstississent?* Imò quomodo sententiam damnationis justè pronuntiare posset in eos, qui indigentibus non subvenerunt, si ne-

mo haberet, unde posset: bona scilicet propria, quibus ea non habentibus posset ministrare? Voluit ergo Christus in sua Ecclesia esse & divitias possidentes ut non habentes alerent, & divitias abdicantes, qui suo ministerio unicè vacantes aliorum providentiâ victitarent.

XVI. Nec tamen propterea Ecclesiasticis omnibus rerum possessiones unde viverent, interdixit, sed iis solùm qui spontaneâ professione omnibus renuntiarunt. Nec Wiclefo & aliis oppositum ut supra sentientibus favent Christi verba præcitata dicentis Apostolis, dum ad evangelizandum eos misit: *Nolite possidere aurum, neque argentum*, quasi nec Ministri Ecclesiæ, nec Ecclesia ipsa quidquam possidere possit. Etenim non intendit ibi Dominus, quòd Apostoli, & qui eis in ministerio successuri erant, omni prorsus temporalium possessione carerent: sed solùm advertere eos voluit, quòd dum ad evangelizandum irent, secum nihil deferrent, nec aurum nec argentum nec pecuniam nec peram nec duas tunicas nec calcamenta nec virgam: non quia aliunde non possent hæc habere ut propria: sed quia de his omnibus ministerio Verbi vacantes providere pertinet ad eos, ad quos velut operarii mittuntur & idcirco subiecit: *Dignus est enim operarius cibo suo*.

XVII. Ita exponit S. Augustinus L. 2. de Conf. Evang. cap. 30. ubi ex his postremis verbis sic insert: *Unde satis ostendit, cur eos hæc possidere ac ferre noluerit, non quia necessaria non sint sustentationi hujus vitæ; sed quia sic eos mittebat, ut eis hæc debere demonstraret ab illis ipsis, quibus Evangelium credentibus annuntiarent, tanquam stipendia militantibus, tanquam fructum vineæ plantatoribus, tanquam lac gregis pastoribus. Unde Paulus dicit (1. Cor. 9. v. 7.) „ Quis militat suis stipendiis unquam? Quis plantat vineam, & de fructu ejus non edit? Quis pascit gregem, & de lacte gregis, non percipit? „ Hinc enim loquebatur de iis, quæ necessaria sunt predicatoribus Evangelii, unde paulò post dicit „ Si nos vobis spiritualia seminavimus, magnum est si vestra carnalia metemus? „ Si alii potestatis vestre participant, non magis nos? Sed non sumus usi hac potestate, „ Unde apparet, hæc non ita præcepisse Dominum, tanquam Evangelistæ vivere aliunde non debeant, quàm eis præbentibus, quibus annuntiant Evangelium: alioquin contra hoc præceptum fecit idem Apostolus, qui victum de manibus suarum laboribus transigebat, ne cuiquam gravis esset: sed potestatem dedisse, in qua scirent sibi ista debere. Cum autem à Domino aliquid imperatur, nisi fiat, inobedientiæ culpa est: cum autem potestas datur, licet cuique non usi, & tanquam de suo jure cedere... Cum itaque dicit (Paulus) ita Dominum ordinasse, se autem usum non esse, utique*

que ostendit atendi potestatem datam, non impostam serciendi necessitatem. Ita S. Augustinus.

XVIII. Eadem dicit fidelis S. Augustini discipulus S. Thomas 1. 2. q. 108. art. 2. ad 3. nempe: *Quid illa praecepta Dominus dedit Apostolis non tanquam caeremoniales observantias, sed tanquam moralia instituta. Et possunt intelligi dupliciter. Uno modo secundum Augustinum L. 2. de Conf. Evangelist. c. 30. ut non sint praecepta, sed concessiones. Concessit enim eis, ut possent pergere ad praedicationis officium sine pera & baculo, & aliis huiusmodi, tanquam habentes potestatem necessaria vitae accipiendi ab illis, quibus praedicabant, unde subdit „Dignus est enim operarius cibo suo„. Non autem peccat, sed supererogat, qui sua portat, ex quibus vivat in praedicationis officio, non accipient sumtum ab his, quibus Evangelium praedicat, sicut Paulus fecit.*

Alio modo possunt intelligi secundum aliorum Sanctorum expositionem, ut sint quaedam statuta temporalia Apostolis data pro illo tempore, quo mittebantur ad praedicandum in Iudaeam ante Christi passionem. Indigebant enim discipuli quasi adhuc parvuli sub Christi cura existentes, accipere aliqua specialia instituta à Christo, sicut quilibet subditi à suis Praelatis, praecipue quia erant paulatim exercitandi, ut temporalium sollicitudinem abdicarent; per quod reddebantur idonei ad hoc, quod Evangelium per universum Orbem praedicarent. Nec est mirum, si adhuc durante statuta Veteris Legis, & nondum perfectam libertatem spiritus consecutis, quosdam determinatos modos vivendi instituit. Quae quidem statuta imminente passione removit, tanquam discipulis jam per ea sufficienter exercitatis. Unde Luca 22. dixit „Quando misi vos sine sacco & pera & calceamentis, numquid defuit aliquid vobis? At illi dixerunt, nihil. Dixit ergo eis, sed nunc qui habet sacculum, tollat similiter & peram„. Jam enim imminerebat tempus perfectae libertatis, ut totaliter suo dimitterentur arbitrio in his, quae secundum se non pertinent ad necessitatem virtutis. Haec D. Th. Quibus apparet, ea quae Christus Matth. 10. Apostolis dixit de nihil secum ferendo, fuisse concessionem, vel praecepta disciplinae solum pro determinato tempore.

XIX. Nec tamen propterea cum Christus ipse nihil unquam possederit, si Apostoli eorum successores aliqua postea possederunt, servi facti sunt Domino suo majores, aut discipuli supra Magistrum. Nam possessio bonorum in viris Ecclesiasticis magis ad servitutem spectat, quam ad dominatum, quoniam illorum bonorum non sunt domini, sed simplices administratores, & dispensatores, qui ut fideles sint, dispensare debent. secundum vo-

luntatem Domini, nempe in utilitatem Ecclesiæ & pauperum subsidium. Ita Wicleio respondet Thomas Waldensis L. 4. tom. 1. art. 3. c. 45. dicens: *Concorditer negatur à Clero, quòd Prælati Ecclesiæ sunt verè Domini rerum Ecclesiasticarum. Primò propter carentiam prærogativæ finalis, quia omnia bona Ecclesiæ non sunt propter Prælatos, sed propter Ecclesiam fidelium: nec ipsa Ecclesia propter Prælatos, sed Prælati propter Ecclesiam: & ideo dicantur Pastores & ministri, quasi ideo sint, ut pascant, ut ministrent: & sic tollit eis rationem dominandi secundum illud 1. Petri 5. „ Neque ut dominantes in Cleris, sed forma facti gregis „: & illud Christi ad Apostolos „ Reges gentium dominantur eorum, vos autem non sic „.*

Secundò Prælati non sunt veri domini propter carentiam proprietatis. Hæc Thomas Waldensis: qui proprietatem, non in Prælatis sed in Ecclesia esse ostendit ex S. August. Tract. 6. in Joann., ubi de prædio vel villa fortè suæ Ecclesiæ, quam nomine Columba appellat, dicit non esse suam, sed Columbae: *Nam vobis, fratres mei, quia villa ista non sunt Augustini; & si non vobis, & putatis, me gaudere in possessione illarum, Deus novit, ipse scit quid ego de illis villis sentiam, vel quid ibi sufferam, novit gemitus meos, si mihi aliquid de Columba impertire dignatus est.* Quibus indicat, quàm agrè ferret bonorum Ecclesiæ administrationem sibi conceditam esse. Deinde concludit, quòd cùm bonorum possessio tradita sit Ecclesiæ non Divino jure, sed humano, nempe Imperatorum legibus, nihil nomine Ecclesiæ hæreticos possidere: *Leguntur enim, inquit, Leges manifestæ, ubi præceperunt Imperatores, eos qui præter Ecclesiæ Catholicæ communionem usurpant sibi nomen Christianum, nec volunt in pace colere pacis auctorem, nihil nomine Ecclesiæ audeant possidere.* Quæ ad Donatistas dirigit, qui ab Ecclesiæ Catholicæ communione se se absciderant, & ad modernos Hæreticos extendi possunt, qui omnia Ecclesiæ bona in regionibus, ubi ipsi dominantur, invaserunt.

XX. Hoc spiritu Apostoli primi Ecclesiæ Episcopi eleemosynas & bona Ecclesiæ à piis fidelibus collata susceperunt, scilicet non tamquam Domini, sed ministri & dispensatores. Hoc se fecisse testatur Paulus Rom. 15. v. 25. *Nunc igitur proficiscar in Jerusalem ministrare Sanctis. Probaverunt enim Macedonia & Achajæ collationem aliquam facere in pauperes, qui sunt in Jerusalem. Placuit enim eis, & debitores sunt eorum. Nam si spiritualium eorum participes facti sunt Gentiles, debent & in carnalibus ministrare illis.* Hæc sollicitudine premebatur Paulus, ut de bonis Ecclesiæ collatis pauperibus subveniretur: qui tamen nihil eorum sibi appropriare volens, de labore manuum suarum victum quærebat.

Ad hoc ministerium Dominus ipse Apostolos præsignavit, dum panes à se multiplicatos, nonnisi per Apostolos famelicæ Turbæ distribui voluit; & dum ea quæ à fidelibus mittebantur, sic volente Christo penes Judam, qui Apostolus erat, allervabantur, & ab eo in usus pauperum dispensabantur: super hoc Augustinus Tract. 50. in Joann. Exemplum, inquit, Domini accipite conversantis in terra. Quare habuit loculos, cui Angeli ministraverunt, nisi quia Ecclesia ipsius loculos suos habitura erat? Quare fures admisit, nisi ut ejus Ecclesia fures patienter toleret? Et Tractatu 62. ait: Habebat ergo & Dominus loculos, & à fidelibus oblata conservans, & suorum necessitatibus, & aliis indigentibus tribuebat. Tunc primum Ecclesiastica pecunia forma est instituta, ubi intelligeremus, quodd præceptum non cogitandum esse de crastino, non ad hoc fuisse præceptum, ut vix pecunia servetur à Sanctis: sed ne Deo pro ista serviatur, & ob inopiam timorem justitia deferatur. En bonorum temporalium in Ecclesia ab ipso Christo ad ejus sustentationem instituta possessio, & eorum concredita Apostolis dispensatio.

XXI. Fateor quidem, Apostolos post Ascensionem Domini, ne ob hoc à prædicatione Verbi Dei impedirentur, curam hanc per se ipsos bona Ecclesiæ indigentibus dispensandi in alios transtulisse, ut legitur Act. 6. At in quos transtulerunt? in Laicos? nequaquam: sed in alios Ecclesiasticos viros, qui loco ipsorum bona Ecclesiæ ministrarent ac dispensarent. Elegerunt ergo septem Diaconos, quibus imposuerunt manus, & in Ordine Ecclesiastico eos constituerunt. His apparet, curam bona Ecclesiæ collata ministrandi & dispensandi à Christo viris Ecclesiæ præsentibus ne. n. p. Apostolis tuisse injunctam, & ab istis inferioribus ejusdem Ordinis ministris delegatam. Quo fit ut bonorum Ecclesiæ administratio temper penes Ecclesiasticos fuerit: & quod Ecclesiæ Prælati, ut gravioribus & spiritualibus vacare possint, liceat temporalium curam Clericis inferioribus in fide probatis exemplo Apostolorum commendare.

XXII. Ne autem quis putet, bona Ecclesiæ primis seculis, in solis fidelium oblationibus posita fuisse, non autem in prædiis, aut aliis stabilibus, adeat supra dictum Eusebium L. 2. de Vita Const. c. 39., ubi Constantinus præcipit, ut Fiscus fundos, ædes, & hortos antea ereptos Ecclesiis restituat: *Omnia ergo quæ ad Ecclesias relictæ visa fuerint pertinere, siue domus ac possessio sit, siue agri, siue borti, seu quæcumque alia, nullo jure, quod ad dominium pertinet, immunito, sed salvo omnibus atque integris manentibus, restitui jubemus.* Cap. 40. Idem statuit de Martyriis, & Cœmeteriis. Et cap. 41. præcipit, ut res Ecclesiæ à Fiscu emptæ, vel titulo donationis acqui-

acquisitæ, & etiam alienatæ, eidem Ecclesiæ restituantur. Quæ omnia confirmant ejusdem Constantini Literæ ad Anulinum datæ apud Euseb. L. 10. Hist. cap. 5. tenoris sequentis: *Ave Anuline carissime nobis. Est hic mos bonitatis nostræ, ut ea quæ ad alienum jus pertinent, non modò nulla inquietudine affici, sed etiam restitui velimus, Anuline carissime. Quapropter jubemus, ut simul atque has literas acceperis, si quæ ex illis quæ ad Catholicam Christianorum Ecclesiam per singulas Civitates, aut in aliis locis pertinebant, nunc à Decurionibus, aut quibuscumque aliis detinentur, confestim illorum Ecclesiis restitui facias. Quandoquidem ut quæ supradictæ Ecclesiæ antea possederunt, ad earumdem jus omnino revertantur. Cùm ergo perspicias devotio tua hujus nostræ jussionis manifestissimum esse præscriptum; operam dabis ut sive horti, sive ades, seu quodcumque aliud ad jus earumdem Ecclesiarum pertinuerit, cuncta illis quantum restituantur, quo scilicet te hinc nostro præcepto accuratissime obtemperasse intelligamus. Vale, Anuline carissime & desideratissime nobis.* Ex his ad evidentiam patet, Ecclesias ante Constantinum bonâ temporalia tempore persecutionum possedisse, quæ ab Ethnicis erepta fuere, postea à pietate Constantini illis restituta.

XXIII. Nedom autem pius ille Imperator bona Ecclesiæ erepta restitui eidem mandavit sed alia adjunxit. Ubi enim ut supra dixi bona quæ Martyrum aut Confessorum fuerant cognatis eorum adjudicavit, istis deficientibus, Ecclesiam heredem instituit. Ita Eusebius L. 2. de Vita Const. cap. 36. ejus verba refert: *Quòd si nullus cognatus supervisset, qui prout rationi consentaneum est, hereditatem capeisset eorum, quos supra memoravi, Martyrum scilicet & Confessorum, aut illorum, qui ob hujusmodi causam ex patria migraverunt; cujusque loci Ecclesiam hereditatem adire decernimus. Nec defunctis utique molestum erit, si cujus gratiâ nullum non discrimen subierint, eam ipsam heredem habere contingat.* Quanta autem Constantinus in Ecclesiam contulerit, & quot temporalibus bonis eas ditaverit, quem alii Imperatores, ac pii Principes postea imitati sunt, nedum historia sed experientia ipsa loquitur. Quæ omnia ad obstruendum os Wicleffo & aliis abundè sufficiunt.

XXIV. Supereft modò respondere ad ea, quæ de Levitis supra opposita sunt. In hoc tollenda est æquivocatio. Aliud enim est, quòd in distributione Terræ promissionis Levitarum Tribui non fuerit assignata, sicut aliis Tribubus, determinata pars, extra quam habitare non possent, eamque sicut aliæ Tribus in hereditatem haberent: Aliud est, quòd Levitæ in Civitatibus, ubi habitabant, nihil omnino possiderent, nec hereditatis capaces essent, sed de oblatis tantum vivere deberent, ut modò quidam Mendican-

cantium Ordines vivunt. Primum verum est; & hoc significat id quod Deus Aaroni dixit Num. 18. v. 20. *In terra eorum nihil possidebitis, nec habebitis partem inter eos. Ego pars & hereditas tua in medio filiorum Israel.* Et Deuteron. 18. v. 1. *Non habebunt Sacerdotes & Levitæ, & omnes qui de eadem Tribu sunt partem & hereditatem cum reliquo Israel:* Quia Levitis non fuit in divisione Terræ promissionis aliqua Civitas vel regio in partem & hereditatem, sicut alteri populo, determinata, sed libera per omnes Tribus habitatio, ut sicut Deus est communis Dominus omnium, ita & Levitæ ministri ejus communem cum omnibus possessionem haberent: & hoc exprimunt illa verba: *Ego pars & hereditas tua in medio filiorum Israel.* Et ad hanc formam hodie possessionem suam habet Ecclesia in omnibus Regnis: ubi enim omne Regnum suis terminis circumscriptum alterum excludit, Ecclesia in omnibus Regnis nullis clausis limitibus sedem obtinet.

At secundum omninò falsum est. Nam primò titulo oblationis possessiones proprias habere poterant Levitæ: offerebantur autem non solum victimæ, sed etiam agri, quos etiam poterant emere: hoc tamen discrimine, quòd agros, quos pecuniâ sua emerrant, anno Sabbatico ad veteres dominos redibant. Agri verò, & domus privatorum religione Domino devotæ, jure perpetuo Sacerdotum erant, fasque erat tamquam de re sua decernere. Secundò in urbibus, quas incolebant, suas quoque habebant villas, agros, & pascua. Hinc Jeremias, & S. Barnabas Levitæ ambo fundos jure proprio possidebant. Jeremias cap. 32. v. 7. emit agrum Hananeelis patrui sui; & Barnabas Act. 4. v. 37. agri sui venditi pretium detulit ad Apostolos. Claudam igitur ex S. Thoma in 4. dist. 24. q. 3. art. 1. quæst. 3. ad 2. *Quòd Levitæ in Veteri Testamento habebant jus in hereditate paterna. Sed idèd non acceperunt partem cum aliis Tribubus, quia erant per omnes Tribus dispergendi: quod fieri non potuisset, si unam determinatam partem terræ accepissent, sicut aliæ Tribus.*

XXV. Sicut autem in Levitis, ita in Ecclesiæ Ministris, distinguenda sunt bona propria, quæ nempe jure paternæ hereditatis, vel aliunde sibi competunt, & bona jam Ecclesiæ consecrata & applicata, quæ ipsi participant. Nam priorum quidem sunt domini & possunt ea vel sibi retinere, vel aliis dispensare pro libito sicut Laici. At posteriorum domini non sunt, sed Deus & Ecclesia; ipsi verò ministri & dispensatores. Ita S. Prosper (seu verius Julianus Pomerius) Lib. 2. de Vita contemplativa cap. 16. *Possessiones, inquit, quas oblatas à populo suscipiunt Sacerdotes, jam non sunt res mundi credendæ sed Dei. Quoniam si vestes ac vasa &*

cetera, quæ in sacris usui ministrantibus erant, sancta vocabantur, nec in usus humanos revocari jam poterant, Divinis semel ministeriis consecrata: quomodo non ea quæ conferuntur Ecclesiæ sacra credenda sunt, quibus non ut seculi rebus, luxuriosè, sed sanctè, ut Deo consecratis utuntur ad necessaria Sacerdotes? De hoc videndus est S. Thomas 2. 2. q. 185. art. 7. ubi agens de Episcopis distinguit inter bona quæ sunt propria, & ea quæ sunt Ecclesiæ, ac dicit, Episcopum priorum quidem esse dominum, posteriorum autem ministrum, ac dispensatorem: statuitque quomodo circa ista se gerere debeat. Ejus verba non refero, quia hic Theologum Moralem non ago, sed Polemicum.

CAPUT XXXVII.

De Sabellianis.

§. I.

Eorum Origo, Auctor, Tempus &c.

I. **S**ABELLIANI à Sabellio hujus hæresis auctore, seu veriùs propagatore, nomen accepere. Eam enim à Praxea Montani prius allecla, postea desertore, excogitatam, ut de Montano agens adnotavi, Noetus & Noetiani de quibus supra c. 32. latis ulnis suscipientes suam fecerunt, quæ in Sabellium & Sabellianos transiens nomen mutavit, sed non errorem; quem deinde Photinus & Photiniani adoptarunt. S. Augustinus L. de Hæres. c. 41. supponens Sabellium fuisse Noeti discipulum, & eundem errorem, quem magister, promulgasse, mirari videtur cur S. Epiphanius Noetianam & Sabellianam tanquam duas hæreses distinctis Capitibus proposuerit, & dicat de Sabellio: *Qui quidem paucis quibusdam exceptis eadem cum Noetianis asseruit.* Quòd si velit, ut notat S. Augustinus, Sabellianos similia cum Noeto dogmatizasse, præter hoc quod dicunt, *Patrem non esse passum:* hoc esse impossibile demonstrat S. Augustinus dicens: *Quomodo de Sabellianis hoc intelligi potest, cum sic innotuerint dicere Patrem passum, ut Patripassiani quàm Sabelliani celebriùs nuncupentur? Aut si forte in eo quod ait, præter hoc quod dicunt Patrem non esse passum,, Noetianos hoc dicere intelligi voluit, quis eos in hac ambiguitate discernat? Vel quomodo possunt, intelligi quilibet eorum Patrem passum fuisse non dicere, cum dicant, eundem ipsum esse & Patrem & Filium & Spiritum Sanctum?* Ita S. Augustinus, qui deinde hoc idem

idem ostendit ex Philastrio, qui *Sabellianos continuò post Noetianos ponens* (Hæres. 54.) „Sabellius, inquit, discipulus ejus, qui similitudinem sui Doctoris itidem secutus est, unde & Sabelliani „postea sunt appellati, qui & Patripassiani, & Praxejani à Praxea, & Hermogeniani ab Hermogene, qui fuerunt in Africa, „qui, & ita sentientes, abjecti sunt ab Ecclesia Catholica „*Certè iste eosdem postea Sabellianos dixit appellatos, qui ea que Noetus sentiebant.* Hactenus S. Augustinus, non inveniens causam, cur Epiphanius Noetianos & Sabellianos sub duobus numeris tanquam duas hæreses posuerit, nempe in Synopsi Tom. 1. L. 2. n. 16. ubi ait: *Sabelliani cum Noetianis in omnibus propemodum consentiunt, nisi quòd Patrem ipsum negant esse passum, ab eoque prolatum duntaxat manare Verbum.*

II. Epiphanio Damascenus consentit L. de Hæres. cap. 62. de Sabellianis: *Sabelliani, inquit, cum Noetianis in omnibus propemodum isti consentiunt, nisi quòd Patrem negant esse passum: ajuntque Verbum esse ad instar illius, quod ore profertur, atque iterum revocatur.* Quæ P. Lequien in Notis exponens ait: Non idem fuit Sabellii sensus atque Noeti, cum tamen uterque unicam in Trinitate personam agnosceret. Sabellius sibi finxerat Verbum & Spiritum Sanctum efficientias quasdam Dei esse minimè subsistentes, sed quas Deus irradiationum instar, quando opus esset, evibraret, rursùmque ad se contraheret. Ex quo fiebat, quòd censuerit, Jesum, cum solâ efficientiâ illâ quæ Verbum extimum diceretur perfusus esset, purum hominem extitisse, non Deum Incarnatum: ideoque Paulo Samosateno præluserit. Cum ergo Pater in Jesum solâ Deitatis efficientiâ descenderit, non persona Patris secundum Deitatem in ejus humanitate subsisteret, dici non poterat, patiente Jesu Patrem quoque propriè fuisse passum.

III. Communior tamen Patrum sententia est, Sabellianos æquè ac Noetianos in eodem errore fuisse, Patrem nempe fuisse passum, quia eosdem quos Sabellianos, Patripassianos etiam appellant. Etenim præter Philastrium supra à S. Augustino relatam, Athanasius Lib. de Synodis: *Tales, inquit, sunt qui apud Romanos quidem Patripassiani, apud nos Sabelliani nominantur.* Augustinus ipse hoc repetit Tract. 36. in Joann. dicens: *Nam Sabelliani dicti sunt quidam hæretici, qui vocantur Patripassiani, qui dicunt ipsum Patrem passum fuisse.* Idem confirmat Marius Mercator Auctor S. Augustino cœvus in Dissert. de duodecimo anathematismo Nestoriano his verbis: *Post hæc Sabellius & Marcellus Monarchiam se in Divinitatis substantia retinere debere putantes,*

nefando errore decepti, ausi sunt (dicere) Deum Patrem ipsum sibi Filium, ipsum sibi esse Patrem, ipsum sibi Spiritum Sanctum, ipsum incarnatum, passum, crucifixum, ipsum à Judæis omnia pertulisse, resurrexisse à mortuis, & omnia peregrisse, quæ nos per Christum in persona propria ejus, pro humani generis salute, gesta esse credimus & confitemur. Liqueat ergo, Sabellianos in hoc cum Noctianis consensisse, quòd & ipsi dicerent Patrem esse passum. Quod Eusebius confirmat L. 2. contra Marcellum Ancyranum c. 1. ubi probans, eum Sabellii errorem renovasse ait: *Agedum deinceps intueamur Idolum Sabellii velut de terra se exerentis. Ausus est dicere, Patrem Domini nostri Jesu Christi Deum de Sancta Virgine genitum, ipsum quoque passum; quod antea dixerat L. 1. c. 20. pag. 91.*

IV. Itaque Sabelliana hæresis, ut in Deo Monarchiam & Divinitatis tueretur unitatem, auferebat à Deo Personarum Trinitatem, sed sicut unam Dei naturam, ita & unam Personam ascribebat, quæ secundum triplicem notionem, seu actum tria haberet nomina. Ita eam exponit Theodoritus Lib. 2. Hæret. Fab. ubi de Sabellio: *Dicebat, inquit, Patrem & Filium & Spiritum Sanctum unam esse hypostasim & unam personam, quæ tria habet nomina, & eundem aliquando quidem vocat ut Patrem, aliquando autem ut Filium, aliquando verò ut Spiritum Sanctum: & in Veteri quidem Testamento ut Patrem, Legem tulisse, in Novo autem ut Filium hominem factum esse, ut Spiritum autem Sanctum ad Apostolos venisse. Eodem modo hanc hæresim exponit Nicetas L. 4. Theodori Hæres. 28. hoc insuper exemplificans, tum in homine, in quo est corpus, anima, & spiritus: ita ut corporis Pater, animæ Filius, Spiritus verò Sanctus vices spiritus suppleret. Tum in Sole, in quo tres actiones elucescunt, illuminativa, calefactiva, & ipsa figura, quæ in Orbem circumducitur; & tamen Sol unum suppositum est.*

V. Hoc eodem modo Sabellianorum describens hæresim S. Epiphanius Hæres. 62. num. 1. ait: *Horum hæc opinio est: Eundem esse Patrem & Filium & Spiritum Sanctum, ut ad eandem hypostasim tres appellationes conveniant. Aut perinde atque in uno homine corpus, anima, & spiritus inest. Ita ut corporis instar sit Pater, animæ Filius, Spiritus denique in ipsa Divinitate humani spiritus instar habeatur. Quod & Solis similitudine declarant; in quo cum una sit hypostasis, triplex nihilominus actus est, nimirum illustrandi vis, & calefaciendi, & orbicularis figura. Ac vim quidem illam calefaciendi, hoc est calorem atque æstum, spiritui respondere; illuminandi verò vim Filio, Patrem denique totius hypostasis velut quandam esse formam. Igitur Filium affirmant radii in morem emissum omnia quæ ad Evangelii & humanæ salutis procuracionem attineant, in hoc Mundo*
præ-

praestitisse, atque in Calum rediisse, quemadmodum is, qui à Sole manavit radius in eundem postea refunditur. Spiritum porro Sanctum in hunc Orbem immitti, ac deinceps singillatim in eos omnes illabi, qui communere digni sunt: eundemque instaurare vitam, & animare fervore; fovere denique ac calefacere, ut ita dicam, vi quâdam, consensuque spiritus. Ita juxta Epiphanium errorem suum describebant Sabelliani. Ita etiam Nicephorus L. 6. Hist. c. 7. & c. 26.

VI. Heresis hæc à Sabellio nomen & errorem accepit, quem, ut dixi, à Noeto cujus discipulus fuit, hauserat. Afrum Sabellium extitisse è regione Pentapolis Lybiæ Cyrenaicæ, scribit Theodorus supra relatus: *Sabellius autem Afer Pentapolitanus*. Nicetas, Sabellium facit ex Lybia Pentapoli oriundum: *Sabellius Lybicæ Pentapoli oriundus*. Unde & Lybicum appellat Magnus Basilus Epist. 78. dicens: *Et nonnulli ex illis, qui impietatem Sabellii Lybici sectantur*. Ptolemaidem verò Pentapolis urbem ei patriam vel domicilium fuisse, colligitur, quia teste Eusebio L. 7. Hist. cap. 6. ibi suæ hæresi dedit initia: *De dogmate illo, inquit, quod nuper apud Ptolemaidem urbem Pentapoleos commotum est*: Loquitur autem de heresi Sabelliana. Idem allèrit Nicephorus locis supra citatis.

VII. De tempore, quo hæresis hæc emerfit, parva controversia est. Ut à Sabellio nomen accepit (is enim ex dictis in eodem errore Noeto successit) vel ad extrema Pontificatus Stephani, vel ad initia Xisti referenda est. Sub Xisto increbuisse, & de ea Dionysium Alexandrinum literas ad Xistum dedisse, refert Eusebius L. 7. Hist. c. 6. dicens: *In eadem Epistola de Sabellianis hæreticis, utpotè qui tunc temporis increbrescebant, Xistum certiore facit*. Quibus apparet, Stephani tempore exordia habuisse, incrementa verò sub Xisto, quod fuisse putatur circa ann. Domini 257. In hoc Danaus ipse consentit Opusc. 41. dum ait „ Cœpit autem Sabelliani nomen innotescere sub Xisto Romano Pontifice, durante adhuc Decianâ, vel potius jam Valerianâ persecutione quemadmodum Platina vult, & circa annum à Christo passio 224. Quamquam quidam existimant, temporibus Cypriani jam quodammodo errorem hunc degustatum & delibatum fuisse. Sed de Montanistis potius intelligenda sunt, quæ Cyprianus in Sabellianos jaculari videtur. Ita Danaus. Nullam tamen invenio repugnantiam, quòd S. Cyprianus de Sabellianis loqui potuerit, cum enim hæc hæresis sub Xisto innotuerit, & eo tempore adhuc in vivis esset S. Cyprianus, inò Xisti martyrio superstes fuerit, potuit Sabelliana hæresis in Africæ regione exorta ei innotuisse.

VIII. Cujus

VIII. Cujus conditionis Sabellius fuerit, nec Augustinus, nec Epiphanius, nec Theodoritus, nec Damascenus, nec alii Patres indicant. Solus Zonaras in Notis ad Can. 1. Conc. Constantinop. I. scribit Sabellium Ptolemaidis Episcopum fuisse: *Subet etiam anathematizari secundum eos Sabellianos, qui à Sabellio quodam Lybico nomen accepere. Is Ptolemaidis, quæ urbs in Pentapoli fuit, Episcopus, concreatione quâdam coalitioneque excogitata tres hypostases in unam substantiam Divinitatemque miscet, ac unam in Trinitate, tribus licet variam nominibus, Personam agnoscebat.* Timotheus autem Presbyter Constantinopolitanus in Lib. de Recept. Hæretic. duos distinguit Sabellios, similia tamen docentes: unum Lybicum, alterum diversum quem Episcopum fuisse dicit. Cum tamen nemo ante hos duos auctores de Sabellii Episcopatu quidquam indicaverit, verius puto Sabellium Episcopum non fuisse.

IX. In Africa hanc hæresim, & in Lybia sua habuisse natalia ex dictis constat. Indè Mesopotamiam invasisse & Romam usque pervenisse, testis est S. Epiphanius num. 1. Hæres. 62. dicens: *Atque hujus Sectæ plurimi, cum in Mesopotamia, tum Roma versantur vesania quâdam perciti.* In Oriente diu viguit, adeo ut sub Magno Constantino Eustathius Episcopus Antiochenus hanc hæresi infectus fuerit: unde Socrates L. 1. Hist. cap. 23. de Eusebio Nicomediensi dicit: *Eustathium verò criminatur, tanquam dogma Sabelli adstruentem.* Et jure quidem: nam, ut idem Socrates refert cap. 24. in initio, hujus rei causa in Antiochena Synodo depositus fuit: *Congregata igitur Antiochia Synodo Eustathium deponunt, ut qui Sabellii dogmati potius, quàm Nicænæ Synodi decretis insisteret.* Hujus Sectæ sequaces extitisse anno 381., colligitur ex Canone 1. Conc. Constantinop. I. à quo unà cum aliis hæreticis Sabelliani damnantur. Et S. Basilus Epist. 64. conqueritur, suâ ætate non defuisse, qui hunc errorem revocare tentarent. In Africa tamen cessasse, indicat S. Augustinus Tract. 40. in Joann. dum ait: *Quidam enim fortasse sunt in ista multitudo Ariani. Non audeo suspicari esse Sabellianos, qui ipsum Patrem dicunt esse qui Filius est: hæresis quippe ista nimis antiqua est, & paulatim eviscerata.* In Oriente autem aliquas Sabellianorum reliquias septimo desinente seculo extitisse, videtur colligi ex Synodo Trullana, in cuius Can. 94. sancitum fuit, inter alios Hæreticos ad fidem venientes, Sabellianos esse rebaptizandos.

X. An verò hanc nostrâ ætate, quâ à præteritis Reformatis omnes antiqui & sepulti errores excitati sunt, etiam Sabellianismus revixerit, testimonio Georgii Hernii unius ex illis fateri cogor. Is enim in sua Eccl. Hist. Periodo 3. art. 3. scribit, in Anglia has cvul-

evulgatas propositiones fuisse, quæ sunt 24. 25. & 26. nimirum : *In unitate Dei non esse Trinitatem* ; item : *Non tres personas esse in Deo , sed tantum tria officia* ; demum : *Unam tantum in Deo esse personam* . Ad hunc errorem apud quemcumque sit confutandum accedamus .

§. II.

Sabellii error refutatur .

I. **E**ravit ergo Sabellius, quia in Divinis posuit unam tantum Personam trinominem, quæ scilicet ratione unius officii diceretur Pater, ratione alterius Filius, & ratione tertii Spiritus Sanctus. Sed quia hunc errorem à Noeto magistro suo didicerat, in quo illum supra Cap. 32. §. 2. ex Scripturis, tum testimonio æterni Patris, tum ipsius Christi filii, tum aliis rejeci: ideò ibi dicta Lector adire poterit; dum interim aliqua in confirmationem fundamentalis hujus veritatis adjiciam; præter ea quæ dixi Tom. 4. in 1. p. Tract. de Deo Trino Dub. 1. ubi etiam alios plures hujus hæresis Innovatores recensui. Prima hujus erroris semina jecit Simon Magus, qui omnibus hæresibus facem prætulit: inter alia enim sua deliria teste S. Augustino L. de Hæres. c. 1. dicebat, se in Monte Sina Legem dedisse Judæis, tempore Tiberii in Filii persona putativè apparuisse, postea se in linguis Spiritum Sanctum super Apostolos venisse. Nec enim est improbable, quòd dementiam quam sibi affingebat Simon, in impietatem erga Deum Sabellius converterit, dicens, unam Divinam Personam tria hæc officia sub diversis nominibus præstitisse.

II. Sabellianam hæresim ex Judaismo prodissè censet S. Basilii Magnus Epist. 64. modò 210. ubi postquam ostendit, quid ad eam extirpandam Neocæsareæ egerit S. Gregorius Thaumaturgus, videns, quosdam eam subintroducere moliri, primores Neocæsarienses his verbis monet: *Judaismus est Sabelliana hæresis sub Christianismi specie in Evangelicam prædicationem invecita. Qui enim rem unam personis multiplicem, Patrem & Filium & Spiritum Sanctum dicit, unamque trium ponit hypostasim, quid aliud facit, nisi quod Unigeniti sempiternam negat præexistentiam? negat autem & dispensatorium ejus ad homines adventum, descensum ad inferos, resurrectionem.*

III. A Stoicis verò eam deducit S. Athanasius Tract. 4. contra Arianos, ubi num. 13. *Fortè autem, inquit, hujusmodi opinio ex Stoicorum schola emanavit, qui nempe Deum putant contrahi, rursusque*

utque cum rebus creatis dilatari, infinitèque quiescere. Quod enim dilatatur, contractum dilatatur, & quod extenditur contractum extenditur: atque idem quidem est, nihil autem aliud præter affectionem quamdam patitur. Itaque si Unitas dilatata facta est Trinitas; & si item Unitas est Pater, Trinitas verò est Pater Filius & Spiritus Sanctus, primò sequitur ut dilatata Unitas aliquam passâ sit affectionem, factaque sit quod non erat: siquidem dilatata est, quæ lata non erat. Deinde si ipsa Unitas in Trinitatem dilatata est, Trinitasque Pater est & Filius & Spiritus Sanctus: ipse ergo Pater factus est & Filius & Spiritus, ut sentit Sabellius, nisi fortè unitas quam ille, propugnat aliquid sit aliud præter Patrem. Hæc aliaque validè Athanasius in Sabellium intorquet, ostendens, ipsum ponere Deum passioni & mutationi obnoxium.

IV. Porro cum ex Sabellianis aliqui post Concilium Nicænum suum errorem tueri vellent ejusdem Concilii decreto, quo anathemate damnat, qui dixerit, ex alia essentia vel hypostasi Filium esse, ex quo inferebant, Filium nedum ejusdem essentia, sed ejusdem hypostasis cum Patre esse; propterea S. Basilii Epist. 73. modò 125. illos ita redarguit: *Nonnulli ab impia Sabellii Lybiensis heresi, hypostasim & essentiam idem esse rati, ansam inde trahunt ad blasphemiam suam defensionem, quòd ita in fide scriptum sit, Si verò, quispiam dixerit, ex alia essentia, aut hypostasi Filium esse, cum anathemate ferit Catholica & Apostolica Ecclesia.* Non enim idem dixerunt illic essentiam & hypostasim. Etenim si una & eadem notio est subjecta vocibus; quid opus erat utrâque? Sed perspicuum est, aliis quidem Filium ex Patris essentia esse negantibus, aliis verò neque ex essentia esse, sed ex aliqua alia hypostasi dicentibus, illos ita demum utramque opinionem tanquam à sententia Ecclesiastica alienam, rejecisse. Nam ubi suam ipsorum declarabant sententiam, dixerunt ex essentia Patris Filium, non ampliùs adjicientes illud, ex hypostasi. Quare illud quidem positum est ad everisionem nequioris sententia; hoc verò declarationem habet salutaris dogmatis. Confitendum igitur est, consubstantialem esse Patri Filium, quemadmodum scriptum est. Confitendum etiam, in propria hypostasi Patrem esse, in propria Filium, in propria Spiritum Sanctum, quemadmodum & ipsi manifestè exposuerunt. Plenè enim & clarè ostenderunt dicendo Lumen de Lumine, aliud quidem esse Lumen quod genuit, aliud verò quod genitum est, Lumen tamen & Lumen; ita ut una & eadem sit essentia ratio. Hactenus Basilii.

V. Ex his apparere incipit, Sabellio errandi causam dedidisse, quòd nesciebat, vel volebat distinguere Essentiam, seu naturam ab Hypostasi, seu personâ: ut Essentia seu natura sit aliquid commune

nune pluribus, ut homo: Hypostasis verò seu Persona sit aliquid singulare in ea natura subsistens, ut Petrus, Franciscus: & hoc nomen Deus sit nomen naturæ, & nomina Pater Filius & Spiritus sint nomina hypostaseon seu Personarum eandem naturam Divinam habentium, ac in ea subsistentium: cum hoc tamen discrimine, quòd natura humana, & quælibet alia creata est communis suis singularibus personis solum per rationem, re autem diveria; at Natura Divina tribus Divinis Personis communis realiter est, & una ac eadem realiter ac numero indivisa in illis. Et hoc est mysterium altum, quod fides docet, Trinitas unus Deus, cui humana ratio velut captivam se se subdere debet.

VI. Fateor, hujus duplicis vocis *Substantia* seu *Natura*, & *Hypostasis* distinctionem, ac mentionem apud Veteres Ethnicos Philosophos non fieri, aut in sacris Literis ea nomina expressè non reperiri; eas tamen voces (teste Socrate L. 3. Hist. c. 7.) admitendas esse, Patres præcipuè in Synodo Alexandrina decrevere: *Tunc videlicet, cum opinionem refutant Sabellii, ne verborum inopiâ Trinitatem rem unam esse putaremus triplici nomine appellatam, sed ut potius unumquemque eorum, qui nominantur in Trinitate, Deum in propria persona esse credamus.*

Hanc veritatem confitetur etiam Danaus Opusc. 41. ubi de Sabellianis ait „ Itaque Patrem, Filium, & Spiritum Sanctum „ unam & eandem esse *hypostasim* volunt, quæ variis nominibus, „ prout necessitas & usus exigit appellata est, uti unum & idem „ Solis corpus lux, splendor, & calor pro diversis effectibus nominatur. Confirmant autem suam sententiam, quia Deuteron. 6. „ dictum est: *Audi Israel, Dominus Deus tuus, Deus unus est.* „ Quod certè perperam intellectum Judæos ipsos, à quibus prima „ hujus hæreseos fundamenta jacta sunt, in eundem errorem induxit, atque etiamnum hodie retinet: clamant enim *Polythiam*, „ idest Deorum multitudinem à Christianis Ethnicorum more renovari, si Tres in una & eadem Divina essentia Personæ re ipsâ „ distinctæ & subsistentes ponantur. Responsio verò facilis est. „ Nos unam quidem & eandem etiam numero, non tantum genere & specie *Ussian*, idest essentiam Divinam docere, constituere & defendere. In ea verò essentia tres *hypostases*, idest „ personas & subsistentias agnoscere, ut Veteres verterunt. Itaque neque Deos numero multos facimus, cum non separemus „ Divinam illam naturam; neque personas tollimus, quia quemque, idest Patrem Filium & Spiritum Sanctum in Divina essentia propriam personam habere demonstravimus. Ut autem „ hæc commodissimè docerentur voces *Ussias* & *hypostaseos* sunt à

„ Patribus receptæ, ut ait Socrates L. 3. c. 7., Ita Danæus in hoc cum Catholicis sentiens.

VII. Hanc distinctionem excogitarunt Veteres, non proprio studio, sed à Scripturis edocti, in quibus dum de Deo sermo est frequenter pluralitas unitati copulatur, ut Genes. 1. v. 26. ubi Deus ait: *Faciamus hominem ad imaginem & similitudinem nostram*: & v. 27. subditur: *Et creavit Deus hominem ad imaginem suam; ad imaginem Dei creavit illum*. Et pluralitas Personarum ad hominis formationem concurrens, & unitas Divinitatis, ad cujus imaginem factus est homo, & ideo *ad imaginem* dixit, non *ad imagines*, ut indicaret in illis pluribus unicum esset exemplar. Item Gen. 18. dicitur quod sedenti Abrahæ in valle Mambre: *Apparuit ei Dominus, & cum elevarisset oculos, apparuerunt ei tres viri stantes prope eam*. Abraham autem accurrit & adoravit in terram, & dixit: *Domine, si inveni gratiam in oculis tuis, ne transeas servum tuum*. Si apparuit Dominus, quomodo apparuerunt tres viri? Si tres viri, quomodo dixit Abraham *Domine, ne transeas*? Non aliâ ratione, nisi quia in illis tribus, licet Angeli essent, adoravit Abraham Trinitatem Personarum in unitate Divinitatis: & ideo dixit *Domine*. Genes. item 19. v. 24. legitur: *Dominus pluit super Sodomam & Gomorrhæam sulphur & ignem à Domino de Cælo, & subvertit Civitates eas*. Si ergo Deus est una persona, quis est hic Dominus qui pluit à Domino? Certè cum dixit *Dominus à Domino*, ostendit Filium & Patrem: Filius enim Dominus est, & à Domino, idest Patre, à quo habet esse & operari.

VIII. Rursus Psalm. 2. v. 7. David inducit Dominum dicentem ad Christum: *Filius meus es tu: Ego hodie genui te*. Et Psalm. 109. v. 3. *Ex utero ante Luciferum genui te*. Hæc certè Filio sibi consubstantiali non alicui ex Angelis Dominus dixit, ait Paulus Hebr. 1. v. 5. *Cui enim dixit aliquando Angelorum: Filius meus es tu; ego hodie genui te?* Non est autem possibile ut idem gignat se ipsum. Ergo alius est qui gignit, alius qui genitus est: alius Pater, alius Filius. Hanc veritatem demonstrat Psalm. 66. v. 7. illis verbis: *Benedicat nos Deus, Deus noster, benedicat nos Deus: & metuant eum omnes fines terræ*; ubi ter nominando Deum indicat Trinitatem personarum; addens autem & *metuant eum*, declarat omnes tres unum esse Deum. Idem testantur voces Seraphim Isaia 6. v. 3. invicem clamantium: *Sanctus, Sanctus, Sanctus, Dominus Deus exercituum*. Quibus dum ter *Sanctus* repetunt Trinitatem Personarum se venerari ostendunt, dum verò addunt, *Dominus Deus* unitatem Divinitatis profitentur. Alia etiam ex Novo Testamento clariora hujus veritatis adsunt testimonia, quæ addu-

adduxi, tum de Noeto agens, tum in Theolog. loco supra citato.

IX. Præstat igitur cum S. Epiphanio Hæres. 62. num. 3. dicere: *Non enim Deorum multitudinem invehimus, sed Monarchiam prædicamus. In ea autem prædicanda nequaquam aberramus; sed unâ Trinitatem confitemur, unitatem, inquam in Trinitate, & Trinitatem in unitate, unamque Patris & Filii & Spiritus Sancti Divinitatem. Nam neque se ipsum Filius genuit: neque Pater, ut esset Filius, esse Pater desit: neque Spiritus Sanctus se ipsum unquam Christum appellavit, sed Spiritum Christi, ac per Christum communicatum, procedentem à Patre, & accipientem à Filio. Subsistens est Pater, subsistens Filius, subsistens Spiritus Sanctus. Sed non confusio quadam est Trinitas, uti Sabellius credidit; nec ab æternitate sua gloriaque demutatur, ut Arius vanissimè docuit. Sed Trinitas perpetuò Trinitas fuit, nec ei quidquam accessit; cùm una sit Divinitas, una dominatio, una prædicanda celebrandaque gloria. Eodem nihilominus Trinitas numeratur, Pater, Filius, & Spiritus Sanctus: Non ut idem atque unum triplici appellatione declaretur; sed perfectâ re verè nomina sunt, perfectæque personæ, neque quidquam varium inest ac diversum. Pater ipse perpetuò Pater extitit, nec ullum unquam tempus fuit, quo Pater non esset. Semper enim perfectus ille Pater est, atque subsistens, ut & perfectus semper Filius semperque subsistens, verè à Patre genitus, absque initio tamen ac tempore; eoque modo, quem nulla explicare potest oratio. Non is Patris velut germanus frater est, nec esse cepit unquam, aut aliquando desit; sed legitimus perpetuò Filius est, existens cum Patre, ab eoque sinè tempore genitus, æqualis, Deus ex Deo, Lumen de Lumine, Deus verus de Deo vero, genitus, non creatus. Neque tamen aut ipse Pater est, aut Pater ipse Filius. Ac si Deus Pater est, & Filius utique erit, & Spiritus Sanctus. His Epiphanius Catholicam hanc veritatem adversùs Sabellianos exponit. Alia videri possunt in locis à me supra citatis.*

X. Hoc unum addo ex eodem Epiphanio num. 2., Sabellianos usos fuisse Libris tam Veteris, quàm Novi Testamenti, quædam ex eis feligentes ad sui erroris tegumentum. His adjecisse alios apocryphos, & præcipuè pseudo-Evangelium quod vocabant secundum Ægyptios, in quo multa Christum Discipulis suis secretò dixisse suo errori servientia fabulabantur: *Hunc autem errorem omnem (inquit Epiphanius) ejusque firmamentum ex apocryphis quibusdam hausserunt, præsertim ab Ægyptiorum Evangelio: hoc enim illi nomen indiderunt; in quo pleraque sunt hujus generis, quæ ex persona Salvatoris clam atque occultè velut mysteria proponuntur, quasi discipulis ipse declararet, eundem esse Patrem & Filium & Spiritum Sanctum. De hoc Evangelio secundum Ægyptios men-*

tionem facit Clemens Alexandr. L. 3. Strom. pag. 452. & 465., quo usum fuisse dicit Cassianum hæreticum, & fragmentum ab eodem Cassiano recitatum aîfert, quod in quatuor nobis traditis Evangeliiis non habetur.

Subjungit de Sabellianis Epiphanius: *Deinde quoties in aliquem ex simplicioribus ac rudioribus inciderint, qui exactam Divinarum Litterarum scientiam non habent, hunc in modum interrogant. Quid tandem, boni viri, dicemus? Unum habemus Deum, an tres? Quibus auditis religiosus ille, nec perfectâ ad cavendum scientiâ perpolitus, perturbatus illic eorum assentitur errori, ac Deum imprudens negat: negat, inquam, Filium ac Spiritum Sanctum. Sed de his satis.*

CAPUT XXXVIII.

De Origenianis seu Origeniis.

§. I.

Origeniani qui fuerint, & quis eorum auctor.

I. **H**Os ab Origenistis Origenem Adamantium auctorem habentibus (licet dubitanter) separat Epiphanius Hæref. 63. his verbis: *Nonnulli sunt, quos Origenios appellant: quæ hominum Secta non usquequaque diffunditur; proximo tamen loco post superiores illas hæc hæresis occurrit. Sed quamam de causa Origenis vocentur, nondum planè compers: Utrumnam ab Origene Adamantio, qui cognomento Syntactes, hoc est Lucubrador est dictus: an ab aliquo altero, quod, ut dixi, penitus ignoro, nec aliud præter ipsum nomen accepi.*

S. Augustinus autem Lib. de Hæref. cap. 42. ab alio quam ab Adamantio Origene ortum traxisse pronuntiat: *Origeniani, inquit, à quodam Origene dicti sunt, non ab illo qui sævè omnibus notus est, sed ab alio, nescio quo, vel sectatoribus ejus.* Idem sentit Damascenus Hæref. 63. Et quidem incredibile est, quod Hæretici isti, qui, ut dicam, infandæ libidini & corruptelæ corpora sua tradebant, ex Adamantii Origenis, qui severus castitatis custos tuit, imò & superstitiosus adeo, ut ad eam tuendam se ipsum castraverit (ut ex Nicephoro L. 5. Hist. c. 8.) scholâ prodierint.

II. Quinam iste Origenes hujus infamæ Sectæ auctor extiterit, adhuc sub judice lis est. Lambertus Danaus c. 42. de Hæref. solitâ suâ Monachorum Instituto calumniandi indole abreptus, dicit,

dirit, auctorem hujus Sectæ fuisse Origenem quemdam Monachum, de quo Sozomenus L. 6. Hist. c. 30. Sed falsitatis eum redarguit Sozomenus ipse, qui hunc Origenem laudat, & inter Monachos, qui in Monasterio circa Scetim sub Magni Antonii discipulatu maximè claruerunt recenset: *Eodem tempore, inquit, in Monasterio Scetis claruerunt, senes quidem, Origenes, qui ex Magni Antonii discipulis adhuc supererat, & Didymus & Chronion annos natus decem supra centum.* Et aliis recensitis, addit: *Cumque in Monastica Philosophia consensuissent, tunc temporis Monasteriis illicitis præerant.* Ex junioribus verò, & in media adhuc ætate constitutis multi probi, atque honesti viri unà cum superioribus illis florebant. En quales cum Origene erant sub Antonii schola Monachi, honesti & probi, non turpes ac inhonesti, quales fingit Danaus. Imò sibi etiam contradicit: dicit enim de his Origenianis: *Cæpisse verò videntur isti paulò post Gnosticos.* At si ita est, quomodo dicis, eos cœpisse ab Origene Antonii discipulo; cum iste ineunte seculo quarto floruerit, illi verò nempe Gnostici ineunte seculo secundo emerferint? Si Origeniani paulò post Gnosticos emerferunt, certè ante seculum quartum extitere, & proinde non ab Origene Antonii discipulo ortum habuere.

III. Porro quia Danaus hanc Sectam ab Origene Monacho ortam hæc arte confinxit, ut hinc statui præsentī Monachorum & Clericorum detrahendi anfam arripiat: unde subdit: *Hodie verò passim regnat inter Clericos in Papatu;* sciat, Epiphanio teste n. 2. ab Origenianis ipsis hoc se hausisse, qui humiliter illius temporis Clericos quasi idem facientes in suæ seditionis exemplum advocabant: *Interim verò, inquit, Catholicos illos Clericos accusant, qui Dilutas, quas vocant, & Contubernales feminas adsciscant, quos asserunt, clanculum istud ipsum propter hominum pudorem committere, ut & cum nequitia illa sepeliantur; & specie tenus ob aliorum verecundiam, castitatis nomine gloriantur.* Imò nec detuncis etiam si Episcopis parens, subdit: *Nonnulli ex iis certos homines, qui jam vitæ sancti sunt, ad me detulerunt, à quibus commissum hoc flagitii genus affirmarent, idque se ab ipsis, quas illi compresserant, mulierculis accepiisse.* Inter quos quendam Episcopum nominabant; qui in exiguo Palæstinae oppido multis annis Ecclesiæ præfuit, & contubernales istiusmodi feminas ad domesticum ministerium habuit: quem nos etiam ex Confessorum numero fuisse scimus. Sed iis, qui de eo istud affirmarent, & de mulierculis ipsis cognovisse dicerent, fidem nullam adhibendam putavimus. Nam eorum qui id jactabant improbitas necessitatem quandam attulit, ut aliquando crederemus, aliquando minime crederemus, quæ ad senis illius infamiam Episcopi post ejus obi-

sum referrent. Ita Epiphanius. An hoc responso dimittendi sint Danaus, & sui similes, qui ob conceptum in calibatum odium eâdem infamiae notâ aspergere conantur Clericos, & Monachos, judicet æquus ac pius Lector.

IV. Non diffiteor, in Ecclesiam etiam primitivam irrepsisse apud aliquos Clericos abusum in propria domo retinendi extraneas feminas, quas *Dilectas* sive *Agapetas* vocabant, non finè præjudicio castitatis & calibatus quem voverant. Contra hunc abutum declamat S. Hieronymus Epist. 18. ad Eustochium. Et ad eum extirpandum multum adlaboravit Chrysostomus, ut videre est Tom. 1. in Tract. *Adversus eos qui apud se habent virgines subintroductas.* Et alio: *Quod Regulares feminae viris cohabitare non debeant.* Unde in ejus Vita refert Palladius, hunc abusum tollere, laborasse præcipuè à Sacerdotibus, qui subintroductas haberent mulieres, dicens comparatione mali tolerabiliores esse lenones. At numquid propterea Hieronymus Chrysostomus aliique Veteres propter calibatus abusum, quem in aliquibus detestabantur, calibatum damnarunt, & ab omnibus eum sustulere, concedendo cuique sive Clerico, sive Presbytero, sive Monacho, sive Episcopo nuptias inire, & uxori copulari, ut exemplo sui Pseudo-Reformatoris Lutheri fecerunt, & adhuc faciunt Protestantes? Nequaquam. Non enim æquum existimarunt ob aliquorum transgressionem legem sanctam, & Dei servitio mancipatis consonam abrogare, sed abusus tollere ac transgressores punire, quod Canonibus in plurimis Conciliis editis præstitere.

Interim non inficiabor, etiam hodie non deesse, qui voti emissi inmemores illud aliquando violent: sunt tamen iique pluri, qui illud illibate totâ vitâ angelicâ puritate custodiunt. Dicat mihi Danaus. Cur propter illos, eosque paucos, scœdistragos, votum calibatus execratur, nec potius propter istorum tot millia ex utroque sexu illud non celebrat? Ex discipulis Christi unus exivit proditor, aliuseum negavit. Numquid propterea discipulatum Christi totum damnabit? Lex Divina vetat adulteria: & tamen ex nuptis dantur adulteri. Numquid propterea tollenda est Lex vetans pluribus feminis commisceri, & ne adulteria sequantur, concedendum ut cui voluerit quisque commisceatur? Si non: cur ob paucorum à lege calibatus deficientiam legem istam abrogandam vult Danaus?

V. Ad Origenianos revertendo. E' schola Epiphani's Carpocratis filii (de quo supra cap. 5. §. 4) eos produisse censet Epiphanius num. 1. dicens: *Horum verò hæresis ad Epiphani's dogma conformata videtur, de quo in Gnosticorum Secta sermonem antea fecimus.*

Atque

Atque ita ex Gnosticorum reliquiis mutato nomine exorta creditur. Familiare namque Gnosticis fuit sub diversis nominibus errores suos obtrudere, ut idem Epiphanius advertit Hæres. 26. n. 3. Unde ex eadem Gnosticorum Secta alii dicti sunt Borboriani, alii Coddiani, alii Militares, quidam Phibionitæ; sunt etiam qui Zachæos vocent, Barbelitas alii. Cùmque ibidem num. 17. referat, suâ ætate hujus Sectæ aliquos adhuc extitisse, & cum eis congressum habuisse, hos fuisse Origenianos credibile est, cum Hæres. 63. num. 2. ut supra dixi tradat, se à quibusdam ex illis accepisse, nonnullos ex Catholicis in Origenianorum, nempe Gnosticorum, flagitiis deprehensos fuisse.

§. II.

Origenianorum errores.

I. **O**rigenianorum error præcipuus in turpissimis operationibus, quas, ut olim Gnostici, cujus Sectæ ut dixi furculus erant, sibi licitas iaciebant, situs erat. Ita S. Augustinus de Hæres. cap. 42. *Turpis autem sunt operationis. Isti sunt nefanda facientes, sua corpora corruptioni tradentes.* Damascenus Hæres. 63. *Turpissimi isti sunt, ac nefariam præposteramque libidinem exercent, suaque corpora corrumpunt.* Quæ autem facerent, quantum pudor permittit, ex Epiphanio sic ieteram: *Nuptias repudiant: neque tamen obscenis libidinibus modum ullum adhibent; adeoque omni genere spurcitia & corpus suum & mentem animamque contaminant. Quidam enim ex iis monasticam vitam specie ipsâ profitentur, itidemque mulieres idem vitæ institutum præferunt. Qui omnes corruptis sunt corporibus: adeo ut cùm libidinem ipsi suam expleant, facinus, ut honestius dicam, illud perpetrent, quod Judæ filius Onas admisisse legitur (Genes. 38.) Nam ut iste cum Thamare coibat, ac libidini suæ satisfaciebat; neque quidquam tamen ad propagationem sobolis, cuiusmodi hominibus à Deo concessa est, efficiebat, imò verò sibi eo ipso modo, quo flagitium istud patrabat, conscisciebat injuriam. Hanc Origenianorū inicitatos tuisse dicit, & omne studium adhibentes, ne contumprata mulier prægnans fieret, semen ipsum in terram projiciebant, & pedibus conterebant. Ita pergit Epiphanius: *Nec minus isti Judæ, quem diximus, imitantur filium: dum nefariis suis sceleribus & abominandi humoris destillatione terram commaculant: imò verò profluvium illud suum in solo pedibus exterunt: ne surreptum ab impuris spiritibus ad ullam sætus procreationem possit excipi.**

II. Hæc ultima verba indicant, hosce impuros homines ad deji-

dejiciendum & conterendum semen proprium eâ opinione fuisse permotos, quam S. Th. q. 6. de Miraculis art. 8. ad 5. & 6. non improbabilem censet: nempe, quod etsi Dæmon per se ipsum generare non possit, potest tamen per semen ab homine assumptum, & in mulierem transfusum, sicut alias res naturales causare potest propria semina adhibendo, ut dicit August. L. 3. de Trinit. Et hoc potest facere Dæmon, *tum per velocitatem motus, tum adhibendo aliqua fomenta, per quæ calor naturalis conservetur in semine.* Ita ex S. Thoma. Ad quod impediendum Origeniani proprium semen nedum effundebant in terram, sed & pedibus conterebant. Verè digni, ut qui Onæ focii fuerunt in crimine, focii quoque fierent in pœna. De eo enim legitur Gen. 38. v. 16. *Et idcirco percussit eum Dominus, eò quod rem detestabilem faceret.*

III. Quare meritò eos ita increpat Epiphanius n. 3. Si foetum concipere malum est, ergo & ipsa corporum copulatio ad hoc instituta mala est: aut si corporum copulatio mala non est, nec ipsa prolis conceptio mala erit. Si enim terram seminare bonum est, ex ea fructus colligere bonum erit. Cur ergo isti nequam semen effundere volunt, fructum autem seminis recusant: nisi quia norunt, quod sicut copulatio corporum in ipsis mala erat, ita & foetus malè & illicitè conceptus erat, & ideo erubescabant? *Si omnino, inquit, concipere malum est; profectò non ob ipsam sobolis procreationem; sed ob corporum copulationem malum esse videbitur. Quare quid vos attinet voluptate superatos commiscere corpora? Aut si corporum illa conjunctio mala non est: ne idipsum quidem quod gignitur ad exitum perducere, malum est; deinde exemplum agriculturæ subjicit.*

IV. Postea Virginitatem præferens Nuptiis n. 4. Enim verò, inquit, *licet tantus nuptiis honor, quantus virginitati minime sit habendus, & hæc illis anteponenda sit.* Nuptias tamen etiam commendat in iis qui cum honestate & virtute, & propter finem ob quem à Deo institutæ sunt, nempe liberorum procreationem, eas exercent, & in illis etiam Deo serviunt, ut Abraham, Isaac &c. Virginitatem etiam & castimoniam laudat, sed in iis qui illibatam illam custodiunt, ut Elias, Eliseus, & Joannes, his verbis: *Verum & Abrahamum scimus liberis operam dedisse, & amicum interim Dei fuisse: perinde atque Isaacum & Jacobum & deinceps ceteros. Qui neque semetipsos execrandis flagitiis, ac fœdissimis usurpandis rebus inquinaverunt, neque rectè à Deo constitutæ liberorum per nuptias procreationi refragati sunt. Neque porro, qui inter ipsos castimoniam ac virginitatem instituerant, certaminis leges violaverunt, aut velut quibusdam præstigiis, hanc virtutis excitationem alio modo commutaverunt.*

vunt. Atque Elias sanè urbes ipsas propemodum ne ingrediebatur quidem, nec inter mulieres versabatur: sed in desertis locis assidue vivebat: quemadmodum Eliseus & Joannes, ac ceteri omnes; qui ut præclare ex Evangelico Domini mandato insignem illam imitationis Angelicæ notam atque formam exprimerent, semetipsos propter Regnum Cæleste castraverunt. Ita Epiphanius, & laudat sancte viventes in nuptiis, & celebrat virginitatem illibatè custodientes: à quorum utroque Origeniani deficiebant: nam & nuptias repudiabant, & corpora sua nefandis turpitudinibus tœdabant. Ab his refellendis abstinco, satis enim supra contra Gnosticos & alios dictum est.

V. Origeniani nedum aliquibus Veteris & Novi Testamenti Libris, sed & quibusdam aliis apocryphis utebantur. Ita idem Epiphanius num. 2. *Ceterum, inquit, varios tam Veteris, quam Novi Testamenti libros addibent; necnon & apocryphos quosdam, velut Andrea & aliorum Actus.* Mos iste Hæreticorum semper fuit, ut ex precedentibus apparet, nimirum ex Canonicis & legitimis Libros aliquos suscipere, aliquos pro libito rejicere, & loco istorum alios spurios & apocryphos adoptare: ut suis erroribus patrocinium, quod à primis sperare non poterant, ab hisce secundis impetrarent. At verè dici potest: Malâ causâ pejus patrocinium. Eos ergo relinquamus.

CAPUT XXXIX.

De Origene & Origenistis.

§. I.

Origenis gesta, & exitus.

1. **O**RIGENIS si juventam & mediam spectes ætatem, nemo eo gloriosior fuit: dictus propterea *Adamantius*, sive ob adamantinam ejus in fide constantiam, sive ob infractum in sacris Libris evolvendis studium, & novis conscribendis laborem. At si ejus in ætate progressum, exitumque consideres, nemo fuit eo infelicior. Alexandria natus parentem habuit Leonidem, ac simul in pietate, nec non in humanis Divinisque literis institutorem ac magistrum, qui puero quosdam Sacræ Scripturæ locos memoriæ mandare, ac sibi recitare quotidie jubebat. Quæ puer nedum lubenti animo exequabatur, sed obviâ Sacrarum Scripturarum lectione minimè contentus, altiores ac profundio-

res sensus scrutari satagebat : de quibus cum à Patre sciscitaretur, ille quidem coram, puerum objurgabat ; monens, ne supra captum ætatis ultra obvium & apertum Scripturæ sensum quidquam inquireret . Clam tamen se tali filio donatum Deo gratias agebat , ac sæpè dormientis pueri cubiculum ingressus, pectus ejus nudasse dicitur , ac velut quoddam Divini Spiritus sacrarium deosculatus fuisse .

II. Interea Severo annum Imperii decimum agente , Alexandria ac totius Ægypti Præfecturam obtinente Læto, Episcopatum verò Ecclesiarum illarum post Juliani obitum Demetrio recens adepto , cum persecutionis ardentissimum flagraret incendium , atque innumerabiles martyrio coronarentur , Origeni adhuc admodum puero tanta martyrii incescit cupido , ut se periculis ipsis objiceret , & ultrò ad certamen prosilire gestiret , adeò ut mors illi procul dubio evenisset , nisi Divinâ sic statuente providentiâ , matris precibus detentus fuisset . Verùm cum vehementius incitatum vidisset , Leonidâ patre capto ac in vinculis detento , pia mater omni ejus veste absconditâ domi manere vel invitum coegit . Quare frequentibus literis patrem adibat, eum ad martyrium vehementer cohortans , ac his inter cætera verbis : *Cave, mi pater, ne nostrâ causâ sententiam mutes .*

III. Cæterum patre martyrii coronam adepto , ipse cum matre , & parvulis fratribus sex orbus relictus est , ac opibus paternis in fiscum redactis , ad summam rerum egestatem redactus est . Divina tamen providentia non defuit : nam mulier quædam nobilis & opibus potens summâ humanitate ipsum excepit ac fovit . Sed cum in ejus domo Paulo cuidam Antiochiæ oriundo , hæreticorum qui tunc Alexandriæ erant (fortè Marcionitarum aut Valentinianorum) propugnatori convivere cogeretur , adduci nunquam potuit , ut cum eo in precibus communicaret . Porro cum Græcis disciplinis primùm à patre fuisset imbutus , & post ejus obitum totum se liberalibus studiis vehementius addixisset , adeò ut sufficientem artis Grammaticæ peritiam sibi comparasset , paulò post patris mortem eam artem professus , necessaria vitæ subsidia abundè , ut in illa ætate , sibi comparavit . Hæc ex Lib. 6. Hist. Eusebii cap. 2. excerpti .

IV. Decimum octavum ætatis agebat annum , cum omnibus ob persecutionem pullis ac fugatis , nemine superstite , qui tradendis fidei nostræ documentis operam daret , dimissâ ceu minùs necessariâ Grammaticâ scholâ , hoc salutare opus Verbi Dei tradendâ alacriter Origènes assumpsit , & ad illud audiendum phœres etiam Gentiles conveniebant . Quo in munere tantâ se se exercuit caritate ,

tate, ut cum Sanctis Martyribus five notis five ignotis, nedum in carceribus detentis, aut dum ad extremam uique sententiam interrogarentur, comes adesset: sed ad eos dum ad supplicium ducerentur, accederet, eosque confirmans in osculo salutaret, ab infana Gentilium multitudine lapidibus obrutus fuisset, nisi Deus præter spem adiutrice manu ipsum seruasset. Adeoque, Ethnicorum furor in illum exarsit, ut scientes, multos ad eum sacris fidei documentis imbuendos convenire, dispositis militibus domum in qua manebat obsiderent, sic, ut in tota civitate Alexandrina vix locum obtineret, & dum de una in alias ædes migraret, undique fugaretur.

Nihilominus persistens intrepidus plurimos ad Christum traherebat. Quin se totum huic muneri dicans, Scholam Grammaticæ, utpote huic sancto operi minimè consentaneam, penitus abiecit, ac ne alieno studio opus haberet, venditis præcæ doctrinæ voluminibus, quæ eleganter conscripta penes se habebat, contentus fuit quatuor obolis, qui ab emtore voluminum singulos in dies ei pendebantur. Præter labores quos die exercebat, noctis maximam partem Divinarum Scripturarum studiis impendebat. Quibus austerum vitæ genus conjungebat jejuniis se macerans, partem noctis quam somno indulgebat, non in strato, sed super nudo solo transigens, unicam tunicam habens, diù nudis omnino pedibus incedens etiam rigente hyeme, à vino abstinens, ac demum etiam sibi à pietate multorum oblata modestè recusans, adeò ut admirabili ejus exemplo permoti plures etiam ex Gentilibus ejus se magisterio subicerent, qui ab eo veram fidem edocti persecutionis illius tempore adeo inclaruere, ut aliqui eorum comprehensi martyrio coronati sint. Hæc ab Eusebio L. 6. cap. 3. sumta sunt. Qui cap. 4. numerans illos primo loco ponit Plutarchum, cui cum ad mortem duceretur, & individuus comes Origenes usque ad terminum ei adhereret, parum abfuit, quin ab illius occideretur civibus, utpote qui necis illius auctor fuisset. Post hunc ex Origenis discipulis martyr fuit Serenus igne probatus. Tertius Heraclides, quartus Heron ambo securi percussi. Prior dum esset Catechumenus, alter verò neophytus. Quintus alter nomine Serenus, qui post plurima pro Christo superata tormenta capite truncatus dicitur. Sed ex mulieribus quoque Herais quædam adhuc catechumena per ignem Baptismum adepta ex hac luce migravit.

V. Tanto castitatis amore ardebat Origenes, ut ad eam tuendam audax facinus perpetrarit, ut refert Eusebius L. 6. c. 8. Dum enim Alexandrinam scholam Catechumenis & aliis in fide in-

struendis regeret, & ad eum non solum viri, sed & mulieres formam elegantes & juventutis floridam plerumque convenirent, ille, adhuc juvenis castitati suæ periculum timens se ipsum eunuchum fecit. Quamvis autem hoc facinus occultare pro viribus satageret, latere tamen adeo non potuit, quin ad aures Demetrii Episcopi perveniret: qui primò juvenis audaciam admiratus, alacritatem fidei in eo collaudavit ac bono animo esse iussit, eumque permisit cœptum opus cum ingenti laude & fructu proficere. Sed cum postea rescivisset, eum à Theoctisto Cæsareæ & Alexandro Jerosolymorum Episcopis Sacerdotio fuisse insignitum (sive zelo permotus, sive humani aliquid passus) repente mutatus, datis ad totius Orbis Episcopos literis, facinus illud Origenis palam profcindere, ejusque Ordinationem impugnare cœpit, tanquam Canonico obitante impedimento factam, ac proinde nullam. Quod, an jure fecerit, adhuc disceptatur. Affirmat Baronius, negant alii, inter quos Natalis Alexandre Dissert. 15. seculi 2. qu. 1.

VI. Zephyrino in Cathedra Petri sedente Romam profectus est Origenes, Ecclesiæ illius omnium celeberrimæ & antiquissimæ coram visendæ studio. Inde Alexandriam reversus, Demetrio ipso Episcopo (fortè jam placato) hortante, & tantum non supplicante, solitum docendi munus resumit. Verùm cum regendæ scholæ ob confluentium numerum à primo lucis ortu usque ad vesperam solus non sufficeret, Heraclam discipulorum suorum peritissimum in parte n. laboris vocavit, commissâ ei Catechumenorum, & recens Baptizatorum instructione, sibi verò perfectiores docendos reservavit. Hæc Eusebius L. 6. Hist. c. 15.

VII. Sacrarum Literarum intelligentiæ studium, cui impensè vacabat, cum impulit, ut linguam hebraicam disceret, ac Vulgatas Versiones Septuaginta Interpretum, Aquila, Symmachi, & Theodotionis sollicitè quæreret. Quod juvante Deo ei feliciter evenit: nam tres antiquissimas Versiones Scripturæ Sacre reperit: unam Nicopoli ad Actium litus, aliam alibi æquè fausto eventu, tertiam in dolio repertam in urbe Jericho, Antonini Caracallæ qui Severi filius fuit temporibus. Ex his adornavit Opus quod Tetrapla inscripsit, quatuor columnis per singulas paginas distinctum, quarum una Versionem I. XX. Interpretum, altera translationem Aquilæ, tertia Symmachi, quarta Theodotionis exhibebat. Hexapla idest Sextupla sex columnis pariter disposita consecit, in quibus præter quatuor priores, aliæ duæ ignoti Auctoris interpretationes visebantur. Octopla tandem addidit octo columnas exhibentia, quæ præter sex priores, textum etiam hebraicum, & interpretationem in dolio repertam referebant. De his Eusebius Lib. 6. Hist.

Hist. cap. 16. Epiphanius L. de Mensuris & Ponderibus. S. Hieronymus in cap. 3. Ep. ad Titum & Nicephorus L. 5. Hist. c. 11.

VIII. Quamvis autem in Sacris Scripturis occupatus, Philosophiam tamen præsertim Pythagoricam & Platoniam non deseruit, sperans has sibi adjumento fore ad Hæreticorum confutationem, & Sacræ Scripturæ interpretationem. Propterea cum Ammonio Christiano Philosopho (nunquam tamen Fidei desertore, ut falsò ei Porphyrius imponit) qui hanc scientiam Alexandriæ profitebatur, studiorum iniit societatem. Hæc & alia refert Eusebius L. 6. Hist. c. 19. His aded celebre Origenis nomen evalit, ut ab omnibus pro Sacris Scripturis interpretandis exquireretur; ac plures ab hæresi ad Catholicam Fidem reduceret. Inter hos Ambrosius quidam, de quo Eusebius ibid. cap. 18., Valentinâ (seu Marcionis Sectâ ut vult S. Hieron. Lib. de Script. Eccles.) hæresi ejuratâ, ad rectæ fidei professionem transiit. Hic Origenem impensè fovit, mecœnatis in sacris studiis beneficentiam ipsi exhibens. Septem enim Scribas, qui ei dictanti præstò essent, non pauciores librariorum, & puellas ad eleganter scribendum exercitatas ei addixit, quibus necessaria subministrabat. Ita Eusebius Lib. 6. cap. 23. Unde huic Libros contra Celsum Origenes nuncupavit. A Mamea matre Alexandri Imperatoris vocatus Antiochiam venit, ubi summo honore exceptus est. Ad Philippum, qui primus ex Romanis Imperatoribus Christianus à quibusdam putatur, & ad Matrem ejus literas dedit, quarum S. Hieronymus meminit.

IX. In Decii persecutione multa pro Fide passus fuit Origenes, ut refert Eusebius L. 6. Hist. c. 39. Captus enim & in vincula coniectus multos pertulit cruciatus, terrei torquis ærumnas, multorum dierum spatio pedes in nervo ad quatuor usque foraminum interstitia distentos, ignium minas, & alia, quæ omnia constanti nè pertulit. Quomodo autem à cruciatibus, & carcere liber evaserit, Eusebius silet, solum dicens: *Cujusmodi tandem barum rerum exitus fuerit, judice omni virum nisu ambitiosè contendente, ne illum interficeret: denique quos sermones post hæc, quàmque utiles iis qui consolatione indigent reliquerit, plurimæ ejus epistolæ non minus verè, quàm accuratè commemorant.* Quibus Eusebius Origenis constantiam in fide commendare videtur.

X. S. Epiphanius verò ab opposito, cum factò saltem fidem negatè accusat, thus Idolis adolendo, atque ad hoc nefas adauctum fuisse metu stupri sibi ab Æthiope inferendi, quem Judex ad hunc finem conduxerat. Ita enim ait Hæres. 64. num. 2. refert: *Tum illud verò Diaboli calliditate improbitatis artifices commenti sunt,*

ut ad turpitudinis necessitatem hominem adigerent, atque ejusmodi pœnam statuerent, ut ad illius corpori stuprum inferendum *Æthiopem* compararent. Ad hæc *Origenes* fraudulentum illud *Diaboli* consilium non sustinens, vocem illam edidit, quâ duobus illis propositis, sacrificare maluit. Quamquam non omnino spontè illud suâ præstitisse vulgò dicitur, sed ubi semel hoc se esse faciurum assensus est, tunc in manum illius impositum in subjectum aræ focum excussisse *Gentiles* afferunt. Hoc modo & à martyrii gloria *Confessorum* Martyrumque, qui illius temporibus erant judicio excidit, & ab Ecclesia dejectus est. Accidit hoc *Alexandriæ*, ubi cum exprobrantium ludibria ferre non posset, illinc abiit, & in *Palæstina* sive *Judeæ* domicilium constituit. Fortè contigit, ut *Ierosolymam* profectus, ut erat sacrarum litterarum egregius & eruditissimus interpres, ab *Sacerdotum* collegio (nam & ipse priusquam sacrificaret ad sacerdotii gradum pervenisse dicitur) ad verba in Ecclesia facienda sollicitaretur. Cumque ab iis, uti dixi, qui tunc sacerdotalem in Ecclesia dignitatem obtinebant, vi propemodum ad id agendum impelleretur, ille in pedes consurgens, reliquis versibus prætermisiss, postquam hunc unum è *Psalmo* quadragesimo nono locum attulisset, Peccatori autem dixit *Deus*: Quare tu enarras justitias meas, & allumis Testamentum meum per os tuum, & Complicatum librum reddidit, fletusque & lacrymans resedit, fletibus cum eo qui aderant universi. Hactenus *Epiphanius*.

XI. Hoc factum, quod primus & solus *Epiphanius* narrat, cum nemo alius ex veteribus Patribus ejus meminerit, in controversiam vertitur. Qui pro ejus veritate stant, *Leontium* afferunt L. de Sectis act. 10. qui sexto seculo vixit. *Nemesium* seculi 4. auctorem L. de Natura hominis cap. 30. *Justinianum* Imperatorem in Tract. adversus *Origenem* à Synodo quinta probato, *Nicetam* L. 4. *Thefauri* Hæref. 31. *Anastasium* Bibliothecarium in Hist. ad ann. Christi 244. *Nicephorum* Lib. 5. Hist. Eccles. c. 32. *Zonaram* L. 2. Hist. Glycani Annal. p. 3. Quos ex Recentioribus sequuntur *Daniel Huetius*, *Petavius*, *Alexandre*, *Pagi* &c. E contra tamen *Origenem* ab hoc lapsu immunem volunt *Baronius*, & alii, quibus *Tilmontius* Notâ 22. in *Origenem* subscribit; volentes *Epiphanium* in hoc falso rumore processisse, vel hæc ab aliquo *Origeniani* nominis hoste fuisse in textum S. *Epiphani*i intrusa. Quod ex silentio SS. *Augustini*, *Hieronymi* & aliorum PP. se colligere putant. In hac questione prout sibi magis libuerit quisque sentiat.

XII. Obiit *Origenes* anno Christi 256. Galli & *Volusiani* Imperatorum initio, septuagesimo ætatis anno, ut testatur *Eusebius* Lib. 7. Hist. cap. 1. dicens: Quo tempore *Origenes* septuagesimo ætatis anno ex hac vita migravit. *Nicephorus* quoque L. 5. Hist. cap. 34.

Gal-

Gallo, inquit, post Decium imperante, Origenes undeseptuaginta annis peractis, miserabiliter infelix obiit. Tyri mortuus creditur, ibique sepultus, teste S. Hieronymo L. de Script. Eccles. c. 54.

§. II.

De Origenis Fide.

I. Sicut, ut dicebam, non defuere nec defunt, qui Origenem à lapsu in idololatriam vindicare contendunt: ita fuere & sunt, qui eum ab omni errore in Fide purgare conati sint & adhuc conentur. At licet cum primis contendere noluerim, hos tamen secundos dimittere propter oppositum Patrum & Ecclesiæ iudicium conscientia vetat. Qui ergo Origenem ab omni erroris nævo purgare conati sunt, ex antiquis fuere Eusebius Cæsariensis, qui in Historia ubique de eo & ejus scriptis cum laude loquitur, ut L. 6. Hist. c. 39. supra indicavi, cui Pamphilus Martyr adjungitur; Rufinus Aquileensis Presbyter, Auctor anonymus apud Photium Codice 117. E Recentioribus Joannes Picus Mirandulanus, Jacobus Merlinus, Genebrardus, Binetus, Petrus Halloxius, & Daniel Huetius, qui in L. 2. Origenianorum in Origenem videtur propensior.

II. Ab opposito tamen stat communis ferè Patrum sententia. Mitto Demetrium Alexandria Episcopum, qui ipsum adhuc viventem damnavit anathemate, contra quem & omnes totius Orbis Episcopos & Clericos Epistolam Origenes scripsit, ut refert S. Hieronymus in Apologia adversus Rufinum. Nam fortè Demetrius ad hoc anathema contra Origenem processit, non propter errorem in fide, sed propter ejus Ordinationem, cujus post evirationem incapax esse, ut supra dixi, eum Demetrius existimavit, ideoque illam publicè improbavit. Primus ergo doctrinam Origenis post obitum impugnavit Methodius Tyri Episcopus, qui sub Diocletiani imperio floruit, cujus inter Opera Libros de Resurrectione contra Origenem recenset S. Hieron. L. de Script. Eccles. c. 83. cujus Operis fragmentum exhibet Epiphanius Hær. 64. n. 12. & 40. & Photius Cod. 234. Ejus errores impugnavit & S. Petrus Alexandrinus Methodio coævus, ex quo testimonia adversus Origenem profert Justinianus in Tractatu ad Mennam.

III. Accedant primò Theophilus Alexandrinus tum in Epist. ad Epiphanium Salamina Cypri Episcopum (quæ inter Hieronymianas olim 67. modò est 111.) ubi eum adhortatur ut modis omnibus admittatur, quò convocatâ Synodo ipse Origenes nominatim & heresis nefaria condemnatur. (quod ipse Alexandria coactâ Syno-

Synodo jam præstitera) & causam sui pro fide zeli subjungens : *Didici enim, inquit, quod calumniatores veræ fidei Ammonius, Eusebius, & Eutinius novo pro hæresi furore baccantes, Constantinopolim navigarint, ut & novos, si quos valuerint, decipiant : & veteribus suæ impietatis sociis jungantur.* Eodem zelo fertur in Epist. ad S. Hieronymum (antea 69. modò 60.) dolens, quod Origenis hæresis in Monasteriis Nitriæ vigeret. Et in Epist. ad eundem antea 72. modò 62. inter Hieronymianas, monet, ut explosis Origenistis, eos etiam qui clam Origenem sequuntur ejiciat.

IV. Secundò, S. Cyrillus Alexandrinus in Epist. ad Monachos, qui erant in Phua, errorem tollentem carnis resurrectionem tribuit Origeni his verbis : *Hujusmodi autem improba opinio ab Origenis dementia est: quem & Patres nostri ut veri depravatorem abdicaverunt, & anathematizaverant. Non enim sensit ut Christianus, sed Paganorum secutus ineptias & nugæ, in errorem incidit. Hinc autem ei contigit morbi principium: Affevert, animas ante corpora esse, & à sanctimonia abductas fuisse in cupiditates ac nequitiam, descivisseque à Deo, à quo hanc ob causam damnatæ sunt & corpori obstrictæ, suntque in carne tanquam in carcere.*

V. Tertiò, S. Epiphanius, præter ea quæ in Panario scribit Hæresi 64. ubi Origenis capitalia dogmata (ut infra dicam) recenset, ac de eo hoc scribit elogium : *Qui cum adversus superiores omnes hæreses disputasse, ac singulas evertisse visus sit, postea tamen suam & ipse hæresim, & quidem haud vulgarem, in Orbem terrarum evomuit.* In Epistola etiam ad Joannem Jerosolymitanum, quæ inter Hieronymianas ante 60. modò 110., inter alia cum monet, ut ab erroribus Origenis abstineat, quâ occasione plures Origenis indicat errores, ut de Trinitatis Personis, de Animabus antea in supernis creatis, postea in hunc Mundum dejectis & in corpora ut in sepulchra relegatis, de Diabolis ad pristinam dignitatem redituris, de carnis resurrectione ab eo negata, & aliis ejus erroribus. Et Epistolam concludit, ut invigilet, ut Rufinus ab hæresi Origenis recedat, & Palladium caveat, quondam quidem sibi carum, sed modò misericordiâ Dei indigentem, quia Origenis hæresim prædicat, & docet.

VI. Quartò, S. Hieronymus Epist. ad Pammachium & Oceanum prius 65. nunc 41. de Erroribus Origenis, cum ab Origenistis de inconstantia argueretur, quod nempè, cum olim Origenem summis laudibus celebrasset, modò convitiis illum proscinderet : postquam ostendit, se laudasse quidem Origenis ingenium, non tamen dogma : *Laudavi, inquit, interpretem, non dogmatistam, ingenium non fidem, Philosophum non Apostolum:* post multa sic ad

ad eos convertitur : *Si Origenem nunquam secutus sum, frustra infamare me queritis. Si discipulus ejus fui, imitamini pœnitentem. Credidistis confitenti, credite & neganti. Si ista, ut ais, inquit, noveras, cur eum laudasti in Opusculis tuis? Et bodie laudarem, nisi vos ejus laudaretis errores. Non mihi displiceret ingenium, nisi quibusdam ejus placeret impietas. Et Apostolus præcipit (1. Theil. 5.) „ Omnia legentes, quæ bona sunt retinentes „. Et ostenso, aliquorum Opera, in quibus errores continentur, legi, & laborem probari, non tamen probari errores, ad Origenem veniens : *Confitemini*, inquit, & vos, in quibusdam errare Origenem, & mi (verbum) ultra non faciam. *Dicite, eum malè sensisse de Filio, pejus de Spiritu Sancto, animarum de Cælo ruinas impiè protulisse, resurrectionem carnis verbo tantùm confiteri, cætrum assertionem destruere : & post multa secula atque unam omnium restitutionem idipsam fore Gabrielem quod Diabolum, Paulum quod Caipham, virgines quod prostibulas. Quum hac rejeceritis, & quasi censoriâ virgulâ separaveritis à fide Ecclesiæ, tutò legam cætera : nec venena jam timebo, quum antidotum præbitero.* Hanc Hieronymi Regulam in Ecclesia Catholica etiam nunc servamus. Origenis Opera publicè prostant : quod in eis bonum est, tenemus, ingenium laudamus : quod à vera fide alienum est, detestamur.*

Rursus in Apologia adversus Ruffinum procacem Origenis defenforem Lib. 2. non multò ante finem ait : *Probo ego inter multa Origenis mala, hæc maximè hæretica : Dei Filium creaturam ; Spiritum Sanctum ministrum ; mundos innumerabiles, æternis sibi seculis succedentes : Angelos versos in animas hominum : animam Salvatoris fuisse antequam nasceretur ex Maria ; & hæc esse, quæ quum in forma Dei esset, non est rapiam arbitrata æqualem se esse Deo ; sed se exinanivit formam servi accipiens : resurrectionem nostrorum corporum sic futuram, ut eadem membra non habeant ; quia cessantibus membrorum officiis, superflud membra reddantur ; ipsaque corpora tenuia & spiritalia paulatim evanescere, & in aëram tenuem atque in nihilum dissipari : In restitutione omnium quando Indulgentia principalis venerit, Cherubim & Seraphim, Thronos, Principatus, Dominationes, Virtutes, Potestates, Archangelos, Angelos, Diabolum, Dæmones, animas omnium hominum, tam Christianorum, quàm Judæorum, & Gentilium unius conditionis & mensuræ fore. Quumque ad formam & libram æquitatis pervenerint, & rationabiles creaturas omni corporum face depositâ, novus de mundi exilio populi revertentis monstraverit exercitus ; tunc rursus ex alio principio fieri mundum alium & alia corpora, quibus labentes de Cælo anima vestiantur, ut verendum nobis sit, ne qui nunc viri sumus, postea nascamur in semi-*

nas, & quæ hodie virgo, tunc fortè prostibulum sit. Hæc in Origenis Libris ego hæretica doceo: tu ostende, in quo ejus Opere his contraria legeris. Hæc Hieronymus.

VII. Quintò, S. Augustinus L. de Hæres. cap. 43. ubi retulit, quosdam Origenis defensores conari ipsum immuicem tueri ab erroribus, quibus ab Epiphanio traducitur circa mortuorum resurrectionem & Christum & Spiritum Sanctum; cum re verâ docuerit, Patrem, Filium & Spiritum Sanctum unius ejusdemque substantiæ esse; nec carnis resurrectionem repulisse: *Quamvis & in istis enim convincere studeant, qui ejus plura legerunt, addit. Sed sunt hujus Origenis alia dogmata, quæ Catholica Ecclesia omnino non recipit; in quibus ipsam falsi arguit, nec potest ab ejus defensoribus excusari, maxime de purgatione & liberatione, & rursus post longum tempus ad eadem mala revolutione rationalis universa creaturæ. Quis enim Catholicus Christianus vel doctus, vel indoctus non vehementer exhorreat, eam quam dicit purgationem malorum, idest, etiam eos qui hanc vitam in flagitiis & facinoribus & sacrilegiis atque impietatibus quamlibet maximis finierunt, ipsum etiam postremò Diabolum atque Angelos ejus, quamvis post longissima tempora, purgatos atque liberatos Regno Dei lucique restitui, & rursus post longissima tempora omnes qui liberati sunt, ad hæc mala denuò relabi & recerti, & has vices alternantes beatitudinum & miseriæ rationalis creaturæ semper fuisse, semper fore? De qua vanissima impietate adversus Philosophos, à quibus ista didicit Origenes, in Libris de Civitate Dei diligentissime disputavi.*

Hic L. 21. de Civit. Dei c. 17. agens contra quosdam, qui putabant, aliquorum saltem hominum damnatorum pœnas non fore æternas, ait: *Qua in re misericordior profectò fuit Origenes, qui & ipsum Diabolum atque Angelos ejus post graviora pro meritis & diuturniora supplicia ex illis cruciatibus eruendos, atque sociandos Sanctis Angelis credidit. Sed illum & propter hoc, & propter alia novacula, & maxime propter alternantes sine cessatione beatitudines & miseriæ, & statutis seculorum intervallis ab istis ad illas, atque ab illis ad istas itus ac reditus interminabiles, non immeritò reprobavit Ecclesia: quia & hoc quod misericors videbatur amisit, faciendo Sanctis veras miseriæ, quibus pœnas luerent, & falsas beatitudines, in quibus verum ac securum, hoc est sine timore certum sempiterni gaudii bonum non haberent.*

VIII. At dimidiis Patribus videamus, quale fuerit de doctrinâ, fide, & libris Origenis Ecclesiæ judicium. Primò, cum ejusque doctrinam damnatam fuisse in Synodo Alexandrina supra animadverti à Theophilo ex totius Ægypti, Libyæ, & Pentapolis Pro-

Provinciis congregata. In qua Sulpitius Severus in Dialogis n. 3. sicut in frequentibus aliis Synodis, dicit, Libros Origenis legi aut retineri interdictiones fuisse. Et licet multi reclamarent, Sacerdotes tamen in decreto perstiterunt, adeo ut Origenis fautores Monachi per diversas oras fugati sint. Secundò, ut supra dixi, eodem Theophilo movente damnata fuit doctrina Origenis à S. Epiphanio in Synodo Cypri. Tertiò, Origenis doctrinam in Synodo damnavit Anastasius Romanus Pontifex, cujus judicium totus Occidens secutus est. Unde Theophilus Alexandrinus, ut refert Justinianus Imperator in Tract. adversus Origenis errores, ad quosdam Monachos Origeni assentientes scribit, ut anathematizent Origenem ceterosque hereticos, exemplo suo & Anastasii Sanctæ Romanæ Ecclesiæ Episcopi, quem & universa Occidentis Episcoporum sequitur Synodus, quæ accepit ac probavit Alexandrinæ Ecclesiæ sententiam in impium latam.

IX. Porro quanto zelo Anastasius Romanus Pontifex sollicitus esset, ne doctrina erronea Origenis per Orbem Catholicum diffunderetur, declaravit ipse in Epistola ad Joannem Jerosolymitanum de translatione Librorum Periarcon Origenis à Rufino adornata. Eâ enim reprobata tanquam Operis continentis doctrinam impiam & acceptâ ab Apostolis fidei contrariam: *Ab sit hac, inquit, ab Ecclesia Romana nequaquam Catholica disciplina. Nunquam profectò eveniet, ut aliquâ hoc admittamus ratione, quod jure meritoque damnamus. Quapropter in toto Orbe Christi Dei nostri diffusa providentia probare dignabitur, accipere nos omnino non posse, quæ Ecclesiam maculent, probatos mores evertant, aures circumstantium vulnerent, jurgia, iras, dissensionesque disponant. Quare nosce, qualem Epistolam ad fratrem & Coepiscopum nostrum Venerium diligentiori curâ perscriptam parvitas nostra transmiserit, sibi quæ hanc conscientiam fecerim, quòd non superflua laborem formidine, neque vano timore sollicitè; mihi certè cura non deerit Evangelii fidem circa meos custodire populos, partesque populi mei per quaque spatia diversa terrarum diffusas, quantum possim literis convenire: ne quæ profana interpretationis origo subrepat, quæ devotas mentes immissa sibi caligine labefactare conetur. Illud quoque quod evenisse gaudeo, tacere non potui, beatissimorum Principum (Honorii & Arcadii) mansisse responsa, quibus unusquisque Deo serviens, ab Origenis lectione revocetur: damnandumque sententiâ Principum, quem lætiorum profana prodiderit. Ecce in Anastasio solita Romanæ Cathedralis omnium Ecclesiarum sollicitudo pro fide facta tecla in eis tuenda. Ecce quanta Origenistarum protervia, quam ut deprimeret Principum brachium implorare Ecclesia coacta fuit. Num-*

quid ab errore immunis erat Origenis doctrina, ad quam à fidelibus averterendum totius Orbis Episcopi Romanique Pontifices adeò laborarunt, ut etiam Principum implorarint auxilium?

X. Præ ceteris manum validam admovit ad Origenem eliminandum seculo sexto Justinianus Imperator, edito adversus ipsum tractatu, ubi illius errorem palam facit, quem cum ad Synodum Constantinopolitanam II. ordine quintam direxit, moti illius Synodi Patres Origenem ejusque doctrinam diris devoverunt. Justiniani Tractatum istum, seu Epistolam ad Mennam pro Ecclesiæ judicio habendam esse, ex eo apparet, quia Pelagius Romanæ Ecclesiæ Diacono, & Apocrisario instante dictata fuit & postmodum à Vigilio Pontifice, & tandem in V. Synodo, ut dicam, approbata. Legitur per extensum in Tomo 3. Concil. edit. Harduini ann. 545. Novem anathemata in Origenis doctrinam continet. Et tandem impingit *Anathema & Origeni, qui & Adamantius, qui hæc exposuit unâ cum nefaria, atque execrabili scelestaque ejus doctrina; & curvis qui ea sentiunt, aut defendat, aut ullo modo prorsus quocumque tempore tueri præsumat.*

XI. Vigiliij auctoritatem in damnando tunc Origenem intercessisse, affirmat Cassiodorus Divin. Literarum Instit. Lib. 1. c. 1., ubi de Origene, pro quo defendendo multi stabant: *Hunc, inquit, licet tot Patrum impugnet auctoritas, presenti tamen tempore, & à Vigilio beatissimo Papa, denuò constat esse damnatum.* Subditque damnationem antea factam à Theophilo Alexandrino, & Epiphanio, de quibus supra. Nec solus Romanus Pontifex Vigilius, sed & cæteri Orientis Patriarchæ Justiniani Edictum comprobando, eique subscribendo suum fecerunt. Rem gestam sic narrat Liberatus Archidiaconus Carthaginensis in Breviario cap. 23. *Sed redeunte Pelagio Constantinopolim, Monachi quidam ab Jerusalem, per quos Pelagius in Gazam transitum habuit, venerunt ad eum in comitatu, portantes Capitula de Libris Origenis excerpta, volentes agere apud Imperatorem ut Origenes damnaretur, ipsaque Capitula talia docentia. Annuit Imperator facillimè: gaudens se de talibus causis judicium ferre. Jubente eo dictata est in Origenem & illa Capitula anathematis damnatio: quam subscribentes unâ cum Menna Archiepiscopo apud Constantinopolim reperti; deinde directâ est Vigilio Romano Episcopo, Zoilo Alexandrino, Euphemio Antiocheno, & Petro Jerusalemitano. Quibus eam accipientibus, Origenes damnatus est mortuus, qui vivens olim fuerat ante damnatus.* Num magis authentica desiderari poterat damnatio à quatuor Ecclesiæ Patriarchis subscripta?

XII. Nec defuit Generale Concilium. Fuit hoc Œcumenicum

cum V. & Constantinopolitanum II. anno 545. Vigilio Papa congregatum. Acceptis Justiniani Literis Origenis damnationem, urgentibus, necnon ejusdem Edicto à Romano Pontifice, & tribus Orientis Patriarchis approbato & subscripto, illius Synodi Patres numero centum sexaginta quinque anathematismata quindecim contra Origenem ejusque errores protulere, ut legere est Tom. 3. Concil. edit. Harduini. Testis est hujus rei Evagrius L. 4. Hist. Eccl. c. 38., ubi de Gestis in Quinta Synodo agens post trium Capitulorum enarratam damnationem, subjungit: *Cum autem libelli ab Eulogio, Conone, Cyriaco, & Pancratio Monachis dati essent contra dogmata Origenis Adamantii, & contra eos qui impietatem atque errorem illius sequebantur; de his Justinianus Synodum, quæ congregata erat, consuluit, subiecto Epistolæ suæ exemplari ejusdem libelli, & iis quæ ad Vigilium eisdem de rebus scripserat. Ex quibus omnibus deprehendere licet, id studium fuisse Origeni, ut Apostolicorum dogmatum simplicitatem Gentilium & Manichæorum lolio repletet. Missa est igitur relatio à prædicta Synodo ad Justinianum post acclamationes, quas contra Origenem & ejusdem cum illo erroris sectatores congefserant...* Et paulò post: *Fugimus itaque, fugimus istam doctriinam. Neque enim novimus alienorum vocem. Et illum tanquam furem ac latronem anathematis laqueis firmè confectum procul à sacris septis ejicimus.*

XIII. Scio, Halloixium ex Origenis defensoribus unum, negare de damnatione Origenis quidquam in S. Synodo actum fuisse; cum nec Victor Tununensis, nec Facundus Hermianensis scriptores cœvi ejus meminerint. Sed horum duorum silentio, quod fortè procellit, vel Origenistarum fraude, qui Acta illius Synodi in iis quæ Origenem tangunt mutilarunt, vel nimiam festinatione eorum qui latinam Synodi versionem ad usum Vigili non adhuc integram reddiderant, prævalere debent positiva testimonia Evagrii nuper relati, qui eodem seculo vixit, Auctoris Chronici Alexandrini, Georgii Syncelli, Photii in Libello de Synodis, Zonaræ, Glycæ, Cedrepi, Cyrilli Monachi Justiniano cœvi in Vita Euthymii cap. 105. & in Vita Sabæ cap. ultimo; & Nicephori, qui & anathematismos in Origenem à Synodo vibratos refert L. 17. c. 28. Quæ omnia confirmant Synodi Acta, quæ Tom. 3. Conc. edit. Harduini modò præ manibus habentur.

XIV. Sed adversantium obstruunt ora: primò, Sophronius Patriarcha Jerosolymitanus, qui annis octoginta post quintam Synodum in Epistola Synodica ad Sergium Constantinopolitanum Patriarcham relata in sexta Synodo Act. 11. proficitur, se cum quatuor cæteris quintam Synodum Œcumenicam amplecti: *Quæ*

CUN-

confirmat Synodum Chalcedouensem ; tollit verò & funditus abolet , principaliter quidem insanum Origenem & ejus deliramenta ; & uni cum eo Didymi & Evagrii impia dogmata . Secundò , eadem sexta Synodus Constantinopolitana III. quæ Actione 18. protestatur , se in omnibus consonare sanctæ quintæ Synodo : *Quæ hic congregata est adversùs Theodorum Mopsuestenum , Origenem , Didymum , & Evagrium .* Tertiò , septima Synodus idest Nicena II. Act. 1. *Sanctæ ,* inquit , *venerabilis quintæ Synodi , quæ Constantinopolim congregata est , communi & universali submissi sunt anathemati Origenes & Theodorus Mopsuestia , & ea quæ ab Evagrìo & Didymo dicta sunt , de eo videlicet , quod ante substantiam fuisse perbibebant , & quod de restitutione in statum pristinum fatebantur , consentientibus & presentibus quatuor Patriarchis .* Idem dicit Act. 3. & Actione 7. anathemate confossis aliis hæreticis , hæc addit : *Origenis , & Evagrii & Didymi fabulas anathematizamus ; sicuti & Constantinopoli congregatum quintum Concilium egisse dignoscitur .*

XV. Quid ad hæc Origenis Patroni ? Patres in Operibus Origenis errores agnoverunt , & si unus vel alter ab initio anceps visus fuerit , veritate tamen plenius inspectâ , in Origene laudaverunt quidem ingenium , sed doctrinam multis atque gravibus scaterere erroribus , eamque non alieno vitio intrusam , sed genuinum ipsius Origenis fectum esse ingenuè confessi sunt . Eam ut Origenis Romani Pontifices damnarunt , propter eam Ecclesia universa in Conciliis Œcumenicis anathematibus Origenem confixit . Quid ad hæc , inquam , dicent ? An Patres , Pontifices Ecclesiam universam ex deceptione processisse imponendo Origeni errores , qui ipsius non sunt ? Si ista dixerint , se evadere sciant non posse censuram , quâ meritò moderni quidam Jansenii Defensores notantur , allèrentes , errores quos in Jansenio Ecclesia proseripsit , ex falso cogitatu ei tributos , cum verè Jansenii non sint , nec ex ejus doctrina eruantur : ideoque in hoc utpotè judicio facti Ecclesiam errare potuisse , & de facto errasse . Quòd si Origenis patroni ad hoc devenerint (quod non crediderim) sciant , quòd , quidquid sit , an in judicio puri facti Ecclesia falli queat : In judicio tamen dogmatico seu facti conplexi cum dogmate , quale est judicium de doctrina Origenis sicut & Jansenii , errare aut falli nequit : sed ejus judicio tanquam irreformabili , & prorsus infallibili standum est . Alioquin in nullo certi , sed in omnibus fluctuantes erimus , nisi hoc ut certum statuamus cum Paulo 1. ad Timoth. 3. v. 15. Quòd *Ecclesia Dei vivi columna est & firmamentum veritatis .*

XVI. Ut tamen aliquid Origeni indulgeam , cum à nota hæretici absolverem : non quia errores quos effudit verè hæreses non sint ;

sint; sed quia illos cum pertinacia defendisse non legitur, quæ sola hæreticum constituit, ut docet S. Thomas 2. 2. q. 11. art. 2. ad 3. ex S. August. Epist. 162. modò 43. c. 1. sic dicente: *Qui sententiam suam, quamvis falsam atque perversam nullâ pertinaci animositate defendunt, & præsertim quam non audaciâ præsumtionis suæ pepererunt. . . quarunt autem causâ sollicitudine veritatem, corrigi parati cum invenerint, non sunt inter hæreticos deputandi: nimirum, addit S. Th. Quia non habent electionem contradicentem Ecclesiæ doctrinæ.* Ex quo infert, quòd etsi aliqui Doctores in aliquibus quæ pertinent ad fidem dissenserint, quia tamen nondum erant per Ecclesiam determinata, hæretici habendi non sunt: *Postquam autem essent auctoritate universalis Ecclesiæ determinata, si quis tali ordinationi pertinaciter repugnaret, hæreticus censetur. Quæ quidem auctoritas principaliter residet in Summo Pontifice.*

Porrò cum Origenis errores nonnisi post ejus mortem à Romanis Pontificibus Anastasio & Vigilio, & ab universa Ecclesia in Conciliis damnati fuerint, non videtur præsumi posse in Origene pertinacia decretis Ecclesiæ repugnandi. Imò contrarium Eusebius nobis proponit L. 6. Hist. c. 36. ubi dicit quòd Origenes jam sexagenario major post plerosque à se compositos Libros, *Ad Fabianum* Romanæ urbis Episcopum, & ad complures alios Ecclesiarum Antistites de recta fidei suæ ratione Epistolas scripsit. Quo indicant, eum paratum fuisse, quæ scripserat Ecclesiæ judicio submittere. Unde S. Epiphanius, ut refert Gregorius Alexandrinus Episcopus in Vita S. Chrysostomi cap. 43. Constantinopolim profectus, & adversus Origenem agens: *Non ipsum Origenem extra communionem esse decrevit, sed Libros solum criminatus est.* Hæretici tamen tuere ejus doctrinæ pertinaces sectatores, qui post Ecclesiæ damnationem eam propugnare ausi sunt, tanquam veram & Catholicam.

§. III.

Origenis errores de Animabus &c. rejelli.

- I. **Q**uos scriptis suis Origenes vulgarit errores, colligi potest ex sæpè laudato Tractatu Justiniani Imperatoris & ex Actis quintæ Synodi, in quibus referuntur, & sub anathemate proscribuntur. Horum primus est, Hominum animas prius fuisse intellectuales mentes, sive naturas; Divinâ verò contemplatione exsatiatas, atque in deterius prolapsas, animas evasile, & in pœnam corpore velut in carcere inclusas fuisse. Hunc palmarem Origenis errorem refert Epiphanius Hæres. 64. num. 4.

his verbis : *Animam hominis ante corpus extitisse putat , & eandem Angelos esse , virtutesque superiores , quæ quoddam peccata contraxerint , supplicii causâ in hoc corpus inclusæ sunt ; proindeque ad pœnas subeundas à Deo relegari , ut hic iudicii prioris damnationem sustineant , quam ob causam , ait , & corpus demas appellari ; quoddam corpori illigata sit anima . In quo vetera Græcorum somnia & nugæ retextit . Quin nonnullas ad eandem sententiam fabulas accommodat . Nam animam ob id Psychin dicimus , quoddam cœlitus afflata sit . Ad hæc certas ad opinionis falsæ præsidium auctoritates affert , quas Scripturis Sacris perperam affingit , quæ nec ita se habent , ac longè aliter sunt editæ . Quod enim à Propheta dictum est ,, Priusquam humiliarer ego deliqui ,, (Psalm. 118. v. 67.) verba esse animæ ipsius affirmat , cum in Cælo antea deliquisset , quàm ad hoc corpus abjiceretur . Quod verò alibi (Psalm. 114. v. 7.) scriptum est ,, Convertere anima mea in requiem tuam ,, eò referendum putat , quoddam qui strenuè atque egregiè se in hoc mundo gesserit , ob præclara sua facinora , vitamque ex iustitia temperatam , ad supremam illam cœlestemque requiem se se convertat . Ita Epiphanius , qui cum ex dictis causam contra Origenem egerit in Synodo , omni est fide dignus . Et hic est primus ejus error in Synodo 5. & à Justiniano damnatus . Quem rejeci Tom. 6. in 1. p. Tract. de Homine Qu. 1. Dub. 2. §. 2.*

II. Secundus error erat , quia dicebat , Animam etiam Christi antequam corpori uniretur præextitisse . Hunc etiam proscripsit eadem Synodus his verbis : *Si quis dicit aut sentit , animam Domini præexistisse , unitamque esse Deo Verbo ante Incarnationem & Nativitatem ex Virgine , anathema sit .* Deinde : *Si quis dicit aut sentit , prius formatum esse corpus Domini nostri Jesu Christi in utero Beatæ Virginis , ac postea unitum ei esse Deum Verbum & animam , utpotè quæ ante fuisset , anathema sit .*

III. Tertius , quoddam Dei Verbum factum esset simile aliis supernis virtutibus ; qui error ita proscribitur : *Si quis dicit , aut sentit , omnibus cœlestibus ordinibus assimilatum esse Deum Verbum , Cherubimque factum esse ipsis Cherubim , & Seraphim ipsis Seraphim , ac omnibus planè supernis virtutibus simile esse factum ; anathema sit .* Quibus Verbum facit unam ex creaturis .

IV. Quartus , quoddam corpora in resurrectione , formæ orbicularis , non recta futura sint : *Si quis dicit aut sentit , in resurrectione corpora hominum orbiculata suscitari , nec constet nos suscitari re-ctos : anathema sit .*

V. Quintus , quoddam Sol , Luna , & Astra animatæ quædam virtutes sint : *Si quis dicit & Solem & Lunam & Stellæ & aquas , quæ super cælos sunt , animatas & materiales (seu ratione præditas) esse quasdam virtutes , anathema sit .*

VI. Sex-

VI. Sextus, quòd Christus iterum crucifigendus sit pro Dæmonibus. *Si quis dicit aut sentit, Dominum Christum in futuro seculo crucifixum iri pro Dæmonibus, sicut & pro hominibus, anathema sit.*

VII. Septimus, potentiam Dei dicebat esse finitam. *Si quis dicit, aut sentit, vel finitam esse Dei potestatem, vel eum tanta fecisse, quanta comprehendere potuit: anathema sit.*

VIII. Octavus, Dæmonem & impiorum pœnas finem habituras. *Si quis dicit aut sentit, ad tempus esse Dæmonum & impiorum hominum supplicium, ejusque finem aliquando futurum: sive restitutionem & redintegrationem fore Dæmonum aut impiorum hominum: anathema sit.* Post quæ concludit: *Anathema, & Origeni qui & Adamantius, qui hæc exposuit unà cum nefaria atque execrabilis scelestaque ejus doctrina; & cuius qui ea sentiat, aut defendat, aut ullo modo prorsus quocumque tempore tueri præsumat.* Hæc sunt quæ in Origene damnavit Quinta Synodus teste Nicephoro L. 17. Hist. c. 28. vel ut damnanda eidem Synodo à Justiniano exhibita, cum alios & copiosiores errores ab ipsa Synodo damnatos Tomo 3. Concil. edit. Harduini legamus, à quibus per extensum referendis abstinéo. Solum de aliquibus gravioribus aliqua dicam, eos etiam refutando, ex Theophilo Alexandrino Lib. 1. Paschali S. Hieron. interprete Tom. 4. ejusdem Operum, & aliis ut infra.

IX. Et quidem primò. Nam quòd dicit, animas puros spiritus ab initio fuisse, sed illas quæ à Deo desciverunt, in corpora velut in carceres detrusas in pœnam fuisse, ut falsum rejicitur. Tum quia hoc posito, dicendum erit, Mundum istum corporeum propter peccatum intellectualium creaturarum conditum fuisse, alias non exiturum, si istæ non peccassent. Hoc autem quis ex Prophetis dixit? Moyses certè hujus Mundi conditionem describens, nullâ præmissâ causâ præter Dei bonitatem dicit: *In principio creavit Deus Cælum & Terram.* Agens de conditione hominis describit animam non prius existentem, sed de spiritu suo ei insufflavit: animam non prius peccatricem, sed innocentem & sanctam, quæ peccatum in corpus non traxit, sed in corpore posita contraxit: nec propter peccatum comminatus ei fuit Deus reclusionem in corpore, sed separationem à corpore per mortem, morte morieris. Non ergo conjunctio animæ corpori pœna peccati est, sed animæ à corpore separatio. Ideoque anima non odit corpus, sicut quilibet odit carcerem, sed diligit & ab ea dolet separari, & eo rursus in resurrectione supervestiri cupit, juxta illud Pauli 2. Cor. 5. v. 4. *Nolumus expoliari sed supervestiri,* corpore scilicet non amplius mortali, sed incorruptili: unde subdit, *Ut absorbeatur*

quod mortale est à vita: ubi Paulus corpus appellat vestem, non carcerem, vestem inquam, quâ anima spoliata cupit iterum supervestiri, ut gloria animæ redundet ad corpus.

Rursus Anima Christi, quam corpori præstitisse dicit Origenes, certè antea non peccaverat, juxta dictum Petri 1. Epist. c. 2. v. 22. *Qui peccatum non fecit, nec inventus est dolus in ore ejus.* Alias quomodo à peccato hominem redimere potuisset, cujus anima peccato obnoxia in corpus ut in carcerem detrusa fuisset? Cum ergo Deus in Christo animam corpori, & quidem mortali, copularit, falsum est, animam propter peccatum corpori velut carceri alligari. Addo, si animæ propter peccatum corpore tenerentur inclusæ, oporteret ut liberatæ à peccato à corporis carcere solverentur, & effectus redemptionis Christi esset solutio à corpore: & sic cum Christus in Baptismate peccata dimittit, statim deberet animas de corporisolvere carceribus. Præterea si anima corpori velut carceri traditur propter peccatum, quæ gravius peccavit, carceri magis tetro tradi debet: gravius autem peccarunt Angeli, quàm animæ hominum: cur ergo illi juxta Origenem carcere leniori nempe corpore aereo clausi sunt: istæ carceri magis squalido, corpori nempe terreo & corruptibili sunt mancipatæ? Sed de hoc ex S. August. infra.

X. His accedit, quòd si hominum generatio est detrusio animæ seu spiritus in corpus velut in carcerem, humani generis multiplicatio jam non erit benedictio, sed maledictio. Ita S. Epiphanius in Epist. ad Joann. Jerosol. apud S. Hieron. Tom. 4. novæ edit. *Ubi, inquit, benedictio ad Adam, & ad semen ejus, & ad Noè & ad alios filios ejus, Crescite & multiplicamini, & replete terram, & Jam enim non erit benedictio, sed maledictio, juxta Origenem, qui Angelos vertit in animas: & de sublimi sustigio dignitatis facit ad inferiora descendere; quasi Deus generi humano non possit animas per benedictionem dare, nisi Angeli peccaverint: & tot in Cælo sint ruinæ, quot in terra civitates.* Unde fieret quòd sicut continua est in terris hominum generatio, ita continua esset in Cælis Angelorum defectio & peccatum, nec ab initio solum quando duce Luciferi tertia pars Angelorum cum eo cecidit & debitas poenas luit.

- XI. Hanc Origenis erroneam opinionem exponit simulque refellit S. Thomas 1. p. q. 47. art. 2. ubi ostendens quòd Origenes ut declinaret unum errorem excogitavit alium: *Volens, inquit, excludere positionem ponentium distinctionem in rebus ex contrarietate principiorum boni & mali, posuit à Deo à principio omnia creata esse equalia. Dicit enim quòd Deus primò creavit creaturas racionales tantum, & omnes æquales. In quibus primò exorta est inæqualitas ex*
libero

libero arbitrio, quibusdam conversis in Deum secundum magis & minus, quibusdam etiam secundum magis & minus à Deo aversis. Illæ igitur rationales creaturæ, quæ ad Deum per liberum arbitrium conversæ sunt, promotæ sunt ad diversos ordines Angelorum pro diversitate meritorum. Illæ autem quæ aversæ sunt à Deo, sunt corporibus alligatæ diversis: & hanc causam dicit esse creationis & diversitatis corporum. Sed (inquit S. Doctor) secundum hoc universitas corporaliū creaturarum non esset propter bonitatem Dei communicandum creaturis, sed ad puniendum peccatum, quod est contra illud quod dicitur Gen. 2., Vidit Deus cuncta quæ fecerat, & erant valde bona.,.

XII. Sumit hæc Angelicus Doctor ex S. Augustino Lib. 11. de Civit. Dei cap. 23. ubi addit: *Nec mala voluntas, quæ naturæ ordinem servare noluit, idem iusti Dei leges omnia bene ordinantis effugit. Quoniam sicut pictura cum colore nigro loco suo posita, ita universitas rerum, si quis possit intueri, etiam cum peccatoribus pulchra est, quamvis per se ipsos consideratos sua deformitas turpet.* Inde profequitur: *Videre debuit Origenes, & quicumque ita sapiunt, si hæc opinio vera esset, Mundum à Deo factum, ut animæ pro meritis peccatorum suorum tanquam ergastula, quibus pœnaliter includerentur, corpora acciperent, superiora & leviora quæ minus, inferiora verò & graviora, quæ ampliùs peccaverunt; Dæmones, quibus deterius nihil est, terrena corpora, quibus inferius & gravius nihil est, potiùs quam homines etiam malos habere debuisse.* Nunc verò ut intelligeremus animarum merita non qualitatibus corporum esse pensanda, ærium pessimus Dæmon, homo autem & nunc licet malus, longè minoris mitiorisque malitiæ, & certè ante peccatum, tamen luteum corpus accepit.

Porrò quia dicebat aliquam ex peccantibus animabus detructum fuisse in corpus solare, subdit: *Quid autem stultius dici potest, quam per istam Solem, ut in uno Mundo unus esset, non decem palchritudinis, vel etiam saluti rerum corporalium consuluisse artificem Deum, sed hoc potiùs evenisse, quia una anima sic peccaverat, ut tali corpore mereretur includi? Ac per hoc si contigisset, ut non una, sed duæ, imò non duæ, sed decem, vel centum, similiter æqualiterque peccassent, centum soles haberet hic Mundus? Quod ut non fieret, non Opificis provisione mirabili ad rerum corporalium salutem decoremque consultum est, sed contigit potiùs tantà unius animæ progressionem peccantis, ut sola corpus tale mereretur?* Hactenus S. Augustinus.

XIII. Quod verò dicebat, Angelos, Archangelos, ceterosque Angelicos ordines ex animarum bonarum qualitate processisse, non à Deo sic creatos fuisse, reprobatur ab Apostolo Coloss. 1.

v. 16. asserente omnia in Christo sic condita à Deo fuisse : *Quoniam in ipso condita sunt universa in Cælis & in Terra, visibilia & invisibilia, sive Throni, sive Dominationes, sive Principatus, sive Potestates : omnia per ipsum & in ipso creata sunt.* Unde Theophilus Alexandr. supra citatus : *Neque enim, inquit, Origenis & discipulorum ejus imitatur errorem, qui putant in similitudine Dæmonum & Diaboli, qui propria voluntate talia nomina officiaque sortiti sunt, Principatus & Potestates, Virtutes & Thronos & Dominationes, post conditionem sui boni aliquid perpetrasse, ut aliis ad inferiora delapsis, ad excelsa conscenderent, & his nominibus insignirentur, habentes postea quod prius non habuerunt. Quæ dicentes non intelligunt Pauli se sententia contrarie, in Christo creatos Principatus & Potestates & Thronos & Dominationes loquentis. Quod autem dicit creatos, nulli dubium est, quin sic ab exordio conditi sint, & non postea istiusmodi acceperint dignitatem.*

XIV. Circa Resurrectionem erravit quoque. In quo autem erraverit, controversia est. Eam absolutè etiam in impiis admisisse, ejus doctrine, ut infra, consonum est. Eam tamen non admisisse ut Fides Catholica docet, exploratum ex dictis est. Nam corpora non resurrectura recta ut modò, sed orbicularis figuræ, nec cum sanguine & membris quæ modò habent, quia pro illo statu non inservientibus, sed subtilia & aëria fore dicebat. Sed contrarium ostendit Resurrectio Christi exemplar resurrectionis nostræ, cujus corpus post resurrectionem omnibus partibus, quibus ante, imò & ipsis vulnerum cicatricibus constabat, eademque peragebat quæ prius, ut ex Evangelio Joannis cap. 20. & 21. Et ratio est (inquit S. Th. 3. p. q. 79. art. 1. Supplem.) *Non enim resurrectio dici potest, nisi anima ad idem corpus redeat, quia resurrectio est iterata resurrectio. Ejusdem autem est surgere & cadere. Unde resurrectio magis respicit corpus quod post mortem cadit, quàm animam, quæ post mortem vivit : ergo si non est idem corpus quod anima resumit, nec dicetur resurrectio, sed magis novi corporis assumptio.* De hoc fusè egi Tom. 16. Theol. Qu. 5. de Conditionibus resurgentium per totam. Et aliqua supra indicavi in hoc Opere contra Hæreticos corporum resurrectionem negantes.

XV. Circa statum animarum post hanc vitam, & etiam Dæmonum, illum fore æternum, sive in pœna, sive in premio negabat : sed quasdam alternationes beatitudinis & miseriæ ponebat : ita ut transacto aliquo annorum (fortè mille) curriculo, animæ beatè iterum in mortalia corpora reverti, & in eis corporis molestias iterum perpeti, & inde rursus ad beatitudinem evocari, & à beatitudine rursus ad miseriæ desecti tenerentur : & sic

perpetuus quidam beatitudinis & miseriæ circulus fieret. Idem quoque de damnatis impiis & Dæmonibus ipsis statuebat, nempe illos ad hoc sæculum rursùm redituros, & hinc ad beatitudinem evocandos, sicut & Dæmones in priorem statum & ordinem restituendos. Cui hanc addebat blasphemiam, scilicet, Christum pro Dæmonibus sicut pro hominibus iterum crucifixum iri, & moriturum.

XVI. Hunc errorem describit & detestatur S. Augustinus L.de Heres. cap.43. Et rursus Lib.de Civitate Dei cap.17., cujus verba s. præcedente num.5. retuli. Quod repetit S. Doctor L.de perfect. Justitiæ hominis c.3. ubi de Patribus congregatis in Synodo Palæstinâ contra Pelagium loquens, ait: *Hoc acceperunt iudices, quod re verâ in Origene detestatur Ecclesia, idest quòd etiam illi, quos Dominus dixit æterno supplicio puniendos, & ipse Diabolus & Angeli ejus, post tempus licet prolixum purgati liberabuntur à pœnis, & Sanctis cum Deo regnantibus societate beatitudinis adharebunt. Hoc ergo Synodus dixit....Secundùm Evangelium, quòd tales iniqui & peccatores æternis ignibus exurentur, quales tali supplicio dignos judicat Evangelium; & quòd detestabiliter cum Origene sentiat, quisquis dixerit, aliquando eorum finire posse supplicium, quod Dominus dixit æternum: nimirum Matth. 25. v. 37. Discedite à me maledicti in ignem æternum, qui paratus est Diabolo & Angelis ejus. Et v. 46. Et ibunt hi in supplicium æternum, justi autem in vitam æternam. De æternitate pœnarum Dæmonum egi Tom. 5. in 1.p. Quæst. 9. Dub. 5. & generaliter Tom. 16. Theol. de Just. Dei erga damnatos Qu.8. Dub.1.*

XVII. In hoc autem quod dixit, Christum in futuro seculo crucifigendum esse etiam pro Dæmonibus, dum erga istos se misericordem exhibere vult, duplicem blasphemiam profert in Christum. Unam, quâ dicit, Christum non esse perpetuò regnaturum, sed regnum ejus fore terminandum, si iterum passurus est: alteram quòd si passurus est pro Dæmonibus, Dæmon & ipse futurus sit. De utraque blasphemia eum accusat Theophilus Alexandrinus supra laudatus L. 2. Paschali, ubi facit Origenem Pilato pejorem, imò & ipsis Judæis. Ubi enim Pilatus, nec seditione, nec precibus ad hoc potuit adduci, ut Regnum Christi de titulo tolleretur: & ubi Judæi Christum Regem in terra esse negabant, Origenes Regnum Christi fore terminandum astimavit: nec regnum terrenum tantum, sed cœleste in tuturo seculo: *Neque enim, inquit, quos semel salvos fecit iterum præcipitabit de Cælo, & dimittet, juxta Origenis deliramenta & fabulas, ut rursùm de sublimibus corruant. Et intra: Frustraque somniat ascendere animas in Cælum*

Cælum & descendere, & nunc proficere, nunc ad inferiora delabi, ut per ruinas innumerabiles sæpè moriantur, & Christi passio irrita fiat. Qui enim semel pro nobis mortuus est, æternam nobis victoriæ suæ lætitiâ dedit, quæ nullâ vitiorum mole extenuetur. Nec quisquam hominum crebrius moritur, quod Origenes ausus est scribere, Stoicorum impiissimum dogma Divinarum cæpiens Scripturarum auctoritate firmare. Et hic sanè fuit errorum Origenis fons: quia nempe voluit Christiana dogmata paganæ Philosophiæ accommodare.

XVIII. De altera verò in Christum blasphemiâ, quâ dicebat, Christum & pro Dæmonibus apud Superos adfigendum Cruci, cum ita redarguit Theophilus: *Si enim Christus pro hominibus passus homo factus est, ut Scripturarum testantur eloquia, consequens erit, ut dicat Origenes: & pro Dæmonibus passurus, Dæmon futurus est: hoc enim necessitate cogetur inferre, ne ab eo quod cæpit discrepare videatur imitator Judæorum. Etenim illi Christo similiter loquebantur Dæmonium habes... Sed absit, ut pro Dæmonibus Christus passurus sit, ne & ipse Dæmon fiat. Et qui hoc credunt, rursus crucifigunt, & ostentui habent Filium Dei, qui nequaquam, ut semen Abraham apprehendit, ita adsuet & Dæmonum, ut pro illis quoque crucifigatur. Hæc & alia Theophilus. Quæ concordant cum Paulo ad Hebr. 2. ubi postquam dixit quod Christus participavit & sanguini, ut per mortem destrueret eum, qui habebat mortis imperium, idest Diabolum, & liberaret eos, qui timore mortis per totam vitam obnoxii erant servituti: nusquam eum Angelos apprehendit, sed semen Abraham apprehendit. Quomodo ergo Christus, qui venit ut Dæmonis imperium supra homines destrueret, ideoque homo factus fuit, non Angelus, iterum venturus fingitur pro salute Dæmonum, & pro illis factus & ipse Dæmon moriturus? Apage insaniam. Christus (ait idem Apostolus Roman. 6. v. 9.) resurgens ex mortuis jam non moritur, mors illi ultra non dominabitur. Unde S. Bernardus Serm. 54. in Cantic. Hoc, inquit, adversum Origenem, qui in aere Dominum gloriæ denuò pro Dæmonibus impudenti crucifigit mendacio: cum hujus conscius mysterii Paulus affirmet, quod resurgens ex mortuis jam non moritur, mors illi ultra non dominabitur.*

XIX. Dicebat insuper, animas damnatorum nihil pati ab igne corporeo. Et hoc, quia putabat post resurrectionem corpus cum anima conjunctum non permanere, sed in auras abire, & evanescere. Hunc errorem ei tribuit S. Th. q. 26. de Verit. art. 1. in corp. quem ita rejicit: *Sed quia resurrectionem credentes, non solum credimus futuram esse penam spirituum sed corporum, corpora verò*

verò puniri non possunt nisi corporali pœnâ, eadem pœna hominibus post resurrectionem & spiritibus debetur, ut patet Matth. 25. ubi dicitur „ Ite maledicti in ignem æternum &c. „ Idè oportet dicere, ut Augustinus probat 21. de Civit. Dei, ipsos spiritus pœnis corporalibus aliquantulum affici. Nec est simile de gloria Beatorum & pœnâ damnatorum, quia Beati sublimantur in id, quod eorum naturam excedit; damnati verò deprimuntur in id, quod sub eis est: unde corporalibus tormentis puniuntur; & sic quæ dicit Scriptura de pœnis corporalibus damnatorum, non sunt accipienda allegoricè, benè tamen allegoricè sumendæ sunt delectationes corporales, ut edere, bibere super mensam in Regno Dei, & alia similia, quæ Beatis in Scriptura promittuntur.

XX. Ulteriùs, ut notat Epiphanius Epist. ad Joan. Jerosolymit. (apud D. Hieron. Tom. 4.) Omnia, quæ Moyses in initio Genesis narrat, allegoricè intelligebat, ut de corpore Adami & Evæ in eorum formatione, & de arboribus, & aliis in Paradiso à Deo productis. Volebat enim, Deum Adamo & Evæ solùm post peccatum corpus in pœnam indidisse; & hoc significari, quando post peccatum fecit eis tunicas pelliceas. Paradisum autem, in quo eum formaverat, non esse terrenum sed cœlestem, & plantas quæ in eo describuntur, esse angelicas fortitudines. Ita refert de Origene Epiphanius supra citatus.

Sed hæc somnia, ne dicam deliria, sunt: Primum quidem, nempe, quòd ante peccatum Adam & Eva non habuerint corpus: *Quomodo*, inquit, *legimus ante pelliceas tunicas, & ante inobedientiam, & de Paradiso ruinam, Adam loquentem, non secundùm allegoriam sed verè* „ Hoc nunc os ex oculis meis, & caro de carne mea „ *Aut unde assumptum est illud, quod Divinus sermo testatur* „ Et iniecit Deus soporem in Adam, & dormivit: & sumsit unam „ de costis ejus, & adimplevit pro ea carnem, & edificavit coram, quam tulerat ex eo, illi in uxorem „ *Aut quæ corpora contegebat Adam & Eva foliis ficus, postquam comederunt de arbore vetita* ? Habuit ergo à sui conditione verum corpus Adam ex limo terræ priùs à Deo formatum, cui postea Deus ipse inspiravit spiraculum vitæ idest animam. Habuit à sui formatione & Eva corpus, quia ex una de costis Adæ edificata. Alioquin si neuter eorum verum habuisset corpus: quomodo post peccatum cognoscere se esse nudos erubuerunt, ac sibi consuerunt folia ficus, antequam Deus faceret eis tunicas pelliceas ?

Secundum quoque chimericum est. Paradisum enim, in quo conditi fuere Adam & Eva, non in Cœlo, sed in terra fuisse, veritas ipsa ostendit, inquit Epiphanius: *Neque enim dixit Scriptura*

Divina: Deposuit Deus Adam & Evam in terra; sed ejecit eos de Paradiso, & habitare fecit eos contra Paradisum: Non ait sub Paradiso. Et posuit romphæam flammeam & Cherubim custodire introitum ligni vitæ: non dixit, ascensum. Fuisse etiam in Paradiso illo veras arbores, probat. Quia aquæ ex illo egrediebantur in quatuor fluvios diviæ (non dicit descendebant) ad irrigandam terram. Aquas veras eas esse non spirituales, testatur, quia ipse de Euphrate uno ex illis aquam bibit. Unde concludit: *Ubi autem flumina sunt, quæ & videntur & bibuntur, ibi consequens est, quod & ficus, & alia ligna sint, de quibus dicit Deus.* Ex omni ligno, quod est in Paradiso comedes, & similia sunt lignis aliis & arboribus, sicut flumina similia sunt fluminibus & aquis. Si autem aqua quæ cernitur, verè aqua est, necesse est, ut & ficus vera sit, & alia ligna; & Adam verus statim à principio plasmatus in corpore, sicut & Eva, & non in phantasmate, & post ruinam (ut vult Origenes) propter peccatum postea corpus acceperit. Ita Epiphanius, qui deinde prosequitur ostendens, aquas quæ super firmamentum sunt, non esse angelicas potestates, & quæ sub firmamento sunt, non esse virtutes contrarias, idest Demones, ut somniabat Origenes: *Et quomodo, inquit, legimus, in diluvio apertas cataraclas Cæli & aquas inundasse diluvii? Unde aperti sunt fontes abyssi & torus Mundus opertus est aquis?* Hoc certè non evenisset, si aquæ illæ non fuissent veræ.

XXI. Addebat Origenes, Adam per peccatum perdidisse, imaginem Dei. Quod falsitatis idem Epiphanius ibi pluribus evincit; & probat, in homine Dei imaginem semper mansisse. In quo autem homo factus sit ad imaginem Dei ostendit S.Th. 1. p. q. 3. ad 2. dicens, quod homo dicitur esse ad imaginem Dei, non secundum corpus, sed secundum id, quo homo excellit alia animalia, unde sequitur Genes. 1. postquam dictum est, Faciamus hominem ad imaginem & similitudinem nostram, ut præsit piscibus maris &c. Excellit autem homo omnia animalia quantum ad rationem & intellectum; unde secundum intellectum & rationem, quæ sunt incorporea, homo est ad imaginem Dei. Scilicet autem hoc modo ad imaginem Dei esse, non negabit Origenes, nisi se brutum animal esse velit, ratione & intellectu spoliatum. An autem imago Dei inveniat in quolibet homine, & quot modis inveniri possit, docet S.Th. 1. p. q. 93. art. 4. nempe in omni homine inveniri per conformitatem nature: in Justis qui Deum amant, per conformitatem gratiæ: in Beatis verò etiam per conformitatem gloriæ.

§. IV.

Origenis de Filio Dei, de Christo.

I. **M**itto quod supra dixi, inter naves à Synodo V. Origeni imputatos esse hunc, quòd nimirum de Omnipotentia Dei indignè locutus sit, dicens, ejus virtutem terminatam esse in his, quæ produxit, & tantum in creaturis condidisse, quantum virtus ejus complecti poterat. Qui tamen error concordari nequit cum alio, quo dicebat, in perpetuis circulationibus, & animarum transmigrationibus novos semper Mundos Deum condere. Hoc errore cum notat Theophilus Alex. L. 1. Paschali, ac demonstrat, Deum in rerum conditione non tantum fecisse quantum poterat facere, sed quantum natura & dignitas rerum, quas facere decreverat, postulabat, cum tamen majora facere posset. Sic architectus domum construit quantam sustinere potest fundamentum, & qualem fert idea quam statuit, cum tamen altiore & meliorem construere possit, nec illi ars ejus sit alligata. Unde infert: *Et quomodo non impium est humane arti finem non imponere, nec operibus suis artificum scientias coequare, & Deum tanta fecisse dicere rationabilium creaturarum, quanta facere poterat? Audiat ergo & discat impius: non tanta est virtus Dei, quantas fecisse dicitur rationabiles creaturas: sed imponens mensuram operibus, ultra quam esse non poterant, & rerum numerum dispositionis suæ arte, concludens, ipse mensuræ & numero non tenetur. Ex quibus liquidò apparet, non eum tanta fecisse, quanta poterat, sed quantum rerum necessitas expetebat, tantum ejus fecisse virtutem. Et hoc quia ut inferius demonstrat ex Isaia c. 40. Omnes gentes quasi stilla de stivula, & sicut momentum statera computata sunt &c. Hoc ergo dimisso, sicut & quòd de Providentia non rectè senserit;*

II. Quod hic in controversiam vocatur est, quid senserit Origenes de Filio Dei. Malè eum sensisse judicant Patres inferius recensendi. Epiphanius Hæresi 64. num. 8. vult & probat, Origenem posuisse Dei Filium unigenitum non à Patre de sua substantia genitum, sed creatum. Cumque ex alia parte vellet Filium esse ejusdem substantiæ & adorandum cum Patre; Epiphanius contra eum opponit, quòd si Filius creatus est, creatura est, nec cum Patre adorandus quin & nos cum unico Creatore cetera adoremus omnia, quæ servili nobiscum conditione, eademque nominis ratione continentur. Et addit, propterea Christum in Evangelio non dixisse, *Deus me creavit, vel Pater meus creavit me*: nec Patrem unquam pronuntiassè: *Ego creavi eum, & misi ad vos*. Non enim crea-

tus esse potest, qui de se dixit: *Ego in Patre & Pater in me est: & Ambo unum sumus* &c.

III. S. Hieronymus quoque Epist. 41. aliàs 65. ad Pammachium, alioquin in Origenem ejusque scripta adeò propensus, ut à plerisque Origenista judicaretur; ut à se hanc opinionem depelleret, quasi apologiam pro se formans, provocat, ut eum arguant, qui putant cum Origene in aliquo errore sensisse & signatè de Filio Dei & Spiritu Sancto: *Arguite potiùs, inquit, ubi heresim defendiderim, ubi pravam Origenis dogma laudaverim. In lectione Isaia, in qua duo Seraphim clamantia describuntur: illo interpretante Filium & Spiritum Sanctum, nonne ego detestandam expositionem in duo testamenta mutavi?* (hoc legitur in Comment. Hieron. ad cap. 6. Isaie.) Si ergo Origenes in duobus Seraphim clamantibus ante, thronum Dei intellexit Filium & Spiritum Sanctum, malè de utroque sensit. Quia verò Origenista magistram ab errore isto purgare conabantur, quòd in Nicæna Synodo, ubi error iste damnatur, nulla Origenis mentio habetur:

Respondet, S. Hieronymus: *De Ario tunc non de Origene questio fuit: de Filio, non de Spiritu Sancto. Confessi sunt quod negabatur, tacerant de quo nemo querebat. Quamquam latenter Origenem fontem Arii percusserunt. Damnantes enim eos, qui Filium de Patris negant esse substantia, illum pariter Ariumque damnaverunt.* Dum ergo Hieronymus Origenem vocat *fontem Arii* & simul cum Ario tacitè damnatum, dicit, errorem Arii de Filio Dei ab Origene præformatum fuisse.

Hoc repetit L. 1. Apologiæ adv. Ruffinum dicens: *Sex Libros (ut ante jam dixi) Eusebius Cæsariensis Episcopus, Ariana quondam signifer factionis pro Origene scripsit, latissimum & elaboratum Opus, & multis testimoniis approbavit Origenem juxta se Catholicum, idest juxta nos Arianum esse.* Quibus & Origenem Arianum vocat, & Eusebium Cæsariensem Origenis, ut etiam supra vidimus, in omnibus Encomiastem, Arianae factionis signiferum appellat.

IV. Porro quam indignè, ne dicam blasphemè, de Filio Dei & Spiritu Sancto Origenes loquatur, exponit idem S. Hieronymus in Epist. modò 94. aliàs 59. ad Avitum. Cum enim Ruffinus Libros Periarthon Origenis vertisset, sed infideliter, ipse fidelem versionem adornavit. At quia in eis multa Arianorum heresi faventia deprehenderat, Avitum, ad quem suæ versionis exemplar dirigit, monet, à quibus in legendo cavere debeat tanquam à vera fide alienis, dicens: *Accipe igitur quod petisti: sed ita ut scias, detestanda sibi in eis esse quàm plurima, & juxta sermonem*

Do-

Domini, inter scorpiones & colubros incedendum, ut est illud statim in primo volumine: Christum Filium Dei non natum esse sed factum. Deum Patrem per naturam invisibilem etiam à Filio non videri: Filium, qui sit imago invisibilis Patris, comparatum Patri non esse Veritatem: apud nos autem qui Dei omnipotentis non possumus recipere veritatem, imaginariam veritatem videri: ut majestas ac magnitudo majoris, quodammodo circumscripta sentiatur in Filio, Deum Patrem esse lumen incomprebensibile. Christum collatione Patris, splendorem esse parvum, qui apud nos pro imbecillitate nostra magnus esse videatur. Duarum statuarum majoris & parvula, unius, quæ Mundum impleat, & magnitudine suâ quodammodo invisibilis sit, & alterius, quæ sub oculis cadat, ponit exemplum: priori Patrem, posteriori Filium comparans. Deum Patrem omnipotentem appellat bonum, & perfectæ bonitatis. Filium non esse bonum, sed auram quandam & imaginem bonitatis, ut non dicatur absolute bonus, sed cum additamento, Pastor bonus, & cætera. Tertium dignitate & bonore post Patrem & Filium, asserit Spiritum Sanctum. De quo quum ignorare se dicat, utrum factus sit, an infectus, in posterioribus quid de eo sentiret, expressit: nihil absque solo Deo Patre infectum esse confirmans. Filium quoque minorem Patre, eò quod secundus ab illo sit, & Spiritum Sanctum inferiorem Filio in Sanctis quibusvis versari: atque hoc ordine majorem Patris fortitudinem esse, quàm Filii & Spiritus Sancti. Et rursum majorem Filii fortitudinem esse quàm Spiritus Sancti; & consequenter ipsius Sancti Spiritus majorem esse virtutem cæteris, quæ sancta dicuntur. His Origenis de Filio Dei & Spiritu Sancto doctrinam in Libris Periarchon Hieronymus Avito exponit.

V. Perpendat quæso Lector, & judicet, an qui talia de Filio Dei & Spiritu Sancto docuit, ab Arianismi labe excusari possit. Hæc ex Origenis Periarchon in sua Versione excerpfit Hieronymus, Auctor certè Origeni non infensus, sed alioquin adeò ei addictus, ut in suspensionem Origenistæ apud aliquos venerit. Scio, in Scriptis Origenis, quæ modo habemus hæc non legi: sed hoc accidit, quia solam habemus Ruffini translationem, qui pro genio illa expunxit ac detraxit, addiditque alia non pauca, uti ipse in Prologo suæ Versionis testatur. E contra verò non sinè Ecclesiæ & veritatis detrimento ingenua Hieronymi Versio excidit. Nec Ruffinum juvat, se ea expunxisse, quia ab hæreticis & malevolis intrusa. Unde enim id probat? A quibus hæreticis? Non ab aliis quàm ab Origenistis ejus discipulis, qui certè errorem, quem ipse non docuisset, magistro non imposuissent. Ut ut sit, Photius in Biblioth. Cod.8. *Leti sunt, inquit, Origenis de Principiis Libri 4.*

Horum primus de Patre, & Filio, & Spiritu Sancto agit. Quo in Libro plurima blasphemæ scribit: ut Filium à Patre factum: Spiritum à Filio: & Patrem quidem per omnia quæ existunt pervadere: Filium verò ratione dumtaxat prædita: Spiritum verò ea tantum quæ salva facta sunt: aliosque ejus errores recenset. Quibus omnibus pensatis etiam S. Thomas 1. p. q. 34. art. 1. ad 1. Origenem fontem Arianorum appellat. Et S. Augustinus L. de Hæres. c. 43. quamvis absolute Origeni hunc errorem non tribuat, ab eo tamen illum non absolvit.

VI. Pelagianam quoque hæresim Origenis doctrinâ præformatam fuisse, sentit S. Hieronymus Epist. 43. ad Ctesiphontem ubi Pelagium redarguens ait: *Vis ad hoc & alium nosse tui erroris principem? Doctrina tua Origenis ramusculus est.* Et subscribit S. Thomas in 3. contra Gentes cap. 89. his verbis: *Quidam verò non intelligentes, qualiter motum voluntatis Deus in nobis causare possit absque præjudicio libertatis voluntatis, conati sunt has auctoritates (nimirum Proverb. 21. „Cor Regis in manu Domini, quocunque voluerit inclinabit illud „. Et ad Philipp. 2. „Deus est, qui operatur in nobis & velle & perficere pro bona voluntate „) malè exponere: ut scilicet dicerent, quod Deus causat in nobis velle & perficere, inquantum dat nobis virtutem volendi, non autem sic, quod faciat nos velle hoc vel illud; sicut Origenes exponit in 3. Periarcbon liberum arbitrium defendens contra auctoritates prædictas.*

Hoc autem Origenem ibi c. 2. dixisse ejus verba demonstrant: *A Deo datur, inquit, non ut sustineamus, alioquin nullum jam videretur esse certamen, sed ut sustinere possimus. Eâ tamen virtute quæ nobis data est, ut vincere possimus secundum liberi arbitrii facultatem, aut industriæ utimur, & vincimus: aut segniter, & superamur. Si enim totum nobis hoc detur, ut omni genere superemus & nullo modo vincamur, quæ jam superest causa certandi ei qui vinci non potest? Aut quod palmæ meritum, ubi repugnandi adimitur vincendique facultas? Si verò æquè quidem omnibus nobis vincendi possibilitas præbeatur, in nostra autem positum sit potestate, quomodo hâc possibilitate uti debeamus, id est vel industriæ, vel segniter, justa erit victi culpa vel palma victoris. His quis non videt Origenem faciem præbuisse Pelagio?*

VII. Rursus. Cùm ex dictis Origenes poneret animas unioni ad corpora præextitisse, gratiam dari dicebat ex meritis antè comparatis. Sic in c. 7. Jeremiæ ipsius sanctificationem in utero præcedentibus ejus meritis collatam dicit. Parvulos ipsos vasâ in honorem, vel in contumeliam propter merita præcedentia his verbis pronuntiat: *Unumquodque igitur vas, ut vel ad honorem à*
Crea-

Creatore formetur, vel ad contumeliam, ex se ipso causas & occasiones præstitit conditori. Et L. 3. Periarcon c. 1. Quid si, inquit, iusta hæc videtur, assertio, sicut est certò iusta, & cum omni pietate concordans, uti ex præcedentibus causis unumquodque vas vel ad honorem à Deo, vel ad contumeliam præparetur: non videtur absurdum eodem ordine, atque eadem consequentiâ discutientes nos antiquiores causas, eadem etiam de animarum ratione sentire; & hoc esse in causa quòd Jacob dilectus est, etiam dum adhuc in ventre matris haberetur. Quæ doctrina directè contradicit Paulo Rom. 9.

VIII. Prælusit etiam Semipelagianis Origenes, dum ait: initium fidei in nobis esse ex nobis: perfectionem verò & augmentum esse à Deo. Ita L. 9. in Epist. ad Romanos ad illa verba Apostoli: *Habentes donationes, unusquisque secundum mensuram fidei.* Quæ sic exponit: *Quod autem dixit secundum rationem vel mensuram fidei, puto jam plenè in superioribus expositum: quæ sit fides, quæ à nobis requiritur, & quæ à Deo per gratiam datur, secundum hoc quod idem Apostolus dicit, „ Alii fides in eodem spiritu, „ & item ubi ad Dominum dicunt „ Ange nobis fidem „. Quid fides quidem quæ speret, & credat, & absque ulla dubitatione confidat, in nobis est, ratio verò fidei ipsius & scientia, & perfectus eorum intellectus quæ credimus, donatur à Deo ... Ut ergo in nobis tanta fides inveniat, quantam possit sublimior gratia promereri, nostri videtur & studii. Quibus verbis jactum Semipelagianismi semen quis non videt? Hæc de Origene dicta sufficiant.*

IX. Priusquam tamen illum dimittam, monendos omnes censo, ne nimium de se suoque ingenio præsumant: sed ut omnes verè Catholici noverint, se cum Ecclesia Doctores recipere, non cum Doctores Ecclesiæ fidem deferere debere: Origenis exemplo edocti, cujus initiis & progressibus nemo fuit gloriosior, at exitu nemo infelicior. Ita Vincentius Lirinensis in Commonit. num. 17. *Nam si vita facit auctoritatem, magna illi industria, magna pudicitia, patientia, tolerantia. Si genus, vel eruditio; quid eo nobilior, qui primùm in ea domo natus est, quæ est illustrata martyrio, deinde pro Christo non solum patre, sed omni quoque facultate privatus, tantum inter sanctæ paupertatis profecit angustias, ut pro nomine Dominicæ Confessionis sapiens, ut serunt, affligeretur. Neque verò hæc in illo sola erant, quæ cuncta postea tentationi forent; sed tanta etiam vis ingenii, tam profundi tam acris tam elegantis, ut omnes penè multum longèque superaret: tanta doctrinæ ac eruditionis magnificentia, ut pauca forent Divinæ, penè fortasse nulla humane philosophiæ, quæ non penitus adsequeretur. Deinde celebratis tum ejus eloquentiâ, tum innumeris ab eo elaboratis scriptis, subdit: Sed*

forſitan diſcipulis parum felix? Quis unquam felicior? Nempe innu-
meri ex ſinu ſuo Doctores, innumeri Sacerdotes, Confeſſores, & Mar-
tyres exiterant. Jam verò quanta apud omnes illius admiratio, quan-
ta gloria, quanta gratia fuerit, quis exequi valeat? Quis non ad eam
paulo religioſior ex ultimis Mundi partibus advolavit? Hæc & alia
ſubjicit de fama, quâ Origenes etiam apud Principes clarus erat.

X. Verùm quia humanâ gloriâ inflatus plus ſapere voluit,
quàm decebat, doctrinam quâ excellere ſe præſumſit, in ſui &
aliorum vertit ruinam. Ita enim Lirinenſis proſequitur: Eò res
decidit, ut tantæ perſona, tanti Doctores, tanti Prophetæ, non hu-
mana aliqua, ſed, ut exitus docuit, nimium periculofa tentatio plu-
rimos à fidei integritate deduceret. Quamobrem hic Origenes tantus
ac talis, dum gratiâ Dei inſolentiùs abutitur, dum ingenio ſuo ni-
mium indulget, ſibi quæ ſatis credit, cùm parvi pendit antiquam Chri-
ſtianæ religionis ſimplicitatem, dum ſe plus cunctis ſapere præſumit,
dum Eccleſiaſticas traditiones, & veterum magiſteria contemnens,
quædam Scripturarum Capitula novo more interpretatur, meruit, ut
de ſe quoquæ Eccleſiæ Dei diceretur, „ Si ſurrexerit in medio tui
propheta, „: & paulò poſt „ Non audies verba Prophetæ illius „.
Hæc Lirinenſis. Salutaria certè monita, ne proprio ingenio quic-
quam abutens, ac plus ſapere quàm cæteros præſumens, Eccleſiæ
Traditione contemptâ, nova in dies audeat commiſci, memor
Apoſtoli Hebr. 13. v. 9. Doctrinis variis & peregrinis nolite
abduci.

CAPUT XL.

De Paulianis ſeu Samofatenis.

§. I.

Pauli Samofateni Patria, Conditio, Damnatio.

I. POST Sabellium & Origenem quidam emerſit Paulus, qui
ab urbe Samofata ejus patriâ Samofatenſis, ſive Samofa-
tenî nomen accepit. Samofata Metropolis Comagenes
regionis fuit ſita propè Euphratem, quâ Syriam & Meſopota-
miam ſpectat, ut tradunt Epiphanius Hæreſi 65. & Plinius lib. 5.
c. 24. Samofatis teſte Baudrand in Lexico ortus eſt Lucianus, qui
ſub Trajano vixit, Chriſtianæ religionis, quam priùs profeſſus
fuerat, deſertor, ſed & Deorum irriſor in Dialogis quos ſcripſit.
Is miſerè tandem à canibus dilaniatus interiit. Labes tamen magis
peſti-

pestifera fuit Paulus iste ejusdem urbis civis & alumnus, qui suâ hæresi Christianam Religionem infecit. Ab hoc ergo, qui ejus labem contraxere, Pauliani seu Samosateni, vel Samosatæi nuncupati sunt.

II. Anno Christi circiter 262. Valeriano & Gallieno imperantibus Episcopatum Antiochenum Paulus adeptus est, seu verius invasit. Nam ante Episcopatum pauper & mendicus, sceleribus, sacrilegiis, fratrum concussionibus, aliisque malis artibus immensas divitias sibi comparavit (ut testantur secundæ Synodi Antiochenæ Patres in Epistola suâ Synodicâ) quibus abusus est ad factum, quo maximam Christianæ Religionis apud Ethnicos conflavit invidiam. Ita præfati Patres: *Fastu, inquit, & arrogantia supra modum elatus, seculares gerit dignitates, & Ducenarius vocari, quàm Episcopus mavult: per forum magnificè incedens: Epistolas legens ac dictans inter ambulandum palam ac publice: stipatusque maxima hominum multitudine partim præeuntium, partim subsequen- tium: adeo ut ex illius fastu & arrogantia incredibilis invidia odiumque multorum adversus fidem nostram constatum sit.*

Vanâ ambitione se extollebat: Neque item attinet examinare ambitiosam hominis vanitatem in Ecclesiasticis conventibus, quam omni studio consecratur: nihil aliud quàm inanem gloriam captans & pompam affectans, atque hujusmodi artibus animas imperitorum perterrefaciens. Nam & tribunal & sublimem thronum, non ut Christi discipulus sibi ipse construxit, & secretum, perinde ac seculares magistratus, ita appellatum habuit. Ad hæc: semur manu percutere & tribunal pedibus pulsare solitus.

In concionibus nil querebat aliud, quàm plausum & gloriam: Eos verò qui non laudarent, nec ut theatris fieri solet, aræria concenterent, neque unà cum sanctoribus ipsis, viris ac mulierculis indecorè auscultantibus exclamarent, atque exsultarent, sed cum gravitate, ac modestiâ, sicut in domo Dei daret, audirent, increpabat & contumeliis afficiebat.

Antiquos Doctores contemnebat, se Angelum è Cœlo delapsum prædicari à suis patiebatur, Psalmosque in sui laudem in Ecclesia cæni. Ita prosequuntur in prælaudata fipistola iidem Patres: *Et alios quidem legis nostræ Doctores: jam virâ sanctos petulan- ter in concione lacerabat; de se autem ipse magnificè loquebatur, non ut Episcopus, sed ut sophista quidam & impostor. Qui etiam Psal- mos in honorem Domini Jesu Christi cæni solitos, quasi novellor & à recentioribus hominibus compositos abolevit: Mulieres autem magis Pascha die in media Ecclesia Psalmos quosdam canore ad sui ipsius laudem insinuit: quod quidem audientibus burram meretricis incusse- rit.*

rit. Episcopos quoque vicinorum pagorum & civitatum, necnon & Presbyteros assentatores suos submisit, qui in suis ad populum concionibus eadem de ipso prædicarent. Etenim Filium Dei de Cælo descendisse, nobiscum confiteri renuit.... At verò illi, qui in ejus honorem Psalmos canunt, & coram populo eum deprædicant, ipsum, quem impietatis Doctorem habuerunt, Angelum esse dicunt è Cælo delapsum. Sic perfidus iste, dum Christum non de Cælo descendisse, sed de terra ortum (ut videbimus) asserbat, se ipsum Angelum è Cælo delapsum prædicari à suis volebat.

Moribus etiam turpis, mulieres subintroductas duas ipse habebat, & suis alias habere concedebat, ut præfati Patres his verbis narrant: *Quid hæc referre attinet subintroductas, ut Antiocheni ajunt, mulieres, tam ipsius quàm Presbyterorum ejus ac Diaconorum? In quibus non hoc solum, sed etiam alia insanabilia crimina, quorum conscius est, & quorum ipsos reos esse convicit, nihilominus tegit ac dissimulat, ut illos sibi obnoxios habeat: utque dum sibi ipsis metuant, ipsum ob ea quæ impiè agit ac loquitur accusare non audeant. Ad hæc divitiis eos locupletavit.... Itaque etiam si quis concesserit, nihil ab eo turpe committi, suspicionem tamen quæ inde nasci potest, vitari oportebat, ne quemquam offenderet, neve aliquos ad imitationem sui provocaret. Quo enim modo increpabit alium, & admonebit, ut à frequentiori mulieris consuetudine abstineat, ne forte corrumpat, sicut scriptum est, is qui unam quidem jam dimisit, duas verò ætate florentes, & formâ conspicuas secum habet, & quocumquè proficiscitur secum ducit: idquè deliciis diffuens, seseque ingurgitans?* His & aliis in Epistola Synodica apud Eusebium L. 7. Hist. c. 30. Patres Antiochenæ Synodi rationem reddunt, cur Paulum non Pastorem, sed furem & latronem, oves nectum pravis moribus sed impiâ doctrinâ seducentem, ab Episcopatu deposuerint, & alium loco ejus substituerint.

III. Propterea adduat: *Perùm de his sicut antea diximus, examinaverit fortasse aliquis & in judicium vocaverit hominem Catholicæ professionis, nobisque fidei ad ministeriis societate conjunctum. Ab hoc verò, qui prodito atque ejurato religionis nostræ mysterio, ad exsecrandam transgressus hæresim Artemæ (quidni enim parentem illius vobis tandem indicimus?) in ea se plurimum jactavit: ab hoc, inquam rationem eorum omnium exigendam esse non existimamus.... Hunc igitur Deo bellum indicientem, nec cedere volentem, cùm à communione nostra abdicassemus, necesse habuimus alium ejus loco Ecclesiæ Catholicæ Episcopum ordinare, non absque Divinâ, ut credimus, providentiâ: Demetriani scilicet beatæ memoriæ Episcopi, qui ante hunc magna cum laude eandem vexit Ecclesiam, filium Dominum,*
virum

virum omnibus, quæ Episcopum decent, dotibus exornatum. Quod quidem idcirco vobis significavimus, ut & ad eum scribatis, & ab eo communicatorias literas accipiat. Hic verò ad Artemam scribat, si lubet; & qui Artemam sectantur, cum eo communicent. Ita claudunt Epistolam Synodicam Patres Antiocheni.

IV. Ex qua apparet, Paulum Samosatenum, tum ob mores Episcopo indignos; tum, & maximè propter hæresim, ab Episcopatu Antiocheno in Synodo ibi coacta dejectum fuisse, & in ejus locum substitutum Domnum. Notandum tamen, duas contra ipsum Synodos Antiochiæ convocatas fuisse. Prima fuit anno 264. Dionysio Romano Pontifice, Gallieno imperante, de qua Eusebius L. 7. Hist. cap. 27. & 28. qui ad eam plurimos undique Episcopos convenisse refert, inter quos S. Gregorium Neocæsariensem, & Athenodorum ejus fratrem, Firmilianum Cæsareæ in Cappadocia Episcopum, Helenum Tarsensem, Nicomam Iconii, Hymeneum Jerosolymorum, Theotecnium Cæsareæ in Palestina, & Maximum Bosrorum. Valetudine & extremâ senectute coactus S. Dionysius Alexandrinus interesse non potuit; literas tamen dedit ad Patres, quâ suam de Paulo & ejus errore sententiam aperiebat. Accurate à Patribus in Pauli fidem inquisitum est, & contra ipsum accusationes susceptæ sunt; sed istis Catholicæ fidei simulatione & emendationis specie vaferrimus hæresiarcha illusit. Ita præter Eusebium citatum refert etiam Theodorus L. 2. Hæret. Fab. c. 8. dicens: Patres qui convenerant *primum quidem suasionibus & exhortationibus conati sunt, Paulum ab improba opinione abducere. Postquam autem ille apertè negavit se tale quid sensisse, sed se Apostolica decreta sequi dixit, laudato pro concordia & consensione Domino, ad suos greges redierunt.*

V. Sed cum procedente tempore fama ubique pervaderet, Paulum in pejus declinasse; & monitis quibus per literas, ut ad se rediret, hortati fuerant, nihil prodesse viderent, Antiochiam rursus redierunt, ubi præmissis iterum lenibus adhortationibus, quibus ei pacta quibus se obstrinxerat in memoriam ei revocare conati sunt: sed instante populo, eumque accusante, conveniunt in Concilium, ubi à Malathio (vel Malchione) quodam viro eruditissimo Paulus convictus, à communione abscessus, & Episcopatu dejectus fuit. Hæc fuit secunda Synodus contra Paulum Samosatenum, & quidem decretoria, Antiochiæ congregata anno Domini 270., in Petri Cathedra adhuc Dionysio sedente, & Aureliano Imperium consecuto. De qua præter Theodorum laudatum, Eusebius L. 7. c. 29. ait: *Hujus (Aureliani) temporibus postrema Synodus innumerabilium ferè Episcoporum congregata est: in*

qua auctor ille nefarie apud Antiochiam hærescos Paulus, convictus, & ab omnibus manifestissime deprehensus falsi dogmatis reus, ab universa, quæ sub celo est, Ecclesia Catholica eliminatus est. Principue verò illum coarguit, & latere cupientem confutavit Malchion quidam, vir disertissimus: quippe qui sophisticæ apud Antiochiam scholæ præfuerat: & qui ob fidei Christianæ sinceritatem in ejus loci Ecclesia presbyterii honorem erat consecutus. Hic igitur adversus Paulum susceptâ disputatione, excipientibus cuncta notariis (quæ quidem disputatio etiamnum constat) occultos hominis sensus fraudesque detegere solus omnium valuit.

VI. Ex hac secunda Synodo scriptæ fuerunt literæ, de quibus supra (Eusebio teste c. 30.) ad Dionysium Romanæ Urbis Episcopum, & ad Maximum Alexandrinum; quas & ad omnes Provincias transmiserunt, de gestis contra Paulum Samosatenum ejusque vitâ, moribus, ac hæresi; ob quæ cum anathemate & depositione multarant. At quis hic Pauli invincendum non detestetur? Jam à fide simul & Episcopatu exciderat, jam Dominus Antiochenis Ecclesiæ administrationem susceperat: *Sed cum Paulus à domo Ecclesiæ nullatenus excedere vellet; interpellatus Imperator Aurelianus, rectissime hoc negotium dijudicavit, in domum tradi præcipiens, quibus Italici Christianæ religionis Antistites, & Romani Episcopus scriberent. Hoc modo vir supra memoratus cum summo dedecore per secularem potestatem ab Ecclesia exturbatus est. Ita Eusebius dicto cap. 30., cujus facti memini supra Tom. 6. agens de Aureliani Persecut. cap. 12. §. 1.*

VII. Lambertus Daneus Opusc. de Hæres. c. 44. hinc arripit occasionem se ipsum ac prætensores Reformatores suos fortè excusandi, si in sui tutamen & auxilium secularem Principum potestatem implorarunt, Nec enim (inquit) in publicæ pacis tranquillitate tuenda, Imperatoris quamquam Ethnici, auxilium implorare boni illi & Christiani viri & subditi dubitarunt: quod nobis potest prodesse ad exemplum, ut in Chronicis suis annotat D. Philippus Melancthon.

Sed Melancthonem, & Daneum in meridiana luce cecutire nemo non videt, dum in sui præsidium trahunt exemplum quod facto suo apertè resistit: nam ibi Episcoporum Synodus potentiam Imperatoris Ethnici imploravit, ut Paulum jam Ecclesiæ Catholice decreto ut hereticum ab Episcopatu dejectum, sed contumacem, ad obediendum egeret; quod Ecclesia Catholica contra Donatistas, & alios similes agere consuevit. At hic, non Episcoporum coetus, sed pauci, privati, & rebelles homines in sue contumaciæ præsidium contra Ecclesiam Principes armarunt, & in
suum

suum errorem traxere. Ibi Princeps quamquam Ethnicus, ad obediendum Ecclesiæ coegit, & causam Episcopis & Romano Pontifici adjudicavit. Hic Principes ante Catholici ab Ecclesiæ rebellibus seducti, & in hæresim eorum tracti, eorum rebellionem tui sunt, & adhuc tuentur, contra Catholicam Fidem, contra Episcoporum decreta, & maximè contra Romanum Pontificem, quem ab Ecclesia tollere totum eorum studium est. Aptum quidem pro Danao & suis fuisset exemplum, si Paulus ut Ecclesiæ judicium declinaret Aureliani præsidium implorasset, & iste ei contra Ecclesiam patrocinium præbens in sua rebellionem tuenda præsto fuisset. Debuisse ergo Danaus ad exemplum potius Ariannorum, & aliorum confugere: hi enim ut judicium Nicæni Concilii irritum redderent, Constantis & Valentis Imperatorum patrocinio se munierunt. Sed de hoc satis.

VIII. Porro si Paulo jam hæretico Imperatoris Aureliani defuit præsidium, ei tamen Zenobiæ Reginæ auctoritas multum contulit. Cum enim eo tempore, ut scribit Theodorus Lib. 2. Hæc. Fab. cap. 8., Persæ victis Romanis Syriæ ac Phœniciæ regimini istam præficerent, quæ Judæorum religionem profitebatur, Paulus licet jam Antiochenæ Ecclesiæ Episcopus, homo tamen aula magis quàm Ecclesiæ servire volens, ejus sibi conciliandi gratiam studio, hæresim quæ ei ac Judæis placeret excogitavit, coepitque clam asserere, se idem de Christo sentire quod Zenobia ipsa, & Judæi sentiebant, nimirum esse purum hominem, nec ante Mariam extitisse. Expendens hoc S. Jo. Chrysost. Homil. 7. modò 8. in Joann. *Quamobrem, inquit, mirari semper subit Pauli Samosatani insaniam, quomodo tam manifesta veritati obistere potuerit, seseque spontè præcipitem dedit. Neque enim ex ignorantia, sed rei admodum gnarus erravit, non secus ac Judæi. Quemadmodum enim illi, ut hominibus assentarentur, sanam prodidere fidem, gnari ipsum Unigenitum Dei esse, principum verò metu id non consentientes, ne ex Synagoga ejicerentur: ita & illum in mulieris cujuspiam gratiam salutem suam inquit prodidisse.*

§. I I.

Pauli Samosatani errores.

I. **P**rimus erroris caput Pauli Samosatani fuit, quòd Christus non semper fuit, nec ante Mariam extitit, Verbum tamen & Sapientiam in eo habitare dicebat: sed quæ tunc solum subsistentiam habere coeperint à Patre distinctam, cum in utero Virginis

ginis Christus formatus est. Hâc enim temporali missione & eternâ prolatione Verbum evasisse Filium. Cæterum licet recens esset ac novellus Deus, prædestinatione tamen æternum fuisse. Ita eisdem ferè verbis S. Athanasius L. de salutari Christi adventu: *Paulus, inquit, Samosatensis Deum ex Virgine constitetur: Deum ex Nazaret visum, ac qui indè cum existendi, tum regnandi initium duxerit: Verbumque esse ex Cælo efficax, in quo Sapientiam esse constitetur: quod præfinitione quidem ante secula sit; existentia verò ex Nazaret sit editum, ut Deus, inquit, unus ille sit, qui super omnia Deus est Pater.* Et Antiochenæ secundæ Synodi Patres in Epistola sua Synodica supra relata apud Eusebium Lib. 7. Hist. cap. 30. *Etenim, inquit, Filium Dei è Cælo descendisse nobiscum confiteri renuit... Neque id simplici assertionem nostrâ, sed ex his, quæ ad vos misimus, gestis non semel declaratur: maximè verò ubi dicit, Jesum Christum de terrâ ortum fuisse.*

II. Apertius autem hunc Pauli errorem exponit Epiphanius Har. 65. num. 1. his verbis: *Est autem illius hæc opinio: Deum Patrem, & Filium & Spiritum Sanctum unum esse Deum. Verbum Dei ejusque Spiritum inesse Deo perpetuò, sicut hominis in corde proprium verbum inesse cernimus. Filium Dei subsistentiam habere per se se nullam, sed in Deo subsistere: id quod Sabellio quoque placuit, & Noeto & Noeto, aliisque nonnullis: quamquam non eodem cum istis modo: sed diverso quodam ille sentiat. Ad hæc Dei Verbum in terras delapsum, in Jesu, qui homo merus esset, habitasse. Ita unus, inquit ille, Deus est: neque aut Pater est Pater, aut Filius Filius, aut Spiritus Sanctus Spiritus est Sanctus. Imò verò Deus unus est Pater, & hujus in ipso Filius, ut est in homine sermo. Quod iterum exponens num. 3. de Paulianis: Verbum, inquit, tale esse putant, quale in hominis est pectore, & ejusmodi Sapientiam, qualem in animo quilibet hominum insitam à Deo infusamque possidet. Quare unam esse Dei Verbi personam existimant, non secus atque homo unus est cum Verbo suo. Ita cum Paulo delirabant insani homines.*

III. Ex his apparet, Paulum cum Sabellio & Noeto Personarum Trinitatem à Deo amovisse, ab eis tamen discrepasse, ait Epiphanius num. 1. *Neque verò cum Noeto Patrem ille passum esse definiit. Sed solum, inquit, adveniens Verbum, totum illud admisstravit, & ad Patrem revertit. Quod explicatius tradit Leontius L. de Sectis act. 3. his verbis: Paulus autem Samosatensis subsistentem per se Dei sermonem in Christo fuisse non dicebat: sed volebat, sermonem esse jussu quoddam ac mandatum: hoc est, jussit Deus (ut ipse loquebatur) fieri per illum hominem quod volebat: idemque per illum condebat. Nec erat eadem Pauli de Divinitate sententia, quæ*

Sa-

Sabellii. Nam Sabellius eundem dicebat esse Patrem, & Filium, & Spiritum Sanctum, Deumque trini nominis appellabat, nullam prorsus Trinitatem statuens: Paulus verò non eundem dicebat esse Patrem, & Filium & Spiritum Sanctum: sed Patrem aiebat illum esse Deum, qui omnia creasset; Filium purum illum hominem; Spiritum, illam gratiam qua super Apostolos venerit. Ita Leontius.

IV. Ne autem videatur Leontius in hoc contrarius esse Epiphanio, considerandum censerem, Verbum & Spiritum sumi posse dupliciter, nempe ut sunt in mente & corde Dei: & hoc modo dicit Epiphanius Verbum Dei ejusque Spiritum inesse Deo perpetuò, sicut hominis in corde proprium verbum & spiritum inesse cernimus, & hoc modo dicebat Paulus Verbum & Spiritum unam esse Dei ac Verbi personam, sicut homo unus est cum verbo suo. Alio modo ut Verbum est exterius prolatum, & Spiritus externè spiratus, & hoc modo Verbum & Spiritus à dicente & spirante distinguuntur. Unde quia Paulus dicebat Verbum in Christo inhabitans, & Filium Dei ipsum constituens, esse Verbum à Deo exterius prolatum, ideo dicebat Christum esse purum hominem, nec ante Mariam extitisse. In quo à Sabellio dissidebat, quia Sabellius ponebat Patrem, qui & Filius, immediatè per suam substantiam unitum & incarnatum fuisse in Christo Jesu, & ideo patiente Jesu Patrem fuisse passum. At Paulus ponebat, Deum Patrem non immediatè per suam substantiam unitum iussisse Christo, sed solum per Verbum temporaneè prolatum & in Jesu ab ortu suo inhabitans, nec ipso patiente fuisse passum, sed ab eo abcessisse, & ad Deum Patrem reversum fuisse, ut ex Epiphanio supra dixi.

V. Constat hoc ex Philastrio Hæref. 64. ubi ait: *Paulus quidam fuit Samosatenus in Syria, qui Verbum Dei idest Christum Deum Dei Filium substantivum ac Personalem & sempiternum esse cum Patre denegabat: prolativum autem, idest quasi aera quendam dicebat, non tamen personam vivam Filii sempiternam cum sempiterno Patre credendam docebat. Hic Christum hominem justum, non Deum verum predicabat, Judæzans potius &c. Marius quoque Mercator Dissert. de 12. Anathematismo Nestorii de Paulo Samosateno: Verbum autem, inquit, Dei Patris non substantivum, sed prolativum, vel imperativum sensit, atque pronuntiavit, non ut fides habet Catholica, Verbum in substantia, vel essentia consubstantivum, idest Homouition Filium Dei Patris.*

VI. Ex Artema, seu Artemone, ut dixi, hanc heresim hausisse Paulum, Synodus Antiochena tradit: quod & S. Augustinus L. de Hæref. c. 44. confirmat dicens: *Pauliani à Paula Samosateno Christum non semper fuisse dicunt, sed ejus initium ex quo de Maria natus*

natus

natus est, asseverant; nec eum aliquid ampliùs, quàm hominem putant. Ista hæresis aliquando cuiusdam Artemonis fuit; sed cùm defuisset, instaurata est à Paulo. Artemon iste seu Artemas de quo Eusebius L. 5. Hist. c. 28. circa annum Domini 220. hæresim suam spargere cœpit de Christo puro homine, cujus semina paucos post annos suscepta Paulus Samosatenus reviviscere fecit. Artemon autem ab Ebione, Cerintho, Carpocrate, Theodoto, Montano, qui omnes Christo Divinitatem eripuerunt, purum hominem esse dicentes, hunc errorem accepit, eumque in Samosatenum transfudit, à quo deinde in Photinum, & alios mutato nomine pestifera hæc lues pertransiit.

VII. *Quamvis autem errorem istum agens contra præfatos hæreticos Paulo antiquiores non semel impugnaverim: specialiter tamen, ut ab ipso assertum ex Epiphanio num. 3. aggredi placet: quòd enim dicebat Divinum Verbum fuisse semper quidem in Patre, non tamen à Patre ut Personam ab eo distinctam, opponitur Evangelio Joannis c. 1. In principio erat Verbum, & Verbum erat apud Deum, & Deus erat Verbum &c. Epiphanius: Si enim, inquit, in principio Verbum erat, & Verbum erat apud Deum, hoc ipsam quòd dicitur esse, non ad solam prolationem, sed ad hypostasim par est pertinere. Ac si Verbum erat apud Deum, non potest Verbum ille esse apud quem erat. Neque enim apud quem erat, est Verbum. Quòd si Verbum illud velut in corde Deus continet, nulloque modo genitum, quivam illud impleri potest quòd legitur, erat; itemque Deus erat Verbum? Non enim verbum hominis humo est apud hominem, quòd neque vivit, neque subsistit; sed viventis ac subsistentis quidam cordis motus est, non hypostasis: simul enim profertur, subinde nusquam est: ac tamdiù dum pronuntiatur permanet. At Dei Verbum perinde se habet ac per os Prophetæ Spiritus Sanctus pronuntiat (Psalm. 118. v. 89.), Verbum tuum in æternum permanet.*

VIII. *Hoc ergo Verbum quòd erat, idest subsistebat, à Deo genitum sine initio ullo ac tempore à Patre Unigenitum in Christo incarnatum, idem Joannes dicit: Verbum caro factum est & habitavit in nobis, & vidimus gloriam ejus, gloriam quasi unigeniti à Patre, plenum gratiæ & veritatis. Verbum ergo in Christo inhabitans non est verbum prolatitium & temporaneè emissum, sed Verbum ab æterno à Patre procedens, & propriâ hypostasi à Patre distinctum. Quo penitus confoditur Pauli Samosateni error dicentis, in Christo non esse Verbum & Filium Dei, nisi per gratiæ effusionem. Quòd Christus ipse falsitatis convicit cum Marci 14. v. 61. à Summo Sacerdote interrogatus: Tu es Christus Filius Dei bene-*

benedicti? Respondit: *Ego sum*. Et Joann. 8. v. 56. cum dixisset Iesus Judæis: *Abraham pater vester exultavit ut videret diem meum, vidit, & gavisus est*. Et Judæi ei dicerent: *Quinquaginta annos nondum habes & Abraham vidisti?* Respondit Iesus: *Amen, amen dico vobis, antequam Abraham fieret, ego sum*. Si ergo Christus ante nativitatem ex Maria non extitit, quomodo verum est, quod dixit: *Antequam Abraham fieret, ego sum*, cum Abraham Christi secundum carnem nativitatem plus mille annis præcesserit? Et cum alibi vocetur filius Abraham, nec sit possibile, ut filius sit ante patrem, necesse est dicere in Christo esse aliam naturam, secundum quam filius Abraham non sit, & prior illo sit. Hæc pronunciant sufficere, quia Pauli, ac sui similibus jugulum petunt.

IX. Non solum autem in fidei professione, sed etiam in formula Baptismi errorem suum de Trinitate exprimebant Paulianistæ (hoc autem an ab ipso Paulo acceperint, incertum est) Quare in Concilio Nicæno an. 19. statutum fuit, Paulianistas ad Ecclesiam Catholicam redeuntes omnino rebaptizari debere. Quod confirmat S. Augustinus L. de Hæres. c. 44. dicens: *Istos sanè Paulianos baptizandos esse in Ecclesia Catholica Nicæno Concilio constitutum est. Unde credendum est, eos regulam baptismatis non tenere, quam secum multi hæretici cum de Catholica discederent abstulerunt, eamque custodiunt*.

X. Alium errorem Paulo Samosateno tribuit Philastrius Hæres. 64. nempe docuisse, Circumcisionem necessariam esse Christianis, & hoc in gratiam Zenobiæ Reginae in Judaismus propense, cujus, ut dixi, patrocinium ambiebat. At licet negando Divinitatem Christi & processionem Verbi à Patre, Judæis suffragari Paulus visus sit, eum tamen Circumcisionem necessariam docuisse Christianis, nemo Veterum præter Philastrium scripsit. Imò Epiphanius, qui Hæresi 67. num. 2. Paulianos Christum Deum de Deo negantes alteros Judæos appellat, eos tamen Circumcisionem & legalia observasse negat. Ejus hæc verba sunt: *At isti Judæorum opinionem interpolantes, neque quicquam iis habentes amplius, Judæi alteri nominandi sunt & Samosatani; neque aliud omnino sunt, ac solum nomen Jesu præ se ferunt. Nam cum Deum ex Deo, unigenamque Filium, ac Verbum abnegent, ejusmodi sunt, quales ii fuerunt, qui præsentem illum ejurarunt, hoc est Dei ac Domini paricida, & ejusdem Dei negatores. Quamquam neque Circumcisionem adhibent, neque Sabbatum, aliosve Judæorum ritus observant*. Hæc Epiphanius.

XI. Hujus hæresis nomen parum duravit, diu tamen error, & adhuc durat. Ita Lambertus Daneus c. 44. de ea agens, „Diu-

„tissimè, inquit, sed interpolato & mutato postea nomine per-
 „mansit, quando Ariani ipsi fuerunt hujus radicis amarissimæ
 „tantum surculi? quidam, vel rivuli malè illi quidem & fœdè
 „olentes. Latissimè verò disseminata est, quando Arianismus
 „& Mahumetismus, qui sunt inde orti, se se postea in universum
 „terrarum Orbem diffuderunt, & omnia contaminarunt. Diu-
 „rissimè quoque perstitit, quando etiam nunc durat plus quàm
 „1343. annis postquam primum nata est „.

XII. Sed, inquires, apud quos adhuc durat? Danæus non di-
 cit: dicam ego. Durat apud aliquos suæ Pseudo-reformationis
 malè olentes rivulos. Eam ab inferis excitarunt seculo sextodeci-
 mo Antitrinitarii duce Serveto natione Hispano patriâ Tarraco-
 nensi, Anabaptistâ prius, deinde in Trinitatem adeò blasphemio,
 ut propterea, instigante ipso Calvino, Geneva igne consumtus
 fuerit: cum eo tamen hæresis consumta non fuit: Poloniam enim,
 Transylvaniam, & Hungariam invasit propagatoribus præcipuis
 Valentino Gentili Neapolitano, qui suas etiam impietates addi-
 dit, Georgio Blandrata, Alciato, Ochino, Gribaldo & Francisco
 Davide & aliis, quorum omnes Bezâ teste infelici exitu vitam
 finierunt; atque utinam finisset error.

Impietate tamen celebres fuere Lelius & Faustus Socini Pa-
 truius & Nepos, uterque Senis in Etruria oriundus: unde eorum
 Secta adhuc durans etiamnum appellatur Socinianorum. Plures
 evomit impietates tum contra Trinitatem, in Deo unam tantum
 personam ponens, quasi repugnet Deum esse unum & plures in
 eo personas esse: Filium Dei appellari metaphoricè Deum ob su-
 blimem potestatem ipsi à Deo vero participatam, nec Spiritum
 Sanctum esse personam, sed Dei virtutem & efficaciam. Tum
 contra Christum asserens, eum secundum personam esse verum
 hominem Divinâ filiatione ob ortu insignitum: ante Virginem
 Mariam tamen non extitisse. Incarnationem etiam evertens dum
 ait, Deum naturam humanam in unitatem personæ minimè as-
 sumpsisse. Ecce Paulum Samosatenum ejusque errorem in Soci-
 nianis redivivum. Hi sunt amarissimi fructus, qui ex mala præ-
 tensæ Reformationis (verius deformationis ac destructionis) Ca-
 tholicæ Ecclesiæ arbore prodire, ac in dies peiores prodeunt.
 Sed de his modò agere meum non est, maxime cum in Vera Ec-
 clesia & alibi satis dixerim.

CAPUT XLI.

De Photino & Photinianis.

§. I.

De Marcello Ancyrano.

I. **D**UM Photinum cum S. Augustino cap. 45. Paulo Samosateno immediatè subjungimus, similitudinem erroris, non ordinem temporis attendimus, cum inter utrumque plures hæretici diversa sentientes intercesserint. Ita laudatus S. Doctor: *Photinus ab Epiphanio non continuè post Paulum, sive cum Paulo, sed aliis interpositis ponitur. Non tacetur sanè similia credidisse: secundùm aliquid tamen adversatus ei dicitur; sed quid sit ipsum aliquid, omninò non dicitur. Philaster autem continuatim ponit ambos sub singulis & propriis numeris, quasi hæreses duas, cum dicat Photinum in omnibus Pauli secutum esse doctrinam.* Re verà autem ita se habet. Nam Philaster Photinum ponit immediatè post Paulum: Epiphanius verò inter utrumque medios ponit Manichæos, Hieracitas, Meletianos, Arianos, & Audianos. Quo fit, ut Epiphanius observare voluerit ordinem temporis, Augustinus verò similitudinem dogmatis. Quia enim tetrum Samosateni errorem Photinus renovavit, propterea hunc illi subiecit Augustinus, quod & Philastrius præstitit.

II. Hæresis ista à Photino Photiniana, à Marcello autem Photini præceptore Marcelliana etiam dicta fuit. Marcellus iste Ancyra, quæ minoris Galatiæ civitas est, Episcopus erat Constantino Magno imperium tenente. Accidit ut Asterius prius in Capadocia Rhetoricam docens, eâ relicta se Christianum professus, Libros scribere aggressus sit, quibus Arii dogma assererat, Christum dicens esse virtutem Dei, eo modo, quo locusta & bruchus apud Moysen virtus Dei esse dicitur, aliaque his similia. Versabatur autem Asterius cum Episcopis Ario faventibus, eorumque Synodos frequentabat, ad Episcopatum quempiam arripere cupiens. Verùm nec Sacerdotium quidem potuit consequi, eo quòd persecutionis tempore idolis sacrificasset. Urbes autem Syriæ peragrans, libros quos composuerat, publicè recitabat. Hoc comperto Marcellus adversus eum scribere aggressus est: sed dum nimio contradicendi æstu fertur, in contrarium errorem delabitur: dum Christum perinde ac Paulus Samosatensis nudum hominem esse non dubitavit asserere.

III. Hoc cum rescivissent Episcopi, qui tunc erant Jerosolymis congregati, Asterii quidem nullam rationem habuerunt; quippe qui in ordinem Sacerdotii adscriptus non esset; à Marcello verò utpotè Sacerdote exegerunt, ut libri à se conscriptionem redderet: & comperto, illum errore Pauli Samosatensis implicatum esse, iusserunt, ut mutaret sententiam. Ille pudore suffusus librum suum se combustum promisit. Verùm Concilio cum festinatione dimisso, eo quòd Imperator Episcopos Constantinopolim evocasset, ibi Marcelli causa iterùm discussa est. At cum ille improbum librum comburere, ut promiserat, recusaret, Episcopi qui aderant eum deposuerunt, & Ancyram ejus loco Basilium miserunt. (Hic Marcelli liber tribus voluminibus ab Eusebio Pamphili confutatus legitur ad calcem Demonstrationis Evangelicæ) Marcellus verò postea in Synodo Sardicensi Episcopatum recuperavit, cum diceret, ex malo intellectu sui libri processisse, ut in suspensionem erroris Pauli Samosatensis ipse venisset. Hæc habet Socrates L. 1. Hist. c. 36. & Sozomenus L. 2. c. 33. ubi ait: *Quod quidam aiebant, à Marcello inquirendi gratiâ ista dicta esse, & ab Eusebianis calumniosè ad Imperatorem delata, quasi Marcellus ita asseverasset. Etenim Eusebiani admodum illi insensu erant, eo quod iis quæ in Synodo Tyri decreverant minimè consensisset, nec iis quæ Jerosolymis de Ario constituta fuerant acquiescisset, nec Dedicatæ magni Martyrii interfuisset, ipsorum scilicet communionem devitans. Denique scriptis ab eodem Marcello literis ad Imperatorem, ista quoque criminati sunt, quasi & Imperator ipse ab illo contumeliâ affectus fuisset &c.*

IV. Hæc in Marcelli defensionem afferbantur, quasi ejus depositio non ex errore quem re verâ profiteretur processisset, sed ex mala doctrinæ intelligentia, quam Eusebianorum invidia ejus libro affingebat, ideoque veritate detectâ in Synodo Sardicensi Episcopatus restitutus fuit. Quid autem re verâ Marcellus in animo habuerit, solus Deus novit: *Ceterum* (inquit Epiphanius Hæref. 72. quæ de Marcellianis inscribit num. 1.) *illius sectatores cum ejus mentem ignorarent, nec quæ verè sensisset exprimerent, tres hypostases confiteri noluerunt, uti veritas docet: quæ unam censet Divinitatem, unamque gloriam & consubstantialem Trinitatem: quæ nihil in gloria sua diversum habeat: utpote perfectâ Trinitas & una Divinitas, una virtus, una essentia: neque in unum contracta, aut confusa, nec ulla sui parte inferior, aut subiecta.* Hæc Epiphanius, propterea Marcellianos inter hæreticos recensens.

V. An verò Marcelliani hæc acceperint à magistro, disquiritur. Marcellum certè de fide Trinitatis suspectum fuisse, testatur Epi-

Epistola, quam ipse pro sui purgatione ad Julium Romanum Episcopum scripsit: *Etenim, inquit Epiphanius ibidem, si nihil ab illa diversum sensisset unquam, cujusdam rei gratiâ hanc ille sui purgationem institueret; nisi quædam ab illo parùm rectè posita ac pronuntiata forent, quæ cum aliquos perturbassent, defendendi sui atque excusandi necessitatem attulerint*† Testatur Acacii liber contra ipsum (apud Epiphanius) quo venenum ejus doctrinæ detegere satagit; ac denique testatur liber ab ipso conscriptus, & ab Eusebio refutatus. Unde Basilii Epist. 52. ad Athanasium, ut refert Baronius ad ann. 347. num. 56., eum de hæresi contra Verbum & Christum accusat. Nec negotium faciebat, quòd Synodus Sardicensis ipsum velut ab errore immunem Episcopatu restituerit; Nam hoc fuit, quia errorem quem corde retinebat, valde occultavit, & sic Synodo fucum fecit; sicut Arius & Ariani Nicenæ facere tentarunt, qui postea ad sua reversi, quasi triumpho reportato, errorem publicè professi sunt. Ita de Marcello crediderim. Unde Epiphanius ait: *Marcellus autem nonnullorum sententiâ, cum aliquid amplius bis astruere vellet, in Sabellii errorem incidisse visus est. Ex quo factum est, ut inter hæreses ista quoque recensenda & confutanda veniret.*

VI. Scio, aliquos etiam ex Recentioribus, inter quos Natalis Alexandre Hist. Eccl. Seculi 4. Dissert. 30., contendere Marcellum ab omni errore immunem fuisse, & jure à Concilio Sardicensi absolutum. Sed scio etiam, quòd ex veteribus Patribus Basilii Epistola 52. Ep. 74. & præcipuè Ep. 78. dicit: *Quamobrem & Marcellus impiè sentiens contra personam Domini nostri Jesu Christi, ac nudum illum esse Verbum exponens, illinc ausus est se impietatis hujus causas sumsisse prætexere, malè videlicet tu Homousii intellectum exposito.* S. Hieronymus L. de Script. cap. 86. *Sed & Hilarius in 7. adversus Arianos libro nominis ejus quasi hæretici meminit.* Imò idem S. Hilarius in fragmentis testatur, Marcellum in eam hæresim lapsum esse, quam propugnavit Photinus; & propterea Sanctum Athanasium ab ejus communione se separasse. Quod confirmat Sulpicius Severus Lib. 2. Hist. num. 53. aperte dicens, quòd *Marcellus Sabelliana hæresis auctor extiterat.* S. Jo. Chrysost. in Epist. ad Hebræos, Marius Victorinus L. 1. adversus Arium Photino Marcellum adjungunt.

Dux ergo præcipuè Marcelli fuerunt erroneæ hypotheses. Una: Trinitatem nil aliud esse, quàm Deitatis ad modum cujusdam ceræ liquefactæ extensionem, quæ pro usu & œconomia postea contraheretur in unum. Ita ex Patris extensione Filium, & Filii extensione prodiiisse Spiritum Sanctum. Eam Theodorus

L. 2. Hæret. Fab. cap. 10. his verbis exponit : *Marcellus autem Galata ei (Sabellio) quidem consimiliter negavit Trinitatem personarum : quandam autem extensionem Patris dicebat ad Christum venisse, & eam vocabat Deum Verbum. Universâ autem peractâ ækonomiâ, eam rursus retractam, & reversam esse ad Deum, à quo extensa fuerat. Spiritum autem Sanctum dixit esse extensionem extensionis, & eam Apostolis esse exhibitam : & omnino existimabat, Trinitatem & extendi & contrahi pro consiliorum & ækonomiarum diversitate. Altera ex præfata consequens hypothesis erat, Christum ante præfata Deitatis extensionem non existitisse, ac proinde nudum hominem fuisse, in quo cum Paulo Samosateno sentiebat.*

VII. Hæc & alia ex ipsius Marcelli Libris quos confutavit, Eusebius Cæsariensis colligit : in eis enim quinque potissimum errores Marcellum protulisse notat. Primum ; quòd Verbum Dei unam esse cum Patre Personam senserit. Secundum, quòd sic assumptum hominem dixerit, ut efficientiâ solâ & extensione, seu dilatazione Divinitatis sit Deus. Tertium, quòd post resurrectionem Christus, seu Verbum scripserit ad Patrem, se destitutâ carne ad eum rediturum ; quo perpetuum fore Christi regnum negabat. Quartum, quòd Verbum ante humanæ assumptionem naturæ Filium esse Dei inficiabatur, sed tunc factum fuisse Filium Dei contendebat, quando caro factum est. Quintum, quòd Verbum ipsum ex se imaginem Dei non esse diceret, sed hoc illi propter assumptam hominis naturam competere. Hæc Christianæ religionis mysteria funditus evertentia ex ipsius Marcelli libris refert ac refutat Eusebius in libris duobus contra Marcellum Ancyranum, & aliis tribus de Ecclesiastica Theologia inscriptis, & contra eundem editis. Porrò an tum Eusebius, tum prælaudati Patres calumniosè, vel ex falsa existimatione hæc Marcello imposerint, ut aliqui putant, iudicio prudentis relinquam.

§. II.

De Photino, ejusque damnatione.

I. **P**Hotinus (apud aliquos Patres *Scotinus*, idest *tenebrosus*, quod nomen magis quàm Photini, quod ab illuminatione derivatur, illi convenit) natione Galata à Marcello Ancyrano institutus est, cum esset junior, ejusque discipulus, & etiam Diaconus aliquando fuit. Ad Sirmiensem postea in Pannonia Episcopatum promotus fuit ; eruditione & facundiâ præstabat : unde majoris in Ecclesia Catholica tentationis occasio fuit, ut observat

Lirinenſis in Commonitorio num. 11. Ut enim ait Socrates Lib. 2. Hiſt. cap. 18. pravis à Marcello magiſtro ſuo imbutus doctrinis, ejuſque inſiſtens veſtigiiſ malè de Chriſto aſſerens, cum nudum ac ſimplicem hominem eſſe, ſentire & apud ſuos loqui cœpit, cùmque Græcâ & Latinâ linguâ maximè eruditus eſſet, Ebionis, Sabellii, & Pauli Sarmofateni perfidiam gregi ſuo etiam inſinuare, ipſumque à Catholica veritate ſenſim avertere humanæ ſapientiæ artibus aggreſſus eſt. Ita Lirinenſis citato loco de iis loquens qui multis proſectibus & multâ doctrinâ præditi, non parvæ tentationi Catholicis extiterunt: *Velut*, inquit, *apud Pannonias majorum memoria Photinus Eccleſiam Sirmitanam tentaffe memoratur; ubi cùm magno omnium ſuore in Sacerdotium fuiſſet aſcitus, & aliquandiu tanquam Catholicus adminiſtraret, ſubitò, ſicut malus ille Propbeta, aut ſomniator, quem Moyses ſignificat, creditam ſibi plebem Dei perſuadere cœpit, ut ſequeretur Deos alienos, ideſt errores extraneos, quos ante neſciebat. Sed hoc uſitatum: illud verò pernicioſum, quòd ad tantum neſas non mediocribus adminiculis utebatur. Nam erat & ingenii viribus valens, & doctrina opibus excellens, & eloquio præpotens, quippe qui utroque ſermone copioſe & graviter diſputaret & ſcriberet, quòd monumentis librorum ſuorum manifeſtatur, quos idem partim Græco partim Latino ſermone compoſuit.*

Sed bene quòd commiſſe ipſi oves Chriſti multùm pro Catholica fide vigilantes & cautæ, citò ad præmonentis Moysi eloquia reſpexerunt, & Propbeta atque paſtoris ſui licèt admirarentur eloquentiam, tentationem tamen non ignorarunt. Nam quem antea quaſi arietem gregis ſequebantur, eundem deinceps veluti lupum fugere cœperunt. Hiſ indicat Lirinenſis, Photini artes ſaltem initio ad ſeducendos à Catholica veritate Sirmienſes minimè proteciſſe. Nec ſtatim ſe lupum ſuo gregi manifeſtaſſe, ſed ſub ementita Paſtoris ſpecie aliquandiu latuiſſe.

II. Nihilominus, ſi Ruſſino credimus, Photini hæreſis ſub Photiniano nomine innotefcere cœpit, etiam ante Synodum Nicenam, cùm Photinianorum nominis mentio in ea tacta fuerit, ut videre eſt in præſatione Concilii Nicæni ex Arabico translata Tom. 1. Conc. Harduini pag. 524. Sed quia nondum tunc radices latè fixerat: ideò ſub Conſtantino Imperatore & Julio Romano Pontifice circa ann. 343. quaſi tunc orta collocatur à Socrate L. 2. Hiſt. cap. 18. ubi ait: *Sirmii, quæ civitas eſt Illyrici, alia hæreſis exorta eſt. Nam Photinus, qui ejus loci Eccleſiæ præſidebat, ortus ex minore Galatia, & Marcelli ejus, qui Episcopatu dejectus fuerat, olim diſcipulus, magiſtri ſui inſiſtens veſtigiiſ Filium Dei nudum ac ſimplicem eſſe hominem prædicavit. Hujus ſcintillæ Sirmii primum accen-*

accensæ, per Asiam, & reliquas Orbis regiones magna incendia pepererunt: adeo ut licet hæresis ista Artemonis & Pauli Samosatani fortis esset, sub nomine Photini ubique divulgaretur, teste S. Augustino L. de Hæres. c. 44. dicente: *Ista hæresis (Pauli Samosatani) aliquando cuiusdam Artemonis fuit: sed cum defecisset, instaurata est à Paulo: & postea sic à Photino confirmata, ut Photiniani, quàm Pauliani celebrius nuncupentur.*

III. Porro cum, ut ait Nicephorus L. 9. Hist. cap. 31., hæresis ista tum Catholicis, tum Arianis displiceret, eo dogmate ubique locorum divulgato, universi tam in Oriente, quàm in Occidente Episcopi, sive Nicenam sequerentur fidem, seu Arianam complecterentur sententiam, graviter id tulere; ac ipse Imperator Constantius, qui tunc Sirmii erat, eo dissidio non mediocriter est commotus. Quare super hoc Concilium ibi coegit. Convenire eò ex Oriente Episcopi Marcus Arethulius, Georgius Alexandrinus, quem Arianis miserant, Basilus Ancyranus, Pancratius, Polutius, & Hypatianus Heracleotes. Ex Occidente Valens Murforum, & Magnus Hosius Cordubæ in Hispania Episcopus, qui quidem perinvitus tum Sirmii affuit, Arianorum dolo antea in exilium pulsus, sed Imperiali Edicto revocatus. Synodus ergo cum Photinum eundem ac Sabellium Libycum & Paulum Samosatenum docere errorem manifestè deprehendisset, statim ei Episcopalem abrogavit dignitatem. Quod refert etiam Socrates Lib. 2. Hist. cap. 29. addens: *Et hoc quidem tanquam rectè ac jure factum universi & tunc & postea approbarunt.* Eadem habet Sozomenus Lib. 4. Hist. c. 6. Coacta creditur hæc Synodus Sirmii. Damnatus autem ante fuerat Photinus in Concilio Mediolanensi anno 347., teste Hilario in Fragmentis.

IV. *Ceterum (inquit Sozomenus citato loco) post depositionem Photini, Synodus Episcoporum experiri constituit, utrum ille à prior sententia deduci posset. Sed Photinus, cohortantibus licet Episcopis, & Episcopalis loci restitutionem ei pollicentibus, si opinionem suam damnavisset, ipsorumque fidei expositionibus consentire voluisset, minimè acquievit: imò verò eos ad disputationem provocavit. Itaque cum ad constitutum diem convenissent Episcopi, præsentibus ex Imperatoris mandato Judicibus, qui & doctrinâ & dignitate in Palatio præcellere videbantur, partes disputandi contra Photinum suscepit Basilus Episcopus Ancyra. Cumque disputatio ob varias utriusque interrogationes ac responsiones, longius protracta esset, Notariis eorum sermones excipientibus, victoria penes Basilium stetit. Photinus verò exilio damnatus, ne sic quidem opinionem suam tueri destitit. Sed libros tum Græco tum Latino sermone scriptos edidit, quibus ex-*
ceptâ

ceptâ opinione suâ, reliquas omnes falsas esse conabatur ostendere. Hæc Sozomenus; eadem Nicephorus Lib.9. Hist. c.31. Quæ antea scripserat Epiphanius Hæres. 71. num. 1. Ex quibus patet, quod adeo teter & impius Photini error habitus est, ut nec ab Arianis ipsis, quorum non modica pars Sirmiensem Synodum constituebat, sustineri potuerit, ac propterea concorditer ad illum cum Auctore suo proscribendum conspiraverint. Hinc in Constit. Justiniani L. 1. Codicis inter capitales Fidei Christianæ hostes Photiniani numerantur. Cùmque, ut scribit Socrates L.5. Hist. cap.2., Gratianus unâ cum juniore Valentiniano Imperii summam adeptus lege sanxisset, ut omnes cujuscumque religionis homines absque ullo discrimine in Ecclesiis convenirent, solos tamen Eunomianos, Photinianos, & Manichæos ab Ecclesiis pelli jussit.

V. Pettis hæc aliquandiù Christianum Orbem infecit; tempore tamen suo penitus extinctam fuisse dicit Theodoritus Lib. 2. Hæret. Fab. cap. 12. de Photino. Licet autem post mille & ultra annos ab aliquibus modernis Sectariis excitata alicubi revixerit, eam tamen, sicut & cæteras, quæ non modicam Europæ partem hisce temporibus invaserunt, à Jesu Christo Catholicæ veritatis protectore ad inferos iterum retrudendas fore confido, & cum eodem Theodorito dicam: *Has omnes hæreses ad evertendam Unigeniti Divinitatem excogitavit, qui hominum perniciem molitur Daemon. Sed omnes extinxit, qui increpat abyssum, & eam exsiccavit: qui dicit abyssu, „Fies deserta & tuos fluvios exsiccabo,,. Neque enim eorum vel minima manserunt reliquæ, non Cerinthianorum, non Ebionitarum, non Elcæseorum, non Melchisedechianorum, non Paulianistarum, non Marcellianorum, non Photinianorum: sed omnia oblivionis tenebris semel tradita sunt, & nec eorum quidem sunt nomina multis cognita. Verum est enim quod à nostro Salvatore dictum est (Matth. 15. v. 13.) „Omnis plantatio, quam non plantavit Pater meus Cœlestis, eradicabitur,,: Divina autem Evangeliorum dogmata pullularunt, & ad mare usque extensi sunt Apostolorum palmites, & propagines terrarum Orbem implerunt, & impleta est universa terra cognitione Domini. At multa aqua maria tegat, & præditionis veritatem rerum testimonium ostendat. Quod de futuris hæresibus Dominus quoque Christus prædixit. Hactenus Theodoritus. Faxit Deus.*



§. III.

Photini errores rejecti.

I. **E**rravit Photinus primò : dicens , Deum solitarium esse , & more Judaico confitendum ; nullam Verbi Divini , aut Spiritus Sancti putans esse personam , sed meram Patris extensionem ad extra . Secundò : Christum à Maria initium accepisse & merum esse hominem . Constat ex S. Epiphanio Hæref. 71. & Vincentio Lirin. in Commonitorio num. 12. dicente : *Photini ergo Secta hæc est . Dicit , Deum singulum esse & solitarium , & more Judaico confitendum . Trinitatis plenitudinem negat , neque ullam Dei Verbi , aut ullam Spiritus Sancti putat esse personam . Christum verò hominem tantummodo solitarium asserit , cui principium adscribit ex Maria , & hoc omnimodis dogmatizat , solam nos personam Dei Patris , & solum Christum hominem colere debere . Estò autem poneret Christum abundantiore gratiâ quàm ceteros Sanctos insignitum , quia tamen cum purum hominem asseribat , eum sic redarguit S. Augustinus Serm. 246. aliàs 19. ex Viguerianis : Quàm multi Antichristi extiterunt , qui dicerent , sicut Photinus : Homo fuit , plus nihil habuit : sed omnes homines pios & sanctos excellentiâ sapientiæ & justitiæ superavit : nam Deus non fuit . O Photine , in terra tetigisti , festinasti tangere , præcipitasti te : & idè ad patriam non pervenisti , quia in via errasti .*

II. Photini errores manifestè colliguntur ex anathematismis in ipsum à præfata Sirmienti Synodo in ipsum prolatis , quorum quintus est : *Si quis secundum præscientiam & prædestinationem à Maria dicit Filium esse , & non ante secula ex Patre natum apud Deum esse & per eum facta esse omnia , anathema sit . Sextus : Si quis substantiam Dei dilatari & contrahi dicit , anathema sit . Septimus : Si quis dilatatam substantiam Dei , Filiam dicat facere , aut latitudinem substantiæ ejus , sicut sibi videtur , nominet , anathema sit . Octavus : Si quis insitum vel prolatitium verbum Dei Filium dicat , anathema sit . Nonus : Si quis hominem solum de Maria Filium dicit , anathema sit Demum : Si quis Christum Deum Filium Dei ante secula subsistentem & ministrantem Patri ad omnium perfectionem non dicat , sed ex quo de Maria natus est , ex eo & Christum & Filium nominatum esse , & initium accepisse ut sit Deus , dicat , anathema sit .* Quibus apertè patet , Photinum damnatum fuisse , quia diceret , Filium Dei non fuisse ante ortum ex Maria nisi secundum præscientiam , non ante secula ex Patre natum , sed solum accepisse

pisse ut Filius Dei esset secundum substantiam, quando ex Maria natus fuit, & tunc coepisse esse Deum per extensionem vel dilationem substantiæ Dei, & dictum Verbum non substantiale, sed prolatitum tantum.

III. Dubium tamen emergit, an præter Verbum Dei prolatitum agnoverit Photinus in Deo Verbum æternum, non tamen distinctum à Patre personaliter & subsistens. Videtur hoc indicasse Epiphanius Hæres. 71. num. 2. Cum enim Basilii Ancyranus in disputatione ut supra habita sciscitaretur ab eo, quomodo Scripturæ de Domino ac Deo Verbo docerent, *ante omnia secula Unigenitum illum, & cum Patre fuisse*, Photinus adhibitâ distinctione ita quod dicebatur probabat, *partim, ut ad Christum, partim ad Verbum referri oportere judicaret*. Nam his verbis: *Faciamus hominem ad imaginem & similitudinem nostram, Verbum suum Pater alloquitur*. *Quid igitur? Erat, inquit, in Patre Verbum: sed nondum erat Filius*. Ita Photinus Basilio respondebat. Cum autem ei obiciebatur à Prophetis mentionem factam fuisse de Filio Dei, respondebat hoc dictum esse per anticipationem non de eo quod jam esset, sed quod futurum esset. Ita refert Epiphanius: *Velut antedemum dixit, non quod adhuc Filius existeret, sed ipsum solum, cui Filii nomen erat aliquando tribuendum, post Mariam videlicet, quodque ex carne proditurum erat, Christus nimirum de Spiritu Sancto Mariæque genitus, in quem sic tanquam anticipatione quâdam universa conferuntur. Quamquam nondum ipse, quemadmodum & Verbum illud quod in me est*. Quibus Verbum quidem semper fuisse in Deo ponebat, sed non Filium. Quæ doctrina erat Pauli Samosatæni, ut supra dixi.

IV. Ipsum propterea refellit Epiphanius n. 3. Nam si recens adeo est quoad Divinitatem attinet Dei Filius, consequens est, Davidem eo anteriorem esse; quia verò hoc Photinus admittebat, abutens dicto Apostoli 1. Cor. 13. v. 47. *Primus homo de terra terrenus, secundus de Cælo*, & ex hoc inferens Filium Dei Adamo esse posteriorem: ex hoc, ait Epiphanius, sequitur quidem, Verbum & Filium Dei posteriorem esse Adamo secundam carnem ex quo Verbum è Cælo descendit, & habitavit in nobis, non verò antea non extitisse. Nam *si Adamus Verbi originem antecessit, per quemnam non modò Adamus, sed etiam quæ Adamo priores sunt creaturæ Dei omnes productæ sunt?* Quis ille vero est, cui Pater dixit, „*Faciamus hominem*„? At quia respondebat esse Verbum in Patre manens, non à Patre genitum aut prolatum, imò eandem Patris personam, ideo ita contra ipsum prosequitur: *Nemo enim, aut ad intimum Verbum suum, aut ad illud quod exterius profertur, con-*

sultationem deliberationemque dirigit . Ideo insitum sibi sanctissimumque suum Verbum alloquens Pater , futuram hominis procreationem sapientissimâ voce declarat : Ut Filium apud Patrem initio extitisse sciremus : neque Condito rem nostrum recens in lucem editum arbitramur : sed cum Patre priorem seculis omnibus fuisse . Id quod Joannes ita demonstrat ,, In principio erat Verbum , & Verbum erat apud Deum ,,

V. Respondebat Photinus : *Verbum à principio extitisse fateor : Filium Dei genitum fuisse , id non fateor . Eum ita urget n. 4. Epiphanius : Verum nisi Dei sis Filius , inanis est illius labor . . . Nihil enim amplius excellentiusque de Christo profiteamur , quàm Judæi ipsi , qui eundem abnegarunt . Porro non scriptum est in Evangelio ,, In principio erat Verbum , & Verbum erat in Deo ,, : sed ,, Verbum erat apud Deum ,, : nec in Deo Verbum modò fuisse dicit , sed ,, Deus erat Verbum ,, . In ipso quidem lumine sermo ille , qui perpetuò aut interior , aut externâ voce prolatus est , homo dici non potest , sed hominis sermo . Quod si , ut ille negatur , nondum velut factus erat , aut Dei Filius Deus Verbum , per quemnam omnia producta sunt ? Quandoquidem , ut Evangelium asserit ,, Omnia per ipsum facta sunt , & tunc ipso tactum est nihil ,,*

Sed quia dicebat : Quemadmodum homo per Verbum suum quidquid libuerit efficit : ita & Pater per Verbum , quod in ipso erat , omnia procreavit : Instat Epiphanius : Quomodo igitur hoc in Evangelio Domini dictum accipiendum est ,, Pater usque modo operatur , & ego operor ,, ? Quæ verba non sic intelligenda sunt , quasi in his quæ Filius efficit , nihil Pater ipse molietur , aut contra abalienandus sit Filius , neque se Patris opificio aliquid immiscet . Siquidem opera omnia à Patre simul & Filio & Spiritu Sancto producta sunt . Nam per ipsum omnia sunt à Patre producta , ipsæque adeo cum Patre & Spiritu Sancto fabricavit omnia ,, Verbo enim Domini Cœli formati sunt , & Spiritu oris ejus omnis virtus eorum ,, (Pal. 32. v. 6.)

VI. Photinus juxta Epiphanium ponebat in Deo Verbum internum , quod in ipso semper fuisset , non tamen ab eo productum vel personam ab eo distinctam , sicut in homine Verbum internum est , nec tamen est persona ab eo distincta : & sicut homo per Verbum suum quidquid voluerit efficit , non ita tamen quòd Verbum sit persona , quæ cum illo operetur , sed homo per Verbum : ita Pater per Verbum omnia sit operatus , non tamen Verbum sit persona quæ operata sit , sed Pater per Verbum . Quia tamen Dei Filius ab ipso non ponebatur , nisi ut quedam extensio & dilatio , vel exterior verbi prolatio , quæ in tempore facta est in Christo nato ex Maria , idè dicebat , Filium Dei nec in Deo semper fuisse

nec

nec ante quam ex Maria Christus genitus esset. Epiphanio lubens subscribo utpotè de Photini doctrina bene instructo, cum ut ipse dicit num. 1., Photinus ad sua tempora superstes fuerit, & Acta disputationis cum Basilio ad ejus manus pervenire potuerint. Sed quidquid Photinus senserit de Verbo Dei, certum est, Filium Dei eum potuisse purum hominem; ita etiam Optatus auctor cœvus L. 4. de Schism. Donat. *Dictum est hoc*, inquit, *de Photino presentis temporis hæretico, qui Filium Dei ausus est dicere tantummodo hominem fuisse, non Deum.*

VII. Episcopatu depulsus, & in exilium ejectus conscribendis libris tum Græco tum Latino idiomate Photinus totum se dedit, inter quos unum edidit, quo aliis Sectis refutatis suam solam veram esse ostendere contendebat. Sirmium rediisse tertur, fortè Juliano Apostatâ imperante, qui generali edicto omnes à Constantio exilio pulsos restituit, ut hâc libertate Christi Ecclesiam magis turbaret. Photini enim Julianus meminit apud Cyrillum Lib. 8. pag. 262. edit. Lipsien. Imò ut ex Facundo Herm. refert Tilmonius Tom. 6. Mem. Hist. de Arianis art. 47. Photini hæresim commendat in quadam Epistola, tanquam ad salutem proximior, quàm Diodori ac cæterorum Catholicorum doctrinam. Eo quo S. Optatus tempore scribebat nimirum anno 368. Photinum adhuc in vivis extitisse, ex nuper dictis colligitur. Insuper anno 375., quo scribebat librum contra hæreses S. Epiphanius, adhuc fuisse superstitem Hæres. 71. testatur. E vivis tamen ad inferos dejectum anno 376., asserit S. Hieronymus in Chronico.

CAPUT XLII.

De Manichæis.

§. I.

Hæresis ortus. De Scythiano, & Terbintho.

I. PRIMA Sectæ hujus fundamenta jecit Scythianus quidam Sarracenus gente, in Arabia educatus, homo, ut ait Cyrillus Jerosol. Cateches. 6. de Hæresibus, *nihil commune habens, sive cum Christianismo, sive cum Judaismo.* Hic ex commercio cum India & Thebaide ingentibus partis divitiis, ejus feminâ suadente, ut Arabiæ deserta relinqueret, in Ægyptum se conferens Alexandriae domicilium fixit. Feminam hanc Hypsalem Thebaide repertam captivam & prostitutam, cum elegantis es-

set formæ, è lupanari abstractam matrimonio sibi junxerat. Cùmque esset spiritu fervidus ac vivax, præter Græcorum scientias, quas Epiphanio teste Hæres. 66. num. 1. in Arabia didicerat, dum in Ægypto moraretur, scientias quoque Ægyptiorum adjunxit: nec tamen Christianæ Religionis, & Sacrarum Scripturarum (non ut eas sequeretur) prorsus jejunos.

II. Dum ergo Alexandria moraretur, ne inter divitias otio torqueret, vitam Aristotelicam imitari studens, ut ait Cyrillus, vel à Pythagora argumenta sumens, ut vult Epiphanius prælaudatis locis, quatuor libros conscribere fuit aggressus, quorum unum inscripsit *Myeriorum*, alterum *Capitulorum*, tertium *Evangelii*, quartum *Theaurorum*. Videns enim homo pestilentis ingenii, in Mundo multa invicem contraria & pugnantia adesse, hoc existimavit, ex duabus radicibus & principiis sibi contrariis provenire; ideoque ad condendum dogma de duobus principiis, bono & malo processit. Ita duæ perniciosissimæ Sectæ, Manichæismi, quæ Ecclesiam Catholicam diu infecit, & Mahometismi, quæ adhuc maximam Orbis partem contaminat, Deo sic permitte, è Sarracenis turpem originem habuere.

III. Post hæc Scythianus cum Terbintho discipulo suo (qui fortè ad conscribendos libros ut amanuensis etiam inservierat) relictâ Ægypto Jerosolymam se transtulit post annum Christi ducentessimum (non sub Apostolorum tempora, ut vult Epiphanius) ut illic sermonem cum iis conferret, qui ea prædicarent, quæ ad unius principatum pertinerent: ex oraculis enim Prophetarum & Legis audierat, unum ac solum omnium Conditorem & Moderatorem, qui semper existeret, nec desineret unquam celebrari, Patrem scilicet, ac Filium, & Spiritum Sanctum unum Deum: itaque (cum Epiphanio num. 3. loquar) simul atque ad urbem illam accessit, cum Presbyteris, qui illic erant, quique ex Legis à Deo Moysi tradita, ac prophetica disciplina præscripto vitam instituebant, disputare cepit. Qui enim, agebat, unum esse Deum asseritis, qui noctem diemque condiderit, necnon carnem & animam, siccum & humidum, cælum atque terram, tenebras ac lucem? Quod cum illi apertè demonstrarent: neque enim occulta veritas est; contra ille sine illo pudore contendere. Verùm ubi nihil proficit, in eadem nihilominus molestia impudentia persistit. Postremò cum nihil efficere omnino, sed victus potius abscederet, magicis quibusdam libris adhibitis (erat enim maleficiorum peritus, ac perniciosam illam & exitiabilem artem ex ludorum & Ægyptiorum, Gentiliumque disciplina, velut mercionium quoddam abstulerat) præstigiis illudere conatus est; ac domo quâdam conscensâ nibilo magis quod volebat affectus est. Quippe
inde

inde præceptis decidens ex hac vita migravit ; cùm multos illic annos egisset , atque unum tantummodo secum discipulum habuisset , Terbinthum videlicet illum quem diximus , cui & sua omnia velut fidissimo benevolentissimoque administro commisit . Hic mortuum Scythianum quàm honorificentissimè sepeïvit . Ita ex Epiphanio similem cum Simone Mago infelicem exitum Scythianus habuit . Quem tamen S. Cyrillus Jerof. gliscente per morbum labe vult fuisse consumtum .

IV. Terbinthus ergo (cum Epiphanio prosequar) *Apud se deliberans , statuit ad illam mulierculam non reverti , quam ex meretricio quæstu ac servitute sibi Scythianus adjunxerat . Itaque cum omnibus quæ habebat , auro scilicet argento caterisque copiis in Persidem aufugit . Ibi ne deprehenderetur , mutato nomine , pro Terbintho Buddam se , uti diximus , appellat . Atque hic pessimam rursus quatuor illorum Scythiani librorum ac magicarum artium & præstigiærum hereditatem adiit : Idem enim literarum apprimè studiis erat eruditus . Sed cùm in Perside & ipse disputaret , atque apud viduam quamdam habitans , cum aditu ac Sacerdotibus Mitræ , inprimisque Pareo quodam & Labdaco Prophetis de duobus principiis contenderet , neque vel idololatriæ antistitibus resistere posset , sed ab iis turpissimè convictus esset ; Scythiani , quem sequebatur , exemplo domus fastigium conscendens , ibique magicis artibus id efficere studens , ne quis sibi deinceps contradicere auderet , ab Angelo dejectus cecidit , atque ob ea quæ moliebatur maleficia periit . Anus porro sepulto illius corpore pecuniam omnem obtinuit . Sic ex Epiphanio eandem quam magister sortem subiit discipulus . Addit Socrates L. I. Hist. c. 22. Buddam hunc multa de se vana confinxisse , nempe se natum de virgine , & in monte ab Angelo educatum .*

§. II.

De Mane seu Manichæo ejusque exitu .

I. **A**NUS verò (pergit Epiphanius) cùm liberos ac propinquos haberet nullos diu in illo statu perseveravit . Tandem verò Cubricum , qui & Manes dictus est , ad obsequia famularia servum coemit : cui moriens malam illam hereditatem perinde atque aspidis virus multorum ad interitum ac perniciem reliquit : Libros nempe Scythiani & Terbinthi seu Buddæ pestiferam doctrinam continentes , in qua Cubricus demortuæ Anus operâ adhuc juvenis planè fuerat instructus .

II. *Itaque Cubricus , qui se Manem vocavit , inter Persas , apud quos*

quos degebat, disputare instituit. Verum cum nemini dogmata sua probaret; sed quicumque doctrinam illius audiebant moleste ferrent, ac novitate ipsâ horrendisque illis, & ad decipiendum compositis fabulis ac vocibus vehementer obstupescerent; cumque omnes ille quos de impio commento sermones habebat, refelli evertique cerneret, occasionem quandam excogitavit, per quam inanissimis illis, & ad stuporem confectis fabulis auctoritatem ascisceret. Cum enim percrebuisset, Persarum Regis filium quâdam agritudine correptum in Regia Persarum urbe decumbere (neque enim Manes illic degebat, sed alio quodam in loco ab Regis aula diffito) excacante illum improbitate suâ, ratus in heri sui Terbinthi sive Budda, qui & Scythiani heres fuerat, libris posse se ad sanandum Regis filium remedia quadam invenire, ex urbe sua digressus, ad Regiam contendit: ac quorsum venisset aperiens certam filio Regis opem promittit. Sed spes impostorem sefellit. Nam cum agro medicamenta quadam adhibuisset, expectatione suâ frustratus est: adeo ut inter illius manus adolescens postremo sit mortuus, ut vana ipsius ac mendacia promissa convincerentur.

Hac cum ita contigissent, jussu Regis in vincula conjicitur. Neque enim Persarum Reges in graviore delicti reos subinde supplicia decernunt: sed exquisitiori quodam mortis excogitato genere, tormentis prius illos ac quaestioni subjiciunt. Hactenus Epiphanius. Reliqua ex eodem & aliis compendio referam.

III. Priusquam impostor iste truderetur in carcerem, Cubrici nomen, ut memoriam suæ antiquæ servitutis deleteret in Manem transtulit: Manes autem Perlis idem est, ac allocutio, seu dissertatio. Quia enim (inquit Cyrillus Jeros. Catech. 6. num. 24.) dialecticus sibi alicujus nominis esse videbatur, Manem se, uti probum quemdam sermonem ferendorum magistrum appellavit. Videntes autem ejus discipuli, Manem, seu etiam Manichaum apud Græcos insaniam sonare, ut hoc se & magistrum probro liberarent, eum Mannichaum, idest Manna fundentem ac se Mannichæos appellare coeperunt. Ita S. August. Lib. de Hæres. cap. 46. dicens: Unde quidam eorum quasi doctiores eo ipso mendaciores, geminata n. literâ, Mannichaum vocant, quasi manna fundentem.

Interim multos discipulos in suum pertrahens errorem, viginti duos selegit nefariorum suorum dogmatum prædicatores, in quibus tres præ cæteris insignes esse voluit, Thomam, Hermeam, & Addam. Cumque de Christiana Religione multa audivisset, illos cum pecunia Jerosolymam miserat, ut Libros de Lege & Prophetis, Evangelica, & Apostolorum scripta compararent, & ad se deferrent. Qui profecti Libros illos coemerunt, ac reversi ipsum-

ipsumque in carcerem, ut supra conjectum invenientes, nihilominus Libros ei obtulerunt. Quibus acceptis ac diligenter evolutis, malâ fide plura depravavit, & veritati mendacium admiscens, ea suis fabulis studuit accommodare. Dum hæc ageret, contigit ei, ut precibus & ingenti pecuniarum vi corrupto Commentariensi, è Regis Persarum carcere fugam arriperet. Quo audito Rex capite multavit custodes.

IV. Statim ergo relicta Perside Romanorum fines ingreditur: cumque jam ad Mesopotamiæ desertum separans Romanorum Imperium à Pertide pervenisset; intellexit, in oppido Mesopotamiæ Caschara dicto habitare quemdam virum totum justitiæ & pietatis operibus erga viduas orphanos ac pauperes deditum, Marcellum nomine. Cogitans ergo, quod si virum hunc sibi obnoxium habuisset, non in Mesopotamia tantum, sed in toto Syriæ Romanique Imperii tractu dogma suum extendere posset, ad illum ex Castello Arabione, quod ad Strangam fluvium situm est, Epistolam scripsit, eamque per Turbonem ex discipulis suis unum misit, in qua præcipui ejus errores continebantur. Cum autem hanc integram exhibeat S. Epiphanius Hæref. 66. num. 6. non abs re erit illam huc transferre, ut hujus nebulonis impudentia appareat. Tale ergo erat ejus initium.

Manichæus Apostolus Jesu Christi, & qui mecum sunt Sancti omnes & Virgines, Marcello filio carissimo, gratia, misericordia, pax à Deo Patre, & Domino nostro Jesu Christo: ac te lucis dextera custodias à presenti seculo nequam ejusque casibus & laqueis maligni Amen. Hic quasi alterius Pauli Epistolam se auditurum quisque existimabit, dum se *Apostolum Jesu Christi* vocat impostor iste. Non miretur tamen, quod istud sibi nomen arroget, qui & Spiritum Sanctum se dicere ausus fuit, quos blasphemæ arrogantiaë titulos infectatur S. Augustinus Libro contra aliam ejus Epistolam edito, quæ ab ejus discipulis vocata est *Epistola Fundamenti* cap. 5. 7. & 8. Nunc quid Pseudo-Apostolus iste in hac Epistola scribat, videamus.

V. *Quod te summâ caritate præditum esse cognovi, vehementer sum gavisus. Quod verò non recte rationi consentaneam fidem proferis, equidem dolui. Quamobrem eum ad corrigendum genus humanum missus fuerim, eorumque, qui se in fraudem erroremque commiserint, rationem habeam, necessarium patavi has ad te literas scribere, quibus in primis anima tua, tum tuarum salutis consulerem, ut ne confusum quiddam perturbatumque sentires pro eo ac rudium magistri doceat, qui quidem ita prædicant: Bonum & malum ab eodem proficisci, unumque dumtaxat principium statuerunt: neque lucem à*
tene-

tenebris, bonum à malo, exteriorem hominem ab interiori, ut ante dixi, discernunt ac separant: imò verò alterius cum altero confundendi miscendique nullum finem faciunt. Tu verò, fili, ne ut plerique hominum temerè ac sine ratione ambo ista conjungito; neque bonitatis auctori Deo tribuito. Nam illi principium ac finem, & bonum auctorem malorum ad Deum referunt, quorum finis maledicto proximus est, (Hebr. 6. v. 8.) Non enim iis quæ in Evangelii à Salvatore ac Domino nostro Jesu Christo dicuntur fidem adhibent, Non potest arbor bona malos fructus facere: neque arbor mala bonos fructus facere, (Matth. 7. v. 17.) Quemadmodum verò Deum Satanæ malorumque quæ ab eo geruntur, conditorem ac procreatorem asserere audeant, magnopere deuiro. Atque utinam hætenus vanissima illorum consilia progredierentur, nec Unigenitum Dei Filium Christum Dominum, qui de Patris sinu descendit, Mariæ cujusdam mulierculæ filium esse dicerent, atque ex sanguine carneque, tum verò reliquo mulierum fæore prodiisse. Sed ne longiorem Epistolam scribens diutius æquitatem tuam detineam, cùm præsertim naturali eloquentiâ caream, his quæ dicta sunt, ero contentus. Ubi verò ad te uerero plenius omnia cognoscet: si quidem salutis tuæ curam aliquam suscipis. Neque enim, cuiquam laqueum injicimus, (1. Cor. 7. v. 35.) ut stolidiores nonnulli faciunt. Intellige quæ dico, fili carissime. His Christi apostata, non Apostolus, sua seu veriùs Satanæ dogmata suadere conatur.

VI. Epistolam hanc sibi traditam cùm legisset Marcellus, mirum in modum obstupuit, imò exhorruit. Aderat tunc cum eo Archelaus illius urbis Episcopus; qui lectis in præfata Epistola contentis, infrendens ac Divino ardore percitus, ad Manichæum è Barbaris transfugam & Christi ovium seductorem illicò convolare, eumque capere meditabatur. Sed prudens Marcellus, mitigato precibus Episcopo, Turbonem ad Manem remittere cogitabat. Sed isto recusante reverti misit unum è familiaribus suis, cum Epistola, quâ eum invitabat, ut præsens ea quæ literis indicaverat planius posset exponere. Interim Turbo omnia Manis dogmata Marcello & Archelao fusè exposuit.

VII. Acceptis Marcelli literis sine mora Cascharam Manes cum suorum comitatu venit. Quò cum pervenisset, nullâ interjectâ morâ, Marcello sic optante, Archelaus publicam cum eo disputationem inire constituit, cui velut arbitros interesse voluit etiam paganos, nempe Marsum Philosophum, Claudium Medicum, Ægialeum Grammaticum, & Cleobulum Sophistam. Tunc Archelaus vir in Divina scientia egregius, de Manis erroribus præviè à Turbone edoctus, cum sic est allocutus. Dic mihi quid doceas.

ceas. Respondit Manes: Deus Veteris Testamenti est auctor malis; cum ipse dicat: Ego sum ignis devorans. Archelaus respondit: cuius ergo erit filius ille qui dixit Lucæ 9. v. 49. *Ignem veni mittere in terram, & quid volo, nisi ut accendatur?* Tu accusas eum qui dixit quod Deus est auctor vitæ & mortis; Cur ergo honoras Petrum qui ad vitam suscitavit Tabitham, morti autem tradidit Saphiram? De eo qui præparavit ignem conquereris; At cur de illo non conquereris qui dixit Matth. 25. v. 41. *Discedite à me maledicti in ignem æternum?* Tu accusas eum qui dicit Isaïæ 45. v. 7. *Ego Dominus faciens pacem & creans malum.* Expone mihi, quomodo Jesus Matth. 10. v. 34. dixit: *Non veni pacem mittere sed gladium.* Eodem idiomate loquuntur ambo; cur ergo unum damnas, absolvitis alterum?

Manes: Et quis est, inquit, Deus qui excæcat? Et tamen Paulus 2. Cor. 4. v. 4. dicit: *Deus hujus sæculi excæcavit mentes infidelium, ut non fulgeat illis illuminatio Evangelii.* Lege superiora, inquit Archelaus: *Quod si etiam opertum est Evangelium nostrum, iis qui pereunt est opertum.* Porro quis dixit Deum Veteris Testamenti excæcasse mentes infidelium? Nonne idem ait Jesus Matth. 13. v. 13. *Ideo in parabolis loquor eis, quia videntes non vident.* Et Lucæ 8. v. 10. *Ut videntes non videant?* An hoc dixit quia volebat ut viderent, an potius quia erant indigni & claudebant oculos ne viderent? Sol excæcat illos quibus visus est debilis; non quia Sol ad excæcandum sit factus, sed quia oculi malè dispositi sunt. Neque dicit, ego excæco mentes, ne audiant Evangelium, sed ne illuminentur lumine gloriæ Evangelii. Audire Evangelium omnibus permittitur, sed gloria Evangelii solis veris Christianis est reservata. His & aliis teste S. Cyrillo Jerof. Catech. 6. disputationem suam contra Manem complevit Archelaus, quam postea Syriacè conscripfit teste S. Hieronymo L. de Script. Eccl. c.

VIII. Talibus prostratus Manes, videns adstantes in se concitatos ac sibi timens, qui è carcere fugerat, inde etiam fugâ elapsus, venit ad vilissimum quemdam pagum, ad instar serpentis qui in Paradiso Adamum omittens ad Evam accessit (inquit S. Cyrillus) Ibi cum quâdam die congregatâ turbâ concionaretur tanto confidentius, quod neminem sibi adversarium formidandum haberet; Presbyter illius loci Diodoridis appellati, qui Diodori seu ut vult Epiphanius Tryphonis nomen gerebat, Vir quidem bonus, sed lenis & animo placidus, videns se ad frænandam impostoris audaciam imparem, Archelaum per literas certioorem reddidit; qui Presbyterum Epistola (quam Valesius ad calcem Historiæ Socratis exhibet) primò confirmavit, suppeditat ar-

mis, quibus ille cum Mane praelium instauravit, deinde ipse accedens venit ad locum, in quo jam Manes aderat disputationem diei precedentis continuaturus. Illum ergo aggressus dicentem Jesum Christum hominem fuisse solum apparentem, tantâ rationum efficacîâ veritatem Incarnationis ostendit, ut confusus obmutuerit. Hinc populi erga Archelaum plausus, in Manen verò commotio, ut nisi Archelaus obstitisset, lapidibus obrutus remansisset.

IX. Itaque fugâ è Diodoride evadens, estò plures ut eum caperent insequerentur, fluvio Stranga clam trajecto, Arabionem, unde discesserat, reversus fuit. Sed Persarum Regis vigilantiam effugere non potuit. Nam (ut ait Epiphanius Hæres. 66. n. 12.) *compertâ ejus fugâ, missis Satellitibus in eodem Castello comprehensum hominem ignominiosè in Persidem abduxit, ubi calamo cute detrahit, ultimum de eo supplicium sumit. Quam quidem cutem utris ad modum insartis paleis ad bodiernum diem in Persido servant. Hunc ergo ille exitum vitæ consecutus est. Ob id Manichei lætulis suis arundines subserviunt. Ita Epiphanius. Eadem S. Cyrillus Jer. Cat. 6. n. 30. Capitur, inquit, Manes ille, quem sui adorant discipuli, & ad Regem adducitur. Exprobravit ipsi Rex mendacium, & fugam; irrisit servitutem, ultus est pueri interemptionem: damnavit & propter carceris custodum necem. Mani jubet Persico more detrabi cutem: & reliquum quidem corpus ferarum pastui traditum est: illud verò pessima mentis conceptaculum cutis pro furibus in sacci modum suspensa fuit. Qui se Paracletum dicebat, & futurorum scientiam profitebatur, suam ipsius fugam comprehensionemque nescivit.*

X. Manis excidium, quod paulò post disputationem cum Archelao secutum est, non videtur ultra annum 278. posse differri, & contigisse mense Martio circa festum Paschatis verisimile est, quo tempore ejus mortem majori quàm ipsum Pascha celebritate recolebant sub nomine *Bematis* idest gradus, seu Tribunalis. Quod Manichæis exprobrans S. Augustinus Lib. contra Epist. fundam. cap. 8. *Cùm, inquit, sæpè à vobis quærerem illo tempore quo vos audiebam, quæ causa esset, quòd Pascha Domini plerumque nullâ, interdum à paucis tepidissimâ celebritate frequentaretur, nullis vigiliis, nullo prolixiore jejunio indicto Auditoribus, nullo denique festiviore apparatu, cum vestrum Bema, idest diem quo Manichæus occisus est, quinque gradibus instructo tribunali & pretiosis linteis adornato, ac in promptu posito ac objecto adorantibus, magni honoribus prosequamini. Hoc ergo cùm quærerem, respondebatur, ejus diem passionis celebrandum esse, qui verè passus esset: Christum autem qui natus non esset, neque veram, sed simulatam carnem humanis oculis ostendisset, non pertulisse, sed finxisse passionem.*

XI. Ex his apparet, Manis seu Manichæi morte ejus nomen & errores non fuisse extinctos, sed nomen celebratum, & errores à suis discipulis non parvo tempore promulgatos, & veritati Catholice non parvam præbuisse materiam eos impugnandi: quod præ cæteris validè præstitit S. Augustinus pluribus Operibus contra Manichæos elaboratis. In suo cœtu ut refert L. de Hæres. cap. 46. Hierarchicus ordo is erat: *Promissionem Domini nostri Jesu Christi de Paraclito Spiritu Sancto in suo hæresiarcho Manichæo dicunt esse completam. Unde se in suis literis Jesu Christi Apostolum dicunt, ex eo quod Jesus Christus se missurum esse promiserit, atque in illo miserit Spiritum Sanctum. Propter quod etiam ipse Manichæus duodecim discipulos habuit ad instar apostolici numeri, quem numerum Manichæi hodieque custodiunt. Nam ex electis suis habent duodecim, quos appellant magistros, & tertiamdecimum principem ipsorum: Episcopos autem septuaginta duos, qui ordinantur à magistris: & Presbyteros qui ordinantur ab Episcopis. Habent etiam Episcopi Diaconos. Jam cæteri tantummodo Electi vocantur: sed mittuntur etiam ipsi qui videntur idonei ad hunc errorem, vel ubi est, sustinendum & augendum, vel ubi non est, etiam seminandum. En quomodo Satanas ad formam Ecclesiæ Christi Synagogam suam in Manichæis erexerat.*

XII. Ex duodecim Manis seu Manichæi discipulis tres præcipui fuere Addas, Thomas, & Hermeas (seu Hernias). Ita Epiphanius num. 12. dicens: *Ergo ille sic mortuus eos quos dixi discipulos reliquit, Addam, Thomam, & Hermeam, quos antequam illo mortis genere penas lueret, in varia loca dimiserat. Hermeas in Egyptum profectus est, quo cum plerique versati sunt. Neque antiqua est admodum hæresis, adeo ut qui cum Hermea Manis discipulo colloquuti sunt, nobis quæ ad illum pertinebant narraverint. Addas in superiorem regionem abiit, Thomas in Judæam. Atque ab iis Secta illa ad hodiernum usque diem vires atque incrementum habuit. Ita Epiphanius. Idem dicit S. Cyrillus Catechesi 6. n. 31. & Theodoritus L. 1. Hæres. Fab. c. 26. cum nominum & regionum aliqua diversitate. Nam quem Epiphanius appellat *Addam* Cyrillus vocat *Baddam* & Theodoritus *Aldam*. Vulgò sub nomine *Adimanti* recensetur maximè à S. Augustino. Quem S. Epiphanius vocat *Hermeam* S. Cyrillus *Hermam* dicit. Theodoritus vult, eum quem vocat *Aldam*, missum fuisse in Syriam, Thomam verò ad Indos. Thomas iste scripsisse fertur quoddam Evangelium, quod à quibusdam Thomæ Apostoli existimatum falsò fuit: quare Cyrillus prælaudato loco sic monet: *Nullus quæso legat Evangelium secundum Thomam: non enim est unius è duodecim Apostolis, sed unius de tribus pravis Manis discipuli.**

Præter Libros quos à Scythiano editos in hæreditatem Manes acceperat, de quibus supra, alios proprios edidisse fertur. Plures ei tribuere videtur S. Augustinus L. 5. Confess. c. 7., ac ultra Epistolam ad Marcellum, quam retuli, adest Epistola quam vocabant Fundamenti, contra quam Librum scripsit S. Augustinus. Ejus quoque discipuli scripta aliqua reliquerunt. Adimantus seu Addas scripsit Librum contra Legem & Prophetas adversus quem S. Augustinus scripsit Librum unum. Leucius seu Seleucius Acta sub nomine Apostolorum confinxit, & Libellum de Nativitate B. Virginis. Communiter autem Libros apocryphos producebant, ut Acta Andreæ, Joannis, Petri, & Pauli, & alios quos Gelatius in Synodo Romana proscriptis.

XIII. Hæresis sub Manicheorum nomine evulgari coepit tempore Aureliani Imperatoris & Felicis I. Romani Pontificis circa ann. Domini 271. Cum enim, ut dixi, Manes anno 278. occisus fuerit & ante mortem jam misisset discipulos in varias ac distitas regiones ad eam evulgandam, necesse est asserere, aliquibus annis ante habuisse exordia. Latissimè verò & citissimè propagata est. Nam ex Arabia statim in Mesopotamiam & Persidem delata est. Ex Perside in Syriam transit & in Ægyptum, Africam, & postea mari trajecto in Hispaniam & Galliam penetravit. In Asia quoque, Paphlagonia, & pluribus Orbis partibus multos infecit.

Diutissimè etiam substitit. Nedum enim S. Epiphaniū temporibus per Ægyptum & alias Orientis partes pervagabatur & S. Augustini ætate in Africam transierat (prima ejus proles fuere Hieracitæ de quibus infra). Sedente S. Leone I. Romæ aliquos occupaverat, quam tamen coactâ Synodo inde expulit, ut habetur Serm. 15. ejusdem. Anastasii Imperatoris temporibus circa finem seculi 5. adhuc in Perside, Syria, & Mesopotamia grassabatur. Quin & sub Pontificatu Gregorii Magni scilicet annis plus quàm 340. à Manetis morte in Siciliam irrepsit, ut apparet ex ejus Epistola 6. Lib. 4. modò 8. Lib. 5. ad Cyprianum Diaconum. Ex hac enatus fuit in Arabia Mahumetismus velut ex serpentis viperæque ovo prodiens. Divisa postea fuit in varias Sectas, videlicet puros Manicheos, Catharistas, & Macarios à sortis felicitate sic dictos, ut S. August. Hæres. 46. scribit. Hujus hæresis infelix proles seculo 13. fuere Albigenfes.

§. III.

Generalia hæresis Manichæorum capita.

1. **N**ulla unquam ex inferis erupit hæresis tot scatens erroribus ac blasphemis, sicut hæc ex diabolicis Manichæi faucibus, quæ omnium penè superiorum sordes collegit & proprias addidit; Unde universam Religionem corripuit ac sustulit. Hoc ut Lector agnoscat generale prius illius systema subjiciam, & postea de singulis sermonem instituum.

II. Manes igitur tanquam suæ doctrinæ basim, supra quam suas fabulas ædificabat, jecerat, quod duo essent prima principia, bonum unum, alterum malum. Bonum Principem lucis appellabat, malum Principem tenebrarum. Lucem autem ac tenebras non sensu metaphorico, sed reali accipiebat; sic etiam malum non purum detectum, sed realem substantiam esse asseribat: unde quia oportebat ut effectus realis causam realem haberet: nec Deus bonus mali causa esse posset, propterea duo ponebat principia opposita, duo æterna, immortalia, suprema, ac invicem independentia, unum auctorem boni, quem absolute Deum ac Lucem appellabat: alterum auctorem mali, quem materiam, principem Mundi, malignum, gentem tenebrarum, Diabolum identidem Manichæi vocabant.

III. A principio, ut refert Theodoritus L. 1. Har. Fab. c. 26., Deum bonum seu Lucem fuisse à malo Deo seu Materia penitus ignotum, & è contra: & bonum Deum tenuisse quidem partes Septentrionales Orientales & Occidentales, malum verò, idest Materiam, meridionales occupasse dicebat. Verùm multis seculis evolutis inter Materiæ fructus seu effectus seditio orta fuit. Cùmque coëptum esset bellum, & hi quidem insequerentur, illi verò fugerent, ad fines lucis venerunt, unde lucem contemplati, simul & lætitiâ & admiratione affecti decrevere simul junctis copiis adversus lucem bellum gerere, & rapere eamque suis tenebris miscere. Veritus autem Deus lucis rem universam pugnæ discrimini committere; neque enim, inquit, habebat ignem, ut fulgure ac fulmine uti posset, neque aquam ut inundationem posset inducere, neque ferrum aut alia arma, tale quid cogitavit. Acceptâ lucis particulâ veluti quâdam escâ & hamo in materiam inmisit: quæ à materia quasi devorata ei velut glacie concreta & confixa est. Et hinc dicunt coactum fuisse Deum Mundum fabricare ex boni & mali lucis & materiæ seu tenebrarum commixtione: hæc ex Theodorito.

IV. Mundus itaque ex naturis boni & mali sic permixtus quinque elementis ex natura mali seu tenebrarum constabat, nimirum fumo, tenebris, igne, aqua, & vento. In fumo nata esse dicebant animalia bipedia & ipsos etiam homines: in tenebris serpentina: in igne quadrupedia, in aquis natatilia, in vento volatilia. His quinque elementis malis debellandis alia quinque elementa de regno & substantia Dei missa esse, & in illa pugna permixta fuisse, nimirum fumo acra, tenebris lucem, igni malo ignem bonum, aquæ malæ aquam bonam, vento malo ventum bonum. Solem & Lunam duas esse naves per cœlum tanquam per vastum mare navigantes, ac Solem ex igne bono factum, Lunam verò ex bona aqua. Essè autem in eis navibus sanctas virtutes, quæ se in masculos & feminas transfigurant, ut illiciant principes gentis adversæ, & per hanc illecebram commotâ eorum concupiscentiâ fugiat de illis lumen quod membris permixtum tenebant, & purgandum susceperant ab Angelis lucis, purgatumque illis navibus imponatur ad regna propria reportandum. Hucusque ex S. August. L. de Hæres. cap. 46.

Hanc insaniam de Sole & Luna in eis detestatur idem S. Doctor L. 20. contra Faustum cap. 6. ubi postquam eos irrisit, quòd Solem navem fingerent, cum Sol omnium oculis rotundus appareat, subdit: *Verum hæc tolerabilius vel videntur vel sentur in vobis: illud est intolerabiliter sceleratum, quòd de ipsa navi puellas palchras & pueros proponi dicitis, quorum formosissimis corporibus inardescunt principes tenebrarum, ad feminas masculi, & ad masculos femina: ut in ipsa flagranti libidine & inbiansi concupiscentia de membris eorum tanquam de tetrìs sordidisque compedibus Dei vestri membra solvantur. Et his obscenissimis pannis vestris conamini assuere Sanctum Trinitatem, dicentes, Patrem in secreto quodam lumine habitare; Filii autem in Sole virtutem, in Luna sapientiam; Spiritum verò Sanctum in aere. Quæ cap. 7. & 8. refutando progreditur.*

V. Duas Animas in quolibet homine ponebant: unam bonam à bono principio, quæ sit de substantia ejus & corporea ut ipsum. Alteram malam & de mali Principis substantia. Animæ fidelium, idest suorum, agebant, ab elementis purgatæ ad Lunam deferre bantur, inde ad Solem transibant, qui eas ad Deum cum eo reu niendas reportabat. Animæ verò infidelium, seu eorum qui Ma- nis doctrinam non susceperant, ad inferos demittebantur, ut ibi ad tempus à Dæmonibus torquerentur, secundum criminum mensuram: atque ita purgatæ in alia corpora, sive hominum, sive brutorum, sive plantarum remittebantur. Quòd si adhuc purgatæ non fuissent, in magnum ignem projiciebantur. Et ita totum Redemptio-

demptionis mysterium situm erat in separandis à corporibus malis particulis Divinitatis, eisque suo principio reuniendis.

VI. Nihilominus animas è corporibus separare non permittebatur, imò qui hoc fecisset eidem poenæ obnoxius fiebat: quare qui animal occidisset, in ejusdem speciei animal converti, & qui plantam vel evulsisset, vel cæcidisset, in eandem plantam verti debebat. Quando ergo quis panem Manichæo exhibebat, dicebat iste: Abscede parumper, donec illum benedicam. Tunc accepto pane dicebat: Ego te non feci; illumque in altum projiciens, illi qui eum fecerat maledicebat. Deinde subjungebat: Ego te non seminavi: qui te seminavit, & ipse seminetur. Ego te non mesui: qui te mesuit, & ipse metatur. Ego te non coxi: qui te coxit, & ipse coquatur. His protestationibus præmissis panem illum securè comedeat.

VII. Carnibus vesci exhorrebant, nec ova comedeant: lacte & vino abstinebant. Ita S. Augustinus Hæres. 46. *Nec vescuntur, inquit, carnibus, tanquam de mortuis vel occisis sugerit substantia Divina, tantumque ac tale inde remanserit, quod jam dignum non sit Elektorum ventre purgari. Nec ova saltem sumunt, quasi & ipsa cum franguntur expirent, nec oporteat ullis mortuis corporibus vesci.... Sed nec alimonia lactis utuntur, quomvis de corpore animalis vivente mulgeatur sive sugatur: non quia putant Divina substantia nihil ibi esse permixtum, sed quia sibi error ipse non constat. Nam & vinum non bibunt dicentes fel esse principum tenebrarum; cum vescantur uvis: nec musti aliquid, vel recentissimi sorbent.* Ita describit eorum insanam ac superstitiosam abstinentiam S. Augustinus.

His addit: *Animas Auditorum suorum in Elektos revolvī arbitrantur, aut feliciore compendio in escas Elektorum suorum, ut jam inde purgata in nulla corpora revertantur. Ceteras autem animas & in pecora redire putant, & in omnia quæ radicibus fixa sunt, atque aluntur in terra. Herbas enim atque arbores sic putant vivere, ut vitam quæ illis inest, & sentire credant & dolere, cum laduntur: nec aliquid inde sine cruciatu eorum quemquam posse vellere aut carpere. Propter quod agrum etiam spinis purgare nefas habent. Unde agriculturam, quæ omnium artium est innocentissima, tamquam plurimum homicidiorum ream accusant: suisque Auditoribus, ideo hac arbitrantur ignosci, quia præbent inde alimenta Elektis suis, ut Divina illa substantia in eorum ventre purgata impetret eis veniam, quorum traditur oblatione purganda. Itaque ipsi Elekti, nihil in agris operantes, nec poma carpentes, nec saltem folia ulla vellentes, expectant hæc afferri usibus suis ab Auditoribus suis, viventes de tot ac tantis*

tantis secundum suam vanitatem homicidiis alienis. Monent etiam Auditores suos, ut si vescuntur carnibus, animalia non occidant, ne offendant principes tenebrarum in caelestibus colligatos, à quibus omnem carnem dicunt originem ducere: & si utuntur conjugibus, conceptum tamen generationemque devitent, ne Divina substantia, quæ in eos per alimenta ingreditur, vinculis carnis ligetur in prole. Hucusque Augustinus, inde inferens nuptias ab eis prohiberi, cum hæc ad generationem prolis ordinentur.

VIII. De productione Adami & Evæ ita fabulabantur, subdit idem S. Doctor: Adam & Evam ex parentibus principibus sumi asserunt natos: cum pater eorum nomine Saclas sociorum suorum fetus omnium devorasset, & quidquid inde commixtum Divinæ substantiæ cæperat, cum uxore concumbens in carne prolis tanquam tenacissimo vinculo colligasset.

IX. Quid de Christo sentirent, ait: Christum autem fuisse asserunt, quem dicit nostra Scriptura serpentem, à quo illuminatos asserunt, ut cognitionis oculos aperirent, & bonum malumque dignoscerent, eumque Christum novissimis temporibus venisse ad animas non ad corpora liberanda. Nec fuisse in carne vera, sed simulatam speciem carnis ludificandis humanis sensibus præbuisse, ubi non solum mortem, verum etiam resurrectionem similiter mentiretur.

X. De Lege & Evangelio dicebant: Deum qui Legem per Moysen dedit, & in Hebræis Prophetis locutus est, non esse verum Deum, sed unum ex principibus tenebrarum. Ipsiusque Testamenti Novi Scripturas tanquam infalsatas ita legunt, ut quod volunt inde accipiant, quod nolunt rejiciant, eisque tanquam totum verum habentes nonnullas apocryphas anteponan. Promissionem Domini Jesu Christi de Paraclito Spiritu Sancto in suo heresiarcha Manichæo dicunt esse completam. Unde se in suis literis Jesu Christi Apostolum dicit, eo quod Jesus Christus se missurum esse promiserit, atque in illo miserit Spiritum Sanctum. Propter quod etiam ipse Manichæus duodecim discipulos habuit ad instar apostolici numeri &c. de quo supra dixi.

XI. De Baptismo & modo orandi ait: Baptismum in aqua nihil cuiquam perbibent salutis asserre, nec quemquam eorum quos decipiunt, baptizandum putant. Orationes faciunt ad Solem per diem, quæquæ versum circuit: ad Lunam per noctem, si apparet. Si autem non apparet, ad Aquiloniam partem, quæ Sol cum occiderit ad Orientem revertitur, stant orantes.

XII. De peccatorum origine & concupiscentia ita sentiebant: Peccatorum originem non libero arbitrio voluntatis, sed substantiæ tribuunt gentis adversæ: quam dogmatizantes esse hominibus mixtam, omnem carnem, non Dei, sed malæ mentis perbibent esse opificium, quæ

quæ à contrario principio Deo coeterna est. Carnalem concupiscentiam, quæ caro concupiscit adversus spiritum, non ex vitiosa in primo homine natura nobis inesse infirmitatem, sed substantiam volunt esse contrariam, sic nobis adhaerentem, ut quando liberamur atque purgamur, separetur à nobis, & in sua natura etiam ipsa immortali- ter vivat: easque duas animas, vel duas mentes, unam bonam, alteram malam, in uno homine inter se habere confictum, quando caro concupiscit adversus spiritum & spiritus adversus carnem. Nec in nobis sanatum hoc vitium, sicuti nos dicimus, numquam futurum; sed à nobis sejunctam atque seclusam substantiam istam mali, & finito isto seculo post conflagrationem Mundi, in globo quodam tamquam in carcere sempiterno esse victuram. Cui globo affirmant accessurum, semper & adbasurum quasi coopertorium atque tectorium ex animabus, naturâ quidem bonis, sed tamen quæ non potuerint à naturæ male contagione mundari.

Hæc ex S. Augustino generalia hæresis Manichæorum capita sunt, multa ex anterioribus hæresibus hausta, quibus tamen sua particularia inferuerunt, quæ omnia sequenti §. rejiciemus.

§. I V.

Errores de Deo & naturâ mali rejecti.

I. **P** Ræcipuum & palmarem errorem de duobus principiis, seu Diis, uno naturâ bono & auctore boni, altero naturâ malo & mali auctore, ab antiquis hæreticis Gnosticis, Marcionitis, & aliis supra refutatis, Manichei acceperunt: quod inde processit, quia existimarent malum non esse purum defectum boni, sed substantiam quandam bono adversariam. Qui insanus est, cum malum nil aliud sit, quam defectus seu privatio boni. Unde S. Th. 1. p. q. 49. art. 3. directè probat, non posse esse unum summum malum, quod sit causa omnis mali. Primò quia non potest dari aliquid per essentiam malum, nam omnis essentia, seu natura eo ipso quòd ens est, bona est, neque ulla res mala est, nisi quia privatur aliqua essentia aut perfectione. Summum autem malum deberet esse per essentiam malum, sicut summum bonum est per essentiam bonum. Hanc rationem confirmat S. Augustinus Lib. 83. Quæst. qu. 5. his verbis: *Omne igitur quod est, sine aliqua specie non est: ubi autem aliqua species, necessariò est aliquis modus, & modus aliquid boni est: summum ergo malum nullum modum habet, caret enim omni bono. Non est igitur: quia nullâ specie continetur, totum hoc nomen malis de speciei privatione repertum est.* Malum ergo per

se non est, sed in subiecto secundum se bono est, quod aliquo bono privat: sic tenebræ in se ipsis non sunt, sed in aere quem bono lucis privant. Hinc deducitur, malum per se causam esse non posse, multò autem minùs primam: *Nam esse causam non potest convenire, nisi bono, quia nihil potest esse causa, nisi inquantum est ens: omne autem ens in quantum huiusmodi bonum est.* Ita S. Th. dicta q. 49. art. 1.

II. Probat ulterius S. Th. hoc art. 3. Sicut summum bonum est quod nihil habet mali, ita summum malum esse deberet quod nihil habet boni: atqui hoc posito malum se ipsum destrueret, cum saltem debeat esse in subiecto bono: unde dicit Philosophus in 4. & 5. c. 5. *Quod si malum integrum sit, se ipsum destruit: quia destruet omni bono (quod requiritur ad integritatem mali) subtrahitur etiam ipsam malum, cuius subiectum est bonum.* Ergo summum malum esse non potest.

Sic igitur discurret S. Doctor: *Qui posuerunt duo prima principia, unum bonum & alterum malum, ex eadem radice in hunc errorem inciderunt, ex qua aliæ extraneæ positiones ortum habuerunt: quia scilicet non consideraverunt causam universalem totius entis, sed particulares tantum causas particularium effectuum.* Propter hoc enim si aliquid invenerunt esse nocivum alicui rei per virtutem suæ naturæ, æstimaverunt naturam illius esse malum. Puta si quis dicat, naturam ignis esse malam, quia combussit domum alicujus pauperis. Judicium autem de bonitate alicujus rei non est accipiendum secundum ordinem ad aliquid particulare, sed secundum se ipsum, & secundum ordinem ad totum Universum, in quo qualibet res suum locum ordinatissimè tenet, ut ex dictis patet (qu. 11. ar. 3. & q. 4. ar. 2.) Similiter etiam qui invenerunt duorum particularium effectuum contrariorum duas causas particulares contrarias, nesciverunt reducere causas particulares contrarias in causam universalem communem. Et ideo usque ad prima principia contrarietatem in causis esse judicaverunt: sed cum omnia contraria conveniant in uno communi, necesse est in eis supra causas contrarias proprias inveniri unam causam communem: sicut supra qualitates contrarias elementorum invenitur virtus corporis celestis. Et similiter supra omnia, quæ quocumque modo sunt, invenitur unum primum principium essendi, ut supra ostensum est (q. 2. art. 3.)

III. Non dissimili discursu Manen perstringit S. Epiphanius Hæres. 66. num. 13. Hæc duo principia quæ contraria ponis, adeò invicem debent esse separata, ut in nullo communicent, alioquin si in aliquo sociarentur, summè contraria non essent. *Quod si invicem separata sunt, horum unumquodque finitum sit oportet.* Quod autem

autem finitum est perfectum non est : est enim sine suo circumscriptum . Quin etiam terminus aliquis requirendus erit qui utrumque definiat : ne si se mutuo contigerint , communione aliqua extremis illis in finibus copulentur , atque ita constituta illis contrarietas intercidat . Jam verò si quidpiam , quod illa dirimat amborum in medio collocaveris , non potest id quod dirimit illorum esse simile , sed ab utroque diversum . Ex quo infert , quòd istud ea dirimens ac separans , ac nihil habens cum utroque commune , utpotè æternum ; erit tertium principium : & sic non duo tantum , sed tria erunt principia , imò & quatuor : Neque enim , inquit , duo soli terminum hunc ac veluti murum constituere possunt , nisi alter quidam finitor accedat , qui inter illa duo quidpiam quo separetur injiciat . Hæc & alia subtiliter Epiphanius .

IV. Quia verò Manes hoc principum malum Deo adversum se ponere excusabat , ne Deum auctorem boni faceret auctorem etiam mali seu malitiæ : ostendit num. 15. malum seu malitiam non esse quamdam substantiam , quæ per se causam habere petat , sed in solis malè factis seu actionibus à bono deficientibus consistere . Etenim quatenus aliquid facimus contra rationis regulam malum est : cum verò nihil agimus malum non est . Et quamvis malum Deo displiceat , Deo tamen repugnare non potest . Si enim malum ab homine excidi ac extinguere potest , multò minùs Deo resistere poterit . Et sicut natura hominis , ex cujus operatione malum sequitur , mala non est , ita nec natura Dei , qui illud solum permittit , mala erit .

V. Hinc nec Dæmon conditione vel naturâ malus dicendus est , sed voluntate malum se fecit . Ita idem Epiphanius num. 16. *De Diabolo quoque , inquit , sic habendum est , eum minime ab origine ipsa naturæque conditione malum extitisse , sed aliquanto postea tempore malum quod faceret excogitasse : ita tamen ut cujusmodi futurus esset non lateret . Verum quemadmodum cætera benè atque utiliter esse condita præ excellenti Dei justitia , qui pro singulari sua bonitate existere vult omnia , bonæque sua omnibus in commune proponit . Ac nihilominus tamen pro eo ac libertati cujuscumque concessum est , privatim id permittit , suæ ut voluntati obsequens , quidquid libitum erit efficiat . Ut & ipse ab omni malorum culpa sit immunis , & eorum qui in virtute progrediuntur , atque ab humanitate bonitæque sua præmia referunt , discrimen aliquid statuatur . Quibus insania Manichæi detegitur , qui specie servandi ab omni malitiæ labe Deum immunem , eum malitiæ subjicit , ut eo etiam nolente prodeat , dum oppositam potestatem , ac substantiam æternam , ac numquam desituram adversus eum statuit , quæ ipso invito mala producat .*

VI. Propterea S. Augustinus Lib. contra Secundinum Manichæum cap. 10. ad quæstionem unde sit malum : *Hoc*, inquit, à me non quæras, unde sit, cum tibi jam ipse responderis, qui dixisti, quòd „ cum se ipsam cognoverit anima, si modò consenserit, voluntate suà peccat „. *Ecce unde est malum ; à propria scilicet voluntate. Non autem ista natura, sed culpa est. Ac per hoc etiam contraria natura, cui utique nocet privando eam bono, quo beata esse posset, si peccare noluisse. Hanc tu peccati voluntatem moveri non putas in anima, nisi ex alio malo, quod credis esse naturam, quam non fecerit Deus, eamque animam naturam Dei esse contendis : ac per hoc ista mali nescio quæ natura si hanc in anima peccati voluntatem suadendo facit, in peccatum vicius deicitur Deus. Validum procul dubio, & quod jugulum petit, argumentum : si enim à substantia vel natura Dei est : si anima à natura mala in peccatum trahitur : ergo Deus in peccatum deicitur.*

Jure igitur Concilium Bracarense I. anno 561. Can. 7. decrevit : *Si quis dicit Diabolum non fuisse prius bonum Angelum à Deo factum, nec Dei opificium fuisse naturam ejus : sed dicit eum ex chao & tenebris emerxisse, nec aliquem sui habere auctorem, sed ipsum esse principium & substantiam mali, sicut Manichæus & Priscillianus dixerunt : anathema sit.*

VII. Superest duo Manichæi deliria subicere, qui naturam mali vitam sensum &c. habere, & adversus Deum pugnare dicebant. Hoc non melius præstitero quàm si ex Augustino dicto Lib. contra Secundinum cap. 20. ea dissipavero. Dicit ergo : *Ecce quantà impietate, quàm nefariis horrendisque blasphemiiis te non vis exuere, ponendo in natura quam non fecit Deus, vitam, sensum, sermonem, modum, speciem, ordinem, & alia innumerabilia bona, & ponendo in ipsa Dei natura ante ullam commixtionem mali ipsam mutabilitatem, quæ capi poterat, & cui timere cogeatur, videns magnam labem ac vastitatem adversus sua sancta impendere secula, nisi aliquod eximium ac præclarum & virtute potens Numen opponeret. Et ut quid hoc totum, nisi ut illa Dei natura atque substantia sic implicatum teneat hostem subiectum, ut peccans perferat & ligatum, nec totum evadat purgata jam vicium & ut damnata servet inclusum ? En quomodo Deum timuisse, ne à gente tenebrarum inquinaretur, allecebant, & proinde substantiam suam in illam immisitisse, quo fiebat ut eâ peccante, ipsa quoque peccaret.*

VIII. Indè eorum excusationem irridens : *Præclaram verò*, inquit, excusationem bellicæ necessitatis in Deo vestro invenistis, contra illud quod vobis proponitur, ut respondeatis, quid futura erat Deo gens tenebrarum, si cum ea pugnare voluisset : quam si dixeritis ali-

aliquid fuisse nocituram, fatebimini corruptibilem & violabilem. Deum: si autem dixeritis, quod ei nocere non posset; quaereretur à vobis: cur ergo pugnavit? Cur substantiam suam corrumpendam, atque violandam, & ad peccata omnia cogendam hostibus tradidit? Contra istam ergo complexionem numquam exire potuistis.

At quia se tueri conabantur, Deum hoc fecisse ad impediendum peccatum, contra sic prosequitur: *Magnum aliquid vobis & tutum invenisse videmini, ut respondeatis dicentes, magna est iniquitas; appetere aliena, cui Deus iniquitati præbuisse assensum, si eam gentem qua hoc ausa fuerat, expugnare noluisse. Haberet ista responsio qualemcumque justitiæ colorem, si saltem in ipso bello natura Dei vestri se integram impollutamque servasset, & permixta hostilibus membris nihil iniquitatis vel coacta vel seducta fecisset: cum verò tantis facinoribus & flagitiis eam captivam consentire dicatis; cum denique ab illa impietate tam immani, quæ etiam lumini sancto, cujus portio est, exitit inimica, nec totam perhibeatis posse purgari, unde illi merito retribuere creditis horrendi illius globi æterna supplicia: quanto satius erat inimicum hostem in sua iniquitate relinquere inania molientem, quam tradere ei partem Dei, cujus vires hauriret, cujus decorem corruptum suæ iniquitati sociaret, quis non videat? quis tantâ obstinatione cæcetur, ut non sentiat, non attendat, quanto minore iniquitate gens tenebrarum frustra naturam invadere conaretur alienam, quam Deus invadendam, & ad iniquitatem cogendam, & ad penam ex aliqua etiam parte damnandam traderet suam? Hoccine tandem est iniquitati consentire noluisse, & tam ingentem iniquitatem sine ulla necessitate fecisse?* His & aliis S. Augustinus Manichæos redarguit, eosque ad hanc blasphemiam damnandam hortatur. Nam quale flagitium est dicere naturam Dei violabilem & corruptibilem esse, & captivam fieri, nec captivam potuisse saltem justitiam servare? Cum enim Daniel & Leones irriserit, & iniquitatem eorum à quibus captivus fuerat nullo compulsus terrore contemserit, natura Dei juxta Manichæos captiva ducta est, iniqua facta est, non potest tota purgari, cogitur in sine damnari.

IX. Ex hæcenus dictis colligitur, Manichæos de Deo tanquam de re corporea ac divisibili in partes sensisse, cum dicerent de sua substantia particulas in materiam sibi contrariam immisisse: finitâ etiam & terminis loci circumscriptâ, cum ejus substantiæ particulas viventibus singulis inclusas ponerent & alligatas. Et diversos fines in quibus habitaret Deus, ab iis quos incolebat gens tenebrarum assignarent. Unam regionem tribuerent Patri, aliam Filio, aliam Spiritui Sancto. Quare S. Augustinus contra Epist. Manichæi cap. 23. Manichæos Antropomorphitis peiores pronuntiat, quia

quia illi Deo tantum humanam formam tribuebant, malè intelligentes aliqua Scripturæ loca : hi verò de Deo corporali modo loquentes mille fabulas de eo texebant .

X. Trinitatem Patris, Filii, & Spiritus Sancti admittebant : Sed unum Deum sub triplici nomine esse dicebant . Sic enim Faustus apud S. August. L. 20. cap. 2. *Nos, inquit, Patris quidem Dei Omnipotentis, & Christi Filii ejus, & Spiritus Sancti unum idemque sub triplici appellatione colimus Numen* . Quibus cum Sabellio sentire videbantur . Eos tamen declinasse in Arianismum indicant quæ subdit dicens : *Sed Patrem quidem ipsum lucem incolere credimus summam ac principalem, quam Paulus aliàs inaccessiblelem vocat : Filium verò in hac secunda ac visibili luce consistere ; qui quoniam sit & ipse geminus, ut eum Apostolus novit, Christum dicens esse Dei virtutem & Dei sapientiam, virtutem quidem ejus in Sole habitare credimus, sapientiam verò in Luna : necnon & Spiritus Sancti, qui est majestas tertia, aeris hunc omnem ambitum sedem sitemur ac diversorium, cujus ex viribus ac spiritali profusione, terram quoque concipientem gignere patibilem Jesum, qui est vita & salus hominum, omni suspensus ex ligno* . His Faustus & ipse Manichæus fidem suam (verius errorem) de Trinitate involvit .

XI. Ultra tres Divinas Personas infinitum Deorum & Angelorum numerum admittebant, quos non quidem creatos, sed ut de substantia boni Dei genitos adorabant . Contra hunc errorem declamat S. Augustinus L. 15. contra Faustum cap. 5. & 6. qui in L. contra Adimantum cap. 13. ait : *Quod propterea faciunt, ut miserrime & vesana sua Secta etiam Paganorum concilient benevolentiam* . Ideoque crimen imponebant Moysi, quòd Deos alienos voverit adorari, dicentes, Veterem Legem non à bono Deo, sed à Principe tenebrarum latam & acceptam fuisse à Moyse promulgatam . Quem errorem in Simonianis & aliis jam supra refutatum Manichæi in suæ Sectæ præsidium suscitaverunt . Præter hos de Deo errores tamquam basim, alios, de quibus statim agam, Manichæi ædificabant .

§. V.

Errores de Carne & Christo refutati .

1. **P**Ositis duobus principiis uno bono & bonorum auctore, malo altero & malorum causa, quem Principem tenebrarum appellabant aliqui, alii Hylen, alii Diabolum, dicebant primò : Carnem esse à malo Deo, quia materiâ constantem à malo Deo procedente . Hanc insaniam pluribus in locis S. Augustinus ab eorum

eorum mentibus expellere conatur . L. 12. contra Faust. cap. 9. ex Apostolo 1. Cor. 12. qui corpus humanum materiale figuram esse Corporis Christi spiritualis asserens dicit v. 18. *Nunc autem posuit Deus membra unumquodque eorum in corpore sicut voluit* ; ita discurret : *Dicit Apostolus* „ Deus temperavit corpus „ ; & dicit iste (Faustus) *Hyle, non Deus . Quid apertius his inimicitii ante anathemandis, quam refellendis ? Numquid & hic Apostolus cum diceret, Deus, addidit hujus seculi ?* Quia verò fortè dicere poterat Faustus, Deum temperasse corpus, non dispositione membrorum, hoc est fabricando & construendo, sed admixtione lucis suæ, ut scilicet hæc membra ita distincta & locata sedibus suis alter posuerit qui hoc fabricavit : Deus autem miscendo bonitatem suam hujus fabricæ malitiam temperaverit. Sed nec hoc posse dici inquit Augustinus : *Habes enim & paulò superius* „ Deus posuit membra singulorum quodque eorum in corpore prout voluit „ . *Quis jam non intelligat, secundum hoc Deum dictam temperatorem corporis, quod ex multis membris corpus fabricavit, officia diversorum operum in unitatis compage servantibus ?*

Deinde cap. 10. à Manichæis petit, an corpora antequam Deus lucis particulam in ea immitteret, haberent hanc membrorum concordiam, quam laudat Apostolus . Cumque eam habuisse negare non possint : repebant enim, ambulabant, natabant, volabant quæque pro suo genere, videbant quoque, audiebant, alimentis congruis utebantur, proles etiam fecunditas suppetebat : nam & conjugia tribuunt illis : Habebant ergo hanc membrorum concordiam : & à quo habebant, nisi à Deo, qui teste Apostolo hanc posuerat ? Quod si ex commixtione Divinæ lucis hanc amplius in hoc Mundo non habent, vel nisi valdè attenuata habent, exclamat S. Doctor : *O quàm magna bona commixtione boni perdidit gens tenebrarum !*

II. Qualiter igitur originem Carnis Manichæi statuerent, refert & relutat S. Augustinus L. 6. contra Faustum cap. 8. *Dicunt, inquit, isti vaniloqui & mentis seductores, in illa pugna, quando primus eorum homo, tenebrarum gentem elementis fallacibus irretivit, utriusque sexus principibus indidem captis, cum ex eis Mundus construeretur, plerosque eorum in cælestibus fabricis colligatos, in quibus erant etiam feminae aliquæ prægnantes ; quæ, cum Cælum rotari cæpisset, eandem vertiginem ferre non valentes, conceptus suos abortu excussisse, eosque abortivos sætus & masculos & feminas de Cælo in terram cecidisse, vixisse, crevisse, concubuisse, genuisse. Hinc dicunt esse originem carnum omnium, quæ moventur in terra, in aqua, in aere .*

His narratis S. Doctor sic discurret : *Ergo si de Cælo est origo carnum, absurdissimum est propter hoc eas immundiores putare : præsertim quia in ipsa structura Mundi, eosdem principes tenebrarum, ita per omnes contextiones à summis usque ad ima colligatos dicunt, ut quædò quique amplius haberent commixti boni, tantò sublimiùs collocari mererentur : ac per hoc mundiores carnes esse deberent, quarum origo de Cælo est, quàm fruges, quæ oriuntur ex terra. Deinde quid tam insanum dici potest, quàm conceptus ante vitæ commixtionem tantò vivaciores fuisse, ut & abortivi & de Cælo in terram ruentes viverent, commixtâ autem vitâ, nisi tempore maturo editi vivere non possint ; & si de aliquo altiore loco cadant, continuò moriantur ? Uti-que si regnum vitæ contra regnum mortis belligeravit, commixta vita vivaciores facere debuit, non corruptibiliores. His & aliis eorum insaniam Manichæis Augustinus demonstrat.*

III. Ex hoc errore dicebant secundò : Christum veram carnem non habuisse, sed simulatam speciem carnis ludificandis sensibus præbuisse, ac proinde nec verè passum, nec mortuum, nec verè resurrexisse. Et sic Incarnationis mysterium, beneficium passionis, mortis ac resurrectionis Christi tollentes, totam Christianam Fidem evertabant. Ut enim ait Paulus 1. Cor. 15. v. 14. *Si autem Christus non resurrexit, inanis est ergo prædicatio nostra, inanis est & fides vestra.* Hunc errorem à Simonianis & aliis, contra quos supra egi, hauserant Manichæi. Ita se credidisse, cum eorum errore detineretur, fatetur S. Augustinus L. 5. Confess. cap. 10. nimirum, Salvatorem non de Virgine in carne natum, sed de massa lucis Divinæ emissum : *Ipsam quoque, inquit, Salvatorem nostrum Unigenitum tantum tamquam de massa lucidissimæ molis tuæ porrectum ad nostram salutem, ita putabam, ut aliud de illo non crederem, nisi quod possem vanitate imaginari. Talem itaque naturam ejus nasci non posse de Maria Virgine arbitrabar, nisi carui concerneretur. Concerni autem, & non inquinari non videbam, quòd mihi tale figurabam. Metuebam itaque credere in carne natum, ne credere cogerer ex carne inquinatum.* His suum priscum errorem Deo sincerè confitetur Augustinus. Fuit enim per novem annos Manichæis erroribus de-tentus, & in eadem Secta unus ex auditoribus.

IV. Ita de Christo digniùs se sentire gloriabantur Manichæi. Quos tamen refutat idem S. Augustinus Serm. 237. (aliàs 145.) de Tempore, ubi sumto argumento ex Apostolis, qui putantes eum post resurrectionem spiritum sub apparentia carnis fuisse, fuerunt à Christo correcti, ait : *Sed tu meliùs te dicere putas, quia dicis, spiritus erat, spiritus apparebat, spiritus videbatur, spiritus in homine conversabatur. Hoc dicis, ut dixi, hoc putabant & discipuli.*

Si

Si nihil mali dicis, si bonum est quod dicis: bonum erat quod discipuli putabant. Si Dominus sic eos dimisit, ut hoc putarent; dimittendus es & tu. Hoc enim credebant, quod & tu: si bonum est quod tu credis, bonum erat quod illi credebant. Sed non erat bonum. Ait illis Dominus, „ Quid turbati estis „? Perturbatio credidit, quod credis. Quid? „ Putabant se spiritum videre „. Et Dominus ad hæc; „ Quid turbati estis, & cogitationes ascendunt in cor vestrum „? Cogitationes istæ terrenæ sunt. Si enim cælestes essent, descenderent in cor, non ascenderent . . . „ Videte manus & pedes meos, palpite & videte „. Si parum est vobis adtendere, manus mittite. Si parum est adtendere, nec sufficiat tangere; palpite. Nec tangite solum dixit; sed palpite & contrectate. Pro bent sibi manus vestrae, si mentitur oculi vestri „. Palpite & videte „, oculos in manibus habete. Quid palpite, & quid videte? „ Quia spiritus carnem & ossa non habet, sicut me videtis habere „. Errabas cum discipulis (inquit Manichæo Augustinus) corrigere cum discipulis.

V. Christus ergo, & Dominus David est, & filius David est. Dominus David semper, filius David ex tempore: Dominus David natus de substantia Patris; Filius David natus ex Maria Virgine, & conceptus de Spiritu Sancto. *Utrumque teneamus* (ait S. Doctor Serm. 92. aliis 235. de Tempore) *unum horum nobis æterna habitatio, alterum horum nobis est à peregrinatione liberatio. Dominus enim noster Jesus Christus nisi dignatus esset fieri homo, periisset homo. Factus est quem fecit, ne periret quem fecit. Homo verus, Deus verus: Deus & homo totus Christus. Hæc est Catholica Fides. Qui negat Deum Christum, Photinianus est. Qui negat hominem Christum, Manichæus est. Qui confitetur Deum æqualem Patri Christum & hominem verum passum verè, sanguinem sudisse verum: non enim veritas nos liberaret, si falsum pretium pro nobis daret: utrumque qui confitetur, Catholicus est. Habet patriam, habet viam. Habet patriam „ In principio erat Verbum „: habet patriam „ Cùm in forma Dei esset, non rapinam arbitratus est esse æqualis Deo „. Habet viam „ Verbum caro factum est „: habet viam „ semetipsum exinanivit, formam servi accipiens „. Ipse est patria quod imus, ipse via quod imus. Per ipsum ad ipsum eamus, & non errabimus. Ita pulchrè & acutè S. Augustinus.*

IV. Hæc tamen viâ incedere Manichæi nolebant: qui odio carnis abrepti consequenter dicebant Tertio: Christum non ad corpora liberanda, sed ad solas animas reparandas venisse: & animarum tantummodo Resurrectionem per prædicationem veritatis nunc impleri, corporum autem resurrectionem nusquam futuram (ex S. August. L. de Hæres. cap. 46. & L. 4. contra Faustum

cap. 2.) Nec mirum. Qui enim carnem à malo Deo prodiisse, & propterea in Christo nec fuisse, nec surgente ipso surrexisse effutiebant, dicere tenebantur, nec in aliis resurrectionem : contra doctrinam Pauli 1. Cor. 15. ubi expressè carnis resurrectionem affirmat futuram : & præcipuè v. 53. *Oportet enim corruptibile hoc induere incorruptionem, & mortale hoc induere immortalitatem.*

VII. Ob eandem rationem Quarto : execrabantur generationem, eamque impediabant ; nuptias consequenter damnantes, easque in fornicationem vertentes : quia etsi mulieribus uterentur, tamen ne ex coitu generatio fieret, impediabant, quòd eà viâ materię & mali principii causam agi existimarent ; & quòd Divinam substantiam in omnibus ut somniabant alimentis permixtam, & in eos cum ciborum substantia ingressam, vinculis carnis per generationem ligari in prole censerent. De hoc adversus Secundinum cap. 21. S. Augustinus : *Novi, inquit, unde veniat indignatio tua : non enim tibi tam fornicaria displicet in fornicatione, quàm quòd in matrimonium commutata est, & conversa ad pudicitiam conjugalem, ubi Deum creditis vestrum in procreando filios artificibus carnis vinculis colligari : cui putatis parere meretrices, qui dant operam ne concipiant, ut ab officio pariendi libera, libidini serviant ; femine quippe conceptus apud vos carcer est & vinculum Dei. Hinc tibi etiam illud displicet, Erunt duo in carne una, Hinc etiam displicet, Crescite & multiplicabini, : ut Dei vestri multiplicentur ergastula.*

Et cap. 22. prosequitur : *Insultas, quòd mihi doluerit sterilitas Sara. Non planè hoc ego dolui, quia & ipsa prophetica fuit. Vestris autem sacrilegiis fabulosus congruit, non sterilitatem Sara, sed fecunditatem dolere, quia omnis femina fecunditas dura est Dei calamitas : unde non mirum est, quia in vobis maximè impletur, quod de talibus prædictum est, Prohibentes nuptias, Neque enim tam concubitum, quàm nuptias detestamini : quoniam in eis concubitus causâ propagandæ, non vitium, sed officium est : à quo immunis est continentia virorum feminarumque sanctarum ; non quia sicut malum illud devitaverunt, sed quia melius elegerunt. Hisce postremis verbis præfocat Augustinus modernorum Hæreticorum calumniam, quâ celibatum in Ecclesia Catholica profitentes traducunt, tanquam matrimonium damnent : non enim sicut malum illud devitaverunt, sed melius elegerunt.*

VIII. Hoc flagitio pollutos quidem fuisse Manichæos constat, tum ex dictis, tum ex iis quæ idem S. Doctor profert L. 15. contra Faustum cap. 7. ubi ostendens, eos omnia præcepta tabulæ Decalogi pessumdare ; *Hinc etiam, inquit, consequens præceptum, quod est,*

est, Non mœchaberis, ita violatis, ut hoc maximè in conjugio detestemini, quod filii procreantur; ac sic Auditores vestros, dum cavent, ne femina quibus miscentur concipiant, etiam uxorum adulteros faciatis. Ducunt enim eas ex lege matrimonii, tabulis proclamantibus, liberorum procreandorum causâ: Et vestra lege, metuentes, ne particulam Dei sui sordibus carnis afficiant, ad explendam tantum libidinem feminis impudicâ conjunctione miscentur; filios autem invisi suscipiunt, propter quod solum conjugia copulanda sunt. Quomodo ergo non prohibes nubere, quod de te tantò ante prædixit Apostolus, quando id conaris auferre de nuptiis, unde sunt nuptia? Quo ablato, mariti erant turpiter amatores, meretrices uxores, ibalami fornices, soceri lenones. Idem eis improperat L. de Moribus Manichæorum cap. 18. ubi addit, Manichæorum Electos consuevisse monere suos auditores (qui apud Manichæos secundus erat gradus nec ipsis nuptiæ prohibebantur) ut observarent tempus, quo ad conceptum mulier apta esset, eoque tempore à concubitu temperarent.

IX. Quintò: carnibus abstinebant Manichæorum Electi earumque usum detestabantur, quia cum, ut ex illis refert S. Augustinus Lib. de Moribus Manich. cap. 15, in omnibus animarum moribus, & alterationibus fugiat sensim aliqua Divinæ substantiæ particula, & à carnibus mortuis etiam abierit anima bona, nil aliud in carnibus præcipuè remanet, quàm fæx sordidissima, ex qua per concubitus caro formetur: unde concludebant: Quocirca cum anima etiam carnem deserueris, nimias sordes reliquas fieri, & idè eorum qui vescuntur carnibus, animam co inquinari. Ovis etiam & lacte uti, nefas existimabant.

Lambertus Daneus, qui nihil intentatum relinquit, quo Catholicis calumniatur, Opusc. de Hæres. cap. 46. „Papistæ, inquit, dum in suis jejuniis ex Gregorii decreto, quod est in Canone. Denique distinc. 4. refugiant & damnant esum eorum omnium, quæ Sementinam, ut ipsi loquuntur, trahunt originem carnis, manifestè in Manichæorum errorem incidunt. Hoc ipsum, damnat Paulus 1. Cor. 9. v. 7. 1. Timoth. 4. v. 3. & Dominus ipse „ Genes. 9. v. 4. 5. Actorum 10. v. 13.

At dicat mihi calumniator iste. Unde didicit, Catholicos, quos ipse Papistas hæretico spiritu appellat, in suis jejuniis à carnibus, ovis, & lacticiis abstinere, quia putent ea naturâ suâ mala esse, ut Manichæi, Encratitæ, & alii existimarunt, quos proinde damnat Paulus: & non potius ab illis abstineant, ut debilioris nutrimenti cibis utantur, ut carnem macerent? Ad hunc finem abstinentiam ab illis certo tempore Ecclesia præcipit: cur

Daneus non audit potius Paulum Rom. 14. v. 3. dicentem: *Is qui manducat non manducantem non spernat*. Et v. 21. *Bonum est non manducare carnem, & non bibere vinum*? Si bonum est abstinere à carnibus, ne infirmi offendantur, cur bonum non erit abstinere, ne caro concupiscat adversus spiritum? Audiat S. Augustinum L. 30. contra Faustum similia objicientem cap. 5. *Cbristiani, non Hæretici, sed Catholici edomandi corporis causâ, propter animam in orationibus ampliùs humiliandam, non quòd illa esse immunda credant, non solùm à carnibus, verùm etiam à quibusdam terra fructibus abstinent; vel semper, sicut pauci, vel certis diebus atque temporibus, sicut per Quadragesimam serè omnes, quantò magis quisque vel minùs seu voluerit, seu potuerit. Vos autem ipsam creaturam negatis bonam, & immundam dicitis, quòd carnes Diabolus operetur sacrulentiore materiâ mali; ac per hoc eas tamquam immundiora & trulentiora Dei vestri vincula exhorrentes abjicitis*. En ab Augustino statutum discrimen inter abstinentiam à carnibus Catholicorum & Manicheorum. Cur ergo eos cum Manichæis confundit? Cur verius ipse cum Joviniano sentire & loqui dicendus non est, qui teste S. August. Hæresi 82. dicebat, *nec aliquid prodesse jejunia, vet à cibis aliquibus abstinentiam*? Sed de hoc fusè locutus sum in Vera Ecclesia Tom. 2. p. 1. art. 6. Illuc ergo Lectorem meum remitto.

X. Sextò: Vinum quoque ut fel Principum tenebrarum averfabantur, uvas tamen comedebant, putantes in uvis Dei sui particulam adhuc manere, ab eis autem calcatis & in mustum ac vinum redactis eam abiisse; hinc S. Augustinus L. 20. contra Faustum dicentem parem sibi religionem esse cum Catholicis circa panem & calicem cap. 13. ait: *Cur autem arbitretur Faustus parem nobis esse religionem circa panem & calicem, nescio, cùm Manichæis vinum gustare, non religio sed sacrilegium sit. In uva enim agnoscunt Deum suum, in cupa nolunt, quasi aliquid eos calcatus & inclusus offenderit*. Hinc sub unica tantùm specie Manichæi Eucharistiam sumebant: quo indicio eos detegendos monet S. Leo Serm. 41. de Quadragesima 4. cap. 5. dicens: *Cumque ad regendum infidelitatem suam nostris audeant interesse mysteriis, ita in Sacramentorum communione se temperant, ut interdum, ne penitus latere non possint, ore indigno Cbristi corpus accipiant, sanguinem autem redemptionis nostræ haurire omninò declinent. Quod idè vestra notum facimus sanctitati, ut vobis hujusmodi domines, & bis manifestentur indicis, & quorum deprehensa fuerit sacrilega simulatio, à Sanctorum societate sacerdotali auctoritate pellantur. Qualia autem horrenda in sua Eucharistia agerent intra dicam*.

XI. Panem mendico ac extremè esurienti, vel cujuscumque

generis cibum præbere nefas arbitrabantur, ne adminiculum darent materiæ, & mali principii causam agerent (tacite improban-tes factum Christi, qui ad turbas famelicas pascendas panes multiplicavit) & hoc quia putabant, à nemine, quàm à suis Electis Divinam substantiam in alimentis detentam, & quasi inquinatam purgari ac liberari posse. Unde S. Athanasius in Epistola ad Solitarios ait: *Pro re hostili habetur apud Manichæos pauperum commiseratio.*

Attamen S. Augustinus supponit, pauperi importunè petenti nummos dare non exhorruisse: ideòque L. de Moribus Manichæorum cap. 16. eos irridet dicens: *Quæ cum ita sint, etiam panem mendicanti dare prohibetis: censetis tamen propter misericordiam, vel potius propter invidiam nummos dari. Quid hic prius arguam, crudelitatem, an recordiam? Quid enim si eo loco res agatur, ubi cibus inveniri non potest? Homo egeus ille fame moriturus est, dum tu vir sapiens & benignus magis cucumerem, quàm hominem miserearis. Hæc est profectò (quid enim dicam congruentius & planius?) falsa misericordia, & vera crudelitas. Nunc recordiam videamus. Quid enim si nummis illis quos dederis, sibi panem emat? Nonne hoc in illo pars illa vestra Divina, qui hanc sumit à venditore, passura est, quod passura erat, si te dante sumisset? Involvit igitur sordibus peccator ille mendicus partem Dei revolare capientem, tuis nummis ad tantum scelus adjutus: & tamen vos homines prudentissimi interesse arbitramini, si homicidium facturo non detis hominem quem occidat, sed scientes pecuniam, unde occidendum comparet, detis. Quid ad hanc insaniam addi potest? Ita enim fit, ut aut homo moriatur, si venale non invenerit cibum, aut cibus ipse, si invenerit: quorum alterum est verum homicidium; alterum vestrum, vobis tamen ita tribuendam, tamquam utrumque sit verum. Ita irridens eorum insaniam detegit, & dissipat S. Augustinus.*

XII. Septimò: Odio quo adversus carnem ferebantur Sanctorum reliquias execrabantur: unde Faustus Manichæus, ut videre est apud S. Augustinum Lib. 20. contra ipsum, improperebat hoc Catholicis, quòd eas venerantur dicens cap. 4. *Idola vertistis in Martyres, quos votis similibus colitis.* Hinc vides, à quibus hauserint moderni Hæretici sacras reliquias contemnere, & nos qui eas veneramus de idololatriæ crimine accusare. Utrosque tamen calumniatores esse S. Augustinus demonstrat ibidem cap. 21. dicens: *Populus Christianus memorias Martyrum religiosâ solemnitate concelebrat, & ad excitandam imitationem, & ut meritis eorum conficiatur, atque orationibus adjuvetur: ita tamen, ut nulli Martyrum, sed ipsi Deo Martyrum, quamvis in memorijs Martyrum, consistamus*
alta-

altaria. *Quis enim Antistitum in locis Sanctorum corporum assistent altari, aliquando dixit: Offerimus tibi Petre, aut Paule, aut Cypriane? Sed quod offertur, offertur Deo, qui Martyres coronavit, apud memorias eorum quos coronavit: ut ex ipsorum locorum admonitione major affectus exsurgat ad acuendam caritatem, & in illos quos imitari possumus, & in illam, quo adjuvante possumus. Colimus ergo Martyres eo cultu dilectionis & societatis, quo in hac vita coluntur sancti homines Dei, quorum cor ad talem pro Evangelica veritate passionem paratum esse sentimus. Sed illos tantò devotius, quantò securius post certamina superata, quantò etiam fidentiori laude predicamus jam in vita feliçiores viatores, quàm in ista adhuc usque pugnantes. At illo cultu quæ Græcè Latria dicitur, Latine vero verbo dici non potest, cum sit quedam propriè Divinitati debita servitus, nec colimus, nec colendum docemus, nisi unum Deum. Hæc erat Augustini temporibus Ecclesiæ Catholicæ fides: eadem modò est Ecclesiæ Romanæ. Quod tunc opponebant Manichæi, opponunt modò Protestantes. Quis pro vera fide pugnet quisque judicabit. De hoc egi in Vera Ecclesia Tom. 2. p. 2. art. 19.*

XIII. Octavò: De Christo alia ridicula simul & indigna spargebant, nimirum fuisse Serpentem illum, qui Adamo & Evæ per esum pomi scientiam boni & mali infudit. Ita ex S. August. L. de Hæresibus cap. 46. Quam insaniam ab Ophitis supra rejectis hauserant. Rursus Christum esse Solem hujus Orbis, eos tradidisse refert Theodoritus L. 1. Hæret. Fab. c. 26. Re verà tamen Christum in Sole potiùs & Luna, sicut Spiritum Sanctum in aere habitasse asseriebant, ut ex Fausto apud S. Augustinum L. 20. contra ipsum edito cap. 2. apparet.

Quia verò mendacium sibi nunquam constans esse potest, Christum, seu Jesum, à quo tanto conatu ex dictis veram carnem auferentes verè patibilem esse & ex Virgine natum esse negabant, dicebant postea, ex Spiritu Sancto & terra patibilem gigni, & in omnibus herbis, & arboribus esse suspensum. Unde vel duos Christos fingebant: unum in Sole & Luna degentem, qui sub Pontio Pilato apparenter tantum esset passus, & alterum patibilem & per terram distentum, vel secum ipsi pugnant. Hujus delirii testis est & irritor S. Augustinus L. 20. contra Faustum c. 11. ubi: *Quid autem hinc dicam, inquit, quod ais, Ex viribus Sancti Spiritus ac spiritali profusione terram quoque concipientem gignere patibilem Jesum, qui est vita & salus hominum omni suspensus ex ligno? O demens! potestne terra de Spiritu Sancto concipere patibilem Jesum, & Maria Virgo non potuit? Compara si audeo virginalia viscera tantâ sanctitate sanctificata cum omnibus terris locis,*

locis, ubi arbores herbaque gignuntur. Itane in illa femina exborrescis, aut borrescere te fingis uterum pudicitia dedicatum: & in hortis omnibus circum quasque urbes ex cloacinis aquis Jesum gigni non exborrescis? An ut hoc defendatis, dicetis, Spiritum Sanctum in contaminabili ubique pollere præsentia? Respondetur vobis: Cur non ergo & in utero virginali?

Inde post multa, quæ à Lectore meo videnda reservo: Postremo, subdit, dicite nobis, quot Christos esse dicatis. Aliusne est, quem de Spiritu Sancto concipiens terra patibilem gignit omni non solum suspensus ex ligno, sed etiam jacens in verba? Et alius ille quem Judæi crucifixerunt sub Pontio Pilato; & tertius ille per Solem Lunamque discentis? An unus atque idem ex quadam sui parte ligatus in arboribus, ex quadam verò liber, eidem ligata captaque subveniens? Deinde procedit ostendens: quòd si idem est qui fuit crucifixus, aut corpus verum non habuit, & sic pati non potuit. Aut habuit, & sic quærit, unde habuerit, cum omnia corpora ex gente tenebrarum esse dicant, imò nec substantiam Divinam cogitare nisi corpoream valuerint. Unde concludit, eos cogi admittere, aut sine corpore crucifixum esse Christum: aut eum habuisse corpus de gente tenebrarum: aut dari corpus de Divina substantia, quod tamen possit ligno affigi & occidi. At miseros istos tot contradictionibus implicatos dimittentes, ad ultiores eorum dementias procedamus.

§. VI.

*Errores de Homine, Animabus, Libero arbitrio,
Fide, Bello &c.*

I. **T**ot hujus turpissimæ Sectæ fuere deliramenta, ut singulis referendis & simul refutandis vix integer Tomus sufficeret. Strictè ergo ea recensebo. De Mundi creatione, hanc ut dixi cum S. Augustino Her. 46. ex conflictu gentis tenebrarum cum Deo procellasse effutiebant, ut Divina substantia corporibus ligaretur. De Adami etiam & Evæ productione eorum fabulam cum S. Augustino citato loco supra exposui. Hanc Epiphanius Hæresi 66. num. 30. ita refert: *Eum qui ita loquutus est, „ Venite; faciamus hominem ad imaginem nostram & similitudinem, „ sive ad eam quam vidimus formam, Principem esse, qui reliquis Principibus dixerit: Adeste: date mihi ex illa luce, quam accepimus, „ & taciamus hominem, „ ad nostram qui Principes sanctus effigiem, qualem aspeximus; qui quidem primus homo est: ita hominum fabricasse. Eodem*

dem & Evam ratione condidisse, eique de sua cupiditate ad Adamum decipiendum impertiiſſe. Ita Epiphanius.

Aliter fabulam hanc narrat Theodoritus L. 1. Hæret. Fab. c. 26. his verbis: Porro autem hominem quoque dicunt non esse à Deo formatum, sed à Principe materiæ, cum autem Saclam nominant, & similiter dicunt, Etiam à Sacla & Nembroth factam esse: & Adam quidem belluina forma præditum creatum fuisse; Evam autem inanimam & immobilem. Masculinam autem Virginem, quam Filiam lucis nominant & Joel appellant, vitam & lucem Eva impertiiſſe. Adam verò ab Eva sevitare liberatum esse. Saclam autem cum ea primùm coiiſſe & belluæ formæ præditum filium ex ea suscepisse. Deinde cum ea etiam rursus conjunctum esse dicunt. Sed quid in hisce nugis seu veriùs impietatibus Lectorem detineor? Veriùs dixissent, non primos homines, sed Manichæum & suos à Principe tenebrarum Diabolo ortum suum accepisse.

II. Nec eos convincere posſe provocando ad Scripturam, aliter productionem Adami & Evæ, & quidem à Deo summo omnium conditore, factam, enarrantem. Nam Vetus Testamentum (& is erat alter eorum error) integrum rejiciebant; asserentes, Deum qui per Moysen Legem dedit, & in Prophetis loquutus est, non esse verum Deum sed unum ex Principibus tenebrarum. At hic etiam se stultos manifestabant. Si enim Princeps tenebrarum condidit hominem, si idem Veteris Testamenti auctor est: cur hominis conditionem non exponunt, eo modo quo Vetus Testamentum in Genesi eam factam fuisse narrat? Sed eorum mentes quasi misere naves omni vento huc illucque circumferuntur. Quare eandem ratione etiam Novi Testamenti Scripturas adulteratas esse contendebant, nec in totum admittebant ut veras. Unde S. Augustinus L. 17. contra Faustum c. 3. O mirabilem, inquit, insaniam! De Christo aliquid narranti nolle credi Matthæo, & vello credi Manichæo. Si Matthæus non interfuit, cum Christus dixisset: Non veni solvere Legem aut Prophetas, sed adimplere, & propterea non est ei credendum: numquid Manichæus interfuit, aut jam vel natus fuit, cum Christus inter homines appareret? Secundum ergo hanc fidei vestræ legem, nihil ei de Christo testificanti credere debuiſtis. Nos autem non propterea dicimus non credendum esse Manichæo, quia dictis factisque Christi non interfuit, & longè post natus est: sed quia de Christo contra Christi discipulos loquitur, & contra Evangelium, quod illorum auctoritate firmatum est. Habemus enim Apostoli vocem, qui in Spiritu Sancto tales venturos esse cernebat. Unde fidelibus dicebat, si quis vobis evangelizaverit, præterquam quod accepistis, anathema sit. Ita S. Augustinus, qui postquam multis occen-

dit, credendum esse Matthæo, & quòd si Matthæo credere nolunt, credant saltem Joanni attestanti Legi & Prophetis; concludit: *Undique tergiversatio vestra contunditur. Apertè dicite, non vos credere Christi Evangelio: nam qui in Evangelio quod vultis creditis, quod vultis non creditis, vobis potius quàm Evangelio creditis.* Audiant hoc moderni Hæretici, qui suo privato spiritu iudices Evangelii se constituunt.

III. Quia verò dicebant, in Manichæum descendisse Spiritum Sanctum & in eo impletum fuisse, quod Christus promiserat Joan. 14. v. 16. *Ego rogabo Patrem, & alium Paraclitum dabit vobis: respondeant quæso. Paraclitus, quem Christus Apostolis promisit, Spiritum veritatis futurum esse dixit, quo repleti in die Pentecostes omnem Evangelicam veritatem Ecclesiæ tradiderunt. Porro cùm Paraclitus, quo se imbutum dixit Manichæus, contraria locutus sit doctrinæ ab Apostolis traditæ, vel duos Paraclitos Spiritus Dei invicem pugnantes admittere necellè erit, quo fiat, ut cui credendum sit, ignoremus: vel dicendum, ut re verà est, Spiritum quo se impletum jactabat Manichæus, non esse Paraclitum Dei Spiritum Veritatis, sed Spiritum Principis tenebrarum Diaboli, Spiritum mendacii, qualem fuisse Spiritum, quo se impletum jactabat Montanus supra ostendi: quod S. Augustinus confirmat L. 32. contra Faustum c. 17. *Quia enim, inquit, post resurrectionem & ascensionem Domini continuò venturus erat Spiritus Sanctus, apertissimè dictum est à Joanne (c. 7. v. 39.) „ Spiritus enim nondum erat datus, quia Jesus nondum fuerat glorificatus „. Si hac itaque causa erat, ut non daretur, quia nondum erat clarificatus Jesus, procul dubio clarificato Jesu jam causa erat ut statim daretur.**

IV. Rursus cùm Manichæi assererent, Manen suum non tantum fuisse à Paraclito missum, sed à Paraclito susceptum eo modo, quo Jesus susceptus fuit à Verbo, seu Filio Dei, placeat audire Augustinum L. contra Epistolam Manichæi c. 7. eos ita perstringentem: *Quæro, cùm Pater & Filius & Spiritus Sanctus, vobis etiam consentibus, non dispari naturâ copulentur, cur hominem susceptum à Spiritu Sancto Manichæum, non putatis turpe natum ex utroque sexu prædicare, hominem autem susceptum ab Unigenita Sapientia Dei, natum de Virgine credere formidatis? Si caro humana, si concubitus viri, si uterus mulieris non potuit inquinare Spiritum Sanctum, quomodo potuit uterus Virginis inquinare Dei Sapientiam? Manichæus ergo iste, qui de Sancto Spiritu & Evangelica lectione gloriatur, necesse est vobis concedat, aut missum se esse à Spiritu Sancto, aut susceptum. Si missus est, Paracleti se Apostolum dicat, si susceptus, concedat ei hominem matrem, quem suscepit Unigeni-*

us Filius, si ei quem suscepit Spiritus Sanctus concedit & patrem.

Et paulò infra: *Quodd si dixeritis, non in utero, vel ante uterum, sed jam natum Manichæum à Spiritu Sancto esse susceptum, sufficit fateamini habuisse carnem de viro & semina procreata. Cum enim vos non timeatis viscera & sanguinem Manichæi de humano concubitu venientem, & intestina fimo plena, quæ caro illa gestabat; & his omnibus non credatis contaminatum esse Spiritum Sanctum, à quo illum hominem susceptum esse creditis: cur ergo uterum virginalem & intacta genitalia reformidem, & non potius credam, Sapientiam Dei in ipsis matris visceribus homine suscepto immaculatam sinceramque mansisse? Quapropter quoniam sive missum, sive susceptum à Patre se Manichæus vester affirmet, nihil horum poteris obtinere: ego jam cantior, neque missum eum credo, neque susceptum. His Augustinus jugulum Manichæorum petit.*

V. Coherenter ad suum errorem de duobus principiis bono & malo duas in homine ponebant animas: unam bonam, quam dicebant esse partem substantiæ Dei à Deo inditam, cui omnia bona hominis tribuebant: alteram malam, quæ non à Deo, sed à gente tenebrarum procederet. Istam propriam esse carnis: illam ex adventitia Dei parte, quæ cum tenebrarum gente conflixerit, eique permixta remanserit. De hoc agit S. Augustinus præcipuè in lib. de duabus Animabus cap. 1. & sequentibus. Et sanè animam hominis non esse de substantia vel partem substantiæ Dei, sed effectum Dei à Deo in homine inspiratum, probant verba illa Genes. 2. v. 7. *Formavit igitur Deus hominem de limo terræ, & inspiravit in faciem ejus spiraculum vitæ, & factus est homo in animam viventem.* Unde S. Augustinus L. 1. contra Adversarium Legis & Prophet. cap. 14. ait: *Flatus autem ille Dei qui hominem animavit, factus est ab ipso, non de ipso. Quia nec hominis flatus hominis pars est; nec homo eum facit de se ipso, sed ex acrio balitu sumto & effuso: Deus verò potuit & de nihilo & vivum rationalemque facere, quod non potest homo.*

Idem S. Doctor in Disputatione 1. contra Fortunatum Manichæum interrogantem, an Anima Dei sit an non? ait: *Si quæris, utrum à Deo descenderit anima, magna quidem questio est: sed sive à Deo descendit, sive non; illud de anima respondeo, non esse Deum; aliud esse Deum, aliud animam. Deum esse inviolabilem, incorruptibilem, & impenetrabilem & incoquinabilem, & qui ex nulla parte corrumpi possit, & cui nulla ex parte noceri potest. Animam verò videmus, & peccatricem esse, & in æram versari, & veritatem quærere, & liberatore indigere. Hac mutatio animæ ostendit mihi, quodd anima non sit Deus. Nam si anima substantia Dei est,*
sub-

substantia Dei errat, substantia Dei corrumpitur, substantia Dei violatur, substantia Dei decipitur: quod nefas est dicere.

VI. At quia dicebant, animam peccatis ac infirmitatibus obnoxiam non esse animam bonam, quæ pars substantiæ Dei est: sed animam naturam malam à gente tenebrarum profectam, & cum Dei parte pugnantem; Hæc tamen eorum turpis erat imaginatio. Tum quia malum naturam aliquam & substantiam esse ponebant, non purum vitium naturæ, alioquin bonæ. Tum quia volebant malum prævalere bono, & quidem Divino, & animam bonam partem Dei vinci à malo, eique velut captivam servire etiam in malo.

VII. Sciant ergo, malum non esse naturam, sed vitium naturæ alioquin bonæ malâ suâ voluntate contractum. Anima quidem bonam fecit Deus: sed cum dederit liberum voluntatis arbitrium, ipsa eo abutens maluit suæ cupiditati, quam Deo ac ejus Legi obtemperare. Unde S. August. contra Fortunatum Manichæum. Disput. 2. *Nostra, inquit, fides hæc est, quod malorum genitor non sit Deus, neque ullam naturam fecerit malam. Sed cum uterque nostrum consentias incorruptibilem Deum & incoquinabilem, prudentium est estimare & fidelium, quæ sit fides purior & majestate Dei dignior: illa ubi asseritur, vel virtus Dei, vel pars aliqua Dei, vel sermo Dei posse commutari, violari, & corrumpi, ligari; an ea ubi dicitur, & omnipotentem Deum, & omnem ipsius naturam & substantiam nullâ parte unquam posse corrumpi: sed mala esse voluntario peccato animæ, cui dedit Deus liberum arbitrium. Quod liberum arbitrium si non dedisset Deus, judicium puniendi nullum justum esse posset, nec meritum rectè faciendi, nec præceptum Divinum ut ageretur penitentia de peccatis; nec ipsa indulgentia peccatorum, quam nobis Deus per Dominum nostrum Jesum Christum donavit. Quia qui non voluntate peccat, non peccat.... Si quis enim verbi causâ ligaretur ab aliquo cæteris membris, & de manu ejus falsum scriberetur sinè ejus propria voluntate; quæro si hoc judici patefieret, posset hunc hominem falsitatis crimine condemnare? Quare si manifestum est, peccatum non esse, ubi non est liberum voluntatis arbitrium, volo audire, anima, quam dicitis, aut partem, aut virtutem, aut sermonem, aut aliud quodlibet Dei, quid mali fecerit, ut à Deo puniatur, aut penitentiam agat peccati, aut veniam mereatur, cum nihil ipsa peccaverit.*

VIII. Audiendus est etiam idem S. Augustinus in Libro de duabus Animabus cap. 14. ubi probat, neutram ex illis poenitere posse peccati: non bonam, quia nihil mali, non malam, quia nihil boni facere potest: *Quæro, inquit, ex duobus illis generibus anima-*

rum, cuius sit pœnitere peccati? Scio quidem neque illius esse posse, qui malè facere, neque illius, qui benè facere non potest: quare ut eorum verbis utar, si animam tenebrarum peccati pœnitet; non est de substantia summi mali: si animam lacis, non est de substantia summi boni. Pœnitendi enim affectus ille qui prodest, & malè fecisse pœnitentem, & benè facere potuisse testatur. Quomodo igitur ex me nihil mali, si ego perperam feci? aut quomodo me rectè pœnitet, si ego non feci? Audi partem alteram. Quomodo ex me nihil boni est, cui bona voluntas inest? aut quomodo me rectè pœnitet, si non inest? Iudè concludit, quòd Manichæi, vel à Christiano nomine & etiam imaginariâ ratione pœnitentiam ejiciant, aut animarum duo illa genera docere jam desinant. Quod si faciant, Manichæi esse utique jam desinent: nam tota illa Secta bicipiti, vel potiùs præcipiti animarum varietate fulcitur. Ita S. Augustinus.

IX. Et meritò nam ex hoc falso principio inferebant primò, ut supra §. 3. ex S. Augustino L. de Hæres. cap. 46. dixi, carnalem concupiscentiam non esse infirmitatem ex primi hominis peccato in nobis superstitem, sed esse substantiam mali nobis intimè adhaerentem & pugnantem cum substantia boni; & in hoc sensu exponebant illud Pauli ad Galat. 5. v. 17. *Caro concupiscit adversus spiritum, & spiritus adversus carnem: hæc enim sibi invicem adversantur, ut non quæcumque vultis illa faciat; ex quo pugnam duarum animarum deducentes dicebant, concupiscentiam non esse vitium aliquando in nobis in æterna felicitate sanandum; sed substantiam malam à nobis separandam, & post Mundi conflagrationem in globo quodam velut in carcere recludendam. In quo Manichæi cum Pelagianis partim conveniebant, partim disconveniebant. Conveniebant: quia utrique concupiscentiam ponebant esse de natura hominis, ac proinde eam in Paradiso etiam habuisse: disconveniebant, quia Manichæi eam ponebant substantiam nature malæ: Pelagiani verò eam ut bonam laudabant. Ab utrisque diffident Catholici, ait S. Augustinus L. 3. Oper. imperfecti contra Julianum cap. 177. *Nos ergo carnis concupiscentiam nec substantiam naturæ malæ esse dicimus, quod dicunt Manichæi, nec omnis ejus usus reprobat a nobis, sicut à Manichæis: nec eam rursus bonam dicimus, quod dicunt Pelagianis, nec ejus contra spiritum motus laudatur à nobis, sicut à Pelagianis: sed dicimus eam esse vitium substantiæ bonæ, quod in nostram naturam per prævaricationem primi hominis versum est, quod dicunt Catholici Christiani, ejusque mali usus licitus & honestus liberorum procreandorum causâ approbatur à nobis, sicut à Catholicis Christianis. Ita & Manichæos & Pelagianos superamus, atque vitamus; quorum sic errores utrorumque diversi sunt, ut quæ**

vide-

videtur minor, ipse illius qui videtur major, demonstretur adjutor.

X. Inferebant secundo, in homine non esse liberum arbitrium ad peccandum. Ex quo enim duas in homine collocabant animas, bonam unam, & hanc à Deo; malam alteram, & hanc à Principe tenebrarum, mala culpæ, quæ in homine sunt, non libero arbitrio, quod, aiebant, foret Deum peccati auctorem facere, nec infirmitati naturæ peccato primi hominis corruptæ tribuebant, sed animæ naturâ malæ: itaut à criminum quæ patrabant culpâ se vacare assilerent, sed ad ea vi malignantis naturæ vel invitâ cogi. Contra hunc errorem tres libros de Libero Arbitrio scripsit S. Augustinus: in quorum primo motâ quæstione, unde sit malum, explicat quid sit malè agere, tumque mala hominum facta ex libero voluntatis arbitrio proficisci ostendit, cum libidini, quæ in omni malo facto regnat, servire nemo cogatur. Quæ studiosus apud S. Doctorem percurrere poterit. At quia in auferendo libero arbitrio à natura hominis per peccatum corrupta moderni Hæretici conveniunt, videri possunt quæ dixi in Vera Ecclesia Tom. 2. p. 1. art. 7. Primus, qui hominem libertate spoliavit, & omnia necessitate absolutâ evenire dixit, fuit Simon Magus, quem secuti sunt Marcion, Manes, Petrus Abaelardus, Jo: Wicleffius, Lutherus, Calvinus, eorumque gregales.

XI. Errabant insuper, quia fidei necessitatem, & utilitatem rejiciebant, irridentes Catholicam disciplinam, quâ homines credere in primis juberentur, non autem ad veritatis notitiam ratione ducerentur. Et quidem stultè, nedum impiè. Nam si quis criterio rationis Manichæorum doctrinam expendere velit, eam nedum veræ fidei, sed rectæ rationi repugnantem inveniet. Quid enim rationi magis adversum, quàm Deum captivum, coinquinatum proponere, præter alia, de quibus supra, quæ ipsi docebant?

Contra hunc errorem, quo & ipse olim deceptus fuerat S. Augustinus Librum scripsit de Utilitate credendi ad Honoratum, hoc nexo ex parte pollutum, ubi cap. 1. ait: *Est igitur mihi propositum, ut probem tibi, si possim, quod Manichæi sacrilegè & temerè invehantur in eos, qui Catholicæ fidei auctoritatem sequentes, antequam illud verum quod purâ mente conspiciatur, intueri queant, credendo præmuniantur, & illuminaturo præparantur Deo. Nosti enim, Honorate, non aliam ob causam nos in tales homines incidisse, nisi quod se dicebant, terribili auctoritate separatâ, merâ & simplici ratione eos qui se audire vellent, introduciuros ad Deum, & errore omni liberaturos. Quid enim me aliud cogebat, annos serè novem, spretâ religione quæ mihi puerulo à parentibus insita erat, homines illos sequi ac diligenter audire, nisi quod nos superstitione terreri, & fidem nobis*

ante

ante rationem imperari dicerent, se autem nullum premere ad fidem, nisi prius discussâ & enodatâ veritate? Quis non his pollicitationibus illiceretur, præsertim adolescentis animus cupidus veri, etiam nonnullorum in schola doctorum hominum disputationibus superbus & garrulus; qualem me tunc illi invenerunt, spernentem scilicet quasi aniles fabulas, & ab eis promissum, apertum & sincerum verum tenere atque haurire cupientem. His & aliis suam deceptionem ingenuè ac sincerè confitetur S. Augustinus, quam deinde positus in Auditorum numero agnovit, & movente gratiâ depofuit, & tot Libris editis ab aliis etiam avertere acerrimè studuit. Hâc arte Manichæi fallebat incautos, & ut fidem pessumdarent, Sacras Scripturas; ut vidimus, contemnebant.

XII. Quæ verò & quales essent rationes, quibus ad suam fidem simplices allicere conabantur, insanæ mentis potius chimeras, quam rectæ rationis cogitatum, supra ex parte exposui, nimirum de duobus principiis, eorum pugna, ex qua Divinam substantiam ubique permixtam esse dicebant. Quibus addebant, plantas & arbores non vegetante dumtaxat, sed sentiente vitâ præditas esse, & doloris capaces somniabant: unde agriculturam tanquam plurimum homicidiorum ream accusabant; hinc fruges metere, fructus ex arbore decerpere, plantas & legumina quælibet evellere, Manichæorum Electis nefas arbitrabantur: quæ tamen suis Auditoribus ignoscî asserebant, quia hæc sibi ad esum parabantur; sic ex homicidiis vivebant. Et quia ea quæ ab Electis suis comedeantur, à fece materiæ & mali purgari, secus tamen ea quæ ab aliis comedeantur, fiebat, ut quæ ad esum ipsis parabantur tota à se consumenda esse censerent, nefasque putarent, reliquias ciborum suorum aliis etiam pauperibus dare vel abjicere: & hoc, aiebant, ne cibis permixta lux & substantia Divina non purgata maneret: idèoque non solum ad satietatem, sed ad crudelitatem & ructum usque comedeant, S. Augustino teste Lib. de Moribus Manich. cap. 16.

XIII. Animarum metempsychosim seu transmigrationem cum Pythagora asserebant, adeò ut animam hominis in corpus bruti, aut etiam plantæ transire putarent. Animas tamen suorum Auditorum in corpora Electorum transire arbitrabantur, ut in ipsis purgatæ in nulla amplius corpora reverterentur. Ex S. August. L. de Hæres.

XIV. Bellum prorsus illicitum esse contendebant. Unde Faustus apud illos celebris accusabat Moysen, quòd spoliaverit Ægyptos & bella gesserit. Eum tamen confutat S. Augustinus L. 22. contra ipsum cap. 74. & seq. ubi inter alia ostendit, Moysen mandante

dante Deo bella gessisse ejus jussu digna dignis rependendo, additque, quòd *nocendi cupiditas, ulciscendi crudelitas, impacatus, atque implacabilis animus, feritas rebellandi, libido dominandi, & si qua similia, hæc sunt quæ in bellis jure culpantur*. Bellum verò si justum sit non damnari, ostendit tum ex Joanne Baptista, ad quem accedentibus militibus & dicentibus Lucæ 13. v. 14. *Quid faciemus & nos?* non respondit, Arma abjicite: sed *Neminem concutiat, neque calumniam faciat, & contenti estote stipendiis vestris*. Tum ex ipso Christo qui Centurionis fidem laudavit quidem; sed militiæ defectionem non imperavit. Mirum tamen mihi est, quòd Manichæi, qui ex pugna & bello inter sua principia Mundum & cætera omnia processisse imò & in pugna consistere, ut ex dictis, asserabant, bellum postea inter homines reprobarent: Cum tamen Sebastianus quidam de eorum Secta dux militum esset, qui referente S. Athanasio in Apologia de fuga sua, ut Arianis faveret, in Catholicos crudeliter deserviit.

XV. In moribus & conversatione suavitatem ac modestiam, præcipuè Electi exterius affectabant, vitam austeram, humilem, caritatem spirantem profitentes, vultu demisso, & habitu contentibili incedebant. Jejunia frequentabant: sed diebus Dominicis & Lunæ in honorem Solis & Lunæ, quibus cultum deserebant, vel tanquam Diis, vel tanquam Dei sedibus, ad quas animæ purgare ferebantur. Diem etiam Dominicum jejuniis consecrabant, ut Catholicis, quibus eâ die jejunium in gaudium Resurrectionis Domini in usu non erat, se opponerent; unde Manichæi, qui Christum verè resurrexisse negabant, in contemptum jejunare volebant. Hinc factum est, ut die Dominico jejunare Catholicis scandalo esset. Sic S. Augustinus Epist. 36. (aliàs 86.) ad Casulanum c. 12. *Die autem Dominico jejunare scandalum est magnum, maxime posteaquam innotuit detestabilis multumque Fidei Catholicæ Scripturisque Divinis apertissimè contraria hæresis Manicheorum, qui suis auctoribus ad jejunandum istum tamquam constituerunt legitimum diem*.

XVI. Qui se hujus Sectæ severiores custodes, & majori zelo ejus observantiæ promotores esse gloriabantur, ex dictis, Electorum sibi nomen usurpabant, ceteros Auditores, quasi Catechumenos, & nondum benè instructos appellantes. Hi tria signacula suis in moribus magnâ ostentatione jactabant, *oris, manuum, & finis*. Ad oris signaculum pertinere dicebant, quod ab omni se continerent blasphemia: cum tamen nulli alii Hæretici atrociores quàm ipsi in Deum blasphemias evomuerint. Oris signaculum sibi insuper arrogabant, quòd nec vinum biberent, nec carnibus vescerentur. De manuum signaculo ambitiosius gloriabantur, quod

quod ab animalium nece, & à stirpium laceratione temperarent. De signaculo denique sinus, quodd castitatem colerent, nec uxores ducerent. Hæc ex S. Augustino de Moribus Manichæorum c. 10. & sequentibus.

Signis tamen res ac mores non respondebant: sub ovina enim pelle veri lupi erant, ovile Christi laniantes ore, manibus, sinu. Ore quidem dum simplicibus falsis suis dogmatibus illudentes, in perniciem eorum animas trahebant. Dum licet à vino & carnibus abstinerent, potibus tamen & cibis delicatioribus sibi permixtis, etiam ultra satietatem utebantur. Manibus, quia licet herbas & fructus evellere crimini deputarent, volebant tamen, imò cogebant alios ut ea evellerent, & ad se deferrent, quasi aliud esset crimen patrare, aliud velle ut alter pro se illud patret. Quædam tamen animalia homini incommoda absque scrupulo necabant: unde S. August. citato loco cap. 17. ait: *Quid quodd à nece animalium nec vos ipsi in pediculis & pulcibus & cimicibus temperatis? Numquid in istis non erat anima?* Sinu denique, quia licet à conjugio temperantes continentiam se profiteri dictitarent, obscenis tamen impuritatibus, mille tamen impudiciis se inquinabant, quarum aliqua exempla etiam de visu narrat S. Augustinus laudatus c. 19. Hoc verum est, quodd insana præcepta multiplicabant, quæ vel implere malum erat. Sic idem S. Doctor Lib. 5. contra Faustum cap. 6. *Talia sunt, inquit, ipsa præcepta Manichæi, ut si ea non faciatis, deceptores; si autem faciatis, decepti sitis. Neque enim Christus vobis præcepit, ut herbam non evellatis, ne homicidium perpetretis, qui discipulos suos per segetem transeuntes, & esurientes, vellere spicas Sabbato non prohibuit, unde convinceret & præsentis Judæos, & futuros Manichæos; illos quia Sabbato fiebat, istos verò quia fiebat. Sed planè Manichæus præcepit, ut otiosis manibus vestris, de homicidiis vivatis alienis: & illa quidem falsa sunt homicidia, sed vestra sunt vera, cum tali Demoniorum doctrinâ miseris animas trucidatis.*

XVII. Horrendum tamen & execrabile facinus erat, quod Electi eorum in sua Eucharistia conficienda & sumenda patrabant, ut refert S. Augustinus L. de Hæres. cap. 46. Nimirum quodd Electi eorum cogebantur suam velut Eucharistiam conspersam cum semine humano sumere, ut etiam indè, sicut de aliis cibis, quos accipiunt, substantia illa Divina purgetur. Quod licet aliqui eorum hoc se facere negarent: detecti fuere tamen ex confessione cujusdam puellæ Margaritæ nomine coram Tribuno factâ, quæ cum esset annorum nondum duodecim, propter hoc scelestum mysterium se dicebat esse vitiatam: quod & Eusebia quædam Manichæa quasi

quasi Sanctimonialis, se propter idipsum esse passam, confiteri compulsa est.

XVIII. At pudet me hisce vanitatibus & obscenitatibus legentem diutius detinere. Ex dictis deducere quisque poterit, omnes in aliis hæresibus errores ac turpitudines divisim repertas, in hac una fuisse collectas, præter eas quas de proprio addidit. Dum enim abjectâ fide in Deum scientiam boni & mali promittit, facta est sicut Serpens, qui Adamum & Evam seduxit. Unde ita concludam cum S. Augustino Lib. 2. de Genesi contra Manichæos c. 25. *Nulli loquaciùs atque jactantiùs promittunt scientiam boni & mali, & in ipso homine, tamquam in arbore, quæ plantata est in medio Paradisi, eam dignoscantiam demonstraturos se esse præsumunt. Et etiam quod dictum est, Eritis sicut Dii, qui alii magis dicunt, quàm illi, qui per suam superbam vanitatem eandem superbiam persuadere conantes affirmant, animam naturaliter hoc esse quod Deus est? Et ad quos magis pertinet apertio carnalium oculorum, quàm ad istos, qui relictâ interiori sapientiæ luce, Solem illum qui pertinet ad oculos corporis adorare compellunt? Et omnes quidem hæretici generaliter scientiæ pollicitatione decipiant, & reprehendunt eos quos simpliciter credentes invenerint; & quia omninò carnalia persuadent, quasi ad carnalium oculorum apertionem conantur adducere, ut interior oculus excæcetur. Sed istis etiam corpora sua displicent, non propter pœnalem mortalitatem, quam peccando meruimus, sed ita negent Deum esse corporum conditorem, tamquam apertis oculis carnis nuditas ista displiceat. Sed nihil vehementiùs istos designat & notat, quàm quod dicit Serpens, Non morte moriemini: sciebat enim Deus, quoniam quâ die ederitis aperientur oculi vestri. Sic enim isti credunt, quodd Serpens ille Christus fuerit, & Deum nescio quem gentis tenebrarum, sicuti affirmant, illud præceptum dedisse, confingunt, tamquam invideret homini scientiam boni & mali. His S. Augustinus Manichæum comparat Serpenti antiquo: dum uterque falsâ promissione scientiæ homines fefellit, ac in perniciem traxit. Utrumque ergo anathemate proscriptum dimittamus.*

XIX. Finiam ergo cum Cyrillo Jerosolymitano Catechesi 6. num. 35. *Verùm nos Dominus ab tali defendat errore: eaque vobis adversus draconem inimicitia tribuatur, ut quomodo ipsi calcaneum observant; ita & vos illorum caput conculcetis. Memores estote eorum quæ vobis dicuntur. Qui concentus nostrarum rerum cum rebus illorum? Quid lux cum tenebris comparata? Quid Ecclesiæ gravitas & sanctitas cum Manichæorum execrandis institutis? Hic ordo, hic disciplina; hic gravitas & castimonia; hic vel seminam ad libidinem adspicere piaculum est. Hic connubium sanctissimum; hic continentia.*

Tom. VII. Par. II.

R r

(idest

(ideſt viduitatis) tolerantia; hic virginitatis cum Angelis certans dignitas; hic ciborum cum gratiarum actione perceptio: hic gratus in univerſarum rerum Opificem animus. Hic Pater Chriſti adoratur: hic ejus qui pluviā fundit metus ac tremor docetur: hic tonanti ac fulguranti gloriā & bonorem referimus. Hæc diſta ſint in conſolationem etiam præſentium Catholicorum, qui in præſenti Eccleſiā dotes quas Cyrillus laudat, inveniunt: & ſic adverſus modernos Hæreticos muniantur.

CAPUT XLIII

De Hieracitis.

§. I.

Hæreſis Auſtor.

I. **H**IERACITARUM hæreſis in aliquibus Manichæorum, in aliquibus Origeniſtarum ſoboles, Hieracem ſeu Hieracham auctorem habuit. De eo Epiphanius Hæreſ. 67. hæc refert: Hic in oppido Ægypti Leontone vixit, humanioribus literis in primis eruditus, ac Græcorum diſciplinis præſertimque medicinā & aliis artibus imbutus: ad quas Ægyptiorum quoque doctri- nam adjunxerat: ac nescio, an & Aſtronomiæ ac Magicarum artium ſcientiam attigerit. Fuit certè variis artibus inſtructus atque explicandi peritus, ut ex illius Commentariis apparet: ſed Ægyptiorum linguam poſitiſſimū calluit, utpote genere Ægyptius. Nec verò Græcæ linguæ ſcientiā mediocriter eſt perpolitus, vir acutiſſimo in omnibus ingenio. Atque hic quidem Chriſtianus fuit, ſed non in eo vitæ genere, quod eſſet Chriſto dignum, perſeveravit. Siquidem prolapsus & impactus à veritate excidit. Cum enim Veteris Novique Teſtamenti ſcientiſſimus eſſet, ut ea de pectore ſuo velut expromeret, ac commentaria ſcripiſſet, multa de ſuo dogmate vaniſſimè aſperſit, ac quidquid viſum eſt pro libidine ſua propoſuit. Hæc de Hieraca Epiphanius. Quæ poſtrema verba cuique hæretico applicari poſſunt: non enim aliunde hæreſes prodeunt, quàm cum homo pro libidine ſua Sacras Scripturas ad ſuum (non ad Sancti Spiritus) ſenſum audet detorquere.

Hunc errorem deſectatur S. Hieronymus Epist. 50. (aliā 103.) ad Paulinum de ſtudio Scripturarum his verbis: Taceo de mei ſimilibus, qui ſe ſunt ad Scripturas Sanctas poſt ſeculares literas venerunt, & ſaxæ compoſita auxera populi malſerint, quidquid dixerint.
hoc

hoc Legem Dei putant: nec scire dignantur, quid Prophetæ vel Apostoli senserint; sed ad sensum suum incongrua aptant testimonia, quasi grande sit, & non vitiosissimum docendi genus, depravare sententias, & ad voluntatem suam Scripturam trahere repugnantem. Monitum sanè utile, ne Sacrarum Scripturarum studium eas ad proprium, relicto Ecclesiæ iudicio, trahere præsumant.

II. Hierax hujus hæresis auctor ab alio Hierace pariter Ægyptio & Episcopo viro Catholico, ad quem S. Dionysius Alexandrinus literas dedit, ut ex Eusebio Lib. 7. Hist. cap. 21., distinguendus est. Similiter ab Heracla presbytero Alexandrino Origenis cœvo viro in Græcis disciplinis erudito de quo idem Eusebius L. 6. c. 19. Hunc ergo Hieracem hæresiarcham Lambertus Danaus Op. de Hæres. cap. 47. suo in Monachatum odio Monachum facit: dicit enim, hanc hæresim exortam fuisse ex Origenistarum scholâ, & post Monachismum non modò exortum, sed in pretio habitum, adeoque post Origenem & Paulum Eremitam, à quo primùm Monachatus emeruit, additque, quòd hæc hæresis inter Monachos primùm recepta est, qui quam vocant conjugii & ciborum abstinentiam voverant, „ Mansit autem diutissimè etsi non ipso Hieracitarum nomine, cùm quedam illius capita etiamnum hodie „ inter Monachos vigeant & defendantur. Latissimè denique „ tanquam teter quidam odor diffusa est, quando omnes Monachorum, non tantùm Ægyptiorum, sed Europæorum & Asiæ „ norum cellas hic foetor occupavit & persuasit „. Hæc è putrido suo stomacho de more contra Monachorum à conjugio & certis cibis continentiam evomit Danaus. Dimissis tamen iis quæ contra Monachatus vota blaterat, tum quia de hoc agere hic locus non est: tum quia in Vera Ecclesia & in Colloquiis satis egi, solùm à Danao petam: unde didicerit, Hieracem istum hæresis auctorem Monachum fuisse. Epiphanius supra relatus dicit quidem, eum fuisse Christianum, sed Monachum non dicit. An quia post exortum Monachatum Hierax vixit? Si ita est: dici debet, omnes hæreses postea exortas Monachos habuisse auctores, quod nec ipse admittit. An quia similia quæ Hieracitæ profitentur Monachi? Ita fortè. Sed hoc citatis locis refutavi.

III. Hujus hæresis ortum Danaus ipse consignat anno 243. à Christo passio, seu à Christo nato 267. Baronius tamen ad annum 288. illum differt. Prateolus verò illam exortam putat Taciti Imperatoris & Eutychiani Romani Pontificis temporibus circa annum à Christo nato 279. Hieracitas alio nomine *Abstinentes* à Philastrio Hæresi 34. fuisse appellatos, censet Baronius ad ann. 288. num. 4. Sed Philastrium nomine *Abstinentium* Priscillianis

nistas potius quàm Hieracitas indicare voluisse, existimant alii, eo quòd dicit, eos fuisse in Hispaniis & Galliis, cum Hieracitæ maxime Ægyptum pervaserint. Nec absolutè negabo eam hæresim plures Ægypti Monachos infecisse, hoc enim Epiphanius testatur Hæres. 67. num. 1. Sed quòd generale ac purum Monachorum institutum ab ea prodierit, hoc Catholici omnes negant, ac negarunt semper: solus Danæus cum suis affirmat. In hujus testimonium

IV. Placet hic enarrare ex Evagrio Pontico in Vitas Patrum conflictationem Macarii Ægyptii cum hæretico Hieracita relatam à Baronio ad ann. 288. num. 5. *Ajebant præterea venisse ad eum (Macharium Monachum) hæreticum quemdam Hieracitam, quod genus hæreseos invenitur apud Ægyptum. Hic cum per multam loquendi artem plurimos fratrum qui habitabant in eremo, conturbare ausus esset, & jam coram ipsis fidei sue asserere pravitatem, eique resisteret senior & contradiceret: ille verba simplicia argumentis calidius eludebat. Sed cùm videret Sanctus fidem fratrum periclitari: Quid opus est, inquit, nos verbis contendere ad subversionem audientium? Exeamus ad sepulcra fratrum qui nos præcesserunt in Domino, & cui nostrum concesserit Dominus suscitare mortuum de sepulcro, sciant omnes, quia illius fides probatur à Deo. Sermo hic omnibus qui aderant fratribus placuit. Procefferunt ad sepulcra. Hortatur Macarius Hieracitam, ut evocaret mortuum in nomine Domini. At ille: Tu, inquit, qui proposuisti, prior revoca. Et Macarius prosternens se in oratione ante Dominum, ubi sufficienter oravit, elevatis sursum oculis ad Deum: Tu, inquit, Domine, quis ex duobus nobis rectam fidem teneat, ostende, elevato mortuo hoc. Et cum hæc dixisset, fratris cujusdam nomen, qui nuper fuerat sepultus, evocavit: cui ille cùm de tumulo respondiisset, accedentes fratres continuò quæ superposita erant, auferunt: & eductum eum de sepulcro resolutus fasciis, quibus constrictus erat, exhibuerunt viventem. Hieracita verò ubi hæc vidit, obstinatus in fugam vertitur: quem fratres quoquè omnes insequentes extra terminos illius loci exturbarunt. Hactenus Evagrius. Quid ad hæc Danæus? Dicent ne, Hieracitarum hæresim à Monachis susceptam? Si ita esset, Hieracita ille fuisset ab illis veluti frater benignè susceptus, non tamquam malæ fidei rejectus. Cùmque Deus Monachorum fidem miraculo comprobavit, evidenter manifestavit, eam veram esse.*



§. II.

Hieracitarum errores.

I. **H**ieracitæ cum Hierace magistro suo primò Carnis resurrectionem negabant, animæ tantùm eam futuram assentes. Ita S. Augustinus Hæres. 47. Epiphanius Hæres. 67. n. 1. Quem errorem ab Origene mutuatum fuisse dicit, & fortè etiam à Manichæis, & aliis quos supra refutavi. Hunc errorem ita rejicit Epiphanius num. 6. *Ad carnis verò resurrectionem quod attinet, nonne convenire illa carni debet, à vanissime Hierace! cùm & ipsa loquendi ratio satis vim illius arguat? Etenim resurrectio de eo non dicitur, quod minimè ceciderit. Quidnam igitur illud est quod cecidit, quod sepultum est, atque dissolutum, præterquam corpus? Neque enim de Anima istud dici potest, quæ neque cadere, neque separari potest. Quare hic error alium turpiorem supponere debet, nempe quòd anima sit mortalis.*

II. Secundò: Nuptias repudiabant, quas solius Veteris Testamenti proprias esse dicebant. Si enim Christus etiam in Novo nuptias voluisset, nihil Novi & egregii in Lege sua statuisset, quod in Veteri non fuisset statutum: hinc in sui erroris patrocinium advocabant Paulum ad Hebr. 12. v. 14. dicentem: *Pacem sequimini & sanctimoniam, sine qua nemo videbit Deum*; ubi sanctimoniam pro continentia sumebant. Si quis autem respondebat, Paulum ibi intelligere continentiam, non à nuptiis, quas cap. 13. v. 4. *Honorabiles & thorum immaculatum* appellat, sed à fornicatione, ut ex sequentibus apparet; statim ad alium ejusdem textum 1. Cor. 7. v. 34. confugiebant, ubi dicit: *Mulier innupta & virgo cogitat quæ Domini sunt, ut sit sancta corpore & spiritu. Quæ autem nupta est, cogitat quæ sunt Mundi quomodo placeat viro, & divisa est. Unde interebant: Si divisio est, quomodo intercedere communio potest? Ac si Deo non placeat sed viro, potestne hereditatem à Deo consequi?* Hæc & alia in favorem sui erroris adducebant, præcipuè quòd Salvator ipse virginitatem elegerit.

III. Hæc tamen evertit S. Epiphanius num. 6. dicens: *Quod verò de electione plura dicit (Hieracas) quæ Salvator virginitatem, continentiam, & castimoniam elegit: quis hoc non intelligit, de eodem delectu gloriari quoque Sanctam Catholicam & Apostolicam Ecclesiam? (audis Danæ?) Sed eadem nihilominus & eos quoque qui honestis nuptiis illigati sunt, pro sui conditione status ad salutem pervenire posse non dubitat. Nam venerabiles esse nuptias ac Dei aspirante gratiâ Cæleste Regnum obtinere, quis ex eo non agnoscat,*

quòd

quòd ad nuptias invitatus Salvator ipse fuerit, ut iis benediceret?... Ideòque & adesse iisdem voluit, ut eorum ora præcluderet, qui contra veritatem disputant. Quare subdit ibi primum miraculum fecisse, ut honestas nuptias prodigiis illustraret: quibus alia subiicit. Unde apparet in Ecclesia Catholica laudari quidem ut perfectiorem etiam exemplo Christi virginitatis & continentiae statum, sed nuptias tanquam Regno Dei consequendo, & doctrinae Christi contrarias non damnari; ut Hieracitæ & alii hæretici faciebant: ideòque Ecclesia Catholica æquè nuptiis alligatos, ac virgines & continentes sinu suo complectitur.

IV. Tertiò: Puerulos ante usum rationis decedentes Regnum Cælorum capeßere negabant. Nam cum dixerit Apostolus 1. Timoth. 2. v. 5. *Non coronatur, nisi legitime certaverit*: Si ne ii quidem qui certant, nisi id legitime præstiterint, coronantur, multò minus ii qui ad certamen ne quidem vocati sunt. Respondet tamen S. Epiphanius: *Sed ut de puerulis agamus, quid de illis dicemus qui in Bethlehem Judææ subinde propter Christum occisi sunt? Quæro, utrum nec ne Cæleste Regnum consecuti sunt? Enimverò consecuti sunt, utpotè labis omnis expertes. Nisi enim illud obtinuerint, tantum illis malum Dominus consciverit, cujus causâ necati sunt. Quòd si ob eundem prius interfecit, quàm in certamen descenderent, ac præmium assequerentur, consequens est, illius adventum Mundo potius detrimentum attulisse: quoniam quidem causam illis præbuerit, cur & immaturâ morte vitam per supplicia profunderent, & Regio nihilominus interdicto à certamine perinde ac præmio prohibiti fuerint. Deinde ex illo Sapientiæ 4. v. 11. *Raptus est ne malitia mutaret intellectum ejus*, ostendit, Deum aliquando ad se rapere hominem in tenera ætate, ne in certamine malitiâ corruptus succumbat. Et demum idem probat ex dicto ipsius Christi Matth. 19. v. 14. *Sinite parvulos, & nolite eos prohibere ad me venire: talium est enim Regnum Cælorum*. Ut enim ait S. Augustinus L. 1. de Peccat. Meritis & Remiss. c. 19. *Parvulus si percepto Baptismo de hac vita emigraverit, soluto reatu, cui originaliter erat obnoxius, perficietur in illo lumine veritatis, quod incommutabiliter manens in æternum, justificatos præsentia Creatoris illuminat. Regnum ergo Cælorum pueri baptizati morientes consequuntur hæreditate, quia facti filii Dei, etsi non certaverint*.*

V. Quartò: Paradisum fuisse corporeum, & sensibilem negasse, S. Epiphanius refert. Quia verò hic fuit error etiam Origenis quem supra cap. 35. §. 3. num. 20. refutavi: ideò ibi dicta adire Lector poterit.


VI. Quintò: Melchisedecum esse Spiritum Sanctum asserbant.

bat . Ita idem Epiphanius . In hoc cum Melchisedecianis ex parte conveniebant , contra quos cum egerim superius cap. 30. , idèd hic ea repetere superfluum esset .

VII. Sextò : De Patre Filio & Spiritu Sancto Hieracas sentiebat , Filium à Patre re verâ genitum & Spiritum Sanctum à Patre procedere , S. Epiphanio teste num. 2. attamen de Filii Dei generatione & Divinitate pessimè loquebatur . Quamdam enim Divinæ substantiæ divisionem excogitavit , similem ei , quæ sit cum lampas , duobus oleum inter se communicantibus lychnis instructa , duplex lumen profundit . Ita exponit S. Hilarius Lib. 6. de Trinit. num. 12. *Hieracas nesciens Unigeniti nativitatem , nec Evangelicorum Sacramentorum virtutem adeptus , unius lucernæ duo lumina prædicavit , ut lychnorum bipertita divisio substantiam Patris & Filii emularetur , quæ ex unius vasculi unguine accenderetur in lumen , tamquam esset substantia exterior , ut olei in lucerna continens luminis utriusque naturam ; vel certè ut lampas papyro eodem intexta , utroque capite luceret , essetque media materies lumen ex se utrumque profundens . Hæc stultitiæ humanæ error invexit , dum quod sapiunt , ex se potius , quàm ex Deo sapiunt .* Hæc Hilarius .

VIII. Et quidem hoc Hieracis & aliorum Hæreticorum infortunium semper fuit , quòd ex se ipsis non ex Deo sapere voluerunt . Hoc præcipuè Hieraci contigit , qui cateroquin ingenio præditus , & humanis disciplinis apprime instructus , dum Divinam scientiam exponere aggressus est , multa fabulosa & falsa de suo miscere non erubuit . Nam ut refert Epiphanius num. 3. *Inter cætera Commentarios & lucubrationes de Opere sex dierum scripsit , quibus fabulas nonnullas & vanissimas allegorias commentus est : necnon & alia quædam ex Sacris Literis deprompta : quibus & Psalmos novitios à se conditus adjecit .*

Austeram vitam professus est , & docuit (idem Epiphanius asserit) Constat illum ab eduliis omnibus sibi temperasse , adeòque severè vixisse , ut & vino careret . *Autbores nonnulli sunt , ultra annos nonaginta vixisse , & ad extremum vitæ tempus libros antiquarii more scripsisse . Librarius enim & quidem peritus fuit , nec oculus ei caligavit . Qui sub ipso ejus Sectam ex animo , profitebantur , plerique ab animatis abstinebant . Sed qui post illum exitere discipuli , nihil præter simulationem habuerunt (ex eodem Epiphanio .)*



CAPUT XLIV.

De Meletianis .

§. I.

Meletius quis fuerit .

I. **U**T omnis æquivocatio tollatur , supponendum est , duos fuisse Meletios , unum Ponticum & Ecclesiarum Ponti Episcopum , diversum ab eo , de quo locuturi sumus . Huius meminit Baronius ad ann. 285. n. 17. ac de eo ex Eusebio L. 7. Hist. c. ultimo sequentia refert : *Meletius , quem vulgò Mel Aetium docti homines vocabant , talis omnino fuit , qualem quis hominem perfectissimum in omni genere doctrinæ vellet describere . Eloquentiam quidem quod attinet , nemo illum pro merito landaverit . Sed hanc facultatem à natura ipsi insitam fuisse , aliquis fortasse dicet . Reliquam verò peritiam ac multiplicem eruditionem , quis est qui possit unquam superare ? Certè quicumque vel semel ejus periculum fecerit , in omnibus disciplinis , quæ ratione nituntur , subtilissimum ac disertissimum fuisse fatebitur . Jam verò virtus vitæque sanctimonia nullatenus iis dotibus inferior erat . Hunc nos persecutionis tempore in Palaestina latitantem septem annorum spatio videre meruimus . Ita de hoc Meletio Eusebius . Hic est quem Magnum Meletium vocat Athanasius Orat. 1. contra Arianos , qui Nicænæ Synodo interfuit . Sebastopolis in Ponto fuisse Episcopum dicit Philostorgius . Pro Fide Catholica constanter ac sincerè stetit demonstrant S. Athanasii laudes , & S. Basilii in L. ad Amphilochoium de Spiritu Sancto cap. ultimo dicentis : *Sed & magnum Meletium in eadem fuisse sententia , narrant qui cum eo versati sunt .**

II. Alter Meletius seu Melitius Lycopolis in Ægypto Episcopus , à quo Meletiani , & de quo hic sermo erit ; quamvis inter Veteres discordiam reperiā . Nam S. Epiphanius Hæresi 68. de hoc Meletio hæc narrat : *Est quadam in Ægypto Meletianorum sectio , quæ à Meletio quodam in Thebaide olim Episcopo nuncupatur . Qui quidem ad Catholicam Ecclesiam sinceramque fidem nihilominus adbasit : neque enim ullo tempore à Sanctæ Catholica Ecclesiæ religionē desecit . Floruit hic eodem quo Hieraces tempore , eumque ordine consequitur : quo etiam tempore S. Petrus Alexandrinus Episcopus vixit . Atque omnes isti persecutionis illius tempore fuerunt , quæ à Diocletiano & Maximiano Imperatoribus excitata est . Quæ autem ad Meletium attinet , hoc modo se se habuerunt .*

Hic

Hic Ecclesiam schismate discidit: ita tamen ut fidem nulla ex parte mutaret. Qui in illa persecutione unâ cum Sancto Petro Episcopo & Martyre ceterisque Martyribus comprehensus est ab Alexandria & Ægypti Præfectis, quibus hoc ab Imperatoribus mandatum fuerat. Et postquam dixit, primum inter Ægypti Episcopos dignitatis locum obtinuisse Petrum Alexandrinum Episcopum, secundum verò à Petro Meletium: subdit: Ergo omnes illi ob Christi nomen in custodiam dati diù in vinculis detenti sunt: ante quos nonnulli eâdem de causa vineli martyrium obierunt, ac præmium morte consecuti sunt: cùm interim isti tanquam primarii ac præstantiores imposterum reservati essent. Hæc Epiphanius: qui deinde prosequitur dicens, quòd cùm aliqui in illa persecutione defecissent, inter detentos in carcere mota est controversia propter eos qui lapsi per poenitentiam communionem postulabant; ac resistente Meletio, cui pars minima Confessorum ibi detentorum suffragabatur, ne reciperentur, donec restitutâ Ecclesiæ pace poenitentiam egissent; Petro verò Alexandrino cum paucis aliis Confessoribus contentente, statim esse communionem donandos: indè divisim ab invicem partibus, ac seorsim preces ac sacrificia peragentibus, schisma in ipso carcere conflatum est. Deinde cum S. Petrus martyrium subiisset, eique successisset in Alexandrino Episcopatu Alexander (verius tamen Achilles) Meletium cum Episcopis & Confessoribus sibi adherentibus recens ad metalla damnatum ordinasse Clericos, Diaconos, Presbyteros, & Episcopos, necnon Ecclesias in carcere & in itinere variis in locis erexisse. Additque, Meletium, postquam redditâ jam Ecclesiæ pace ab exilio & fodinis revocatus est, Episcopo Alexandrino amicissimum fuisse, & ad eum primùm detulisse Arium tanquam novæ blasphemix auctorem. Ita refert S. Epiphanius.

III. Hæc tamen narratio suspecta Baronio ad ann. 36. num. 48. & aliis est, quasi Epiphanius ab aliquo Meletiano scriptam, nesciens, mutuatus sit. Et ratio est quia S. Athanasius fidelissimus testis, qui & ortum illius schismatis vidit, de Meletio contraria scribit. In secunda enim Apologiæ parte contra Arianos: *Petrus, inquit, apud nos ante persecutionem Episcopus, in persecutione Martyr occubuit. Hic Meletium, qui Episcopus in Ægypto erat, plurimorum convictum scelerum, ac potissimum quòd immolasset idolis, in communi Episcoporum Synodo deposuit. Meletius verò neque ad aliam confugit Synodum, neque curavit apud posteros se se purgare, sed schismatis auctor fuit. Hincque factum, ut ejus Sectatores pro Christianis Meletiani audiant. Statimque ille Episcopos maledictis capitis incescere; primò quidem ipsum Petrum, dehinc Achillam calumniatus*

est, & post Achillam Alexandrum. Hoc autem Absalonis imitatus exemplum callidè est aggressus, eo nempe animo, ut quandoquidem depositio ignominiam inurebat, calumniis saltem suis simpliciores posset circumvenire.

IV. Hæc, quæ Athanasius de Meletio dicit, directe pugnant eum iis quæ de eodem Epiphanius narrat. Quomodo enim inter Confessores & Martyres detentus in carcere Meletius, ut vult Epiphanius, qui jam metu tormentorum idolis sacrificaverat, & propter hoc in Synodo depositus fuerat? Quomodo lapsos à pœnitentia rejicere potuit, qui inter lapsos fuerat insignis? Aut quomodo S. Petrus Alexandrinus, qui severiorem in lapsos disciplinam constituerat, ut ex ipsius Canonibus apparet, molliori indulgentiâ eos prosequi potuit, ipse martyrio proximus, & fervente adhuc persecutione, ut absque debita pœnitentia recipiendos esse censeret? Aut tandem quomodo verisimile est, Meletium fuisse Petri, Achillæ, & Alexandri Episcoporum Alexandria amicissimum, qui eos tot calumniis Athanasio teste oneravit? aut quomodo Meletius primus Arianos ad præfatum Alexandrum detulit, cum potius Meletius ac sui eis patrocinium dederint, eodem Athanasio teste Orat. contra Arianos: & Socrates L. 1. Hist. cap. 6. statim referendus confirmat?

V. Socrates ergo laudato loco hæc habet: *Melitus quidam Episcopus Ægypti à Petro Alexandria Episcopo, qui sub Diocletiano martyrium consummavit, tum ob alias causas depositus est, tum præsertim eo quod persecutionis tempore fidem inficiatus, sacrificasset. Qui cum sacerdotio pulsus esset, multosque haberet sectatores, ducem atque auctorem se præbuit eorum, qui ab ejus nomine Melitiani in Ægypto etiamnum appellantur. Porro cum nullam haberet idoneam causam, cur se ab Ecclesia segregasset, se quidem affectum injuriâ esse dicebat, Petrum verò maledictis & convitiis incessabat. Ac Petrus quidem persecutionis tempore martyrio est coronatus. Melitus verò calumnias suas transtulit primùm in Achillam qui Petro in Episcopatu successerat, deinde in Alexandrum Achille successorem. Dum hæc ab illis gerantur, orta est Arii controversia: & Meletius unâ cum suis Arii partes fovit cum illo conspirans adversus (Alexandrum) Episcopum. Eadem refert Theodoritus tum L. 1. Hist. cap. 6. tum L. 4. Hæret. Fab. cap. 9. Concors hæc Veterum de Meletio sententia eum iis quæ ex Epiphanio retuli coherere non potest.*

VI. Quid verò Meletio seu Melitio, ac suis in contumaci suo schismate perseverantibus postea evenerit, dicam. Delati ad Concilium Nicænum, qualiter à Synodo in eos provisum sit, constat

stat ex ipsius Synodi Epistola ad Ecclesiam Alexandrinam, quam refert Socrates L. 1. Hist. c. 9. in qua præter cætera hæc leguntur: *Placuit igitur, clementius erga Melitium agente Synodo: summo enim jure nullam veniam merebatur: ut is in civitate sua maneat, nec ullam habeat, aut manus imponendi, aut eligendi potestatem, nec hujus rei causâ aut in vico, aut in urbe ulla compareat, sed nudum honoris sui nomen retineat. Is verò qui ab ipso constitutus sunt, sanctione ordinatione confirmati, ad communionem admittantur, eâ lege, ut honorem quidem ac ministerium secum retineant: secundo tamen semper loco sint ab iis omnibus, qui in anaquaque Paræcia & Ecclesia versantur à carissimo collega nostro Alexandro prius ordinati. Aded ut his quidem nulla facultas suppetat, quos visum fuerit eligendi, aut nomen cuiuspiam suggerendi sine consensu Episcopi Catholice Ecclesie qui Alexandro subiectus est. Hoc Synodi Decretum in Melitium & ordinatos ab ipso refert etiam Sozomenus L. 1. Hist. c. 24. addens: *Atque id æquum esse Synodus judicavit, reputans scilicet Melitii ejusque consortium præcipitem in ordinationibus faciendis temeritatem. Quippe qui dum Petrus Episcopus Alexandria, qui postea martyrium consummavit, ob sævientem tunc persecutionem fugisset, Ordinationes ad illum pertinentes sibi vindicaverat.**

VII. Post hæc refert Sozomenus L. 2. c. 21. *Redeunte in Ægyptum Alexandro Melitius Ecclesias, quas contra jus potestati sue subjecerat reddidit: & in urbe Lyco reliquam ætatem transegit, sed non multò post cùm migraturus esset è vita, contra Decretum Synodi Nicenæ, Joannem quemdam unum ex familiaribus suis in suum locum subrogavit, ac rursus turbarum in Ecclesia auctor extitit. Joannes iste, quem Melitius moriens suum in locum contra Decretum Synodi subrogavit, creditur, fuisse Joannes Memphis, qui caput schismatis, postea fuit.*

VIII. Schisma hoc, quod in hæresim postea, ut dicam, transiit, coepit anno à Christo nato circa 301. Postea cum Arianis confusum latissimè sparsum est, ac multas Orbis regiones infecit. Diutissimè autem perseveravit: adeò ut Theodoritus de eo tamquam adhuc suo tempore in Ægypto perdurante loquatur Lib. 4. Hæret. Fabul. His verbis: *Nunc autem dicunt quidem eos esse ab hoc morbo (Arianorum nempe errore) liberatos; sed sine ullo metu degere, nec velle ab ullis regi, & cum Ecclesiis conjungi recusare.*

§. II.

De Meletianis & eorum erroribus.

I. **I**isdem temporibus, quibus Melitius seu Meletius Ecclesiam schismate dividere conabatur, Arius suo pestifero dogmate eam inquinare molitus fuit. Quamvis enim, ut scribit Socrates L. 1. cap. 6. Arii partes contra Alexandrum foverit: attamen ejus errori Meletius, quousque superstes fuit, minimè adhæsisse, sed in puro schismate perstitisse creditur. Ipso tamen virâ functo, qui ejus partes tuebantur, videntes Arianis multos patrocinari, eis etiam in errore se adjungere. Ita Sozomenus L. 2. cap. 21. ubi postquam dixit, quodd non obstante Nicænæ Synodi Decreto contra Arii dogma & Melitii derogatione, *Alii Arii opinionem laudabant: alii æquum esse censebant, ut ii qui à Melitio ordinati fuerant, Ecclesiis præessent: eorumque partibus se se adjungebant;* Subjungit: *Porro cùm utrique prius inter se dissentirent, postquam tamen animadverterunt, plebem Sacerdotibus Ecclesiæ Catholicæ addictam esse, invidia correpti sunt. Initoque inter se fœdere communes inimicitias adversus Clerum Alexandrinum suscipere; junctimque & alios accusare quibuscum disputabant, & se ipsos defendere cæperunt: adeo ut processu temporis Meletiani à plerisque in Egypto vocarentur ii, qui Arii opinionem sectabantur: cùm tamen Melitiani ob primatum dumtaxat ac regimen Ecclesiarum à Catholicis dissiderent: Ariani verò perinde atque Arius sentirent de Deo Verùm temporis successu, ut verisimile est, Melitiani ex assiduis ea de re disputationibus, Arianorum dogmatum peritiam adepti, eadem cum illis de Divinitate senserunt.* Consentit Theodoritus L. 4. Hæret. Fab. ubi de Meletio: *Sed ille quidem, inquit, pietatis dogmatum nihil innovavit: hi autem (Meletiani) eum Arianorum hæresim ab iis, qui tunc imperabant, confirmari viderent, ad illam declinarunt.* Hoc S. Augustinus Hæref. 48. & Damascenus Hæref. 68. apertè confirmant.

II. Meletiani ergo Arianis conjuncti videntes, S. Athanasium, qui Alexandro in Episcopatu Alexandrino successerat, sibi pro Dei zelo insensum esse, confertis manibus adversus eum arina moverunt, de variis criminibus coram Imperatore eum accusantes. Verùm compertâ ab Imperatore & damnatâ calumniâ, aliam meditati sunt, nimirum quodd sacrum poculum confregisset, & quodd Arsenium quemdam interfecisset, quem subdolè occultarunt, ut mendacio fidem conciliarent. Sed innocentia patrocinate Deo, Arsenius vivus repertus fuit. Quæ cum Constantinus Impe-

Imperator rescivisset, ad Athanasium scripsit, ut suum Episcopale munus impigrè obiret, & Meletianorum insidias pro nihilo duceret; addens, se talia imposterum non passurum, sed calumniatores debitas poenas daturus. Quâ Imperatoris Epistolâ publicè lectâ Meletiani timore percussî aliquantisper quievere. Narrat hæc Sozomenus L. 2. Hist. c. 22. & 23.

III. Modò ad erroneas Meletianorum opiniones transeamus. Et quidem dimissio Arii errore, quo, ut dixi, successu temporis infecti fuere, & quo ut refert Theodorus suo tempore liberati fuerant; quisnam verè fuerit error, qui Meletium & suos ad schisma impulit, in eo assignando non sunt admodum concordēs Veteres. S. Augustinus L. de Hæres. c. 48. *Meletiani*, inquit, à *Meletio nuncupati*, nolentes orare cum conversis, idest eis qui in persecutione ceciderunt, schisma fecerunt. Nunc autem dicuntur esse conjuncti. Idem quamvis aliter, ut supra dixi, sentit Epiphanius Hæres. 68. Damascenus quoque Hæres. 68. his verbis: *Meletiani schismatici in Ægypto potius quàm hæretici habentur. Hi cum illis precum communione adjungi noluerunt, qui in persecutione lapsi essent. Iidem tamen se se ad Arianos nunc adgregarunt.* Mirum tamen quòd Meletius, qui, ut supra ex Athanasio & aliis dixi, in persecutione & ipse lapsus idolis sacrificaverat, noluerit cum illis, qui in eodem crimine ei focii fuerant sacrificare, & eò maxime quia hoc non obstante Ecclesia pia Mater ipsum recipere parata erat in Concilio Nicæno, ut supra: & certis tamen restrictionibus, ut merebatur, recepit.

Dici tamen potest, Meletium rabie adactum hoc cogitasse; cum enim propter hoc à Petro Alexandria Episcopo, & Thebaidis totiusque illius tractus Metropolitâ dejectus ab Episcopatu fuisset, ut se ulcisceretur, eò vesaniæ ob ambitionem tandem prorupit, ut ne laicos quidem, qui semel à fide defecissent, & postea resipiscerent, in Ecclesiam recipiendos esse contenderet, si ipse propter lapsum Episcopatu privaretur. Inde schisma ab ipso & suis adeò dirum factum est, ut ne cum Catholicis, eò quòd lapsos verè poenitentes reciperent, communicare in precibus vellent. Novatianis peiores, qui lapsos admittere volebant, quia in lapsis resipiscantiam posse unquam esse negabant: hi verò quamquam in lapsis poenitentiam admitterent, in Ecclesiæ cœtum recipere renuebant: quasi qui per poenitentiam à Deo suscipitur & filius Dei efficitur, à priorum cœtu arceri possit.

IV. Porro Meletiani, quibus religio erat à communione cum lapsis etsi poenitentibus, & ab Ecclesia Catholica susceptis, abstinere, cum Arianis hæreticis ab Ecclesia Catholica proscriptis, sociata-

cietate & stricto foedere contra Catholicos jungi non formidabant. Hinc citati Patres inferunt, Meletianorum scilam ex puro schismate hæresim evasisse. Quod Epiphanius alioquin erga Meletium & Meletianos benignus, Hæres. 68. num. 6. his verbis deplorat: *Utinam Meletiani isti, qui exactissimam justitiæ ac veritatis rationem professi fuerant, cum iis qui lapsi erant post penitentiam communionem habere, quam cum Arianis maluissent! Contigit enim eis quod est in proverbio, ut qui summum devitant, in ignem incidunt. Neque enim consistere Arius, aut fiduciam ullam habere potuisset, nisi eam esset occasionem nactus, quæ pessimam ad bodiurnum usque diem concordiam devinxit. Siquidem Meletiani sinceri quondam fideique tenacissimi cum Arianis commixti sunt; & plerique falsâ Arii doctrinâ contaminati à rectâ fide in hoc tempore degenerarunt: nonnulli verò, etsi constanter in ea perseverarunt, ob illam tamen cum Arianisque societatem in cæno illo ac sordibus baserunt.* Hactenus Epiphanius.

V. Philastrius verò Hæresi 90. nihil dicens de negata à Melitio & Melitianis communione cum lapsis, totum eorum reatum in hoc constituit, quòd Arianorum partes secuti sint: *Melitiani, inquit, sunt à Melitio quodam in Ægypto, qui de parte fuerat Ariana, & abjectus est ab Ecclesia Catholica, qui postea quasi verum sequendo susceptus est, & discipuli ejus cum eo pariter. Atque iterum indifferenter post hac agere cupientes, communicabant & Hæreticis & Ecclesia Catholica: quorum cum cognovisset indifferentiam, exsortes eos suæ communionis effecit Ecclesia Catholica.* In quo Rhetoricorum hæresim præformabant, qui omnes Hæreticos laudabant, & cum eis sentire rem indifferentem judicabant. De qua hæresi agit idem Philaster cap. 91. & inferius Deo dante cap. 72. mihi sermo erit. An in hunc errorem conspiraverint moderni Adiaphoristæ, qui unumquemque in sua Secta salvari posse dicunt; ipsi viderint.

VI. Theodorus L. 4. Hæret. Fab. scribit, Meletium & suos ab initio in fidei veritate stetisse, solum seditionem movisse, postea tamen in Arii hæresim declinasse à nulloque regi voluisse: ait enim: *In Alexandria autem Ægypti, quo tempore Arius adversus Unigenitum blasphemiam inchoavit, Meletius quidam Episcopus adversus Alexandri Magni principatum seditionem agitans, in multis civitatibus ordinavit Episcopos & Presbyteros & Diaconos, non novæ hæresis principatum gerens, sed eadem quidem cum Ecclesia sentiens, sed ambitionis & imperandi cupiditatis morbo laborans. Eum qui Nicææ convenerant Sanctissimi Patres ab Ecclesia administratione removerunt. Qui autem ab eo ordinati fuerant, iis quæ præter leges donata erant privarunt.* Ex hoc deinde factum esse schisma dicit ac Me-

Melitanos conjunctos Arianis, & eorum dogmati. Addit tamen, eos etsi ab eo morbo liberatos, *sine ullo metu degere, nec velle ab ullis regi, & cum Ecclesiis conjungi recusare. Ea ratione & tamquam liberi & sui juris, illa quoque ridicula excogitarunt: Interdixit quidem corpus aqua mundare, cum plausu autem manuum, & quadam saltatione hymnos concinere, & multa tintinnabula funi appensa movere, & his similia.*

VII. Hæc Theodoriti verba de Meletianorum Ritibus in Ritus Ecclesiæ Catholicæ vertit Danæus cap. 48. de Hæres. ubi ait, quod hoc idem retinuerunt Papistæ: *tam est nimirum infelicis lolii & veneni ferax tenaxque humanum ingenium.* His paucis verbis infelix blatero omnes Ecclesiæ Catholicæ sacros Ritus audet pëssumdare, tamquam à Meletianis acceptos, & ex Judaicis ceremoniis haustos. Sed quis non videt, Danæum hic ut de more apertis oculis cæcutire? Ubi enim in Ecclesia Romana Judaico more lotiones repetitæ, ubi in canendis hymnis saltatio, & tintinnabulorum crebra pulsatio? Jure potius ad ipsum dicam: unde ipse cum suis omnes ritus omnium seculorum usu testibus antiquis Patribus consecratos, ipsumque Sacrosanctum Missæ Sacrificium abrogare & ab Ecclesia tollere didicit, & novos & inauditos absque ulla auctoritate inducere? Non ab aliis certè quàm à Meletianis cæterisque antiquioribus Hæreticis, qui, ut notat Cardinalis Bona Liturgic. L. 1. c. 7., hoc sibi jus asceverunt, ut cùm à fide deficerent, Libros etiam Rituales vel suis erroribus inficerent, vel privatâ auctoritate immutarent. Quare meritò Danæus & sui similes Novatores à Concilio Tridentino Sess. 7. Can. 13. & Sess. 22. Can. 9. & aliis, anathemate confixi sunt. Sed hæc præsentis argumenti non sunt.

CAPUT XLV.

De Arianis.

§. I.

De Ario, ejus hæresis occasione, & initiiis.

I. **N**ULLA hæresis magis ac diuturnius Ecclesiam dilaceravit quam Ariana, quæ nedum Ecclesiæ Præsulum, sed & Mundi Potestatum auctoritate suffulta, nedum fraudolenta fuit ut cæteræ, sed & violenta, & nova persecutio, quæ persecutioni paganorum succedens, nedum in animas, sed & in

cor-

corpora defeviens ; ut Antichristianæ persecutionis , quæ S. Augu-
stino teste in Psalm. 9. fraudolenta simul & violenta futura est ,
initium eam S. Hilarius censuerit L. adversus Constantium Impe-
ratorem : ubi & fraudes & violentias , quibus ad seducendos pios
fideles utebatur Imperator ille Arianus , & exprobrat , ut magis
detestabilem pronuntiet persecutionem quam ille inferebat Ec-
clesiæ , quàm illa quâ Imperatores pagani eam vexarunt : quia isti
in corpora , ille autem in corpora & in corda irruebat . Sed de hoc
inferius dicam .

II. Tantæ stragis auctor Arius fuit . Is teste S. Epiphanio Hæ-
ref. 69. num. 1. ex ea Lybiæ parte , quæ Ægypto vicina est , &
Alexandriæ contributa oriundus fertur . Hinc patriâ Alexandri-
num aliqui eum vocant , eique Ammonium parentem tribuunt .
Externâ corporis , oris , & habitus specie eam præferebat virtu-
tem , gravitatem ac modestiam , quâ facilè hominibus illuderet ;
eam in verbis comitatem , urbanitatem , easque blanditias , ut
omnium sibi animos conciliaret . Dialecticarum argutiarum erat
peritissimus . Eum è Luciani Antiocheni schola prodissse probabi-
le fit , quia Eusebium Nicomediensem *Conlucianistam* appellat ,
quo titulo Luciani Martyris discipuli gloriari , ac se mutuo indi-
gitare solebant . Schismaticus antequam heresiarcha Arius fuit ;
Meletio quippe , de quo Cap. præcedente , schisma molienti adhæ-
sit , ut scribit Sozomenus L. 1. Hist. c. 15. Postea verò relictis ejus
partibus à Petro Alexandrinorum Episcopo Diaconus est ordina-
tus . Rursus tamen Ecclesiâ pulsus est ab eodem . Nam cùm Pe-
trus Meletii fautores excommunicasset , nec eorum Baptismum
admitteret (idest Baptismi administratione , ac cæteris muniis Ec-
clesiasticis interdiceret) ipse Petri Acta reprehendebat , neque
ullo modo quiescere sustinebat .

Narrant Acta S. Petri Alexandrini , quæ Anastasius Bibliothe-
carius ex Græcis Latina reddidit , quòd cùm Arius à S. Petro in
carcere constituto & jam morti proximo in communionem recipi
vehementius postularet , Christus Sancto Episcopo noctu apparuit
veste discipulâ , causamque rei sciscitanti respondit : *Arius mihi*
scidit . Præcave omnino , ne eum in communionem recipias . Quin po-
tius jubeto Achillæ & Alexandro presbyteris , qui post tuum exitum
reverturi sunt Ecclesiam meam , ne eum in communionem recipiant .
Verùm Visionem hanc suspectam habent Critici , & Natalis Ale-
xandre in Hist. Seculi 4. Dissert. 9. , à quibus non dissentior . Eâ
enim admittenda oportebit dicere , vel quòd S. Petrus mandato Chri-
sti non paruit , si Achillæ & successoribus illud non aperuit , vel
Achillam & Alexandrum contra illud sibi manifestatum egisse :
nam

nam Achilles non solum in communionem Arium recepit, sed ad Presbyteratum promovit: Alexander verò cuidam Ecclesiæ, ut populum instrueret, illum præfecit, ut statim dicam.

III. S. Petro martyrio jam coronato, in Ecclesiam Arius irrepfit, & ab Achilla Petri succellore in communionem susceptus Presbyter factus est, & ab Alexandro in honore habitus. Hæc ex Sozomeno loco citato, cui addit S. Epiphanius, quòd Ecclesiæ cujusdam vici Præfectus fuisse dicitur. Ita Hæres. 69. num. 1. ubi de Ario: *Ferunt, inquit, illum ex Lybia oriundum Alexandria Presbyterum esse factum, qui tunc Baucalensis cujusdam Ecclesiæ Præfecturam gerebat. Etenim quotquot Alexandriae Catholicae communionis Ecclesiæ sunt, uni Archiepiscopo subiectæ, suis cuique præpositus est Presbyter, qui Ecclesiastica munera iis administret, qui circa Ecclesias illas habitabant, eorumque conventicula Vici, sive Lauræ ab Alexandrinis vulgò nominantur. Idem fatetur Gelasius Cyzicenus, in hoc tamen diversus, quòd Arium dicat, non ab Achilla, sed à S. Alexandro Presbyterum ordinatum. Itaque Arius Presbyter, & simul quasi Parochus erat.*

IV. Id quod Arium ad concipiendam & effundendam hæresim impulit, ambitio fuit & invidia in S. Alexandrum, quem sibi prelatum in electione ad Episcopatum Alexandrinum ægrè ferebat. Quamvis Philostorgius sectæ Arianus L. 1. Hist. num. 3. dicat: *Arium cum suffragia pro Archiepiscopatu Alexandrino in ipsum inclinarent, Alexandrum tamen sibi prætulisse, & suffragia in eum transulisse.* At Theodorus cui major fides habenda est L. 1. Hist. cap. 2. oppositum sentit: & hinc ad suæ hæresis pestiferum virus evomendum permotum referens: *Eodem tempore, inquit, Arius, qui in Presbyterorum ordinem erat adscriptus, & cui sacrorum Voluminum expositio commissa erat, cum Alexandrum videret Ecclesiæ administrationem suscepisse, livoris impetum ferre non potuit: sed invidia stimulis exagitatus contentionis ac discordiæ causas aucupari cepit. Et calumnias quidem adversus illum contexere nullas poterat, cum vitam ejus & conversationem omni laude dignam videret. Invidia tamen eum quiescere non sinebat. Hunc igitur natus Daemon veritatis inimicus, ejus operâ Ecclesiam miscere ac perturbare cepit. Persuasis enim illi, ut Apostolicae Alexandri doctrinæ palam contradiceret.*

V. Livor igitur, ambitio, & invidia Arianae hæresis, sicut & cæterarum, causa & initium fuit. Quia autem Arius in Alexandri moribus nihil blasphemiae capax reperiēbat, blasphemias convertit in Deum. Cum enim audisset Alexandrum in conventu de Mysterio Sanctissimæ Trinitatis publicè dissentientem, & Filium

Patri honore parem, & ejusdem omninò substantiæ cum illo asserentem, obmurmurare ac resistere cœpit. Ita Theodoritus prosequitur: *Et Alexander quidem Sacrarum Literarum vestigiis insistentis Filium ejusdem esse dignitatis cum Patre, eandemque cum Deo, qui ipsum genuit, habere substantiam assererat. Arius verò apertè veritatem impugnans, Filium Dei creaturam & facturam vocabat. Addebat etiam fuisse tempus cum non esset, & alia nonnulla, quæ ex ejus scriptis clariùs cognoscemus.* (his indicat præcipuè Thaliæ ab Ario compositam, de qua infra) *Atque hæc ille, non in Ecclesia solum, verum etiam in exterius conventibus ac cætibz assiduè disseminabat. Quin etiam domos circumiens, quotquot poterat, in sententiam suam traducebat. Hucusque Theodoritus.*

Idem refert Socrates L. 1. Hist. cap. 5. ubi ait: *Fortè quâdam die, presentibus suis Presbyteris unâ cum reliquo suo Clero, de Sacrosanctæ Trinitatis Mysterio (Alexander) ambitiosius disputans, in Trinitate esse docebat unionem. Arius verò unus è numero Presbyterorum, qui Alexandro parebant, vir artis dialecticæ minimè ignarus, ratus Episcopum Sabellii Lybici dogma inducere, ad opinionem, quæ cum Sabellii dogmate ex adverso pugnat, contentionis studio deflexit, iisque, quæ ab Episcopo dicta fuerant, acerbius, ut videbatur, occurrit, ita disputans. Si Pater genuit Filium, existendi initium habet is qui genitus est. Ex quo manifestè liquet, fuisse aliquando tempus, cum non esset Filius: & necessariò conficitur, eundem ex nihilo subsistere. Hæc prima Arianæ hæresis nascentis vox, quæ audita plures ad eam questionem excitavit, atque eam Ario circumsonante magnum subito murmur excitavit.*

VI. Blasphemæ istius vocis sonus Alexandria primùm prolata per universam Ægyptum & Lybiam ac superiorem Thebaidem perstrepsit, & tandem reliquas Provincias & Civitates concussit, adeò ut divisio opinionum exorta sit, quibusdam, iisque piuribus, Alexandro & Catholicæ veritati faventibus: quibusdam verò Arii errorem approbantibus, quem præ cæteris suscepit Eusebius, non Cæsariensis, sed alter, qui ante Berytiorum Episcopus tunc ad Nicomediæ, quæ in Bithynia est, Episcopatum irrepperat. Quæ cum audiret ac cerneret Alexander, gravi exarsit irâ, & collecto multorum Episcoporum Concilio, Arium & reliquos, qui sententiam ejus amplectebantur, gradu movit, è Presbyterorum ordine illum ejiciens, & Episcopis per singulas urbes constitutis gravem de hac re scripsit Epistolam, quam per extensum refert Socrates L. 1. Hist. c. 6. In ea præcipuum Arii patronum Eusebium Nicomediensem statuit; nomina autem eorum, qui Arium in errore sequebantur hæc fuisse scribit, Achillam, Aithalem, Car-

Carponem, alterum Arium, Sarmaten, Euzojum, Lucium, Julianum, Menam, Helladium, Gajum, & cum his Secundum, ac Theonam olim Episcopos, illum Ptolemaidis, istum Marmaricæ, omnes numero quatuordecim: quos omnes in Synodo Alexandriæ coacto centum circiter Episcoporum anathemate à se damnatos dicit. S. Epiphanius tamen Hæres. 69. dicit ab Ario septingentas Virgines Deo consecratas, Presbyteros septem, Diaconos duodecim, brevè fuisse seductos. Quid in hac causa gestum sit, dicam.

§. II.

De Arii damnatione, restitutione, & exitu.

I. **D**E anno, quo Arius errorem suum prodere cœpit, controversa est. Eum innotuisse non ante annum 315. putat Baronius. Alii ad annum 317. & S. Hieronymus ad annum 321. eum differt. Conciliari tamen posse credo, si distinguantur tempora, illius primi ortus Alexandriæ, ejus disseminationis per Ægyptum, & denique propagationem per totum Orbem, & dici de primo loqui Baronium, de secundo alios, & de tertio S. Hieronymum.

II. Verùm, quidquid de anno sit, Arius anathemate damnatus & gradu pulsus Alexandriâ relictâ in Palæstinam abiit. Ibi singulos Episcopos adire, singulis adulari cœpit, quò plures sibi ac suo errori suffragatores adjungeret. Ex his quidam eum receperunt, quidam rejecerunt; quæ mox ut ad aures Alexandriæ Patriarchæ perlata sunt, præter Synodicam, de qua supra, alias Epistolas ad plurimos Episcopos scripsit, quibus Arii & Sectatorum ejus impietatem detexit. Dedit inter alias eruditissimam ad S. Alexandrum Episcopum Constantinopolitanum, quam nobis exhibet Theodorus L. 1. Hist. c. 4. Arius è converso ad Eusebium Nicomediensem præcipuum suæ causæ patronum, & in errore socium literas dedit, quas legimus apud eundem Theodorum c. 5. & Epiphanius Hæres. 69. n. 6. In quibus de Alexandro conqueritur, tamquam se ac sibi adherentes propter veritatem injustè persequente. Se Ammonii filium vocat, & Eusebium *Conlucianissam* appellat; quòd verisimiliter S. Luciani Antiocheni simul auditores fuissent: non quòd ab illo S. Martyre, quem tot laudibus celebrat S. Chrysostomus, errorem acceperint. His literis acceptis Eusebius, ipse quoque impietatem suam evomuit, & ad Paulinum Episcopum Tyriorum, quem inter suos fautores Arius recensèbat, Epistolam dedit, quam legere est apud Theodorum L. 1. cap. 6.

Episcopi verò, quos suæ causæ fautores Arius in dicta Epistola refert, sunt, Eusebius Cæsareæ Episcopus, Theodotus Laodiceæ, Paulinus Tyri, Athanasius Anazarbi, Gregorius Beri, Actius Liddæ, quæ postea Diospolis dicta fuit. Eos verò quos adversarios nominat sunt Philogonius Antiochenis Antistes, Ellanicus Tripoleos, & Macarius Jerosolymorum, quos calumniis infestatur.

III. Interim Thaleiam suam Arius composuit: Thaleiam seu Thaliā, vel à nomine unius ex Musis, vel à lætitiā nuncupavit, cantilena quippe erat mollis & impura, ac nomen & modum à Sotade antiquo Poeta mutuatus fuit. In hac totum suæ hæreseos virus expressit, ut illud suavis modulis in hominum ac mulierularum ad voluptates proclivium animos sensim instillaret. Ex ipsa aliqua fragmenta refert S. Athanasius Orat. 1. contra Arianos num. 5., Non semper Deus fuit Pater: sed fuit, cū Deus solus esset, nondumque Pater erat, postea verò factus est Pater. Non semper fuit Filius: nam cū omnia ex nihilo sint orta, resque omnes creatæ sint & factæ, ipsum quoque Dei Verbum ex nihilo factum est, & fuit aliquando cū non esset: nec erat antequam fieret: sed habuit quoque creationis initium. Erat enim, inquit, solus Deus, nondumque erat Verbum & Sapientia. Cū autem nos postea voluit creare, tunc profecto unum quemdam fecit, quem & Verbum & Sapientiam & Filium nominavit, ut nos per ipsum crearet. Duas ergo Sapientias esse ait: unam quæ propria sit & cum Deo simul existat; Filium verò in ista Sapientia factum fuisse, ejusque factum participem, Sapientiam & Verbum nomine tenus esse appellatum. Sapientia enim, inquit, per Sapientiam Dei sapientis Voluntate extitit. Sic aliud Verbum in Deo esse dicit præter filium, cujus Verbi participem factum Filium, ipsum quoque gratiā Verbum & Filium vocatum fuisse.

Christum autem non esse veram Dei virtutem, sed unam earum, quæ virtutes solent dici, inter quas & locusta & eruca non virtus tantum sed magna virtus appellatur Joelis 2. v. 25. & alias porro multas esse similesque Filio, de quibus David psallit (Psal. 23. v. 10.) *Dominus virtutum*. Item Verbum naturā, ut nos omnes, esse mutabile, suoque arbitrio, quousque volet, bonum perseverare: quod si voluerit, posse quoque ut & nos mutari, cū mutabili sit naturā. Quia enim Deus, inquit, bonum eum fore præcivit, idcirco hanc ei gloriam præveniendo donavit, quam ho no postea ex virtute consecutus est. Quapropter ex ejus operibus, quæ præcivit Deus talem illum nasci voluit.

IV. Præ-

IV. „ Præterea ausus est dicere, Verbum non esse verum Deum. Nam tamen si dicitur Deus, inquit, non tamen verus est Deus, sed gratiæ factus particeps, non aliter quàm alii omnes, & quemadmodum res omnes secundùm naturam diversæ & dissimiles Dei sunt; ita & Verbum omninò alienum, & dissimile est naturæ proprietatisque Dei Patris, sed ad res factas & creatas pertinet, quarum una ipsum est.

„ In Thalia etiam scripsit, Patrem à Filio videri non posse, neque Verbum perfectè & plenè suum Patrem posse intueri, vel cognoscere, sed quidquid cognoscit & cernit convenienter pro suis viribus cognoscere & ceruere, quemadmodum & nos pro nostra facultate cognoscimus. Enimverò, inquit, non solum Filius Patrem non accuratè cognoscit, utpote cui comprehendere facultas desit, verùm nec suam ipsè naturam notam habet. Addit similiter naturâ divisas, diversas, disjunctas, alienasque, nec invicem participes esse Patris Filii & Sancti Spiritus substantias, quin etiam, ut ipse ait, penitus inter se & substantiâ & gloriâ sunt infinitè dissimiles. Itaque, quod ad naturæ & gloriæ similitudinem attinet, Verbum ab utrisque, Patre videlicet & Spiritu Sancto alienum omninò esse docet: hæc enim sunt impii illius verba, qui item ait Filium ex se à Patre esse divisum, nullaque in re participem ejus esse.

V. Hisce particulis ex impia Arii doctrina excerptis exclamat S. Athanasius: *Quis ergo bis & carmine Thaliæ auditis, Arium quasi in scena de hujusmodi rebus jocantem jure non oderit? Quis non agnoscit illum, cùm Dei nomen proferre & de Deo loqui videtur, simillimum esse serpentis mulieri dantis consilium? Ecquis verò aliis quæ ibidem sequuntur perlectis, non tam clarè ejus perspicit impietatem, quàm fraudem, in quam serpens mulierem dolosè induxit.* Has easdem blasphemias Arianos docuisse, testis est S. Alexander Episcopus in Epist. Encyclica quam refert S. Athanasius, qui in Libro de Synodis eadem refert. In aulam etiam irrepsit perfidus Hæresiaracha, & Constantiam Augustam Constantini sororem suis partibus addixit, in hoc etiam imitatus serpentem, qui mulierem seduxit, ut ejus patrocinio, & suasu viros deciperet.

VI. Ecclesia interim scindebatur in partes. Eusebius Nicomediensis totus pro Ario, coacto in Bythinia Concilio literas ad omnes Episcopos dedit, adhortans ut Arium & suos in communionem admitterent, & Alexandrum ipsum ad pacem cum illis ineundam impellerent. Una ex his epistolis ad Paulinum Tyri Episcopum, de qua supra apud Theodorum L. 1. Hist. c. 6., legitur, in qua gratulatur, quòd Eusebius Cæsariensis veritati (verius blasphem-

blasphemiarum) tuendæ se adjunxerit. Ab opposito S. Alexander Epistolis & malis artibus Arianorum libellum opposuit, eumque misit ad Episcopos Ægypti, Thebaidis, Lybiæ, Pentapoleos, Syriæ, Lyciæ, Pamphiliæ, Cappadociæ, Asiæ &c. qui ipsi subscribere, & summam consensione ad tuendam fidei veritatem cum ipso conspirarunt, ut ex Theodorito L. 1. Hist. cap. 4. Certiorem etiam de Arii hæresi, & turbis ab ipso in Ægypto & Palæstina excitatis, fecit Silvestrum Romanum Pontificem, ut testatur Liberius in Epistola ad Constantinum. Noverat enim ad Summum Pontificem pertinere iudicium de causis fidei, quas nomine *majorum* tota intellexit Antiquitas.

VII. *Hæc cum audisset Imperator* (inquit Socrates Lib. 1. Hist. cap. 7.) *gravissimo dolore perculsus est, suamque esse ducens banc calamitatem, eò incubuit, ut excitatum malum quamprimum resingeret. Proinde literas mittit ad Alexandrum & Arium per virum spectatæ fidei Hosium nomine Episcopum Cordubæ, quæ Hispaniæ civitas est, quem quidem Imperator & amabat & colebat plurimum.* Deinde subjicit exemplum literarum Constantini: quas exhibet etiam Eusebius L. 2. de Vita Constantini c. 64. & seq. In eis totus est pius Imperator in suadenda pace & concordia inter Alexandrum & Arium, & tollendis ab Ecclesia dissensionibus tanquam de re (ut sibi falsò persuadebat) summam Religionis non tangente.

VIII. Verùm cum hoc pro votis non eveniret, Alexandro pro Fide Catholica stante, Ario verò pertinaciter renitente, ac in dies magis turbas excitante, Silvestri Romani Pontificis consensu & auctoritate, Nicææ in Bythinia Concilium cui 318. Patres alique, inter quos S. Athanasius adhuc Diaconus, interfuere, coactum est; quod est celeberrimum Nicænum I. in quo Arius cum suo errore damnatus est, & controversia de die Paschæ definita, ipso Imperatore præsentè & Catholicæ veritati subscribente. De hoc testes habemus Eusebium Pamphili L. 3. de Vita Constantini cap. 6. & seq., Socratem L. 1. c. 8., & Theodoritum L. 1. Hist. c. 7. Fidem in eo statutam Ecclesiis omnibus suis literis Constantinus promulgavit (Eusebio teste L. 3. de Vita Constant. c. 17.) Arium cum suis discipulis exilio multavit, perpetuam ignominiam notavit, jubens eum & Sectatores ejus *Porphyrianos* vocari, à Porphyrio apostata, & Christianæ Religionis hoste, ut ejus imitabantur mores, vocabulum etiam haberent. Arii quoque Thaliæ ejusque Libros flammis tradi jussit, poenam mortis indictam ei, qui illos occultasse deprehensus fuisset.

IX. Hoc Imperatoris Edictum legimus apud Socratem Lib. 1. cap. 9.

cap. 9. his verbis: *Cum malos & impios homines imitatus sit Arius, eandem cum illis pœnam infamiae meretur subire. Quemadmodum ergo Porphyrius veræ pietatis inimicus compositis adversus Christianam Religionem nefariis voluminibus, dignam mercedem retulit, ut & ipse infamis sit apud posteros multisque appetitus opprobriis, & impii ejus libri penitus fuerint aboliti: ita nunc placuit Arium Sectatoresque ejus Porphyrianos vocari, ut cujus imitati sunt mores, ejus etiam vocabulo appellentur. Præterea si quis fortè liber ab Ario conscriptus reperiatur, flammis eum absumi præcipimus: ut non solùm prava illius doctrina funditus aboleatur; sed ne monumentum quidem ejus ullam posteritati relinquantur. Illud etiam denuntio, quòd si quis librum ab Ario compositum occultasse deprehensus sit, nec eum statim oblatum igne combusserit, mortis pœnam subibit. Simulatque enim in hoc facinore fuerit deprehensus, capitali supplicio ferietur. Ita in exterminium Arianæ blasphemiae pius Imperator decrevit.*

X. Quinquennio tamen post damnationem in Concilio Nicæno, nimirum anno 330., Constantiâ ejusdem Imperatoris sorore morti proximâ postulante, Arius in Aulam vocatus est. Leguntur Constantini Literæ ad Arium apud Socratem L. 1. Hist. c. 25. qui rem narrat factam industriâ cujusdam Presbyteri, Ariani quidem, sed occulti, quem Constantia moriens Constantino fratri commendaverat. Is gratiam Imperatoris adeptus, causam Arii apud ipsum agere cœpit, affirmans, eum non aliud sentire, quàm quod à Synodo decretum fuisset, & si in conspectum ejus admitteretur, Synodi decretis consensurum esse, & sine causa eum falsò insimulari. Nova atque admiranda Imperatori visa sunt, quæ à Presbytero dicebantur. Sic igitur ille respondit Presbytero. *Si Arius Decretis Synodi subscribit, & eadem sentit cum Synodo, eum in conspectum meum admittam libens, & cum honore remittam Alexandriam. Hac locutus, confestim ad illum scripsit.*

Epistolam quam Imperator dedit ad Arium clementiæ & benignitatis plenam placet ex Socrate referre: *Victor Constantinus Maximus Augustus Ario. Jampridem gravitati tue significatum est, ut ad Comitatum nostrum venires, quòd Majestatis nostræ conspectus perfrui posses. Sed mirari satis non possumus, quòd confestim id non præstiteris. Consenso igitur vehiculo publico ad Comitatum nostrum venire accelera, ut nostram clementiam ac beneficentiam expertus, in patriam reverti possis. Divinitas te servet, frater dilectissime. Data ante diem quintum Calendarum Decembrium. Hicce terminis scribit Imperator: ad quem? Ad Arium Ecclesiæ transfugam, ut eum reducat. Merito igitur Socrates ait: *Hic verò mirari subit Imperatoris studium atque zelum, quo erga Religionem erat affectus.**

Ex

Ex hac enim epistola præcipue apparet, quod Arium sapissimè ad pœnitentiam cohortatus sit. Quippe illum reprehendit, quod cum ipse crebras ad illum dedisset literas, nihilominus ille ad viam veritatis redire minimè properasset.

XI. Arius igitur acceptis Imperatoris literis baud multò post Constantinopolim venit. Erat cum eo etiam Euzojus, quem Alexander Diaconatus honore exuerat, cum Arium ejusque socios deponeret. Eos Imperator ad conspectum suum admisit, interrogavitque utrum fidei consentirent. Illis protinus assentientibus, Imperator libellum fidei suæ tradere eos jubet. Formulam ergo obtulerunt Principi specie quidem Catholicam, sed æquivocam, & quæ errorem suum non excluderet. Talem inter alios exhibet Socrates Lib. 1. cap. 26. *Credimus in unum Deum, Patrem Omnipotentem, & in Dominum Jesum Christum Filium ejus, qui ex eo factus est ante omnia secula: Deum Verbum, per quem omnia facta sunt, quæ in Cælo & quæ in terra &c.* Atque ita se corde credere Deum testem ac judicem advocantes, se in communionem recipi postularunt. Unde pius Imperator nihil fraudis latere existimans, eis Alexandriam reverteendi licentiam indulxit.

XII. Anno itaque 331. Alexandro jam defuncto, ejusque in locum Athanasio Episcopatum gerente, Arius Alexandriam revertitur, ad quem Eusebii Nicomediensis Epistolam quoque detulit, ipsum adhortantis, ut Arium in communionem reciperet. Verùm cum Athanasius hominem captiosum agnoscens, eum recipere renueret, Imperator Eusebio suadente, ut eum cum sociis admitteret, movit. Restitit tamen Athanasius, & Imperatorem per literas docuit, fieri non posse, ut qui fidem semel violassent, & anathemate percussii essent, rursus de integro, maximè non probatâ per pœnitentiam fide, reciperentur. Id molestè ferens Imperator, Athanasio rescripsit, si mandatis ejus non pareret, aditumque omnibus petentibus in Ecclesiam non aperiret, se missurum continuò aliquem, qui ipsum deponat, & extra patriam suam deportet. Cumque nec his Athanasius flecteretur, hinc occasionem Eusebiani sumserunt persecutionem in Athanasium excitandi omnibus notam; quam invicto animo pertulit ac superavit. Hæc ex Socrate L. 1. c. 27., Sozomeno L. 2. c. 22. &c. & ex ipso Athanasio passim.

XIII. Anno 335. Ad dedicationem Ecclesiæ, quam Jerosolymis Imperator construxerat, frequentes Episcopos jussit convenire. Eos ergo, priusquam illuc convenirent, in civitate Tyro collectos causam Athanasii variis criminibus ab Arianis accusati ventilari præcepit, quò sexaginta Episcopi majori ex parte Ariani accef-

accessere, ubi, quamvis Athanasii innocentia comperta fuisset, Synodali tamen sententiâ depositus fuit; ac Synodus relicta Tyro Ierosolymam veniens Arium cum fociis in communionem recepit. Hæc refert Socrates Lib. 1. c. 28. & sequentibus.

De præfata Synodo Tyria dicit Epiphanius Hæres. 68. n. 7. quod ei præerat Eusebius Cæsariensis cum aliis in Arianorum, dogma propensis. Aderant ex Catholica Ægypti Ecclesia & Athanasio subjecta Episcopi quidam vitæ sanctitate præditi, inter quos Magnus Potamo olim Heracleæ Episcopus, vir ardore veritatis æstuans, & summâ loquendi libertate potens, qui pro fidei confessione alterum in persecutione oculum amiserat. *Is Eusebium, sedentem & judicantem, stantem verò Athanasium conspicatus, dolore confectus & illacrymans, cujusmodi sinceris mentibus usu venire solet, magnâ voce adversus Eusebium invectus est. Et te ne, inquit, Eusebi sedere, & innocentem Athanasium à te judicari? Quis ista sustinere possit? Dic sodes, nonne mecum persecutionis tempore in custodia fuisti? Atque ego quidem oculum pro veritate perdidici; tu nullâ corporis parte mutilatus es, neque martyrium subiisti, sed vivus integerque consistis. Quânam ratione è custodia evolucisti, nisi quod persecutionibus nostris nefarium facinus admittiturum te esse recepisti, vel etiam admisisti? Hæc Eusebius audiens magnopere doluit, & repente surgens Concilium dimisit.* A qualitate Judicis, colligat quisque, quale esset adversus Athanasium Tyrium Concilium, simile ei certè cui adversus Christum Caiphas præerat.

XIV. Anno 336. urgentibus Arianis, qui ad Concilium contra Marcellum Ancyranum Nicænæ fidei defensorem Constantinopoli convenerant, ut Arius, quem plebs Alexandrina ab ingressu Ecclesiæ arcebat, in communionem Constantinensi mandato recipere-
retur, & gratiâ ipsi à Synodo Ierosolymitana concessâ frui liceret, Imperator ipsum Constantinopolim vocavit. Ibi oblata pi-
entissimo Principi Nicænæ fidei formulâ, ita se credere juramento confirmavit, aliam tamen perfidiæ suæ formulam sub ala recon-
dens, ad quam juramentum suum restrictione mentali dirigebat, ut tradit Socrates L. 1. c. 38.: cui fidem præstans pius Imperator, Alexandro tunc Constantinopolitano Episcopo mandavit, ut Arium in communionem reciperet. Alexander Apostolicus Antistes, fideique Nicænæ propugnator ingenuus; dolens nimîâ Principis credulitate Arium, Eusebium Nicomediensem & Arianos trium-
phaturos, ad preces & jejunia unâ cum S. Jacobo Nisibi Episcopo, confugit.

XV. Quæ sequuntur ex Socrate loco citato referam, Erat
,, tum dies Sabbati. Postridie verò sperabat Arius, se in Eccle-
Tom. VII. Par. II. V v fia

„ fia cum reliquis fidelibus conventurum . Sed perditis Arij co-
 „ natibus Divina ultio jam instabat . Egressus enim ex Imperiali
 „ Palatio , Eusebianis satellitum instar eum stipantibus , per me-
 „ diam civitatem magnificè incedebat , omnium oculis in se-
 „ convertens . Cùmque venisset juxta forum , quod dicitur Con-
 „ stantini , quo in loco statua porphyretica posita est , terror quĩ-
 „ dam ex conscientia scelerum ei subortus est , & cum terrore
 „ simul alvus relaxata . Percontatusque , num in proximo essent
 „ latrinæ , cùm post Constantini forum esse didicisset , illuc per-
 „ rexit . Mox animo deficere cœpit , & unâ cum excrementis
 „ anus ipsi delabatur , & id quod medici vocant apeptsthisma , pro-
 „ tinus per anum decedit . Subsecuta est sanguinis copia ; ac po-
 „ stremo tenuia intestina , simul cum splene ac jecore effusa sunt .
 „ Et ille quidem continuò animam exhalavit . Latrinæ autem
 „ illæ Constantinopoli post forum Constantini , sicut antea dixi , &
 „ post macellum , quod est in porticu , etiamnum monstrantur :
 „ & cunctis prætereuntibus digitum ad eas intendentibus , genus
 „ mortis Arij perpetuò memorabile posteris reddunt „ :

Cùm hæc ita accidissent , ingens terror ac mœstitia animos
 eorum , qui cum Eusebio Nicomediensi erant , occupavit : famâ-
 que hujus rei , non per totam modò civitatem , sed per universum ,
 ut ita dicam , Orbem terrarum dispersa est . Imperator verò Chri-
 stianæ Religioni cò magis adhæsit , cùm Nicænæ fidei veritatem
 Dei ipsius testimonio confirmatam esse intelligeret . Hactenus
 Socrates . Quæ confirmantur ex S. Athanasio Orat. 1. contra
 Arianos , Theodorito L. 1. Hist. cap. 14. & L. 4. Hæc. Fab. cap. 1.
 S. Epiphanio Hæres. 69. & Sozomeno L. 2. Hist. c. 29. Hoc Divinæ
 justitiæ sententiâ Arij exitiale supplicium fuit , ut qui Judam Chri-
 sti proditorem imitatus , Christi fidem prodiderat , & ipse sicut ille
 viscerum diffusionem interiret .

§. III.

Constantini mors, Julius Rom. Pont., Ariana hæresis furor.

I. S Equenti anno , nimirum 337. ut refert Socrates Lib. 1. Hist.
 cap. 39. , Constantinus Imperator in morbum incidit , à quo
 ut levaretur Helenopolim profectus est : ibi enim juxta urbem aquæ
 calidæ erant , quarum lavacrum salubre ægrotantibus erat . Sed
 morbo ingravescente , urbe & balneo relictis , Nicomediam se tran-
 stulit , ibique Baptisma suscepit . De tempore tamen & loco in quo
 Constantinus baptizatus fuit , controversia est , de qua hic agere
 locus

locus non est. Quare modò suspendo, Baronio & aliis subscribere, asserentibus ab anno 324., & quidem Romæ à S. Silvestro baptizatum fuisse. Subinde testamentum condidit, in quo tribus filiis suis Constantio, Constanti, & juniori Constantino Imperium divisit. Testamentum secretò tradidit Presbytero illi sectâ Ariano sibi familiari, quem Constantia soror ipsi commendaverat, mandans ei, ne alteri quàm filio Constantio, quem Orienti præfecerat, illud in manus traderet. Cùmque aliquot diebus supervixisset, absentibus filiis, mortuus est Constantinus, & quidem in Catholica fide, ut inter cæteros ostendit Natalis Alexandre Hist. Seculi 4. Dissert. 24. Vixit autem annos quinque & sexaginta, ex quibus unum & triginta imperavit.

II. Accepto de Constantini parentis obitu nuntio, Constantius Constantinopolim advolavit, & demortui corpus illuc jam translatum, in Ecclesia Apostolorum, in qua sibi sepulturam elegerat, honorificè condidit. Interim Presbyter ille, de quo supra, testamentum & mandata, quæ Constantinus moriens ipsi commiserat, Constantio filio obtulit. Qui legens, in testamento sibi tradi Orientis Imperium, ac summopere gavissus, Presbyterum illum in honore habere cœpit, multumque auctoritatis ei concessit, ac liberum in Palatium ingressum habere præcepit. Hâc licentiâ Presbyter ille utens sectam Arianam, tum Imperatoris conjugii, tum Eunuchis instillare cœpit. Eâ tempestate Regii cubiculi Præpositus erat Eunuchus quidam nomine Eusebius. Huic Presbyter persuasit, ut opinionem Arii amplecteretur. Quo factum est, ut cæteri etiam Eunuchi in eandem sententiam adducerentur. Sed & ipsa Imperatoris uxor, & spadonum & Presbyteri hortatu Arii partibus sese adjunxit, nec multò post ad Imperatorem, ipsum hæc lues pervenit. Paulatimque evulgata, primùm quidem his qui in Palatio militabant innotuit, deinde ad ipsum quoque Regiæ urbis vulgus promanavit, ut primùm quidem in palatio etiam cum mulierculis hac de re quæstio haberetur, deinde per singulas urbis domos transiens, alias quoque Urbes ac Provincias invaderet: sicque parva scintilla ingens contentionis incendium excitavit. Et hæc quidem in Orientis dumtaxat urbibus agebantur; Urbes enim Illyrici, & quæ in Occidentis partibus, ubi Constantinus junior imperabat, interim quievere; quippe quæ Nicæni Concilii decreta labefactare nollent (ex Socrate Lib. 2. cap. 2.)

III. Sic pace à Paganis obtentâ, aliud bellum invidia Diaboli excitavit, eò atrocius quia internum, & inter ipsa ejusdem corporis membra, quæ ad ejus dissolutionem armavit ad pugnam, ac præcipuè ipsos Ecclesiæ Antistites ac Pastores, ut eorum multos

vertens in lupos, perniciem gregis redderet faciliorem. Tumultum ergo in Oriente per supradictum Presbyterum Diaboli ministrum excitatum, ac Imperatoris Constantii potentiâ munitum, lucro suo Eusebiani deputantes, omne studium eò direxerunt, ut in locum Athanasii pro Catholica fide pugilis invicti, & eorum operâ à custodia sui gregis jam deturbati, alter suæ factionis deputaretur. *Sed consilium illorum prævenit Athanasii reditus, qui Alexandriam reversus est Regiis munitus literis, quas unus ex Augustis Constantinus junior patri cognominis ad populum Alexandrinum scripserat.* Ita Socrates L. 2. c. 2. qui earum literarum exemplum subjicit. Contigerunt hæc anno 338.

IV. Præfatis literis se opponere ausus non fuit Constantius. Unde Athanasius Treviris relicto, ubi duobus annis & quatuor mensibus exul permanerat, trajectâ Lybiâ in Ægyptum, & tandem Alexandriam pervenit incredibili, tum Cleri, tum fidelis populi gaudio & plausu exceptus, omnibus etiam ex agris & remotioribus locis ad eum invisendum accurrentibus. Movit hoc Arianorum animos, qui præcipuè Athanasii reditum ferre non valentes, novas adversus ipsum calumnias instruxere anno 339. & potissimè, quòd à Synodo Tyria exauctoratus, absque alia Synodo temerè & contra Canones sedem repetierit. Quas calumnias ab Episcopis Alexandrini Patriarchatus in Concilio egregiè dilutas, ad Julium tunc Romanum Pontificem detulerunt, ad quem accurrens etiam Athanasius in Synodo Romæ coacta absolutus fuit: & cum eo etiam Paulus Constantinopolis Episcopus, Asclepas Gazæ, Marcellus Ancyrae, Lucius Adrianopolis ab Ecclesiis suis pulsi. Hi enim etiam Romam ad dicendam causam suam coram Julio adventarant.

V. Totum hoc enarrans Socrates L. 2. Hist. c. 15. Eodem tempore, inquit, Paulus quoque Constantinopolis Episcopus, Asclepas Gazæ, Marcellus Ancyrae, quæ est urbs minoris Galatiæ, Lucius denique Adrianopolis, alius aliam ob causam accusati & Ecclesiis suis pulsi in urbem regiam adventant. Ubi cum Julio Romana Urbis Episcopo causam suam exposuissent, ille, quæ est Romana Ecclesia prærogativa, liberioribus literis eos communitos in Orientem remisit, singulis sedem suam restituens, simulque perstringens illos, qui supradictos Episcopos temerè deposuissent. Itaque illi Româ digressi, & Julii Episcopi literis freti suas quisque Ecclesias occuparunt, & Epistolæ ad eos quibus scriptæ fuerant miserunt. Hæc Socrates.

Eadem refert Sozomenus Lib. 3. Hist. cap. 8., ubi narrato ad Juliam recursum præfatorum Episcoporum, subdit: *Episcopus igitur Romanus cum singulorum causas cognovisset, omnesque in Nicænæ fidei*

fidei doctrinam convenientes reperisset, tamquam idem cum ipso sentientes in communionem recepit. Et quoniam propter Sedis dignitatem omnium cura ad ipsum spectabat, suam cuique Ecclesiam restituit. Scripsit etiam Orientalibus Episcopis reprehendens eos, quod in supradictorum causis non rectè judicassent, & quod Ecclesiarum statum turbarent, eò quod Decretis Concilii Nicæni minimè acquiescerent. Simulque paucos ex illorum numero ad constitutum diem adesse iussit, qui docerent justam ab ipsis prolatam fuisse sententiam, minatusque est se impofterum non passurum, nisi à novandi studio absisterent. Hactenus Sozomenus.

VI. Discant ergo Novatores & alii, qui jus appellationis ad Romanum Pontificem, ejusque supremum in causis fidei Judicium, vel tollere vel infirmare præsumunt. Agebatur hic de causis non Italiae aut Occidentis, sed Orientis, & in Synodis Orientis jam judicatis. Utraque pars ad Julium Romanum Episcopum recurrit, nempe & qui judicaverant, & qui fuerant iudicati. Julius causam assumpsit, non sibi iudicium usurpans, sed ex prerogativa Romanae Ecclesiae, & quoniam propter Sedis dignitatem omnium cura ad ipsum spectabat: singulorum causas cognovit, non rectè iudicatos decrevit, ac singulos suis Ecclesiis restituit, diem adversariis dixit, ut docerent justam ab illis prolatam fuisse sententiam, comminatus, se non passurum, ut impofterum Ecclesiam turbarent; ac vi hujus sententiæ Episcopi pulsi suis Ecclesiis fuere restituti. Quis hic non videt, in Romanae Sedis Episcopo iis temporibus jus agnatum fuisse de omnibus totius Orbis Ecclesiarum causis iudicandi ac sententiam ferendi?

VII. At, inquires, sententia Julii tanquam injusta reprobata fuit; Episcopi per ipsum restituti, Athanasius & alii supradicti in Concilio Antiochiæ iterum pulsi: ait enim citato loco Socrates: *Verùm bi acceptis Julii Literis reprehensionem contumelia loco duxere. Et convocata Antiochiæ Synodo in unum collecti de communi omnium sententiâ conscriptis Literis Julium vicissim acriter insimulant, significantes, non debere ab ipso discuti, si quos ipsi Ecclesiis suis expellere voluissent: neque enim se contradixisse tunc cum Novatus Ecclesiâ ejectus est. Eadem habet Sozomenus loco supra allato, addens, in literis suis eos falsos fuisse, Romanam Ecclesiam apud omnes magnificam esse, quippe quæ jam inde ab initio domicilium Apostolorum & pietatis origo & Metropolis extiterit (en vel Ariani fatentur Romam fuisse domicilium Apostolorum Petri & Pauli, quod de Petro inficiantur Novatores) licet fidei Doctores ad eam ex Orientis partibus advenissent; non tamen æquum censebant, se inferiore loco haberi.*

VIII. Non

VIII. Non diffiteor. Sed qui fuerunt isti in Antiochena Synodo congregati, qui adeò impudenter Julii Decreto rescripserunt? Catholici non certè, qui Athanasium ceterosque Episcopos suis sedibus restitutos cum gaudio susceperunt. Fuit ergo Arianorum superba factio, quæ sicut Dei Verbo injuriosa, ita ejus Ecclesiæ præsidem Julium contemnere minùs erubuit. Quòd si perduelles isti Julio pares in auctoritate se gloriabantur, ejusque sententiæ parere recusabant, cur saltem Nicæno Concilio Œcumenico & Orientali cervices non flectebant, pro cujus auctoritate tuenda Julius militabat? Cur Episcopos qui pro eodem Concilio stabant, deponebant, alios qui eidem refragabantur intrudentes? Num pluris faciendæ sunt eorum pseudosynodi Tyria, Antiochena, & aliæ, quàm Nicæna Universalis & totius Orbis consensione probata? Pro hac stabat Julius, pro hac vindicanda Athanasium, & alios suis sedibus deturbatos restituit. Quis ergo pro veritate dimicavit? Ad hoc declarandum Sardicenis Synodus coacta fuit. Scio suæ perditæ causæ diffidentes ad eam accedere Eusebianos recusasse. Audiant tamen illam ita loquentem: *Jam ergo (Eusebiano) diffisi suis fabulis & vanis rumoribus, ac etiam intuentes, quàm non possent de iis rebus vera documenta asserre, quum essent in urbe Sardica, non ausi sunt in Concilio Sanctorum Episcoporum apparere. Quia ex re aequitas Judicii fratris, & Coepiscopi nostri Julii liquidissima apparuit, qui non temerario consilio, sed cum matura deliberatione sententiam tulit, adeò ut nihil relinquatur dubii de communionis fratris nostri Athanasii.* Hæc Sardicenis Synodus.

IX. Paulatim facta est generalis corporis Ecclesiæ scissio, quæ quanta intulerit mala, historiam illorum temporum legenti constabit. Pro tuenda Nicæna fide stabant Catholici: ut eam everterent, vel saltem contaminarent, pugnabant Ariani. Pseudosynodos multiplicabant, varias in eis fidei, seu veriùs contra fidem confessiones edebant. Qui eis subscribere recusassent, Episcopos depositione & exilio mulctabant, ceterosque mille ærumnis, Principum, & præcipuè Constantii, favore & potentiâ insequabantur. Cùmque lues nedum Orientem, sed etiam Occidentem infecisset, undique contaminatam & laceratam Christi Ecclesiam toti Orbi commiserandam exhibuit. Quod deplorans Vincentius Lirinensis in Communi. num. 4. *Quando, inquit, Arianorum venenum, non jam portiunculam quamdam, sed penè Orbem totum contaminaverat, adeò ut propè cunctis latini sermonis Episcopis partim vi, partim fraude deceptis, caligo quadam mentibus offunderetur, quidnam potissimum in tanto rerum confusione sequendum foret, tunc quisquis verus Christi amator & cultor extirpit antiquam fidem novella perfidia præ-*

ferendo nullâ contagii illius peste maculatus est.... Tunc siquidem non solum parva res, sed etiam maxima labefacta sunt. Nec enim tantum affinitates, cognationes, amicitia, domus; verum etiam urbes, Populi, Provinciae, Nationes, universum postremo Romanum Imperium funditus concussum & emotum est. Namque cum profana ipsa Arianorum novitas, velut quadam Bellona aut Furia, capto prius omnium Imperatore, cuncta deinde Palatii culmina legibus novis subjugasset, nequaquam deinceps desistit universa miscere atque vexare privata, ac publica, sacra profanaque omnia: nullum boni & veri gerere discrimen, sed quoscumque collibuisse tamquam de loco superiore percutere. Tunc temerata conjuges, depopulata vidua, profanata virgines, Monasteria demolita, disturbati Clerici, verberati Levitæ, acti in exilium Sacerdotes, oppleta Sanctis ergastula, carceres, metalla: quorum pars maxima interdictis urbibus, protusi atque extorres, inter deserta, speluncas, feras, saxa, nuditate, fame, siti affecti, attriti & tabescenti sunt. Hactenus Lirinenfis Arianorum in Catholicos feritatem, non minorem quam Gentilium in Christianos exponit. Quæ si quisquam sigillatim videre cupit, adeat Victorem Vitensem de Persecutione Africana, & P. Ruinart de Persecutione Wandalica.

X. Deinde tantæ hujus persecutionis causam assignans profertur Lirinenfis: *Atque hæc omnia numquid ullam aliam ob causam, nisi utique, dum pro cælesti dogmate humanæ superstitiones introducantur, dum bene fundata antiquitas scelestâ novitate subvertitur, dum superiorum instituta violantur, dum rescinduntur scita Patrum, dum convelluntur definita Majorum, dum se se intra sacrata atque incorrupta vetustatis castissimos limites profana ac novellæ curiositatis libido non continet? Effrænis hæc libido, quæ adversus scita Patrum & traditiones Majorum teste Lirinenfi impulit Arianos, numquid eadem excitavit Lutherum, Calvinum, & quotquot nostrâ ætate vigent Sectarios, ut sacrâ vetustate & Ecclesiæ decretis contemptis, quas suo privato judicio sibi confinxerunt, novitates sequantur eisque pervicaciter adherentes, Catholicos pro sacrâ antiquitate stantes derideant, & persequantur? Igitur ex S. Ambrosio Lib. 3. ad Gratianum cum eodem Lirinenfi utrisque repetam: *Servemus præcepta Majorum, nec bæreditaria signacula ausi rudi temeritate violemus. Librum signatum illud propheticum, non Seniores, non Potestates, non Angeli, non Archangeli aperire ausi sunt: Soli Christo explanandi ejus prærogativa servata est. Librum Sacerdotalem quis nostrum resignare audeat, signatum à Confessoribus, & multorum jam martyrio consecratum? Quem qui resignare conati sunt, postea tamen damnatâ fraude signarunt;* qui*

qui violare non sunt ausi, Confessores & Martyres extiterunt. Quomodo fidem eorum possumus denegare, quorum victoriam predicamus? Librum hunc, quia inter alios ausus fuit aperire Lutherus clamans, ad sua usque tempora Evangelium fuisse opertum, propterea damnatus ipse, sequaces suos in damnationem traxit, & adhuc trahit.

§. IV.

Persecutio in Liberium, & Osum.

I. **M**Ala, quæ Ecclesiæ Arianae hæresis furor intulit, Magno Antonio in raptu præmonstrata, in ejus Vita apud S. Athanasium leguntur. Quâdam die sedens Sanctus Monachus ecclasi somno correptus plorans & gemens diu mansit. Post horam surgens & coram adstantibus adhuc plorans, in preces genuflexus procidit, sed post preces adhuc in gemitu & lacrymis perseveravit. Exterriti qui aderant, causam tanti mœroris & lletus repetitis vicibus exorant. Ille tandem magno præmissio ejulatu, Filii mei, inquit, melius est mihi ut moriar, priusquam ea quæ mihi ostensa sunt impleantur. Illis autem acrius instantibus tandem ait. Ira Dei super Ecclesiam imminet, quæ hominibus bestiis ipsis ferocioribus conculcanda tradetur. Vidi altare Dei multis bestiis undique circumdatum, continuis calcibus illud impetentibus, ac simul ea quæ super ipsum sunt evertere conantibus, ac mihi vox insonuit *Altare meum sic profanabitur*. Hæc mei planctus ac gemituum causa. Ita sanctus Senex: quæ (heu nimis!) diu ab Arianis sacrilege impleta totus Orbis vidit ac deploravit.

II. Ut Diabolicum hoc consilium, Christi Altare Ecclesiamque evertendi, felicius implerent Ariani, in Ecclesiæ Antistites tanquam super Ecclesiam positos furem suum direxerunt. Hoc maxime Athanasius alique Episcopi à suis Ecclesiis pulsi, & in exilium amandati experti fuere. Præcipuum verò studium eorum fuit ut Romanum Pontificem, seu Ecclesiæ Caput fascinis suis caperent. Hoc tentarunt in Julio: sed quia invenerunt Apostolicæ doctrinæ fidelem custodem ac fortem Athanasii & aliorum qui eam sequebantur defensorem, injuriis eum lacerare, atque anathema ei dicere veriti non sunt. Eo autem vita functo anno 352. in Liberium ejus successorem arma verterunt. Mortuo jam Constante, & domino totius Imperii & etiam Romæ facto Constantio, Ariani ejus freti patrocinio Liberium criminati sunt, quod & fidem Nicenam, & Athanasium defenderet. Post multa hinc inde acta, videns Constantius, se flectere Liberii animum non posse, Medio-

lano,

Iano, ubi tunc moram trahebat, Eusebium Eunuchorum principem Romam misit. Hic videns, se nec suasionibus, nec minis quidquam cum Liberio proficere, noctu commotionem populi timens, Romam abductum Mediolanum coram Imperatore Liberium transtulit.

III. Mediolani positus celebrem habuit cum Constantio congressum, quem refert Theodoritus Lib. 2. Hist. c. 16. in quo Imperatori conanti damnationem Athanasii ab eo extorquere respondit: *Æquum censeo, ut prius proponatur generalis Episcoporum subscriptio, quâ fides in Concilio Nicæno exposita confirmetur: deinde ut fratribus nostris ab exilio revocatis, & ad suas ipsorum sedes restitutis, si isti qui nunc tumultus cient, fidei Apostolica assentiri comperiantur, tunc omnes contendamus Alexandriam, ubi reus, ubi accusatores, & causæ eorum Patroni sunt: atque litigantium causâ diligenter cognitâ, sententiam de ea pariter feramus.* Consultissima hæc responsio Constantio non placuit; quin Liberio minari cœpit, Romam eum non reverfurum: cui infracto animo hæc verba cedro digna respondit: *Leges Ecclesiasticas observare, pluris faciendum censeo, quàm Romæ domicilium habere.* Hæc ex Theodorito.

IV. His addit Sozomenus Lib. 4. Hist. c. 11. *Cum ergo Liberius mandatis Principis minimè obtemperaret, Imperator eum in Thraciam deportari iussit, nisi intra biduum sententiam mutaret. At Liberius: mibi verò, inquit, ò Imperator, nihil opus est deliberatione. Hæc enim jam pridem à me perpensa ac decreta sunt: & jam nunc iter ingredior. Porro cum abduceretur in exilium, ajunt, Imperatorem quingentos aureos ei misisse: Liberium verò eos aspernatum dixisse illi qui attulerat: Abi, & nuntia illi qui hoc aurum misit, ut assentatoribus & bistrionibus, quos secum habet, illud largiatur: quos præ insatiabili cupiditate continua egestas quotidie urget ac cruciat, semper quidens appetentes divitias, numquam verò satiatos. Nobis verò Christus, qui Patri in omnibus similis est, & annonas & bona omnia subministrat.*

Hæc itaque de causa Liberius Episcopatu Romano spoliatus est, ejusque administratio commissa est Felici cuidam illius Cleri Diacono. Quem quidem ajunt fidei Concilii Nicæni perpetuò adhæsisse, & quod ad religionem pertinet, omni prorsus reprehensione caruisse. Unum verò illud in eo esse reprehensum, quod etiam ante Ordinationem communionem cum hæreticis sociatus fuisset. Socrates tamen Lib. 2. Hist. cap. 37. de Felice, an Arianam amplexus sit perfidiam, tunc cum ad Episcopatus honorem promotus est, an verò non, sed vi ac necessitate compulsus Ordinationem susceperit, in ambiguo relinquit. In hoc tamen falli visus est Socrates, quod dicat, Liberium missum fuisse in exilium, quod expositioni fidei factæ in Concilio

Ariminenſi ſubſcribere recuſarit ; cùm hoc Concilium nondum fuiſſet celebratum ; coactum enim fuit anno 358. poſt Liberii reditum ab exilio .

Interim Liberio pulſo , Conſtantius Romam adventans comuni populi ſupplicatione pro ejus reſtitutione interpellatur . Ita Sozomenus proſequitur : *Ubi verò Imperator Romam ingreſſus eſt , populus Romanus crebris acclamationibus interpellare eum pro Liberio non deſtitit , & rogare , ut iſſis reſtitueretur . Itaque Imperator addibitis in Concilium Epiſcopis qui cum ipſo erant , reſpondit revocaturum ſe illum , & petentibus redditurum eſſe , ſi Sacerdotibus qui in ipſius erant comitatu (Arianis nempe) conſentire vellet .*

V. Vix biennium in exilio egerat Liberius , cùm ejus fracta conſtantia viſa fuit . Nam ſive tædio victus , ſive gregis ſui ejus reditum crebrò ac importunè ſollicitantis deſiderio adactus , Sirmienſi formulæ ſibi ab Arianis oblatae , & Athanaſii damnationi ſubſcripſit . Porro cùm in Sirmienſi Synodo tres fidei formulæ editæ aſſerantur , quarum prima 25. anathematifmos continens ſpecie quidem Catholica videbatur ; nam licèt in illa vox *Conſubſtantialis* ſeu *Homouſios* omitteretur , apertè tamen Arii error excluderetur . Ut enim SS. Athanaſius & Hilarius in Lib. de Synodis exponunt , in primo anathematifmo ita concepta erat : *Eos qui dicunt ex non ente , aut ex alio ſubſiſtente , & non ex Deo Filium extiſſe , aut quoddã tempus aut ætas fuiſſe , quando ille non erat , alienos à ſe cenſet Sancta & Catholica Eccleſia .* In ultimo verò anathematifmo hæc habebat : *Si quis Chriſtum Deum Filium Dei ante ſecula , adminiſtrumque ad univerſitatis opificium fuiſſe neget ; ſed ex quo tempore à Maria genitus eſt , Chriſtum & Filium appellatum fuiſſe , & principium ſuæ Deitatis tum accepſſe dicat : anathema eſto .* Quo anathematifmo directè percutitur hæreſis Photini . Porro vox *Homouſios* omiſſa in primo , & vox *Adminiſtrum* poſita in ultimo , ut innoxie tolerari poſſent , ut ab Arianis tamen , unius omiſſio , & alterius prolatio ſuſpicionem non caret .

Secunda Sirmienſis formula puram putamque Arii hæreſim exhibet . Nam in ea voces *Conſubſtantialis* , & ſimilis *Uſiæ* ſeu ſubſtantiaæ , ut à Scriptura alienæ proſcribuntur , & Pater major Filio , Filiusque minor , & ſubjectus Patri aſſeritur . Idedque à S. Hilario in Lib. de Synodis jure appellatur : *Exemplum blaſphemiae apud Sirmium per Oſium , & Potamium conſcripta .*

Tertia formula Sirmienſis dicta , licèt non in Concilio , ſed poſt annos octo à paucis , duobus nempe aut tribus Epiſcopis conſecta , & ad Synodum Ariminenſem delata , vocem quidem ſubſtantiaæ & *Uſiæ* interdicit , Filium verò Patri per omnia ſimilem pro-

profitetur . His ergo præmissis queritur, cuinam ex prædictis formulis Liberius subscripserit .

VI. Dico. Liberius non secundæ, sed primæ Sirmienti formulæ contra Photinum editæ subscripsit, in qua licet vox Homousios non exprimeretur, non tamen apertè excluderetur . Ita communiter sentiunt Auctores Catholici, inter quos etiam Natalis Alexandre in Hist. Seculi 4. Dissert. 32. art. 1., de quo egi Tom. 4. in 1. par. de Trin. q. 1. Dub. 3. §. 4. Factum hoc describit Sozomenus L. 4. Hist. c. 15. ubi narrat, quòd cum Constantius Româ Sirmium reversus fuisset, ad se Liberium Berrhœâ accersivit, qui Liberium quidem cœpit compellere, ut Filium Patri non esse consubstantialem profiteretur : sed deinde transiens ad ea quæ contra Paulum Samosatenum & contra Photinum decreta fuerant, dicit : *Sed & Confessionem à Liberio vicissim susceperunt, quæ eos qui Filium secundum substantiam & per omnia Patri similem non esse assererent, alienos ab Ecclesia pronuntiabat .* Quæ certè, ut ex supradictis patet, fuit confessio primæ Sirmientis formulæ. Quamquam, ut subiungit, aliqui sparsis rumoribus divulgaverant, *Liberium quoque Consubstantialis vocabulum condemnasse, & Filium Patri dissimilem confiteri .* Ex quibus sparsis rumoribus, licet falsis, fieri potnit, ut Sancti Hilarius, Athanasius, Hieronymus decepti existimarint, Liberium perfidæ Arianae subscripsisse .

VII. Secundò id probatur ex eo, quòd Liberius post subscriptam formulam non statim ab exilio solutus fuit, & suæ sedi restitutus . Id constat ex ejus Epistolis ad Orientales, & ad Ursacium, Valentem, & Germanium datis, quibus eos rogat, ut reditum ad suam sedem sibi ab Imperatore impetrent . Si autem formulæ Arianam hæresim continenti subscripsisset, cum S. Athanasium à sua communione jam suspendisset, ut in Epistola ad Orientales ipse fatetur, nil ampliùs ab eo Ariani & Constantius expetere possent .

VIII. His accedit, quòd obtento reditu ad suam Romanam Ecclesiam, populus ingenti gaudio illum suscepit . *Nam* (inquit Sozomenus loco supra citato) *Liberium utpotè virum undequaque egregium, & qui pro religione Imperatori fortiter resistisset, populus Romanus impensè diligebat, adeò ut ejus causâ gravissimam seditionem excitaverit, & ad cedes usque proruperit .* Quòd si Liberius Arianae hæresi subscripsisset, Romani Nicænam fidem severè custodientes, cum horrore ipsum rejecissent . Porro estò Liberius Romanæ Sedi fuerit restitutus eâ conditione, ut simul cum Felice eam Ecclesiam gubernaret : Attamen, inquit Sozomenus, *Cùm Felix modico tempore supervivisset, Liberius solus Ecclesiam admini-*

stravit. *Quod quidem Divina providentia ita dispensavit, ne Sedes Petri debonestaretur à duobus Præsulibus simul gubernata; quod discordia signum, & ab Ecclesiasticis legibus alienum est.*

IX. Non defunt tamen qui putent, in totum à noxa excusari non posse factum Liberii: nam quamvis formulæ apertè hæreticæ non subscripserit: quia tamen in ea vox *Homousios* deerat, id satis videbatur, ut Arianis, qui ad eam subscribendam illum adegerrant, consensisset, & proinde causam dedit rumoribus, qui super hoc spargebantur. Tunc enim idem erat Homousion tacere, ac Consubstantialitatem negare: & eò maximè, quòd videbant, Liberium cum Arianis communicare, & ab Athanasii acerrimi *Homousii* propugnatoris communione se separasse. Ab hoc tamen nævo suæ sedis restitutus se purgavit, & tunc maximè, cum Ariminensi Concilio assensum suum, & suffragium constantissimè negavit: ideòque à S. Ambrosio L. 3. de Virginibus *Vir beata memoria & Vir sanctior* appellatur: ac similes honoris ac venerationis titulos meruit à S. Basilio Epist. 74., à S. Epiphanio Hæres. 75., & à Siricio Romano Pontifice Epist. ad Himerium cap. 1. Ejus nomen in Martyrologio S. Hieronymi ad diem 8. Kal. Octobris, & in Menæis Græcorum 27. Augusti, velut Sancti Pontificis, celebratur.

X. Qualiscumque tamen fuerit macula, quam præfata Formulæ subscribendo contraxit Liberius, macula fuit personæ, non Apostolicæ Sedis. Unde ex hoc Liberii defectu malè inferunt Romani Pontificis infallibilitatis oppugnatores in supposito Liberii defectu Romanam Cathedram defecisse. Romanam Cathedram, & in ea sedentem indefectibilem dicimus, quia dum Ecclesiam docet errare non potest. Personam tamen in suis privatis actionibus indefectibilem nemo dixit. Si ergo vi vel metu Liberius defecit, hoc ut faciendum aliis non proposuit, sed potius non faciendum docuit, cum Concilium Ariminense, in quo hæc vox Homousios omiſſa fuerat, confirmare noluit. Si ergo lapsus fuit Liberius, lapsus fuit & Concilium: at Liberius si ut homo lapsus fuerat, Concilii lapsus ut è Sede Petri loquens emendavit. Sic & Petrus ipse ut homo lapsus fuit, dum metu adactus se Christum nosse negavit, ei tamen potestatem confirmandi in fide fratres Christus fuit elargitus. In hoc observatione dignum censeo, quòd cap. 22. à v. 31. Lucas refert. Primò enim de omnibus Apostolis dixit Petro: *Simon, Simon ecce Satanas expetivit vos ut cribraret sicut triticum; Ego autem rogavi pro te, ut non deficiat fides tua: & tu aliquando conversus confirma fratres tuos.* Hic mihi duo exurgunt dubia. Si enim omnes Apostoli à Satana expetendi erant; cur non

non pro omnibus rogavit, ne eorum deficiat fides, sed pro solo Petro, *Ego autem rogavi pro te* ? Rursus si rogavit, ne deficeret Petri fides, cur Petrus ter negando à fidei confessione cecidit ? an Christi Oratio exaudita non fuit ? Non aliter hæc intelligenda censeo ; nisi quòd Dominus non pro omnibus Apostolis, sed pro solo Petro rogavit, quia à solo ipso ut eorum Capite aliorum fidem in casu, quo à Satana expeteretur, confirmandam fore statuerat, unde ait, *Confirma fratres tuos*. Ad coercendam verò ejus præsumptionem, quâ dixit, *tecum paratus sum & in carcerem & in mortem ire* ; putans hoc singulare privilegium suæ concessum particulari fuisse personæ, permisit eum in negationem labi, ut indè resurgens tanquam Caput cæteros confirmaret, ac intelligeret indefectibilitatem concessam ipsi fuisse, non ut particulari personæ, sed ut cæterorum Capiti. Quare Christi Oratio effectum intantum sortita fuit, & adhuc fortitur.

XI. Confirmat hoc Theophilactus apud S. Th. in Catena Aurea ad Caput 22. Lucæ, qui Christi mentem ita exponit : *Postquam me negato ploraveris ac pœnitueris, corrobora cæteros, cum te Principem Apostolorum deputaverim*. Hoc enim decet te, qui mecum robar es & petra Ecclesiæ. Hoc autem intelligendum est non solum de Apostolis qui tunc erant, ut roborarentur à Petro ; sed de omnibus, qui usque ad finem mundi futuri sunt, fidelibus, ne scilicet aliquis credentium diffidat, videns eum, qui cùm esset Apostolus denegavit, ac iterum per pœnitentiam obtinuit prærogativam, ut esset Antistes Mundi. Quibus apparet, Indefectibilitatem in fide concessam Petro ut petræ & Capiti Ecclesiæ non in solo Petro stetisse, sed derivari usque ad finem Mundi in omnes, qui in dignitate Capitis ei succedunt. Sed hæc ad abundantiam hoc loco dicta sunt. Videantur Auctores, qui rem hanc ex professò discutiunt. Hic enim mihi satis fuit Danæo os obstruere, qui Opusc. de Hæres. cap. 4. referens Episcopos, qui ad Arianos defecerunt, quasi triumphans dicit : „ Inter quos etiam omnium Historicorum consensu Liberius Romanus Episcopus recensetur, ne quis Romanam Ecclesiam errare posse neget „ . Contrarium enim ostendi in Vera Ecclesia Tom. 2. par. 1. art. 3., & præcipuè de factò Liberii Tom. 1. c. 11. §. 2. num. 13. quæ videri possunt.

XII. Nunc ad Osium transitum faciam, de quo etiam dixi Tom. 4. in 1. p. de Trinit. q. 1. Dub. 3. §. 4. num. 29. Is Cordubæ in Hispania Episcopus fuit, Vir celebris, & fidei Catholicæ adversus Arium & Arianos strenuus propugnator. Constantino carus ejus jussu Alexandrino Concilio ad sedandos Arii motus, & statuendum diem celebrationis Paschatis interfuit. In Nicæna Synodo Silvestri

vestri Romani Pontificis personam gessit, eique ejus nomine præfuit unà cum Vito ac Vincentio Legatis. Sardicensi etiam in Synodo & aliis pluribus primas partes gessit: proinde Arianis inivsus ab eis persecutiones passus fuit. Literas ad Constantium Imperatorem summo libertatis zelo scripsit, ipsum hortans, ut ab Arianis protegendis, & Athanasio persequendo desisteret. His Constantius irā percitus Osium Sirmium trahi imperavit, eumque ætate jam provectum ibi per annum detinuit: ubi postea coactâ Synodo Osium vel invitum adesse voluit, & Formulæ ibi editæ jam centenarium subscribere.

XIII. Rem hanc ita narrat Socrates Lib. 2. c. 31. *Hic siquidem (Osium) per insidias Arianorum paulò ante in exilium pulsus fuerat. Tunc verò studio atque impulsu eorum qui Sirmium convenerant, Imperator illuc eum evocavit: volens, ut vel spontè vel coactus cum Episcopis qui aderant consentiret. Hoc enim factò illorum fidei maximum testimonium videbatur accedere. Hanc igitur ob causam necessitate compulsus, ut dixi, adfuit invitus. Sed cum ille consentire renueret, verbera & tormenta inflixerunt seni. Itaque vi & necessitate adactus, editis tum fidei expositionibus consensit, atque subscripsit.*

XIV. Porro cum ex supradictis, tres fidei expositiones, seu Formulæ Sirmii editæ ferantur: quæritur, cuinam ex illis Osium subscripserit; an primæ contra Photinum, cui Liberium subscripsisse dixi; an secundæ Arianam hæresim exprimenti.

Huic secundæ Osium subscripsisse manu quidem non voluntate, communior sententia est. Ita ex S. Hilario Lib. de Synodis, ubi secundam formulam Sirmiensem appellat: *Exemplum blasphemie apud Sirmium per Osium & Potamium conscriptæ*. Et interiùs loquens de formula, quæ voces consubstantialis & similis substantiæ ex æquo damnabat, ait: *Oro vos, ne quisquam alius ex his præter senem Osium & ipsum illum nimium sui sepulchri amantem reperiatur, qui taceendum existimet de utroque*. Epiphanius etiam Hæres. 73. num. 14. de Arianis loquens: *Alterum, inquit, quod perficere studuerant, fuit, ut dissimilem essentiâ Filium Patri esse scriptis mandarent. Quo nomine Ecclesiam condemnare se posse putarent iis literis quas ab venerabili Episcopo Osio abstulerunt, in quibus Dissimilis sententia legitur. Igitur subscripsit Osium secundæ Sirmienfi formulæ, in qua Filius Patri dissimilis in essentia dicebatur.*

XV. Accedit Sulpitius Severus L. 2. Historiæ de Arianis hæc habet: *Sed quidam ex his ultra processerant, Anomænosiam, idest, dissimilem substantiam confirmantes. Eoque his certaminibus processum,*

sum, ut istiusmodi piaculis Orbis terrarum implicaretur: nam Italiam, Illyricum, atque Orientem Valens & Ursacius, cæterique, quorum nomina edidimus, infecerunt. Gallias nostras Saturninus Arelaten- sium Episcopus homo impotens & satiosus premebat. Osium quoque ab Hispania in eandem perfidiam concessisse, opinio fuit: quod eò mi- rum atque incredibile videbatur, quia omni ferè ætatis suæ tempore constantissimus nostrarum partium, & Nicæa Synodus auctore illo confecta habebatur: nisi fatiscente ævo, etenim major centenarius fuit (ut Sanctus Hilarius in Epistolis refert) deliraverit.

XVI. A lapsu tamen Osium Divinâ gratiâ crectum fuisse & in Fide Catholica obisse, testatur S. Athanasius in Epist. ad Solita- rios, ubi fusè enarratâ Osii adversus Constantii repetitas minas fortitudine, ad ejus lapsum deveniens, ait: *Tantam enim vim in- tulit seni, & ita eum arctè tenuit, ut afflictus attritusque malis, tandem agrèque cum Ursacio & Valente communicaret, sed tamen ut contra Athanasium non subscriberet.* Deinde Osii resipiscentiam re- ferens: *Verùm, inquit, ne ita quidem eam rem pro levi habuit: moriturus enim, quasi in testamento suo, eorum vim protestatus est; & Arianam hæresim condemnavit, vetuitque eam à quoquam probari, aut recipi.*

Et in fine Apologiæ 2. hæc scribit: *Nam tametsi Osus minis Constantii contreritus non videbatur Eusebianis contradicere, vis ta- men illa & tyrannica Constantii potestas, multæque contumelia & interminationes satis ostendunt, minime eum in nostri condemnationem consensisse, sed senii imbecillitate imparem, verberibus ad tempus cessasse.* Hactenus Athanasius. Si ergo solum ad tempus verberum vi cessit, non semper in errore mansit.

XVII. S. Augustinus quoque Osium à criminibus vindicat, qui- bus eum onerabant Donatistæ quorum æquè ac Arianorum hostis fuerat Osus. Libro enim contra Parmenianum c. 4. 5. & 8. cùm Donatistæ Osium accusarent, quòd in Hispaniam rediens ab Hi- spanis fuerit damnatus ait: *Hoc enim magis credibile est: si tamen Osus ab Hispanis damnatus, à Gallis est absolutus; sic fieri potuisse, ut falsis criminationibus Hispani circumventi, & callidâ insidiarum fraude decepti, contra innocentem ferrent sententiam, & postea pa- cificè in humilitate Christiana cederent sententiæ collegarum, quibus illius innocentia comprobata est.*

XVIII. In contrarium opponitur Libellus à Faustino & Mar- cellino Imperatori Theodosio porrectus, in quo testantur, quòd cùm Gregorius Illiberitanus Episcopus Oslo in Hispaniam redeun- ti communicare noluisse, Osus iratus ad tribunal Clementini Provinciæ Præfidis Gregorium vocavit. Coram quo Osus licet à Gre-

Gregorio prævaricationis convictus, ut respondere objectis non posset, rescriptum tamen à Principe obtinuit, vi cujus Gregorium amandari in exilium à Clementino postulavit. Respondit Præfex, non posse Episcopum in exilium amandari, nisi prius depositus fuisset. Ipse ergo Gregorium deponeret, & tunc se mandato Principis pariturum. Hisce in angustiis positus Gregorius Divinam opem precibus imploravit, quæ illi præstò fuit. Nam cum Osius in Sanctum Antistitem sententiam dicere vellet, statim capite & ore distortis in terram à sede sua Deo vindice dejectus, ac elisus infelicer subito interiit. Et addunt, quòd Clementinus metu percussus ad pedes Gregorii procidens veniam ab ipso exoravit. Hæc illorum duorum Presbyterorum de Osi morte narratio. Quibus suffragatur S. Isidorus Hispalensis, qui eadem de Osi morte narrat Lib. de Viris Illustribus cap. 14.

XIX. Sed hæc narratio falsitatis suspecta meritò est. Primò: Nam quæ fides hac in re Faustino & Marcellino Presbyteris de schismate Luciferiano habenda est, qui Osi, aliosque Episcopos in Constantii Imperatoris persecutione, & maxime in Concilio Ariminensi lapsos adeò averfati sunt, ut ab Ecclesia nefario schismate dividi maluerint, quàm cum eis reconciliari, & communionem inire? Secundò, & maxime, quia illis nullus auctor coævus suffragatur, nec Athanasius, cujus causæ plurimum intererat id non reticere: nam si ob desertam filii Consubstantialitatem Divina ultio in Osiu defecisset, maximum hinc argumentum fumere contra Arianos potuisset. Cum ergo Athanasius non solum hoc non dicat, sed ut supra dixi, Osiu post lapsum respuisse, & piè obisse referat, calumniosa contraria historia censenda est. Inverisimile etiam est, quòd Clementinus Præfex, fortè Ethnicus, tantà in ordinem Episcopalem reverentiâ afficeretur, ut etiam urgente Imperiali mandato Gregorium nisi prius depositum in exilium mittere noluerit, cum eà tempestate Ecclesiarum Antistites nullo juris ordine servato à suis sedibus pellerentur. Et magis inverisimile est, quòd Osius nullo præmisso Ecclesiastico iudicio Gregorium deponere aggressus sit. Nec suffragium Isidori huic narrationi fidem augere potest: quia Liber ille veri Isidori Hispalensis fortis non est, cum S. Hildephonsus universa Opera Isidori recensens illius non meminisset, sed alterius Isidori, qui ex cænoso Luciferianorum gurgite hoc expiscatus fuit.

XX. Tantam Catholicæ Ecclesiæ & præcipuè Episcoporum stragem intulit tum fraudulenta Arianorum ars errorem variis vocabulorum tegminibus occultantium, cum & maxime violenta Constantii tyrannis, cui sæva voluntas pro lege erat. Quare in
Con-

Concilio Mediolanensi anno 354. sub Liberio habito, Episcopis Orthodoxis, Ursacii & Valentis accusationem contra Athanasium non esse audiendam, contestantibus, Constantius respondit: *Ego sum Athanasii accusator; meo nomine illis credite*. Et Legatis Apostolicis dicentibus, se non posse in Athanasium subscribere, & cum Hæreticis communionem inire, ait: *Quod ego volo, pro Canone sit*. Quæ omnia Athanasius ipse in Epistola ad Solitarios recensens, ait: Constantium induisse imaginem Antichristi, *Quis enim, inquit, videns enim in decernendo facere se Principem Episcoporum, & præsidere judiciis Ecclesiasticis, non meritò dicat, eum illam ipsam abominationis desolationem esse, quæ à Daniele prædicta est?* Porro an eadem repeteret Athanasius de Principibus apud prætenso Reformatos, qui & Judiciis Ecclesiasticis præfunt, & non solum quæ Cæsaris, sed quæ Dei sunt, pro arbitrio disponunt, ut eorum voluntas pro canone sit, æquo Lectori judicandum relinquo.

XXI. Hoc dico, quòd tanto furore Ariani, Constantio patrocinium eis præbente, persecuti sunt Orthodoxos, ut feritate ac barbarie paganos ipsos superarint, historicis omnibus Socrate, Sozomeno, Theodorito & aliis fatentibus, ac nedum in Oriente, sed & in Occidente maximè post Concilium Ariminense. Cum enim Orthodoxi qui ibi erant Episcopi, petita quidem, sed nondum obtenta à Constantio licentiâ, dissoluto Concilio ad suas Ecclesias rediissent, ratus ipse, in sui contemtum hoc fecisse, Socrate referente L. 2. c. 37. *Ursacio & Valenti eorumque affectis quidvis contra Ecclesias agendi liberam potestatem dedit. Expositionem autem fidei, quæ lecta fuerat Arimini, ad Ecclesias Italiae mitti jussit: mandans ut quicumque subscribere ei nollet, pellerentur Ecclesiis, & in eorum locum alii substituerentur*. Tum, inquit Rufinus L. 1. cap. 21., Ecclesiæ facies penitus defigurata est, quia non ab extraneis ut antea, sed à propriis filiis lacerata, cum & qui persecutionem inferebant, & qui eam patiebantur utrique ex ipsa prodirent. Non erant ampliùs Idolorum altaria, non thurificationes, non sacrificia, ubique tamen ruinæ & lapsus. Qui pro Ecclesia pugnabant, tormenta ut à tyrannis patiebantur, martyres erant; sed martyrii gloriam Ecclesia non celebrabat, quin utriusque jacturam, & ejus qui supplicia subibat, & ejus qui ea inferebat flere cogeatur.

XXII. Nec brevi, sed diuturno tempore perduravit Ecclesiæ luctus. Nam dimisso Constantio, alii Principes seu verius tyranni fuere, qui sub Christiano nomine ejus viscera lacerarunt. Experta id fuit à Gothis & Wandalis in Africa, in Hispania & alibi. Plusquam octoginta annis lues ista eam publicè devastavit: dein

aliquantum sopita, non tamen extincta, evigilavit. Nam sub Theodosio, Valentiniano, & aliis proximis Imperatoribus viguit, suaque templa publicè concessa habuit; Anno Domini 700. Longobardi eam fuisse infectam feruntur. Et quod pejus est, post annos ab ejus ortu ultra mille & quadringentos à quibusdam ex modernis Sectariis, qui ferè omnes hæreses extumularunt, excitata revixit, & ipso Danæo teste adhuc vivit inter quosdam nomine Blandratas, Servetanos, Davidicos, Sylvanistas: adde quoque Socinianos, Deistas, quorum Secta modò viget.

§. V.

Arii & suorum errores rejecti.

I. **P**rimò errabat Arius, ut ex ejus Thalia indicavi, quia dicebat, unum esse verum proprièque dictum Deum, scilicet Patrem solum à se omni principio carentem, solum verum, solum immutabilem, solum æternum, qui Filium Unigenitum ante tempora genuit, & per quem secula genuit. Hunc tamen Filium non esse verum Deum ac de Patris substantia, seu Patri consubstantiali, sed creaturam super omnes perfectissimam, & maxime ad Deum accedentem, non tamen ei coeternam, sed ex non extantibus factam, ac fuisse tempus quando non erat: nec per essentiam bonum, sed in libero ejus arbitrio fuisse quamdiu vellet bonum permanere: Deum porro cum præcognosceret eum bonum futurum, hanc ei gloriam anticipando dedisse, quam homo postea meritis esset assecuturus: & per ipsum velut per ministrum secula & omnia alia fecisse; ideòque Deum participatione gratiæ, non naturæ, verbo tenus appellari. Hoc modo Christum Filium Dei esse dicebat non naturæ & origine, sed gratiæ & consensione voluntatis; addendo Filium non nosse perfectè Patrem, imò nec se ipsum. Ita blasphemabat Arius: ut mirum sit, quòd totus Orbis diris ut impium non deoverit, sed potius tot, tanto tempore, & adhuc sue impietatis habeat sectatores.

II. In hac impugnanda non diu immorabor. Tum quia in hoc ferè omnes Patres Græci & Latini strenuè laborarunt, & omnia Concilia perpetuo anathemate eam confixerunt. Tum quia in Tract. Theol. de Trinit. Tom. 4. q. 1. in 1. p. Dub. 2. contra eam egi. Dicam tamen ad præsens primò: Joannes initio Evangelii *In principio*, inquit, *erat Verbum, & Verbum erat apud Deum, & Deus erat Verbum. Hoc erat in principio apud Deum.* In principio ergo quo erat Deus, hoc est ab æterno jam erat (non dicit factum erat)

erat) Verbum : & hoc Verbum erat , non purè in Deo , sed apud Deum ut persona distincta : & Deus erat Verbum , hoc est ejusdem naturæ quâ Deus : & hoc in principio , non temporis , sed originis erat apud Deum . Subditur : *Omnia per ipsum facta sunt , & sine ipso factum est nihil quod factum est .* Quod si ipsum Verbum à Deo factum est : ergo non omnia per ipsum facta sunt , nec nihil eorum quæ facta sunt sine illo est factum , cum à Deo ipsum Verbum sine Verbo factum fuisse dicendum sit , repugnat enim , aliquid facere se ipsum , aliàs esset quando non esset , hoc est antequam esset . Et hoc fuit Arii delirium toties à Synodis explosum , & ab Arianis de Verbo ac Filio Dei repetitum : *Erat quando non erat .*

III. Omnia ergo quæ facit Pater , facit & Filius , quia eadem Patris & Filii substantia & operatio est : sed quia quidquid habet Filius habet per generationem à Patre , idèd & operari habet à Patre , ita ut virtus & operatio filii sit eadem ac virtus & operatio Patris , accepta tamen à Patre . Ita Judæis cum interficere volentibus , quòd Patrem suum dicebat Deum , æqualem se faciens Deo : respondit Christus Joann. 5. v. 19. *Non potest Filius à se facere . quidquam , nisi quod viderit Patrem facientem : quacunque enim ille fecerit , hæc & Filius similiter facit .* Quibus se æqualem in virtute cum Patre , licèt acceptâ à Patre , se esse demonstrat .

IV. Porrò Christum esse Filium Dei ac Deum naturâ , non gratiâ & adoptione demonstrat Paulus Rom. 8. v. 32. ubi de Deo ait : *Qui etiam proprio Filio suo non pepercit , sed pro nobis omnibus tradidit illum .* Si ergo proprius Filius hominis , per naturam homo esse debet , cur proprius Filius Dei per naturam Deus non erit sicut Pater ? Filius naturalis in natura dissimilis Patri , monstrum est : An ergo Deus pater gignendo filium sibi in natura dissimilem , monstrum genuit ? Nec dixerint , Deum Patrem Filium habere non naturâ genitum , sed voluntate : nam tales filios plures facit Deus Psal. 81. v. 6. *Ego dixi dii estis & Filii excelsi omnes : non unicum & proprium , quem teste Paulo dedit nobis Deus .* Hujus diversitatem ab aliis demonstrat idem Paulus ad Hebr. 1. v. 1. dicens : *Multifariam multisque modis olim Deus loquens Patribus in Prophetis , novissimè diebus istis locutus est nobis in Filio , quem constituit heredem universorum , per quem fecit & secula . Qui cum sit splendor gloriæ , & figura substantiæ ejus , portansque omnia verbo virtutis suæ , purgationem peccatorum faciens , sedet ad dexteram maiestatis in excelsis . Tantò melior Angelis effectus , quantò differentius præ illis nomen hereditavit . Cui enim dixit aliquando Angelorum , Filius meus es tu , ego hodie genui te ? Et rursum : Ego ero illi in patrem , & ipse erit mihi in filium ? Et cum iterum introducit pri-*

nogenitum in Orbem terræ dicit: Et adorent eum omnes Angeli Dei. Et ad Angelos quidem dicit: Qui facit Angelos suos spiritus & ministros suos flammam ignis. Ad Filium autem: Thronus tuus Deus in seculum seculi.... Et tu in principio terram fundasti: & opera manuum tuarum sunt Cæli &c. Hæc & alia de Christo filio Dei à Patre missio dicit Paulus. Quid ergo ad hæc Ariani? An hæc filio Dei convenire possunt qui non sit verus Deus, æqualis Patri ad dexteram ejus in throno majestatis sedens, sed purus ut ipsi dicunt Dei Patris minister?

V. Nec fatiscunt dicentes, Filium Dei non esse quidem *Homousion*, idest ejusdem substantiæ, sed *Hominion* idest similis cum Patre substantiæ: nam dum dicunt, Filium Dei non esse ejusdem sed similis substantiæ cum Patre, vel loquuntur de similitudine in natura specifica, ita ut natura Divina licet in Patre & Filio eadem numero non sit, sit tamen eadem in specie, sicut in hominibus eadem in Patre & Filio natura est, non numero, sed specie. Si hoc dicant; ergo Pater & Filius in Divinis non sunt unus Deus sed duo Dii sicut in humanis Pater & filius non sunt unus homo, sed duo homines: & sic unitatem Dei evertunt Deitatem multiplicantes. Vel loquuntur (ut re verâ loquuntur) de similitudine non in natura specifica, sed analogâ, nempe quòd dicatur Dei Filius, quia majori abundantia donorum in creatione à Deo ditatus fuerit: & sic titulo tantum Deus dicatur. Et hoc modo nihil plus tribuunt Filio Dei quàm homini; nam etiam homo ad imaginem & similitudinem Dei factus est Gen. 1. v. 25. *Faciamus hominem ad imaginem & similitudinem nostram... Et creavit Deus hominem ad imaginem suam: ad imaginem Dei creavit illum.*

VI. Dicebant. Impossibile est, Deum Patrem incorporeum & invisibilem de sua substantia generare. Respondeo. Et tamen ipse dixit Psalmo 109. se genuisse: *Ex utero ante Luciferum genui te.* Ergo vel mentitus est Dominus Domino, Deus Pater Deo Filio, cum ei dixit se genuisse eum, si verè non genuit, quia sibi impossibile; vel mentiuntur, qui hoc tamquam impossibile negant. Ut autem veritatem generationis indicaret *Uteri* nomen assumpsit: *Non quia corporeis compositus sit membris, aut aliquibus artuum delineamentis distinctus: sed quia nos aliter Divinæ generationis veritatem mentis audita percipere non possemus, nisi humani uteri provocaremur exemplo: ut ambigi ultra non posset, de Dei substantia natum esse, quem constat de Patris utero processisse.* Ita Vigilii Tapscensis ad objectiones Arianorum. Deinde ostendit, quòd Pater semper fuit Pater, semper generans, Filius semper Filius semper genitus, semper nascent semper natus, semper à Patre procedens, nun-

nunquam inde discedens, nec cum non esset, sed cum esset natus, concludit: *Et ubi, inquires, erat? In corde Patris, in utero Patris, in sinu Patris, idest in occultis naturæ arcanis. Inde nascendo processit, non recedendo decessit*, Ego, inquit, ex ore Altissimi processi. Ego, inquit, de Domino Patre exivi. Ecce habes nascentis processionem: audi non decedentis unde processerat mansionem, Ego, inquit, in Patre, & Pater in me.

VII. Rursus quia dicebant: Ingenitus est Pater, genitus Filius. Non autem fieri potest, unam esse substantiam geniti atque ingeneriti; Respondet: *Si sicut ingenitus est Pater, ingenitus esset & Filius, tunc magis diversa posset esse substantia: quia unusquisque à se ipso subsistens communionem substantiæ cum altero non haberet. Cùm verò ingenitus Pater de se ipso, idest de eo quod ipse est, si quid illud est, Filium generavit, apparet unam esse gignentis genitique naturam. Quod in Adamo exponit, qui licet ingenitus, naturam quam habebat genito filio communicavit.*

Sed quia terrænæ nativitatis exemplis ineffabilis Filii Dei generatio adequatè exponi nequit, ad Divina testimonia Vigilius recurrens ait: *Igitur Divinis est approbandum testimoniis, Patrem & Filium unius esse naturæ. De Deo certè Patre legimus, Joanne Apostolo testificante, Deus, inquit (1. Joann. 1. v. 5.) lux est, & tenebræ in eo non sunt ullæ. Filius verò de se ipso ait (Joan. 8. v. 12.) Ego sum lux. Si igitur lux Pater, lux Filius, apparet unus esse substantia, dum lucis & lucis diversa non potest esse natura, ejus scilicet, quæ de se gignit, & quæ de gignente existit. Denique ne aliquam temerariâ præsumptione inter Patrem & Filium diversitatem naturalis luminis introducat, paternæ lucis splendorem esse Filium Scriptura tradidit dicens (Sap. 7. v. 26.), Splendor est, inquit, lucis æternæ, & speculum sine macula Dei majestatis, & imago bonitatis illius, in quo evidentiùs & coæternus Patri, & inseparabilis à Patre, & unius cum eo esse naturæ docetur. Omnis enim in hoc brevè versiculo Catholica fidei professio continetur, dum luci splendor semper est coæternus, dum splendor à lumine nunquam est separatus, dum splendor à luce naturæ & substantiæ nunquam potest esse diversus. Hoc est quod nos recto fidei tramite indivisibilem, atque unius cum Patre substantiæ Filium profiteamur. His Vigilius Tappienus Arianos ita perstringit, ut omnem evadendi viam eis præcludat.*

VIII. Igitur statuto quòd Filius sit unius substantiæ cum Patre sicut splendor cum luce, jam ruit Arii machina, Filium esse creaturam, de bono in malum arbitrio mutabilem, perfectè non nosse Patrem, non naturam sed voluntate Filium dici. Nam si ejusdem

cum Patre substantiæ est, æquè ac ille Deus est, essentialiter bonus imò ipsa bonitas, ipsa sapientia, quâ ipse Pater Deus, bonus, immutabilis, sapiens & naturâ non voluntate Pater est. In Christo etiam debuisset Arius distinguere id quod Filii Dei, & id quod Filii hominis: id quod Divinitatis; & id quod infirmitatis erat. Hæc enim in se Christus ipse distinxit. Cum enim dixit Joan. 16. v. 27. *à Deo exivi*. Joan. 14. v. 10. *Ego in Patre & Pater in me*. Joan. 10. v. 30. *Ego & Pater unum sumus*. Et Joan. 14. v. 9. *Qui videt me videt & Patrem*, se esse Filium Dei & eandem Patre habere Divinitatem manifestavit. Cum verò Joan. 14. v. 28. dixit: *Vado ad Patrem, quia Pater major me est*. Jo. 5. v. 30. *Non quero voluntatem meam, sed voluntatem ejus qui misit me*. Lucæ 22. v. 42. *Non mea voluntas sed tua fiat*. Et Matth. 20. v. 23. *Non est meum dare vobis, sed quibus paratum est à Patre*, & alia ejusmodi; se Filium esse hominis ostendit; & secundum hoc diversam à Patre potentiam & voluntatem, quemadmodum & naturam, se habere. Hæc si Arius distinguere & non confundere voluisset, à tot blasphemiiis abstinuisset.

IX. In duobus Scripturæ textibus se triumphare putabat Arius. Unum erat ex Proverb. 8. v. 22. ubi Sapientia de se dicit: *Dominus creavit me in initio viarum suarum*. Ex quo inferebat, Sapientiam Patris idest Dei Filium non esse genitum sed creatum. Alterum ex Joan. 17. v. 3. ubi Christus ait: *Hæc est vita æterna, ut cognoscant te solum Deum verum*. Ergo aiebat ex ipsius Christi confessione solus Pater est verus Deus.

X. Sed prior textus suâ spontè ruit: in Hebræo enim non legitur *creavit*, sed *possedit*, vel *habuit me*. Sic etiam habet Vulgata: *Dominus possedit me in initio viarum suarum antequam quidquam faceret à principio*. *Ab æterno ordinata sum* &c. Vox autem *possedit me* in Scripturis idem sonat ac *genuit*. Unde Gen. 4. v. 1. Eva de Cain à se concepto & nato ait: *Possedi hominem per Deum*. Sumitur etiam pro eodem ac *habuit*. Et ita de se intellexit Christus ipse Jo. 17. v. 5. dum ait: *Clarifica me tu Pater claritate quam habui priusquam mundus esset apud te*.

XI. Alter verò textus minùs Arium juvat. Dum enim Christus dicit: *Hæc est vita æterna, ut cognoscant te solum Deum verum*, non excludit Filium & Spiritum Sanctum, quorum una & eadem cum Patre Deitas sicut una natura est; sed pluralitatem Deorum, qualem Pagani admittebant. Unde Epiphanius Hæres. 69. n. 32. Dei Filium ita esse locutum dicit: *Ne scilicet Deorum fingi turba posset, ne vitalis cognitionis divortium ullum fieret. Nam si Pater solus verus Deus est, verus est etiam ex Patre Filius ab eodem re verâ geni-*

genitus. Cùm enim Patri deservit eumque solum verum Deum esse declarat, se ipsum quoque verum à Patre genitum esse monstravit. Quocirca verus Pater Deus est, verus Deus & Unigenitus Filius. Et hoc ipsa Christi verba demonstrant. Ubi enim ait ad Patrem *Ut cognoscant te solum Deum verum*, adjecit: *Et quem misisti Jesum Christum*. Unde S. August. Tract. 105. super Joann. Ordo, inquit, verborum est, „ Ut te & quem misisti Jesum Christum cognoscant solum verum Deum „, consequenter enim & Spiritus Sanctus intelligitur, quia Spiritus est Patris & Filii, tamquam caritas consubstantialis amborum.

XII. Arius tamen his contradicet (& hic secundus ejus error est) qui sicut Filium creaturam Patris esse dixit, ita Spiritum Sanctum creaturam Filii asseruit. Hoc errore laboravit etiam Macedonius contra quem inferius sermo erit. Nunc contra Arium dicam: Quòd si, ut probatum est, Filius Dei, quia à Deo procedit, estque Verbum ipsius, verus Deus habendus est, ita & Spiritus Sanctus, quia à Patre & Filio procedit, ac utriusque Spiritus est: ut sic confurgat perfecta Trinitas, nimirum tres Personæ in Deitate subsistentes & unus Deus juxta illud 1. Joan. 5. v. 7. *Tres sunt qui testimonium dant in Cælo, Pater, Verbum, & Spiritus Sanctus: & hi tres unum sunt*. Unde cùm Dominus de vocatione Gentium loqueretur, intra unum Divinitatis nomen Patrem & Filium & Spiritum Sanctum prædicans: *Euntes*, inquit, *docete omnes gentes baptizantes eos in nomine Patris & Filii & Spiritus Sancti*. Ubi in nomine dixit non in nominibus, ut in Trinitate Personarum unitatem essentiae demonstraret: & Joannes supra relatus ait & *hi tres unum sunt*, non *unus sunt*, ut cum unitate essentiae pluralitatem personarum adversus Sabellium ostenderet.

XIII. Porro quòd Spiritus Sanctus sit Deus, non creatura aut servus Filii, contra Arium ostendo. Nam sicut omnia quæ facit Pater, facit & Filius, ita & Spiritus Sanctus facit. Hoc Victor Vitenſis L. 3. de Perf. Wandalica ex variis Scripturæ locis probat, deinde num. 21. sic discurret: *Si de Patre procedit Spiritus Sanctus, si liberat, si Dominus est, & sanctificat, si creat cum Patre & Filio & vivificat: si præscientiam habet cum Patre & Filio, si ubique est & implet omnia, si habitat in electis, si arguit mundum & judicat, si bonus & rectus est, si de eo clamatur*, „ Hæc dicit Spiritus Sanctus „, *si Prophetas constituit, si Apostolos mittit, si Episcopos præficit, si consolator est, si cuncta dispensat ut vult, si abluit & justificat, si tentatores suos interficit, si is qui eum blasphemaverit non habet remissionem neque in hoc seculo, neque in futuro, quod utique Deo proprium est: Hæc cùm ita sint, cur de eo dubitatur, quòd Deus sit*, cūm

cum cum operum magnitudo, quod est ipse, manifestet? Non utique alienus est à Patris & Filii maiestate, qui non est ab operum virtute alienus. Frustra illi nomen Divinitatis negatur, cuius potestas non potest abnegari. Frustra prohibeor Eum cum Patre & Filio venerari, quem exigo cum Patre & Filio confiteri. Hæc & alia pro Divinitate Spiritus Sancti Victor Vitenfis.

XIV. Vigilus etiam Tapsensis L. 12. de Trinitate in Arianos, qui Spiritum Sanctum Filii servum esse dicebant, assumit Paulum dicentem 2. Cor. 3. v. 17. *Dominus verò Spiritus est, & ubi Spiritus Domini, ibi libertas.* Et Rom. 8. v. 2. *Lex autem Spiritus vitæ in Christo Jesu liberavit me à lege peccati & mortis.* Indè sic eos redarguit: *Quomodo ergo ausi estis Spiritum Sanctum servum dicere, qui creaturam liberavit?* Et rursus ex illo Roman. 8. v. 15. *Non enim accepistis spiritum servitutis iterum in timore, sed accepistis spiritum adoptionis filiorum, in quo clamamus Abba, Pater.* Ait: *Itaque nec servus nec creatus Spiritus Sanctus esse docetur. Sed vos & creatum & servum eum esse infamatis, cum non solum liber sit, sed & creatura libertatem largiatur, sicut superius probavimus. Et rursum Paulus scribit (1. Cor. 12. v. 4.) „Divisiones autem donorum sunt, idem verò Spiritus „. Et (vers. 11.) „Omnia autem hæc operatur unus & idem Spiritus, dividens singulis prout vult „. Et Jesus ait „ Spiritus ubi vult spirat „. *Si autem facit quod vult, jam non est servus, sed liber.* Ita Vigilus quæ ad præsens sufficiant.*

XV. Tertius Arianus, seu Arianorum, error is erat, quod dicerent, Verbum in Christo solam carnem allumissè non animam. De hoc S. Augustinus L. de Hæres. cap. 49. ait: *In eo autem quod Christum sine anima solam carnem suscepisse arbitrantur, minus noti sunt. Nec adversus eos ab aliquo inveni de hac re aliquando fuisse certatum. Sed hoc verum esse & Epiphanius non tacuit, & ego ex eorum quibusdam scriptis & collocationibus certissime comperi.*

De facto autem S. Epiphanius Hæres. 69. num. 49. de Arianis, inquit: *At isti negant animam illum assumpsisse.* Quem errorem eis quoque tribuit S. Thomas 3. p. q. 5. art. 3. eosque etiam Apollinarem in hoc secutum fuisse dicit. Hanc tamen positionem subfistere non posse propter tria ostendit; primò quia repugnat auctoritati Scripturæ, in qua Dominus de sua anima facit mentionem Matth. 26. *Tristis est anima mea usque ad mortem;* & Joan. 10. *Potestatem habeo ponendi animam meam.* Sed quia dicebant, verba hæc non propriè & literaliter, sed tropicè & metaphoricè esse intelligenda, sicut verba illa, quibus in Veteri Testamento anima Deo tribuitur Isaia 1. *Calendas vestras & Solemnitates vestras odiovit anima mea:* respondet cum S. August. L. 83. Quæst. q. 80., quod aliud est

est quod prophetice nuntiatur in figuris, aliud quod historicè narratur. In Evangelio autem historicè narratur, quod miratus est Jesus, & iratus & contristatus, & quod esuriit: quæ quidem ita demonstrant, eum veram Animam habuisse, sicut ex hoc quod comedit, & dormivit, & fatigatus est, demonstratur eum habuisse veram carnem. De Deo autem Patre, qui non est factus homo sicut Filius, sicut tropicè dicta sumuntur ea quæ respiciunt corpus, ita & ea quæ animam humanam indicare videntur. Ita respondet etiam Epiphanius loco relato num. 50.

Secundò, præfatus error tollit utilitatem Incarnationis, quæ est liberatio hominis à peccato, quod in anima contrahitur. Unde S. Augustinus (seu Vigilus) Lib. contra Felicianum c. 13. apud S. Th. Cur, inquit, *accepta carne Filius Dei animam omisit? aut innoxiam sciens, medicinæ indigentem esse non credidit? aut à se alienam putans, redemptionis beneficio non donavit? aut insanabilem iudicans, curare nequivit, aut vilem & quæ nullis usibus apta videretur, abiecit?* Horum duo blasphemiam important in Deum. Quomoddò enim diceretur Omnipotens, si curare non potuit desperatam? aut quomoddò omnium Deus, si non ipse fecit animam nostram? Duobus autem aliis; in uno animæ causa nescitur, in altero meritum non tenetur. Aut intelligere causam putandus est anima, qui eam ad accipiendam legem habitu insita rationis instructam, à peccato voluntariæ transgressionis. nititur separare? Aut quomodo ejus generositatem novit, qui ignobilitatis vitio dicit esse despectam? Si originem attendas, pretiosior est anima substantia: si transgressionis culpam propter negligentiam, peior est carne. Ego autem Christum & perfectam Sapientiam dico & scio, & piissimum esse non dubito, quorum primò meliorem & prudentiæ capacem non desepxit: secundò eam, quæ magis fuerat vulnerata suscepit. Ita S. Thomas ex S. Augustino Arianos contundit.

Tertiò, dicit S. Thomas quòd hæc positio est contra ipsam Incarnationis veritatem: caro enim & ceteræ partes hominis per animam speciem sortiuntur. Unde recedente animâ non est os, aut caro, nisi æquivocè, ut patet per Philosophum in 2. de Anima, & 7. Metaphysicorum.

XVI. Sed cur dicitur Joan. 1. *Verbum caro factum est?* Respondet S. Th. ibi ad primum: *Quidd cum dicitur* „ Verbum caro factum est „ *caro ponitur pro toto homine, ac si diceretur* „ Verbum homo factum est „: *sicut & Isaia 40.* „ Videbit omnis caro pariter, quod os Domini loquutum est „. *Ideo autem totus homo per carnem significatur, quia, ut dicitur in auctoritate inducâ (Jo. 1.) per carnem Filius Dei visibilis apparuit; unde subditur* „ Et vidimus

gloriam ejus „ . *Vel idèd , quia ut dicit Augustinus L. 83. Quest. 9. 80. In tota illa unitate susceptionis principale Verbum est , extrema autem atque ultima , caro . Volens itaque Evangelista commendare pro nobis dilectionem humilitatis Dei , Verbum & carnem nominavit , omittens animam , quæ est Verbo inferior , carne præstantior . Rationabile etiam fuit , ut nominaret carnem : quæ propter hoc quòd magis distat à Verbo , minùs assumptibilis videbatur .* Hæc S. Thomas. Conferri possunt quæ dixi Tom. 1. in 3. p. qu. 5. de Natura assumpta Dub. 5. §. 1.

XVII. Quartò : Hymnum glorificationis pervertit Arius . Ubi enim Catholica Ecclesia canere consuevit : *Gloria Patri , & Filio , & Spiritui Sancto* ; ipse suos canere docuit : *Gloria Patri per Filium in Spiritu Sancto* : volens , in ipsis laudibus suum inferere errorem , quo Filium Dei Patris ministrum asserens , significaret gloriam non ipsi Filio deberi , sed soli Patri per Filium .

XVIII. Quintò : Catholicos ab Arianis fuisse rebaptizatos scribit S. Augustinus L. de Hæres. Utrum autem etiam non Catholici rebaptizarentur ab eis , se nescire dicit ; suspicari sortè quis possèt , hoc Arianos fecisse , quia formam Baptismi à Christo præscriptam repudiarent , & loco ejus hanc in Baptismo (ut dicebam in Laude) usurparent *In nomine Patris per Filium in Spiritu Sancto* . At hoc posito , Ariani ad Catholicam fidem venientes , utpotè corruptâ formâ baptizati , rebaptizari debuissent . Quod tamen Epiphanius in Exposit. Fidei Catholicæ ad calcem Panarii posita num. 13. rejicit , quia præter Ecclesiæ consuetudinem , dicens : *Alii qui audaciores sunt , ex Catholicorum partibus privatâ sibi satiatione constat præter Ecclesiæ consuetudinem ac citra Generalis Concilii Decretum , eos qui ab Arianis ad suas partes transeunt , iterum baptizare nibil verentur* . Rebaptizare ergo Arianos consueville crederem , quia Baptismum esse iterabilem putarent , eique ex opere operato vim salutis affixam . Sed jam Arianam hæresim cum ejus auctore & sequacibus apud inferos annuente Domino in æternum sepultam dimittamus . Ejus brevem expositionem unâ cum Catholica Athanasii Confessione exhibet Vigilius Tapsensis L. 11. de Trinitate .



CAPUT XLVI.

De Audæanis seu Anthropomorphitis.

§. I.

*De Audæo, Danæi calumniis, &
Anthropomorphitarum ortu.*

I. **A**UDÆANI seu Audiani, ut eos appellat S. Augustinus Lib. de Hæres. cap. 50. ex Epiphanio Hæres. 70. qui eos Odianos etiam vocat, Audæum sive Audium habuerunt auctorem. Fuit hic natione Syrus è Mesopotamia oriundus & Arii temporibus vicinus vixit. Audæanorum quippe nomen sub Valentiniano Imperatore & Damaso Pontifice circa annum 380. prius innotuit, ac primò quidem sub nomine puri schismatis, quamvis postea falsis dogmatibus additis in hæresim eruperet, ut dicam.

Audæus ergo seu Audius, ut refert Epiphanius num. 1., *Domus clarus in primis fuit propter & vitæ integritatem & Divinæ fidei zelum & ardorem. Qui cum sæpè nonnulla videret, quæ in Ecclesiis perperam geruntur, Episcopos ac Presbyteros coram increpare ac redarguere non verebatur, & identidem monere.... Velut si quem è Clericis pecuniarum plus æquo cupidum videret, Episcopum, aut Presbyterum, aut alium quempiam qui Ecclesiasticis Ordinibus censentur, exprobrare non dubitabat: aut si quispiam luxu ac deliciis difflueret; sive ullam Ecclesiastici dogmatis, ac disciplina partem adulterando corrumpere, patienti nequaquam ferens animo, verbis, ut dixi castigabat. Quod quidem dissolutioris vitæ hominibus molestum erat: unde maximas propterea contumelias sustinuit, infestis omnium vocibus & odiis exagitatus.... Qui nihilominus ista sustinens, sed ad veritatem perseverandam acrius intentus, studebat interim ab Ecclesia Catholica conjunctione ac societate minimè divelli. Verùm cum ipse cum suis vapularet, & indigna pateretur, his malis ingemiscens, ex harum calamitatum & contumeliarum violentia consilium cepit. Quare se ipsum ab Ecclesia segregavit: atque ita pluribus cum illo desciscensibus, novum ab eo divortium conflatum. His causam & originem schismatis Audæi describit Epiphanius. Qui postea Audæum in schismate ab Episcopo suæ factionis in Episcopum fuisse ordinatum num. 2. refert.*

II. Hæc quæ de Audæo narrat Epiphanius in suæ causæ pa-

trocinium trahens Lambertus Danæus cap. 50. de more extollit, & ait „ Nimia jam Episcoporum Christianorum in ipsum gregem „ Domini insolentia, & in vivendi more & genere superbia, luxus, otium, pompa, opes, & lautitia, quibus vir ille, & merito quidem, ut Epiphanius scribit, offensus sæpè eos coram „ acerbè increpavit. Quamobrem illis invisus, & convitiis impetebatur, & ut austerior Prælatorumque Ecclesiæ calumniabatur: tandem pugnis etiam ab iis cæsus, & vi ex ejus Ecclesiæ, „ cui præerant tales Episcopi, cœtu ejectus, novum sibi cœtum colligere coactus est. Nec verò nimius ille Episcoporum factus, nimixque divitiæ hunc solum, qui duræ illi ac monasticæ vitæ assuetus erat, offendit: sed postea quoque Mahumetem „ ipsum tam superbas suo seculo Episcoporum (qui se Christianos appellabant) aulas cernentem, ita à Fide Christiana avertit, „ ut de nova religione, in qua pastores simpliciori genere uterentur, cogitarit, quemadmodum illius temporis historici scribunt. „ Quid igitur si Romanæ Curix splendorem, si Cardinalium luxum, qualis hodie est, vidisset? „ Ita impudentissimus iste, ut suum ac suorum Pseudo-Reformatorum ab Ecclesia Catholica secessionem aliquo justo titulo coloret, non solum Audæi, sed Mahumetis defensam suscipit.

III. Hæc arte suam ab Ecclesia secessionem tueri ac tegere conabantur olim Donatistæ, asserentes eam in suis Pastoribus apostatasse, & eorum pravis moribus fuisse corruptam, quos passim refellit S. Augustinus. Verius tamen in Mahumete, quàm in Audæo suæ ab Ecclesia secessionis ideam agnoscere debuisset Danæus. Audæus enim impotenti severioris disciplinæ, quam in aliquibus Ecclesiasticis laxatam videbat, zelo adactus, ab Ecclesia secessit, ac vitam severam cælibem & asperam transegit. At non sic prætenso Reformationis parens Lutherus, & ejus quotquot fuere & modò sunt gregales, contra quorundam Ecclesiasticorum mores oblatrare non desinunt, & ideò se ab eorum cœtu recessisse cum Audæanis dictitant. At tantum abest, ut severioris restituendæ disciplinæ causâ cum Audæanis id fecerint, quin potius cum Mahumete omni Ecclesiasticâ disciplinâ, & Canonibus eam præcipientibus contemptis, jejunia, cælibatum, & alias austeritates à suis cœtibus perpetuò exulare fecerunt. Lutherus, qui in Monasterio cælebs degebat, factus Reformator Monasterium reliquit, & ne quid sacrilegio deesset, Monialem à Deo abstractam in uxorem duxit. Imò ut nec in hoc à Mahumete dissentiret, viro, cujus exsaturandæ libidini una uxor satis non esset, aliam concessit, ut Philippo Langravio ex suorum Atheologorum consulto concessisse

fiſſe conſtat. Ita qui in oculis aliorum feſtucas vident & damnant, in oculis ſuis trabes habent & non vident.

IV. Omnes tamen præſati meritò ab Eccleſia Catholica damnati ſunt. Si enim in aliquibus corruptos mores intuebantur, in hoc eos certè non imitari debuiffent, ſed cur ab eorum cœtu propterea reſilire? Numquid quod Presbyteri vel Epifcopi malè faciebant, faciendum ab aliis proponebant? Etiam Scribæ & Phariſæi mores Legi parum conſonos gerebant: quia tamen ex cathedra Moyſis Legem docebant, non dixit Chriſtus Turbis, ut ab eorum conſortio recederent; ſed Matth. 23. v. 3. ait: *Omnia ergo quæcumque dixerint vobis ſervate & facite, ſecundùm opera verò eorum nolite facere; dicunt enim & non faciunt.* Ita Chriſtus, qui à Patre miſus fuerat ad omnium ſalutem. At Audæum, Lutherum & alios, ad corrigendos aliquorum de Eccleſia mores, quis miſerat? Audæus homo laicus, &, ut Danæus putat, ſimplex Monachus, Lutherus item homo clauſtralis ad reformandos Presbyteros Epifcopos Eccleſiam totam, quem titulum præferebant? Zelus hic non fuit, ſed prætextus arrogantix plenus & phariſæicæ propago doctrinæ. Nam & illi animarum & corporum medicum accuſabant in Templo, dicentes Apoſtolis Marci 2. v. 16. *Quare cum Publicanis & peccatoribus manducat Magiſter veſter?* De talibus per Eſaiam 65. v. 5. dicit Dominus: *Qui dicunt manduſum ſum, nolite tangere, iſti ſumus erunt in furore meo, ignis ardens totâ die.*

V. Præſtat hic audire Epiphanium, qui Hæref. 70. num. 15. quamvis de Audianis ſua ætate adhuc vigentibus dicat, quòd fides eorum eſſet integra moresque caſtiſſimi, & plerique eorum arctiorem in Monaſteriis vitam colerent, & Audæus eorum auctor Gothorum plurimos ad Chriſtianam fidem convertiſſet: ex eo tamen quòd ab Eccleſia ſe ſeparaviſſent, & rejecto Chriſtianorum nomine ſe Audianos vocari vellent, hoc ſolo nomine ut hereticos habendos eſſe cenſet: *Eſt hoc verò, inquit, horrendum, Chriſtianorum commutare nomen, qui in Sancta Eccleſia cenſentur, quæ ſolâ Chriſti, & Chriſtianorum appellatione contenta adſcitiſſimum omne nomen reſpuit. Pro illo, inquam, nomine Audianos appellari, coitiones inter ſe facere, ac teſſeram meri hominis nomine inſcriptam exigere. Hæc inquam, minimè ferenda ſunt, quamvis aliquin integerrimus fit hominum ille conventus, atque omni ſe probitate juſtitiaque cenditet.* Si ergo Epiphanius Audianos vitam moresque innoxios, ac ſevcrioris diſciplinæ rigorem ſervantes hoc ſolo damnat quòd ſeparati ab Eccleſia coitiones facerent, & neglecto Chriſtianorum nomine Audianos ſe vocari vellent: quid diceret de noſtræ ætatis Proteſtantibus, qui omni vitæ aſteritate ac lege contemptâ in
omni

omni laxitate ut sibi placet viventes, & sejuncti ab Ecclesia conventus suos non sub Christiano, sed vel Lutheranò, vel Calviniano nomine celebrant, se non jam Christianos vel Catholicos sed Lutheranos & Calvinianos esse gloriantes? Non latet, aliquos ex istis modò se Lutheranos & Calvinistas appellari crubescere, sed Evangelicos se vocitare; At cum Evangelium suo privato iudicio accommodent, non Christi Evangelium sequuntur, sed suum, quod sibi confingunt. Sed hos dimittamus.

VI. Redeundo igitur ad Audæum, de quo Epiphan. num. 14. hæc refert: *Caterum idem ille senex Audius in Scythiam ab Imperatore relegatus est; quod populos passim ab Ecclesia obsequio retraheret, cum eo nomine ab Episcopis esset ad Imperatorem delatus. Cumque in ea regione versaretur (quot autem annis ibidem vixerit certò asseverare non possumus) in interiora Gothicæ penetrans, barbaros multos Christianæ Religionis rudimentis instituit. Ex quo Monasteria in Gothia nonnulla propagata sunt, in quibus religiosa vivendi ratio & virginitas, arctissimaque disciplina floruit.* Ita Epiphanius.

Deinde num. 15. profectitur: *Post illius verò mortem ad eundem illum cætum adhasere complures Episcopi: sed in primis Uranius in Mesopotamia. Quin etiam ex ipsa Gothia sibi aliquos adjunxit, & Episcopus constituit. Præter quos etiam Silvanus, & alii quidam extiterunt, è quibus nonnulli mortui sunt, & inter alios Uranius qui se in illa turba præ cæteris efferebat.*

Verùm post Uranii ac Silvani in Gothia Episcopi mortem, plerisque ab ea factione abstractis, ad paucos illorum conventus redactis est, atque in Chalcide, quæ ad Antiocbiam sita est, & ad Euphratem resedit. Nam è Gothia plerique pulsi sunt nã cum aliis communionis nostræ Christianis: cum ab Rege quodam Gentili ingens esset ac vehementius concitata persecutio, quam Romanorum præsertim odio commoverat, quod Romanos Imperatores Christianos esse videret: unde Christianum omne nomen illinc exterminari voluit. Verùm radix sapientie, aut fidei satus non deficit. Et quamquam impulsu fugatique Christiani omnes videantur, nonnulli tamen adhuc supersunt. Neque enim fidei fons arefcere penitus potest. Quocirca multi ex Audianis Gothiæ ac Provinciis nostris egressi, & ad Euphratis regiones illos præfetti, quartum jam annum illic habitant. Ad hæc è Tauro monte ac Palestina & Arabia eorundem Audianorum Monasteria sublata sunt. Olim quippe magnoperè diffusi propagatique fuerant. Hodie verò tam hominum, quàm Monasteriorum paucissimo numero sunt: adeò ut duobus duntaxat in pagis domicilium habeant in ea quam dixi Provinciâ, hoc est exteriore Chalcidis limite ultra Damasculum & Mesopotamiam, ubi ad hoc tempus perexigua illorum multitudo degit:

Ita

Ita Audianorum Secta referente Epiphanio paulatim extincta est. Veritas autem Catholica inter persecutiones magis effulset, effulget, ac semper effulgebit, & fortior stabit.

VII. Ex Audianis ortos fuisse Anthropomorphitas, censet S. Augustinus Lib. de Hæres. cap. 50. *Audianos, quos appellant (& Epiphanius schismaticos non hæreticos vult videri) alii vocant Anthropomorphitas, quoniam Deum sibi fingunt cogitatione carnali in similitudinem imaginis corruptibilis hominis, quod rusticitati eorum tribuit Epiphanius, parcens eis ne dicantur hæretici.* Quibus S. Augustinus tuetur Epiphanium, quòd dixerit, Audianos seu Anthropomorphitas non fuisse hæreticos: hoc enim dixit; non quia existimaret, Deum sibi fingere corporeum hæresim non esse: sed quia cum Audiani ab initio, vel qui suo tempore extabant, non ex pertinacia, sed ex mera rusticitate ac simplicitate id assererent, errabant quidem, & idèd Epiphanius eos redarguit, sed ut hæretici habendi non erant.

VIII. Quare cum Baronio, & Petavio meritò dicit Natalis Alexandre in Hist. Seculi 4. cap. 6. art. 28. cavendos esse illos Scriptores, qui referunt, Epiphanium Anthropomorphitane doctrinæ initio adhæsisse, & à Theophilo errorem edoctum, eidem propterea favisse, atque Origenem damnasæ. Fallunt enim aut falluntur Scriptores illi, dum Origeni plus æquo dediti, eam viro sanctissimo calumniam aspergunt, quam Catholicis Origenistæ vulgò imponere consueverant, quòd nimirum ab illis Deus corporeus fingeretur. Nam ab omni hac invidiâ Epiphanium sublevat S. Hieronymus Ep. 61. (modò 38.) ad Pammachium contra Jo. Jerosolym. Ejusdem cum laude meminere Theophilus Alexandrinus Epist. 67. inter Hieronymianas, Facundus Hermianensis Lib. 4. cap. 2.; & ut dixi, & ostendam, ipsemet se purgat dum Audianos de hoc errore reprehendit.

IX. Sub nomine Anthropomorphitarum seu Vadianorum. Audiani prodierunt (ut scribit Prateolus) tempore Theodosii Magni, qui cum Arcadio & Honorio tribus annis Imperium tenuit, & Siricii Romani Pontificis anno 395. in partibus Ægypti. Revi-
xit hæc hæresis sub Henrico I. qui Auceps appellabatur, & Joanne XII. Rom. Antistite, qui Agapeto successit anno 954. idque in Patavina Provincia, infelici tamen successu. Nam Bracherius Veronensis Episcopus vir doctus & pius, ceterique comprovinciales Episcopi eidem hæresi forti animo occurrentes, eam tandem exterminarunt.

X. Lambertus Danaus, qui nil intactum, quo Catholicos feri-
riat, onittit, ait. Ex hac hæresi, inducendarum in Christiano-
rum

rum Templâ Imaginum, post deinde cultus earum instituendi
 „ primum fundamentum videtur esse ortum. Nam postquam
 „ Deus ipse ad hominis similitudinem corporeus fingi cœpit, ta-
 „ les Imagines honestæ quoque & pie habitæ sunt, tamquam per
 „ eas Dei ipsius forma repræsentaretur. Post Dei Imaginem
 „ Martyrum quoque & Apostolorum imagines induci cœptæ
 „ sunt & colæ. Quem errorem uni maximè Monachi foverunt &
 „ disseminarunt, ut apparet ex actis Nicenæ Synodi secundæ, ubi
 „ pro Imaginibus & earum cultu acerrima moverunt illi certa-
 „ mina „. Hæc Danaus pro Iconomachorum hæresi tacitè pu-
 „ gnans; qui tamen non dicit, quòd post acrem discussionem in
 Nicenâ II. Synodo de hoc habitam, Imaginum Sacrarum usus &
 cultus, fuit à Synodo approbatus, & postea qui illum improbarant
 ab universâ Ecclesiâ Catholica heretici habiti sunt, & tales ha-
 bentur Evangelici hodierni, qui in hoc Judæis potiùs & Mahume-
 tanis adjungi malunt, quàm Ecclesiæ Christi. Sed de hoc egi in
 Vera Ecclesiâ Tom. 2. p. 2. art. 16.

Solum dicam ex Prateolo de Iconoclastis „ Imagines Judæi
 „ non ferunt, uti nec Zuingliani nec Calviniani, quemadmodum
 „ Synagoga Genève loquitur nullam omnino habens Turcico
 „ more ullius rei imaginem. Hæc Lindanus. Et Staphylus de
 „ Lutheranorum inter se concordia. Iconoclastæ, inquit, sunt,
 „ qui Christi omniumque Sanctorum Imagines è Templis eji-
 „ ciunt, suas autem & uxorum suarum effigies elegantissimè &
 „ amatorie depictas reponunt: sicuti quondam fecit Simon Ma-
 „ gus, & pellex ipsius Helena, ut Nicephorus testatur. Idem
 „ nostri Evangelici Prophetæ faciunt, ut exempla eorum testan-
 „ tur. Hæc Staphylus „. Sed his omittis ad Audianorum &
 Anthropomorphitarum refutandos errores transeamus,

§. II.

Audianorum & Anthropomorphitarum errores rejecti.

I. **P**Ræcipuus istorum error fuit, quòd de Deo sicut de homine
 cogitabant, Deum esse corporeum & membra ad formam
 humani corporis habere effutientes. Movebantur ad hoc primò:
 Cum enim scriptum sit Genes. 1. v. 26. *Faciamus hominem ad imagi-
 nem & similitudinem nostram*, statim illud subjicitur, Deum sumto
 de terra pulvere hominem fabricasse. Cum igitur hominem de
 terra formatum asserat, vides totum illud è terra conflatum veris-
 simè hominem dici. Ita apud Epiphanium num. 2.

Secundò, quia Scriptura manus oculos aures pedes Deo tribuit. Manus quidem Job. c. 10. v. 8. *Manus tua fecerunt me.* Isaia 41. v. 20. *Manus Domini fecit hoc.* Et c. 61. v. 2. *Omnia hæc manus mea fecit.* Oculos & aures Psalm. 9. v. 23. *Oculi Domini in pauperem respiciunt;* & Psalm. 33. v. 16. *Oculi Domini super justos,* & *Aures ejus in preces eorum.* Pedes, Isaia 66. v. 1. *Calum sedes mea, terra autem scabellum Pedum meorum.* Gen. 3. v. 8. de Adam Eva, *Cum audissent vocem Domini Dei Deambulantis in Paradiso ad auram post meridiem:* Deus ergo ut homo loquitur & deambulat.

Tertiò, quia talem exhibuit Isaïas quidem c. 6. v. 1. *Sedentem super solium excelsum & elevatum:* Daniel c. 7. v. 9. ubi Deum describens: *Vestimentum ejus, inquit, quasi nix, & capilli capitis ejus quasi lana munda, thronus ejus quasi ignis* &c. Qui ergo sedet, qui habet capillos capitis, vestimenta, nunquid non habebit corpus?

II. Attamen Deus, si Deus est, nec corpus est, nec corpus habere potest; unde si ad similitudinem Dei tactus est homo, hoc secundum corpus esse non potest. *Nam* (inquit Epiphanius Har. 70. num. 5.) *quis fieri potest, ut quod aspectabile est ei simile sit quod videri non potest? aut corporeum corporis experti? aut quod contrahere potest ei quod apprehendi nequit?* Præterea nos anteriora dumtaxat oculis nostris cernimus, quæ ponere sunt ignoramus. Penes Deum autem neque affectio ulla, neque defectus est: sed undecumque lumen est, undecumque oculus, undecumque gloria. *Spiritus enim Deus est, qui omnem Spiritum exuperat, & lux luce omni præstantior.* His Epiphanius purgatur à nævo, ut supra, ei à quibusdam imposito, quòd asserentibus Deum corporeum esse aliquandiu consenserit.

III. Ulteriùs veritas hæc probatur, tum quia si Deus corporeus esset, & formam haberet humanam, figuram haberet, & sic terminò concluderetur: figura enim certis limitibus circumscribitur: at Deus qui infinitus est nullo potest limite concludi, nec loco contineri: excelsior enim Cælo est: *Magnitudinis ejus non est finis* (Psalm. 144. v. 3.) quòd si magnitudinis ejus non est finis; ergo nulla erit illius figura. Rursùs si corporeus est Deus, & membra habet ut homo: ergo non est totus ubique, sed pars ejus in uno loco, & pars alia in alio; & ita erit per partes & loca divisus. Præterea dici debebit, quòd sit compositus, nec ea quæ in eo sunt infinitæ sint perfectionis: omnis enim pars minor est suo toto, nec manus est quod est oculus. Qualis ergo erit Deus? Sed de hoc alibi dictum est, nempe Tom. 2. in 1. p. Qu. 3. Dub. 1.

IV. Ad primum Anthropomorphitarum fundamentum ex dictis patet, hominem non esse factum ad similitudinem Dei secundum

dum corpus. In quo autem hæc Dei Imago in homine sit, variè aliqui sunt locuti. Quidam eam posuerunt in virtute & innocentia vitæ: quidam in Baptismo. Sed utroque rejicit Epiphanius n. 5. Nam ex primis sequitur, hominem suâ virtute imaginem Dei sibi acquirere & per peccatum delere, & proinde Adam post peccatum imaginem Dei perdidisse quod falsum est. Ex secundo pariter sequitur, qui Baptismum non suscipere non gerere in se imaginem Dei; & Infideles, imò Abraham, Isaac, Prophetas, quia non baptizatos Dei imagine carere & caruisse. Quæ omnia absurda sunt.

V. Dicendum est ergo, hominem esse factum ad Imaginem & similitudinem Dei, secundum quam homo rationis compos est, & capax dominii super alia animantia, ac proinde post illa verba *faciamus* &c. subdidit Deus Gen. 1. v. 26. *Et præstet piscibus maris, & volatilibus cæli & bestiis, universæque terræ* &c. Homo autem sine anima horum capax non est, imò nec homo est. Unde non cum de limo terræ Deus formavit corpus formavit hominem, sed cum corpori formato inspiravit spiraculum vitæ. Tunc enim dicitur: *& factus est homo in animam viventem* Gen. 2. v. 7. Homo enim non ex corpore solo, sed ex corpore & anima constare debet. Vide S. Thomam 1. p. q. 93. art. 6. Scio ab Epiphanio hoc non probari num. 4. cum Deus animam in infinitum excedat. Verum hoc evincit quidem, hominem secundum animam non esse imaginem Dei univocam, sic enim solus Dei Unigenitus Filius imago Dei est; sed non analogam: *Non quia ipse essentialiter sit imago: sed quia in eo Dei est imago impressa secundum mentem, sicut denarius dicitur imago Caesaris, inquantum habet Caesaris imaginem.* Ita S. Th. dicto art. 6. ad 1. Et art. 1. ejusdem quæst. 93. ad 2. *Primogenitus*, inquit, *omnis creaturæ est Imago Dei perfecta perfecte implens illud, cujus imago est. Homo verò & propter similitudinem dicitur imago, & propter imperfectionem similitudinis dicitur ad imaginem. Et quia similitudo perfecta Dei non potest esse nisi in identitate naturæ, imago Dei est in Filio suo Primogenito, sicut imago Regis in filio sibi conaturali: in homine autem sicut in aliena naturæ, sicut imago Regis in nummo argenteo, ut patet per Augustinum L. de decem chordis cap. 8. It a S. Th. qui art. 6. in corp. addit: Quod cum in omnibus creaturis sit aliquis Dei similitudo, in sola creatura rationali invenitur similitudo Dei per modum imaginis, ut supra dictum est, in aliis autem creaturis per modum vestigii.* Plura de hoc apud S. Doctorem videri possunt.

VI. Alterum Anthropomorphitarum fundamentum procedit ex nimia eorum stoliditate, quâ literaliter intelligere volunt ea, quæ solum tropicè & metaphoricè ad captum nostrum de Deo in
Scri-

Scripturis dicuntur ; ut enim docet S. Th. 1. p. q. 3. art. 1. ad 1. *Sacra Scriptura tradit nobis spiritualia & Divina sub similitudinibus corporalium : unde cum trinam dimensionem Deo attribuit, sub similitudine quantitatis corporeæ quantitatem virtuales ipsius designat : utpotè per profunditatem virtutem ad cognoscendum occulta, per altitudinem excellentiam virtutis super omnia, per longitudinem durationem sui esse, per latitudinem affectum dilectionis ad omnia.* Unde ait ad 3. *Oculus de Deo dictus significat virtutem ejus ad videndum modo intelligibili, non sensibili.* Sicut, inquit ad 4. *dicitur sedens propter suam immobilitatem & auctoritatem, & stans propter suam fortitudinem ad debellandum omne quod adversatur.* Ad Deum (ait ad 5.) *non acceditur passibus corporalibus, cum ubique sit, sed affectibus mentis, & eodem modo ab eo receditur.* Sic deambulasse ad auram dicitur commiserans Adami lapsum & Evæ ; vox autem Domini quam audierunt fuit conscientie vox eos de transgressione arguentis. Sed in his tempus terere non vacat. A Prophetis autem visus fuisse dicitur, non in se, sed in aliqua similitudine, ut ipsi placuit.

VII. Secundo errabant Audiani, quia Pascha cum Judæis, hoc est tempore quo Judæi Azyma sua peragunt celebrare volebant. Ita refert Epiphanius num. 9. Cum vero eis objiciebatur hoc esse contra Decretum Nicæni Concilii, respondebant aliqui : *A Constantini temporibus, ut Imperatoris rationem haberetis, paternam in celebrando Paschate consuetudinem reliquistis, diemque commutastis, ut vos ad Imperatoris nutum accommodaretis.* Quidam etiam pervercius definiunt, & cum natalis inquit Constantini celebraretur, Paschatis rationem immutastis. Verum (ait Epiphanius) *si eadem quot annis die Pascha representaretur, in eaque celebrandum esse statuisset illa Synodus à Constantino collecta, probabilis istorum esset oratio.* Nunc cum annis singulis non eadem temporum series putativoque respondeat, inanis est ista ratio. Non enim ob natalem suum, sed ad Ecclesiam conciliandam ei rei studium Imperator adhibuit. Quia vero suam sententiam Apostolicis Constitutionibus consonam esse jactitabant, ostendit Epiphanius num. 10., quod Liber ille etsi dubie sit auctoritatis, eis tamen non suffragatur. Sed de hac controversia supra Cap. 25. de Quartodecimanis satis egi.

VIII. Tertiò. Qui Theodoriti temporibus supererant Audiani, se remissionem peccatorum dare jactitabant. Duas enim in partes Libros sacros & adulterinos dividentes, & ordine hinc inde collocantes, inter hos jubebant unumquemque transire, & peccata sua confiteri: deinde confessis dabant veniam, tempus ad poenitentiam secundum Ecclesie Leges non præscribentes, sed potestate

condonantes. Cum autem scirent qui sic transibant, ludum esse quod agebatur, vera graviaque peccata celabant. Ita refert Theodoritus Lib. 4. Hæc. Fab. cap. 10. Hic error irridendus potius est, quam confutandus.

IX. Quartò. Tenebras ignem & aquam æterna & ingeniata esse Audæum dixisse, ibidem Theodoritus refert: sed ex vago rumore hoc se accepisse significat. Hoc si verum est, ex Manicheorum lacuna Audæum expiscatum fuisse dici debet; de quibus supra.

X. Quintò. Estò (ut dicit Epiphanius num. 2.) de Trinitate, nempe de Patre, Filio, & Spiritu Sancto benè sentirent: cum tamen Deum sibi fingerent corporeum, difficile creditu est, quòd tantum Mysterium ut Fides Catholica docet, & absque errore, explicare possent. Vel enim unum corpus cum triplici appellatione ponebant, & sic cum Sabellio errabant; vel tria esse corpora asseriebant, & hoc posito, quomodo Consubstantialitatem in eis tueri possent, fateor me ignorare.

XI. Sextum errorem Danæus illis affingit, quem ipsiusmet verbis placet describere. De Audianis ergo ait, „Propter hominum vitia cœtum Orthodoxæ Ecclesiæ deserunt. Quod Donatistarum erroris fuit postea seminarium. Quamquam enim, „Episcoporum, inter quos sana tamen manebat adhuc Christi „Evangelique doctrina, vitia luxus & fastus damnandi erant: „& fœnora Christianorum, & concubinatus calibum detestandus „(propter quæ crimina primum, & meritò invecus est in sui „seculi Ecclesias Audæus) cœtus tamen ipse piorum, ubi retinebatur adhuc orthodoxa veritas, non fuit scindendus. „Si ergo juxta Danæum error est propter vitia, luxum, fastum Episcoporum ab Orthodoxa se separare; quomodo Lutherus ceterique post ipsum Sectarii titulo reformandæ Ecclesiæ Orthodoxæ ab ea secesserunt, & adhuc ab ea extorres persistunt?

Dicet, se separasse, non propter defectum Orthodoxorum in moribus, sed propter defectum etiam à Fide Catholica, quem in ea observarunt. At suorum scripta à Luthero usque ad præsens, Ecclesiæ Catholicæ Romanæ mores ac disciplinam maledictis continuo impetentia, contrarium evincunt. Scio, titulo reformandæ etiam doctrinæ, quam jactabant in Papatu corruptam, suam secessionem munire solitos esse. Sed doctrinam verè corruptam non esse eam quam ex Patribus acceptam Romana Ecclesia profitetur; benè quidem eam quam in suos cœtus ipsi invexerunt, & ut hæreticam ab Ecclesia antiqua damnatam, satis ostendi in Vera Ecclesia; & demonstrant Libri, qui ex eorum schola, maxime Socinianorum,

norum & Deistarum in dies prodeunt, in quibus præcipua Christianæ & Evangelicæ Religionis myſteria funditus everſa cum horrore leguntur: adeò ut de ipſis, quod Danaus de Audianis, concludi meritò poſſit „ Quòd non tantum contra veterem Eccleſiæ „ diſciplinam agant, ſed ipſa Dei dona ſanctiſſima, & ſacra-
 „ tiſſima profanant. Atque ex his apparet, ut abyſſus abyſſum im-
 „ pellat, & qui primùm leviter peccare videbantur, dum carita-
 „ tis Chriſtianæ normam non ſequuntur, graviter & in pluribus
 „ quidem impeggerint, fideique naufragium fecerint „. Hæc quæ
 Danaus de Audianis dicit, an in ipſum ac ſuos retorqueri poſſint,
 pius Lector judicet.

CAPUT XLVII.

De Semiarianis, & Acacianis, ac voce Homouſion.

§. I.

Qui & à quo fuerint.

I. **A**RIANA Secta progreſſu temporis in tres factiones diviſa eſt. Prima fuit eorum, qui primigeniam Arii blaſphemiam rigorosè propugnabant, quam poſtea Aetius, & Eunomius amplexi novis erroribus auxerunt. Hi in Conciliabulo Antiocheno anno 360. coactò formulam fidei conſcripſerunt, in qua Filium Dei Patri per omnia diſſimilem declararunt. Quibus inter cæteros ſubſcripſit etiam Acacius Cæſaræ in Palæſtina Episcopuſ, teſte Sozomeno L. 4. c. 12., quamvis tunc propriam factionem nondum manifeſtaret, nec Arianas blaſphemias palam propugnaret, Semiarianis potiùs communicans. De eo enim Epiphaniuſ Hæref. 73. num. 23. *Acaciuſ, inquit, cum ſuis neque Conſubſtantialem fatebatur eſſe Filium, neque creaturam ex cæterarum ordine ac numero. Et quamvis eadem cum aliis ſentirent, ſuam tamen opinionem diſſimulabant, ac tempori ſervientes, creatura nomen ſilentio præteribant, cùm interim nihil ab Arianiſ diſſiderent.*

II. Altera factio Semiarianorum fuit, qui vocem *Homouſion* rejiciebant, & Filium Patri minime Conſubſtantialem eſſe, ſed per omnia ſimilem, adeoque *Car' Viſan* dicebant, & *Homouſion*, quod editis fidei formulis (ſeu anathematismiſ) in Ancyrana Synodo anno 358., quas refert S. Hilariuſ Lib. de Synodiſ, declararunt. Horum quartuſ ſic conceptuſ erat: *Si quiſ audiens hoc: Quomodo Pater habet vitam in ſemetipſo, ſic dedit & Filio habere vitam in ſe-*

femetipso, similem non dicat etiam Filium Patri juxta essentiam, anathema sit. Septimus: Si quis Patrem & Filium credere se promittens, Patrem dissimilis essentiae dicat, sed similis efficaciae, quasi profanas & novas voces contra essentiam Filii loquens, & interimus verum Filium Dei esse, anathema sit. Alios insuper ediderunt, quibus anathematizant eos qui non in Essentia, sed solâ potestate, similem Patri, qui Patrem tempore anteriorem, Filium juniorem dicunt, quos & alios refert Epiphanius Hæres. 73. n. 11. At in ultimo apertè damnant eum qui dixerit, Filium Homiusion esse Patri his verbis: Si quis Patrem potestate simul & substantiâ Filii Patrem asserens, Consubstantialem, vel ejusdem cum Patre substantiæ Filium esse dicat, anathema sit. Semiariani ergo Filium Patri in Essentia quidem similem esse fatebantur, sed Consubstantialem & ejusdem substantiæ cum Patre negabant. Hos anathematismos ad Constantium Sirmii tunc agentem miserunt, quos cum accepisset, secundam formulam Sirmientem solemnî edicto reprobavit.

Hujus Sectæ principes fuere Basilus Ancyranus, Georgius Laodicæus; qui ab Arianis se separantes Filium Dei specie tenus creaturam esse negabant, re verâ tamen creaturam se corde retinentes Patri similem & Homiusion dicebant, sed ejusdem substantiæ cum illo esse refragabantur. De Spiritu Sancto verò eadem cum puris Arianis sentiebant. Ita Epiphanius Hæres. 73. num. 1. his verbis: *Neque verò tergiversando, aut hesitando quemadmodum in Filio; quem cum absolute creaturam pronuntiare non audeant, etsi id omnino sentiant, nihilominus hominum existimationem veriti vocem illam Homiusion obtrudunt, & creaturam ab cæterarum conditione diversam esse definiunt: cum de Spiritu Sancto, inquam, agitur, non timide ac dissidenter, sed rabidorum canum more toto impetu feruntur, & Creaturam esse sine ulla cunctatione docent, & à Patre ac Filio abalienare conantur.* Hæc Epiphanius, qui in testimonium assert per extensum Basilii, & Georgii Epistolas in Pseudo-Synodo Ancyrana exaratas.

III. Tertia Arianae Sectæ factio fuit Acacianorum, quæ auctorem habuit Acacium in Episcopatu Cæsariensi Eusebio Pamphili successorem. Monoculus seu cocles fuisse fertur: sic qui veræ fidei lumen amiserat, æquum erat, ut & lumine diminutus esset etiam in corpore. Propterea simulans aliquandiu incescit, nec uni nec alteri parti se adungere exterius demonstrans: Tandem odio in Cyrillum Jerosolymitanum percitus ob Metropoliticae dignitatis jura, quam in Cæsariensi Præsule non satis revereri Cyrillus videbatur, Nicæno fretus Canone, quo singularis Jerosolymitanæ Sedi prærogativa concessa fuerat, venenum quod corde
reti-

retinebat Acacius effudit . Propterea in Pſeudo-Synodo Conſtantinopolitana, ut refert Sozomenus L. 4. c. 24. & 25., Cyrillum cum aliis depoſuerunt . Sed prius in ejuſdem furfuris Synodo Seleucia congregata, de qua idem Sozomenus cap. 21., Acacius cum ſuis ſtatuit *Homœouſion* & *Homœuſion* tamquam voces à Scripturis alienas, & quæ multos turbarent, rejici oportere, *Anomœon* verò eſſe condemnandum, & ſimilem Patri Filium conſtitendum. Quibus nec Filium Conſubſtantialem Patri, ut prædicabant Catholici: non alienum & diſſimilem ut Ariani, & Eunomiani, non ſimilem in ſubſtantia ut Semiariani, ſed alio modo, puta in accidentibus & figura ſimilem, ut ſtatim dicam ex Epiphanio, aſſerebant.

IV. Sic ergo Epiphanius Hæref. 73. num. 23. & 24. *Seleucia*, inquit, *quæ aſpera dicitur, in Iſauria Conſtantii Imperatoris juſſu congregati aliam fidei formulam proponunt, non qualem Patres olim in Nicæna Synodo orthodoxam ac præclaram inſtituerant: ſed callidè ac ſcilè, ſimulatâ tamen ſimplicitate, hunc in modum conſcripſerunt:* „ Credimus in unum Deum Patrem Omnipotentem &c. & in Filium Dei &c. „ ſimpliciter, ac nihil vehementius elocuti. Poſtea verò totam ut fabulam agerent, addiderunt „ Conſubſtantiale rejicimus, tamquam à Sacris Literis alienum. Iſtud verò damnamus Diſſimilem eſſe Patri Filium „. Atque hæc demum erat callidiſſimorum venatorum illecebra. Sic enim inter ſe muſſitabant, ac docebant: *Creatura quidem eſt Dei Filius, ſed ſimilis Patri, eo videlicet ſenſu, qui omnium hominum uſu ac conſuetudine familiaris eſt. Etenim plaſta ſtatuas effingunt, ac ſimulacra ex auro, argento, aliâve materiâ, aut coloribus in ligno exprimunt, quæ ſimilitudinem habent illa quidem, exemplaribus verò ſuis nullo modo ſunt equalia. Sic ab illis callidè quidem excogitatum eſt hujusmodi, ut Filium Patri ſimilem ſaterentur, licet nihil in ipſo paternæ Divinitatis iueſſet. Hæc illorum Decreta nonnulli qui cum ipſis erant, partim propter temporis calamitatem approbaverunt; & verò magna ex parte conſcii ac ſanctores erant: quidam tamen inſcii & imprudentes abrepti ſunt, ut paulò poſt apparuit. Hactenus Epiphanius.*

V. Et quidem ſiquis Fidei expoſitionem ab Acacio cum ſuis in Seleuciensi Conciliabulo editam (quam integram idem Epiphanius num. 25. ſubjicit) inſcius fraudis in ea latentis ſecundum verba ſpectaſſet, eam ut Catholicam approbaſſet. In ea enim ita de Filio Dei loquebatur: *Credimus etiam in Dominum noſtrum Jeſum Chriſtum Filium Dei ab ipſo genitum citra paſſionem ullam ante omnia ſecula, Deum Verbum, Deum de Deo, unigenitum, lucem, vitam, veritatem, ſapientiam, virtutem, per quem omnia facta ſunt, quæ in Cælis, quæ in terra ſunt, ſive viſibilia ſive inviſibilia.* Quis hæc

hæc legens ut Catholicæ fidei Nicænæ consona non statim approbaretr' cùm tamen in sensu Acacianorum secundùm similitudinem & figuram latenter acciperentur. Hinc factum fuisse putarim, quòd, ut refert Prateolus V. *Acacius*, ab aliquibus an fuerit re verà hæreticus, dubitatum olim fuerit. Cùm tamen à Felice & Gelasio Romanis Pontificibus Acacius tamquam hæreticus & in hæresi mortuus post mortem excommunicatus fuerit, de hoc dubitandum non est.

§. II.

Semiarianorum & Acacianorum errores rejecti.

IN referendis & refutandis istorum erroribus parùm immorabor. In quo enim erraverint §. præcedente explicatum est, & errores eorum ab erroribus Arianorum parùm distantes eisdem quibus illi ferè argumentis profligantur.

Dum enim Semiariani ponebant Filium Dei non esse extraneæ naturæ, sed similis cum Patre, & negabant, eum esse Consubstantialem & ejusdem substantiæ cum illo: vel volebant Filium esse similem in substantia cum Patre similitudine univocâ & specificâ sicut in humanis filius similis est Patri, quia licet non habeat eandem numero naturam quam Pater, habet tamen eandem speciem, cum uterque sit homo: Vel volebant Filium Dei esse similem in substantia Patri, non quia naturâ substantiam Patris ac Divinitatem haberet, sed tantùm voluntate Patris, qui eam illi participaverit, & sic Divinitatem habuerit non per naturam ut Pater, sed per gratiam Patris.

Si primum dicebant: Ergo sicut Pater & filius in humanis, quia non habent eandem naturam numero, sed solum specie, sunt duo homines, non unus homo: ita Pater & Filius in Divinis erunt duo Dii, non unus Deus: & consequenter Natura Divina fiet numero multiplicabilis, sicut natura humana; quod est contra essentiam veri Dei, qui unus omninò est, aliàs Deus non est: unde plures Deos ponere idem est ac nullum Deum ponere. Hunc errorem prævenit Christus cum ait Joan. 10. v. 30. *Ego & Pater unum sumus*. Dicendo enim *Unum* docuit se unitate Essentiæ unum esse cum Patre contra Arianos: dicendo *sumus* docuit se distinctum esse à Patre in Persona contra Sabellianos. Et eadem ratione Filius est quidem *alius* à Patre non tamen *aliud*; quia ut docet S. Thomas 1. p. q. 31. art. 2. ad 4. *Neutrum genus est informe, masculinum autem est formatum, & similiter femininum. Et ideo convenienter per neutrum genus significatur Essentia communis, per masculinum*

linum autem & femininum aliquod suppositum determinatum in communi natura. Unde etiam in rebus humanis, si queratur: Quis est iste? Respondetur, Sortes, quod nomen est suppositi. Si autem queratur: Quid est iste? Respondetur, animal rationale & mortale. Et ideo quia in Divinis distinctio est secundum personas, non autem secundum essentiam, dicitur, quod Pater est alius à Filio, sed non aliud, & è converso dicimus, quod sunt unum, sed non unus.

II. Quod si (uti re verâ ponebant dum consubstantiali Patri Filium esse negabant) dicant, Filium esse similem in substantia cum Patre, non naturâ sed voluntate, contra eos sic arguam. Ergo Filium non per omnia similem Patri in substantia dicitis: nam Pater substantiam Dei habet naturâ & à se: Filius autem habet eam ex voluntate Patris, cui placuit eam Filio impertiri. Hoc loquendi modo vobis contradicitis, dum ex una parte Filium in omnibus Patri similem asserere fatemini, ex alia Filium Dei creaturam esse negatis, & tamen creaturam esse, dum non naturâ sed voluntate Filium dicitis. Quomodo potestis Filium Deo Patri in voluntate & operatione similem pronuntiare, nisi eum dicatis, eadem quâ Pater substantiâ & essentiâ potiri, ac in eadem subsistere, cum nemo possit Dei voluntatem & operationem habere, nisi essentiam Dei habeat & naturam? Dicam ergo cum Epiphanio num. 22. *Si ex animi vestri sententia similem in omnibus esse Patri Filium statuatis, damnate illos anathemate, qui similitudinis discrimen agnoscunt: atque ita scribitote: Si quis non in omnibus similem esse Patri dixerit, quemadmodum Patri similis est Filius: sed voluntate similem, substantiâ dissimilem esse dixerit, anathema sit. Præterea: Si Substantiæ nomen commemorare contra aliquos vestrum vultis, non voluntate modo, sed & quoad esse ipsum attinet ac substantiam & existentiam, atque in omnibus similem esse Patri Filium asserite, quemadmodum similis est Patri Filius, uti Sacra Literæ testantur.*

III. Idem Acacianis dicam, qui verbo tenus Filium creaturam esse negantes eum Patris Imaginem assererebant. Sed dum illum ex dictis imaginem Patris esse musitabant eo modo quo statua vel pictura imago est ejus quem repræsentat, nihil nisi umbratile Filio tribuebant, & minus quàm rationalibus creaturis, quæ ad imaginem Dei esse dicuntur, non solum quia Deum velut statua repræsentant, sed quia ulterius Dei operationes suo modo participant, ac imitantur. Quamquam nec isti quoque inter se constantes fuere, sed veluti naves polari sidere amissæ, omni vento huc illucque circumferebantur, ac mutatis fidei confessionibus, de errore in errorem prolabentes veritatis portum numquam asse-

quebantur. Sic Babelicæ Turris ædificatores imitati eâdem quâ illi pœna dispersi sunt. Cùm enim de Trinitatis fide universa Ecclesia esset labii unius & sermonum eorundem, venerunt Ariani & dixerunt: *Faciamus turrim cujus culmen pertingat ad Cælum & celebremus nomen nostrum.* At Deus unitatis ac veritatis fidei suæ defensor: *Descendamus*, inquit, & *confundamus ibi linguam eorum, ut non audiat unusquisque vocem proximi sui* (Genes. 11.) Ita Arianos & universas hæreses dispersit ac disperdet Deus.

IV. Sed priusquam Babelicos istos architectos in confusionem dimittam, sustine Lector, ut eos ex Epiphanio Hæres. 73. n. 36. ita conveniam: *Dicite igitur, obsecro vos, quid tantoperè molestum vobis est ac grave Filium Patri Consubstantialem asserere? Velim hoc mihi ingenuè apertèque fateamini, ut vos non alienos à nobis, sed germanos esse cognoscamus. Potest enim & æs auro, & argento stannum, & ferro plumbum similis esse substantiæ. Sed nos vestra illa perperam excogitata & fraudulentè conficta commenta non sument. Nam si, ut in errorem aliquos impellatis, inanes species commentitiasque queritis, & Consubstantialem propterea vocari non oportere defenditis, ne Filium cum Patre & Spiritum Sanctum cum utroque confundamus, ne hac quidem in parte possunt mendacia vestra consilere. Non enim simul substantialem, sed Consubstantialem dicimus: ne aliquid diversum à Patre profiteamur, sed Deum ex Deo verè genitum, non aliud, nec ex nihilo, sed à Patre suè tempore & initio, & inexplicabili quâdam ratione productum ac genitum, qui semper cum Patre fuerit, nec esse quandoque desinat. Genitum porro, non germanum fratrem, non avum. Nam hac particula Con hypostasies duas, nec alienas naturâ significat. Unde & veritatis velut nexus ac vinculum non sinè Sancti Spiritus afflatu, per illorum orâ, qui primi authores fuerunt, est in ea voce constitutum. Vides igitur, nullum jam tibi colorem aut speciem esse reliquam: neque adversus orthodoxam fidem meritò posse contendere, vel eos perturbare, qui falsum illud tuum à te decretam, ac sermonem acceperint. Si quis Consubstantiale usurpare velit, confusionem quamdam in Divinitate confiteri. Neque enim ampliùs istud objicere potes. Quippe Consubstantialis illa vox duos quosdam significat, eademque baud alienam à Patre sobolem esse demonstrat.*

Tu verò Homoeousion, hoc est substantiâ simile, commentus, primum ipso Ulxæ, hoc est substantiæ vocabulo refelleris. Deinde tua te illa discrepans, nec consentanea professio condemnat, cùm non ea dicas quæ sentias, sed quæ sentis falsò ac mendaciter doceas. Etenim si ab ipso Patre non est omnino Filius, sed nihilominus similis est, à veritate plurimùm aberras. Nam quacumque demum ex materia quilibet ex-

prcf-

pressum alicujus simulacrum ornare voluerit, numquam illud cum exemplari ipso adæquare poterit. Est enim structura atque affectionis opus illud. Quod autem ab aliquo gignitur, id ipsum ad id unde gignitur germanitatis similem & æqualem formam retinet. Quamobrem si ab ipso Patre non est genitus, & extra ipsum est, licet similitudinem quamdam substantiæ, velut gratificando tribuas, nihil ipsi largiris, sed ab ejus excidisti gratia, Qui enim non honorat Filium sicut honorat Patrem, ira Dei manet in ipsum, (Joan. 5. v. 23. & c. 3. v. 36.) ait Sanctius Apostolus. Item, Exivi à Patre & vado, (Joan. 16. v. 28.) ille ipse nimirum qui dixit (Jo. 14. v. 11.), Ego in Patre, & Pater in me est, Tam illud, Philippe qui videt me, videt & Patrem (ibidem v. 9.), His Epiphanius Semiarianos, & Acacianos perstringit.

V. Ex his omnibus evidenter apparet, Semiarianos malè sensisse de Filio Dei. Unde captu difficile est, quòd Philaster Hæres. 67. dixerit: *Semiariani sunt quoque: bi de Patre & Filio bene sentiunt, unam qualitatis substantiam, unam Divinitatem esse credentes. Spiritum autem non de Divina substantia, nec Deum verum, sed factum atque creatum Spiritum prædicantes, ut eum conjungant & comparent creaturæ. In hoc secundo verum dicit. Nam de Spiritu Sancto impiè loquebantur, puram creaturam cum Macedonianis (de quibus infra) ipsum facientes. At Semiarianos rectè de Patre & Filio sensisse, ut Philaster scribit, nemo præter ipsum dixit. Nisi fortè dicatur, Philastrium sub hoc nomine Macedonianos intellexisse, vel si de Semiarianis locutus fuit, de aliquibus locutum fuisse, qui errorem suum Catholicis fraudulenter tegentes, adeò magnificè de Filio Dei loquebantur, ut de illo catholicè sentire viderentur, ut de Acacio supra dixi.*

§. III.

De voce Homousion.

I. **C**ontroversia, quæ inter Catholicos & Arium à dogmate cœpta fuit, post Nicænæ Synodum etiam de vocibus, quibus fides exprimebatur, agitata fuit. Cum enim Nicæni Patres, ut statuerent contra Arium Filium Dei non esse diversæ sed ejusdem Substantiæ vel Essentiæ cum Patre, voce hac græca *Homousion* usi fuissent, quâ latinè exprimebatur Filium esse Patri Consubstantialem: contra hanc vocem tam Ariani quàm Semiariani insurrexerunt. Ariani quidem videntes hanc vocis expressionem suum errorem profligari, eam novitatis reprehendebant,

tamquam in Scripturis Sacris nullibi usurpatam. Semiariani autem qui volebant Filium Dei esse quidem similem Patri, sed non ejusdem substantiæ cum illo, vocem *Homousion* rejicientes, dicebant Filium non esse *Homousion* sed *Homiasion*, seu *Homoeusion*, idest similem Patri. Quod dissidium eò processit, ut non soli Ariani & Semiariani vocem *Homousion* respuerent; sed aliqui etiam qui cum Catholicis in dogmate conveniebant, ab ea voce abstinendum esse fortè sentirent. Duo igitur hic quæram. Unum: an vox *Homousion* appositè ac prudenter Symbolo Nicæno inserta fuerit: Alterum an omnes qui tali voci refragati fuere, ut hæretici habendi sint.

II. Ad primum igitur affirmativè respondeo. Vocabulum enim quod Filium non solum similem Patri, sed ejusdem cum illo omnino Naturæ ac Essentiæ significat, quodque propterea ad explodendam tum Arianam tum Semiarianam hæresim plurimum valet, appositè ac prudenter Symbolo fidei additum est: hujusmodi autem est vocabulum *Homousion*, significat enim Filium non solum similis, sed ejusdem naturæ ac essentiæ esse cum Patre, quod æquè Arianos & Semiarianos confutat. Ergo &c.

Hanc veritatem ostendunt Patres, & primò quidem S. Athanasius. Tum in Epistola de Nicænæ Synodi Decretis, ubi recitat Ariatorum cavillis, quibus veritatem eludere conabantur, subdit: *Ceterum Episcopi consideratæ eorum hypocrisis & vafritie, ipsi quoque necessitate coacti sunt sententiam earum rerum ex Scripturis colligere, & quæ priùs dixerant, apertioribus verbis repetere & scribere Filium Consubstantialem esse Patri, ut non solum similem similitudine, sed eundem eâ voce quâ dicitur esse ex Patre significarent.* Et infra: *In his verbis; ex Patre esse & Consubstantialem esse, vim peremptoriam Patres voluerunt contineri ad elidendas has argutias, Filium creatum aut factum, aut mutabilem esse, aut non fuisse antequam nasceretur.... Quapropter si isti hæc vocabula exotica cavillantur, respiciant sensum, juxta quem Synodus ea in Decretis suis adhiberi voluit: & pro anathemate habcant, quæ Synodus pro anathemate habere voluit, & tunc demum, si possint, culpent.* Tum in Epist. de Synodis Arimini & Seleuciæ, ubi: *To homousion Columnam vel Cip-pam vocat, quo Arianorum impietas proscribitur, ac velut trophæum de ea superata prostrataque statuitur.* In hoc totus est Athanasius ut singula referre nimium prolixum foret.

III. Secundò S. Hilarius Lib. de Synodis: *Inane est, inquit, calumniam verbi perterritescere, ubi res ipsa cujus verbum est non habeat difficultatem. Displicet cuicumque in Synodo Nicæna Homousion esse susceptum? Hoc si cui displicet, necesse est placeat quod ab*
Aria-

Arianis est negatum . Negatum enim idcirco est Homousion , ne ex substantia Dei Patris Dei Filius natus , sed secundum creaturas ex nihilo conditus predicaretur . Nihil novum loquimur : pluribus edita literis ipsa Arianorum perfidia sibi testis est . Si propter negantium impietatem pia tunc fuit intelligentia consentientium : quæro , cur hodie convellatur , quod tam piè susceptum est , quia impiè negabatur ? Si piè susceptum est , cur venit constitutio pietatis in crimen ? Hæc , & alia S. Hilarius . Accedit S. Basilii Magni Epist. 300. ubi de huius vocis additione : Quandoquidem , inquit , est Pater lumen sine principio , lumen verò genitum Filius , lumen & lumen alteruter : Homousion dixerunt non incongruè , ut naturæ æqualem dignitatem demonstrent : non enim quæ ad invicem sunt cognata , sunt ad invicem consubstantialia , id quod nonnemo existimavit . Sed tum cum & causa & causatum ejusdem per omnia naturæ sunt participes . Vox ista & Sabellii impietatem corrigit : tollit enim hypostaseos identitatem , & perfectam personarum intelligentiam introducit . Non aliquid idem est sibi ipsi Homousion , sed alterum alteri . Itaque rectissime & cum pietate conjunctissime hypostaseon dividuntur proprietates , & immutabilitas naturæ inalterabilis representatur .

IV. Accedunt S. Ambrosius Lib. 3. de Fide , S. Gregorius Nazianz. Orat. 49. , S. Augustinus , qui Lib. contra Sermonem Arianorum cap. 36. *Ariani* , inquit , & *Eunomiani* nos vocitant *Homousianos* : quia contra eorum errorem *Homousion* defendimus Patrem & Filium & Spiritum Sanctum : idest unius ejusdemque substantiæ , vel , ut expressius dicatur , *Essentiæ* , quæ *Utiæ* Græcè appellatur : quod planius dicitur , unius ejusdemque *Naturæ* . Et tamen si quis istorum qui nos *Homousianos* vocant , filium suum , non cujus ipse esset , sed diversæ diceret esse naturæ , exhereditari se ab eo mallet filius , quàm hoc putari . Quantâ itaque impietate isti cæcantur , qui cum confiteantur Unigenitum Dei Filium , nolunt ejusdem naturæ cujus Pater est , confiteri , sed diversæ atque imparis , & multis modis rebusque dissimilis , tamquam non de Deo natus , sed ab eo de nihilo sit creatus : ac per hoc & ipse creatura sit , gratiâ Filius , non naturâ . Ecce qui nos quasi maculâ novi nominis vocant *Homousianos* , nec se ipsos cum ista sentiunt intuentur insanos . Ita S. Augustinus . Præterea alios idem sentientes .

V. Audiamus modò Arianos , quid in ista voce *Homousion* eis displiceret . Displicebat primò , quòd ista vox *Homousion* non legatur in Scripturis , sed sit hominum adinventum , & quidem novum . Secundò , quòd olim fuerat in Synodo Antiochena contra Paulum Samosatenum ab Ecclesia damnata , eò quòd multiplicis erroris occasionem daret : Quidam enim *Homousion* nomine unicam

unicam personam intelligebant: alii substantiam Personis priorem, quæ ipsis deinde communicaretur; alii substantiam quæ in tres divisa esset portiones tribus personis adscriptas. Colliguntur hæc ex S. Hilario Lib. de Synodis; ergo hæc vox *Homousion* non est prudenter Symbolo inserta.

IV. Respondeo tamen ad primum. Quòd licet vox *Homousion* expressè & quoad sonum in Sacris Scripturis non legatur; in eis tamen invenitur æquivalenter & quoad sensum. Ita S. Athanasius Lib. de Synodi Nicænæ Decretis, ubi ostendit, redarguendos quidem Arianos, qui novas voces Scripturis contrarias inducentes causam dederunt Patribus Nicænis verum Scripturarum sensum voce *Homousion* explicandi. Propterea allatis Scripturæ textibus, quibus dicitur Filius ex Deo procedens, ex utero ante Luciferum genitus, Ego & Pater unum sumus, Ego in Patre & Pater in me est: cùmque Deus simplex ac indivisibilis sit, infert, idem esse dicere, quòd sit unum cum Patre, quòd sit in illo, ac dicere quòd sit unum & idem in substantia cum illo, ac proinde *Homousios* seu Confubstantialis illi: Quapropter, inquit, cùm quis audit Filium Dei esse ex substantia Dei, ne admiratione ducatur, sed potius approbet recipiatque Patres, qui rei intellectum purius tradidere, & liquidius verbis paribus & idem pollentibus, id dictum ex Deo esse, per has voces, ex substantia Dei esse, expresserunt. Idem enim arbitrati sunt ex Deo esse & ex Substantia Dei esse.

Et Lib. de Synodis Arimini & Seleuciæ Arianos sic ad hominem perstringit: Si penitus excludenda putant vocabula omnia non scripta, cur cùm Arius tantum acervum dictionum, quæ nusquam in Scripturis occurrunt, accumulaverit; quales sunt, „ Ex non extantibus: & Non erat Filius antequam gigneretur: & Erat quando non erat: & Mutabilis est: & Ineffabilis est atque invisibilis Pater suo Filio: & Filius ne suam quidem novit substantiam, „ & cætera quæ in ridiculo impioque suo Commentario Arius evomuit ex opinione sua, non illi contradixerunt?

VII. Præstat audire S. Hilarium, qui in Libro contra ipsum edito ita Constantium alloquitur: Novitates vocum, sed profanas devitari jubet Apostolus. Tu cur pias excludis? Innascibile scriptum numquam legis. Numquid & hoc negandum erit, quia novum est? Decernis similem Patri Filium, Evangelia non predicant. Quid est quòd non refugis hanc vocem? In uno novitas eligitur, in alio submovetur. Ubi impietatis occasio patet, novitas admittitur: ubi autem religionis maxima & sola cautela est, excluditur. S. Gregorium Nazianzenum quoque audire juvat. Is enim Orat. 49. Si dicis mihi, inquit, *Homousion*, quod est unius essentiæ nomen, ob hoc nomi-

minari

minari non oportere, quia in Scripturis Divinis non confineatur: quæro autem, ò homo qui hoc prohibes, utrum idèò nominari non debeat, quia scriptum non est, an quia credi ita non licet? Quid si ita credendum est, cur non ita profitendum? Aut si idèò nominandum non est, quia nec ita credendum; obtinuit Ariana labis assertio.... Frustra times, ò homo, profiteri quod credis: aut frustra credis, si ita non profiteris, & meritò hæreticus denotaris.

VIII. Videndum modò superest, quid in hac voce *Homousion* Arianis secundo displiceat. Quia, inquiunt, vox illa occasionem præbet erroris, & idèò in Synodo Antiochena fuit proscripta. In hoc examinandum cenfeo, an hæc vox *Homousion* sit per se occasio erroris, quia significatum ejus erroneum & contra rectam fidem sit: an verò solùm per accidens sit occasio erroris, non quia suæ significationis vi occasionem errandi præbeat, sed quia ex prava ejus intelligentia aliqui malè intelligentes occasionem errandi sumserint. Porro quòd vox *Homousion* per se & vi suæ significationis occasionem errandi non præbeat, aut errorem non exprimat, sed potiùs Catholicam veritatem significans, Ariano errori jugulum petat, quisquis ab eorum Secta alienus fatebitur; nam hæc vox per se significat, Patrem esse ejusdem essentia & Consubstantialem cum Filio: idèòque duos errores exterminat, & errorem Arii, dum dicit, Filium esse ejusdem substantiæ cum Patre, & errorem Sabellii per vocem *Con*, quæ indicat in eadem substantia non esse unam personam, sed duas.

IX. Remanet igitur ut dicatur, ex hac voce *Homousion* malè intellecta aliquos occasionem sumsisse, eaque abusus esse. Et idèò cum eâ Paulus Samosatenus abuteretur dicens, Christum esse Consubstantialem Patri, cum tamen Christum poneret hominem purum, factum quidem Deum in tempore, sed non naturâ Deum, idèò vocem *Homousion* ut à Samosateno prolatam Antiochena Synodus reprobavit. At contra Nicæni Patres, qui agebant contra Arium ponentem Filium Dei ab æterno creatum non genitum, & proinde diversæ ab illo Essentiæ asserentem, verè ac legitime hac voce usi sunt; & ut omnem ejus fraudem dissiparent, Filium *Homousion*, seu Consubstantialem esse Patri sanxerunt. Utrique ergo justè processerunt: Antiocheni quidem Patres eam in sensu Pauli Samosateni damnantes, Nicæni autem ea in sensu proprio contra Arium utentes: secuti in hoc exemplum Dionysii tum Alexandrini, tum Romani, quorum uterque Filium ex Patris Substantia productum, & Patri Consubstantialem antea dixerat, teste S. Athanasio Lib. de Synodi Nicænæ Decretis.

X. *Quemadmodum* ergo (dicaui cum eodem Athanasio Lib. de Syno-

Synodis Arimini & Seleucia) *Beatus Apostolus in Epistola sua ad Romanos dixit „ Lex spiritualis est, & lex sancta est, & præceptum sanctum, iustum & bonum „; ad Hebræos verò aliter scripsit „ Lex neminem perficit „; itidem & ad Galatas „ In Lege nemo iustificatur „; & ad Timotheum contra „ Legem bonam esse dixit, si quis eâ legitimè utatur „. Neque tamen quis ob id sanctum virum reprehenderit, quasi qui contraria & pugnancia scribat, sed potius eum admiratione prosequatur, quòd tam congruentia pro re nata ad singulos scripta mittat, ut & Romani & alii discerent à litera ad spiritum converti; Hecbræi verò & Galatæ instituerentur, non in Legem, sed in Datorem Legis spem habere. Ita quoque etsi amborum Conciliorum Patres diversimodè de Consubstantiali mentionem fecere, non tamen ea de causa ab illis dissidere debemus, sed illorum mentes scrutari: quod si fecerimus, inveniemus omninò ambas Synodos inter se consentire. Hæc & alia S. Athanasius.*

XI. Non absimili modo loquitur S. Hilarius Lib. de Synodis dicens: *Malè intelligitur Homousion; quid ad me benè intelligentem? Malè Homousion Samosatenus confessus est: sed numquid meliùs Ariani negaverunt? Octoginta Episcopi olim respuerunt: sed trecenti decem & octo nuper receperunt. Et mihi quidem ille numerus sanctus est, in quo Abraham victor regum implorum, ab eo qui æterni Sacerdotii est forma, benedicitur. Illi contra hæreticum improbaverunt: numquid & isti non adversum hæreticum probaverunt? Gravis auctoritas est Veterum; numquid & horum levis sanctitas est? Si contraria invicem senserunt, debemus quasi iudices probare meliora. Si verò & probando & improbando, unum utrique statuerunt, quid benè constituta convellimus? Homousion intelligo ex Deo Deum, non dissimilis essentia, non divisum, sed natum, & ex innascibilis Dei substantia congenitum in Filio, secundum similitudinem unigenitam natiuitatem. Ea me antea intelligentem non mediocriter ad id confirmavit Homousion. Sed malè alius intelligit: damnemus in commune vitiosam intelligentiam, non auferamus fidei securitatem. Synodo Samosatena subscribendum putas, ne secundum Samosatæi intelligentiam quisquam sibi sumat Homousion. Subscribamus & Nicæana Synodo, ne Homousion improbent Ariani. . . . Sed Homousion potest malè intelligi. Constituatur, qualiter possit benè intelligi. Unum atque idem quod sapiamus, pium inter nos esse velimus. Date veniam, fratres, quam frequenter poposci. Ariani non estis: cur negando Homousion censemini Ariani? Ita peroptimè Hilarius.*

XII. Nec dicas, quòd cùm Nicænæ Synodi temporibus adhuc Paulistæ superessent non pauci, consultius fuisset vocem *Homousion* reticere, ne isti ea ad suum pravam sensum detorquentes

existimarent, Nicænos Patres approbasse quod Antiocheni in Paulo damnaverant. Nam præterquam quòd vocis *Homousion* sensus, in quo Patres Nicæni eam protulere, adeò apertè contrarius erat sensui, in quo eam usurpaverat Paulus, & Antiocheni damnaverant, ut nemo, nisi mentis inops posset ei sensum Paulianistarum affingere. Petam. An quia veritas ab aliquo impugnatur, vel in errorem detorquetur, propterea damanda est aut silentio prætereunda? Crux Christi Judæis scandalo erat Gentibus autem stultitia: & tamen Paulus 1. Cor. 1. v. 23. *Nos autem*, inquit, *predicamus Christum crucifixum, Judæis quidem scandalum, Gentibus autem stultitiam*. Plurima sunt S. Scripturæ loca, quibus Hæretici ad prævum sensum trahentes abutuntur. Numquid illa loca expungenda sunt, nec potiùs ad rectum sensum contra illos reducenda?

Audiat iterum Hilarius Lib. de Synodis: *Sed fortè*, inquit, *è contrario dicitur, idcirco improbari oportere, quia vitiosè intelligi solet. Hoc si timemus, deleamus in Apostolo, quod dictum est* (1. ad Tim. 2.) „ *Mediator Dei & hominum homo Christus Jesus* „, *quia ad auctoritatem hæresis suæ Photinus hoc utitur: & non legatur à nobis, quia ab illo malè intelligatur. Pereat quoque ad Philippenfes scripta* [Epistola] *aut igne aut spongiâ, ne in ea Marcion relegat* (cap. 2.) „ *Et habitu repertus ut homo* „, *phantasiam corporis confitens esse, non corpus. Non extet Evangelium Joannis, ne Sabelius dicat* „ *Ego & Pater unum sumus* „. *Neque isti nunc creaturæ prædicatores scriptum habeant* „ *Pater major me est* „. *Neque illi qui dissimilem Patri Filium affirmare volunt, legant* (Lucæ 13.) „ *De die autem & hora nemo scit, neque Angeli in Cælo, neque Filius, nisi Pater solus* „. His & aliis prosequitur Hilarius, ostendens, quòd si delendum est *Homousion*, quia eo aliqui abusi sunt, eadem ratione multa Sacræ Scripturæ loca delenda forent.

XIII. Sed adhuc instabis. Ad statuendum Catholicum dogma de æqualitate Filii cum Patre, satis erat vox *Homousion* seu *Homœousion*, nempe similis substantiæ cum Patre: quare ut Catholicos habuere Athanasius illos qui Filium *Homousion* Patri asserebant, estò *Homousion* esse negarent. Ergo imprudenter Nicæni Patres pro sola voce *Homousion* steterunt, quâ omisâ Catholicum dogma habebatur, & quâ positâ tot in Ecclesia jurgia excitata sunt.

Respondeo negando absolute assumtum. Nam vox *Homousion* seu *Homœousion* seu similis substantiæ, non satis Filii Divinitatem exprimebat. Unde Semiariani, & Acaciani, qui Filium *Homousion* seu Patri similem asserebant, malè de Filii Divinitate sentiebant, ut supra ostendi. Oportuit ergo veram de Filii Divini-

tate fidem eâ voce exprimere, quæ nulli æquivocationi, aut ambiguae interpretationi subesset: & hæc sola erat vox *Homousion*, quæ Filium exprimit ejusdem substantiæ, seu Consubstantialis esse. Quòd verò qui solum *Hominson* fatebantur, adhuc ut Catholici haberentur, dicam

XIV. Hoc est quod secundo loco discutiendum supra proposui. Qua in re qui *Homousion* fateri recusabant, *Homœousion* loco illius statuentes, in duas classes distinguendos censeo. Alii erant, qui idèò *Hominson* respuebant, & solum *Homœousion* admittebant, quia non in sola voce, sed & in dogmate à Catholicis dissentiebant, Divinitatem veram vel Filio eripientes, vel de ea malè sentientes, vel Filium Patri similem negantes ut Ariani, vel similem non in substantiâ, sed solum in voluntate & operatione, profitentes, quales Semiariani erant: & hos ut hæreticos habitos jure fuisse, nemini dubium est. Alii verò erant, qui licet de Filii Divinitate cum Catholicis re verâ sentirent; attamen voce *Homousion* veluti dissensionum causâ rejectâ, solam *Homœousion* admittentes Filium per omnia Patri similem profitebantur: & isti ab Athanasio, Hilario & aliis, non ut hæretici & alieni à fide habebantur. Id constat ex S. Athanasio Lib. de Synodis ubi ait: *Adversus autem eos, qui omnia Synodi scripta recipiunt, de solo autem Consubstantiali ambigunt, non ut adversus inimicos affici nos decet.* Et hoc quia cum eis eadem sententia est, controversia autem de Verbis. Idem sentit S. Hilarius Lib. de Synodis.

XV. Qui S. tamen videns in aliquibus pertinaciam in detestanda voce *Homousion* à Nicæna Synodo probata & Symbolo inserta, & nimium in tuenda *Homœousion* ardorem, saltem à suspitione hæresis eos liberare non audet. Sic enim in eodem Libro ad illos conversus: *Ariani, inquit, non estis: cur negando Homousion censemini Ariani? Sed dices: Movit me cum scandalo Homousii ambiguitas. Iterum audi, oro, sine scandalo & me movit Homœousii nuditas.* Et infra: *Oro vos fratres, adimite suspensionem, secludite occasionem: ut probari possit Homœousion, non improbemus Homousion.*

XVI. Patere, Lector, ut hæc Hilarii verba & monita ad aliquos nostri temporis stimulo caritatis convertam, qui Jansenianos se esse negantes, Decretis tamen contra Jansenium à Summis Pontificibus editis, & ab Ecclesia reverenter susceptis, vel præscriptis formulis, parere ac subscribere refragantur; duriores fortè ac sibi non placentes voces in eis contineri affirmantes, Patere, inquam, ut eis repetam: Janseniani (ut dicitis) non estis; cur refragando Decretis contra Jansenium editis censemini Janseniani?

niani? Sed dicetis: Movit nos quorundam verborum & sententiarum ambiguitas. Audite, oro, movit me, nec sine scandalo tanta animositas. Oro vos, fratres, adimite suspensionem, secludite occasionem: ut probari possit Catholica veritas, vocem Ecclesiæ per Petrum loquentis non improbemus. Faxit Deus.

CAPUT XLVIII.

De Macedonianis.

§. I.

Macedonii conditio, fortuna, hæresis ortus, & damnatio.

I. **M**ACEDONIANA hæresis, Ariana infelix furculus, à Macedonio nomen & errorem accepit: quæ cum partim ex Ariano, partim ex Orthodoxo dogmate conflata fuerit, monstrum potius quam hæresis fuisse videtur, sic enim Epiphanius Hæres. 74. num. 1. de Macedonianis, quos *Pneumatobos* appellat: *Ab his, inquit, Semiarianis & ab Orthodoxis monstrum quoddam, ut ita dicam, bisformium hominum ac semifavorum contra nos excitatum est.* Fuit autem Macedonius artis plumariæ, deinde Diaconus, postea Presbyter Ecclesiæ Constantinopolitanae; qui cum Arianorum partibus faveret, à Synodo Tyria ad Constantium Legatus missus fuit. Mortuo Eusebio, qui è Nicomediensi in Constantinopolitanam Sedem à Constantio, expulso Paulo, intrusus fuerat, Homousiani Paulum iterum sedi suæ præfecerunt. At Ariani Macedonium elegerunt, teste Socrate Lib. 2. cap. 12. Macedonio Constantius & ipse Arianus favit, ac Paulum iterum exulare coegit. Sed cum ob hoc tumultus in populo excitatus fuisset, misit Imperator Præfectum cum militari manu, qui perfidum & adulterum Macedonium in Ecclesiam intruderet: quod absque sæva multorum, qui Paulo favebant, cæde ad tria circiter millia, & centum insuper ac quinquaginta, non fuit executioni mandatum (ex Socrate L. 2. c. 16.)

II. *Post tam præclara facinora (prosequitur Socrates) Macedonius, perinde quasi nihil mali gessisset, sed integer vacuusque esset ab omni culpa, à Præfeto veriùs, quam per Ecclesiasticam regulam in Episcopali sede constituitur. In hunc modum Macedonius & Ariani per tot tantæque hominum cædes Ecclesiæ potiti sunt. Hæc viâ Macedonius Episcopatu potitus, Constantii patrocinio fretus, bellum in Pauli fautores & Catholicos tale excitavit, quale à Tyrannis*

gerebatur. Ira Socrates Lib. 2. cap. 27. *Pellebantur*, inquit, *non modò ab Ecclesijs, verùm etiam ex Civitatibus quicumque Consubstantialis fidem asseriebant. Et initio quidem id unum agebant, ut eos expellerent. Postea verò progrediente ulterius malo ad id se vertebant, ut communicare sibi etiam invitos cogerent, parùm scilicet de Ecclesijs solliciti. Eratque ea vis nibilo minor illà, quam olim adhibuerant hi, qui Christianos ad simulacrorum cultum adigebant. Quippe verba ac tormenta & omnis generis cruciatus admovebantur. Alii bonorum conscriptione, alii exilio multati sunt. Et hi quidem in ipsis cruciatibus interierunt, illi verò dum ad exilium abducerentur, necati sunt. Et hæc quidem per omnes urbes Orientalis Imperis gerebantur, maximè verò Constantinopoli. Sic Macedonius tanquam lupus in ovile Christi irrumpens, tanquam lupus rapiebat ac dispergebat oves.*

. III. Non diù tamen res feliciter ei cessit. Cùm enim Constantio Imperatore inconsulto, magnâ populi multitudine reclamante, ausus esset cadaver Constantini ex Apostolorum Ecclesia in aliam transferre, atque hoc gravis seditionis, & multarum cædium causa extitisset, Constantius ipse in parentis sui contumeliam hoc factum ratus, ac proinde in Macedonium exasperatus, in Conciliabulo Constantinopolitano eum Episcopatu abdicari iussit. Atque ita, cujus favore injustè evectus, ejusdem furore justè dejectus fuit. Alias ejus abdicationis causas assert Socrates Lib. 2. cap. 42. nempe, *tum quòd plurimarum cædium auctor fuisset; tum quòd Diaconum in fornicatione deprehensum ad communionem admiserat.* Hæc Macedonii depositio contigit anno Christi 359. eique successus est Eudoxius Antiochenus, ut ex Sozomeno Lib. 4. cap. 26. qui refert etiam quòd *Macedonius Constantinopolitanâ spoliatus Ecclesiâ, in locum quemdam juxta urbis Regiæ portas se recepit, ibique extremum diem obiit.*

. IV. In ordinem ergo redactus Macedonius, antequam obiret, suæ hæresi condendæ totum se dedit, ac Arii doctrinâ ex parte ejuratâ propriam adjunctis sibi fociis, ac ovinam pellem induens spargere cœpit: cui multum profuere Eleusius, & Eustathius, qui parem cum illo depositionis sortem sortiti fuerant, & Marathonius quidam, qui ex Quæstore cum illis Monachi habitum amplexus, opibus quibus affluebat multos in suum errorem traxit, ut Macedonii sectatores ab aliquibus Marathoniani appellarentur. Audiamus Sozomenum citatum Lib. 4. c. 27. qui & hæresis hujus initium, & primos progressus ita describit, „ Postquam enim Macedonius Constantinopolitanâ exutus est Ecclesiâ, non amplius „ eandem cum Acacio, & Eudoxio opinionem (Semiarianam)

„ tenuit : Docebat enim , Filium quidem Deum esse , per omnia
 „ similem Patri , adeoque secundum substantiam ; Spiritum verò
 „ Sanctum ejusdem honoris & dignitatis expertem esse asserbat :
 „ famulum ac ministrum eum appellans , & quæcumque alia quif-
 „ piam de Angelis dicens non aberraverit .

„ Eandem cum illo opinionem amplexi sunt Eleusius & Eu-
 „ stathius , & reliqui omnes , qui eo tempore à contrariæ senten-
 „ tiæ assertoribus depositi fuerant Constantinopoli . Quibus haud
 „ exigua pars populi adhæsit , tam Constantinopoli , quàm per
 „ Thraciam , Bithyniam , & Hellespontum , finitimasque Provin-
 „ cias . Nam vivendi ratio , quam vulgus potissimum spectare
 „ solet , haudquaquam in illis culpanda erat . Etenim in cessus
 „ quidem eorum gravis , disciplina verò monasticæ similis fuit .
 „ Ad hæc sermo non inveniustus , & ingenium ad persuadendum
 „ accommodatum . Cujusmodi tunc fuisse dicitur Marathionius :
 „ qui ex rationario publico officii Præfecturæ Prætorianæ , cum
 „ opes maximas sibi comparasset , finitâ militiâ agrorum ac pau-
 „ perum sub eodem tecto degentium curam gessit . Postea verò
 „ suasu Eustathii Sebastii Episcopi monasticam amplexus est vi-
 „ tam , & sodalitium Monachorum instituit Constantinopoli ,
 „ quod ad nostram usque ætatem continuâ successionem perseve-
 „ ravit .

„ Hanc porro hæresim tum studio , tum opibus suis tanto-
 „ perè adjuvit , ut Sectatores Macedonii à quibusdam Maratho-
 „ niani appellentur , nec immeritò , ut equidem cenfeo . Hic
 „ enim solus unâ cum sodalibus suis perfecisse videtur , ne hæc
 „ hæresis Constantinopoli penitus extingueretur . Etenim ex quo
 „ depositus fuerat Macedonius , nec Ecclesias deinceps , nec Epi-
 „ scopos ullos habuerunt Macedoniani , usque ad Principatum
 „ Arcadii . Quippè Ariani id nequaquam sinebant , à quibus
 „ omnes , qui contraria ipsis sentirent , extrudebantur Ecclesiis ,
 „ & gravibus suppliciis afficiebantur . Hæc Sozomenus de ortu
 „ & initis hujus hæresis , seu veriùs monstri ad modum centauri ,
 „ vel satyri , aliquid de Catholica veritate aliquid de Ariano errore
 „ participantis .

V. Advertit hic cap. 52. Lambertus Danaus , Macedonium
 hunc Hæresiarcham distinguendum esse ab alio Macedonio pariter
 Constantinopolitano Episcopo , sed posteriore , qui floruit , fuitque
 vir pius sub Leone seniore Imperatore anno à Christo passio 484. &
 à Christo nato 517. & Gangris exulavit propter Orthodoxam Fi-
 dem . Et addit , Macedonium hæreticum depositum & in exilium
 actum circa locum qui Pylæ dicuntur , consensuisse , ibique debitas
 suæ

suæ impietatis poenas luisse; ac refert ex Theodorito L. 2. Hist. c. 5. curasse, ut Paulus, quem ab Episcopatu Constantinopolitano perfidè dejecerat, Cucuzi, ubi exulabat, strangularetur. Hoc confirmat Socrates L. 2. c. 26., & Sozomenus L. 4. c. 2. tamquam rem ad sua usque tempora famâ vulgatam.

VI. Macedoniana hæresis sub hoc nomine in apertum prodiit, non anno à Christo passò 312. & à Christo nato 345. sub Julio I. Pontifice & Constantio Imperatore, ut vult Danæus, sed anno à Christo nato 360. Liberio Pontifice, & Constantio Imperante, quamvis aliqui putent, eam sub specialis Sectæ specie, non nisi post Constantii obitum apparuisse. Præter Macedonium auctorem, qui tunc inter vivos adhuc fuisse creditur, promulgatores habuit, ut supra, Eleusium, Eustathium & Manethonium & Presbyteros multos, Episcopos verò paucos. Varia fuit ejus sors, malè enim audiebat tum apud Catholicos tum apud Arianos, quamvis inter utrosque se statueret mediam. At quia Arianì in Oriente potentiores eos insectabantur, quòd cum Homousianis de Patre & Filio communicarent idemque sentirent, hinc fiebat, ut pro opportunitate modò Homousion de Patre & Filio, modò Homiusion seu Homæouision profiterentur. De quo videri potest Socrates Lib. 3. cap. 10.

In Synodo Lampfaci, quæ urbs est in Helleſponto, anno 365. sub Valente congregata, hæresim suam variis Decretis Macedoniani confirmarunt; ideoque in Helleſponto latè propagata est. Sed & in Phrygia diù vigit. Nam etiam sub Arcadio Synadæ, quæ est urbs Phrygiæ, persistebat: persistit adhuc apud illos, licet non sub hoc nomine in eis, qui Arianismi labe infecti sunt.

VII. Statim ac hujus hæresis nomen ac error insonuit, damnatus fuit à Synodo Alexandrina post reditum S. Athanasii anno 362. celebrata, ut constet ex illius Epistola Synodica, quæ est apud ipsum Athanasium, ad Antiochenos scripta. Secundò proscripta fuit in Synodo Illyrici anno 367. ut apparet ex ejus Epist. Synodica ad Orientales, quæ profitentur, *Sanctam Trinitatem Consubstantialem esse, & Deum Patrem cum Filio & Spiritu Sancto sanctificari & glorificari: & Patrem in Filio existere, & Filium in Patre, unum cum Spiritu Sancto in omnem æternitatem*. Damnata est tertio in Synodo Romana à Damaso paulò post celebrata, ut constet ex Epistola ad Episcopos Illyrici ab eodem datâ, quæ extat apud Theodorum Lib. 2. Hist. cap. 22., in qua *Spiritum Sanctum unam eandemque cum Patre & Filio substantiam & substantiam habere, assertitur*. Quarto damnata fuit cum suo auctore in altera Synodo Romana, quam idem Damasus contra Apollinarem habuit, ex qua

qua ad Paulinum Episcopum Antiochenum Epistolam scripsit, quam apud Theodorum L. 2. Hist. c. 11. legere est. In ea enim nominatim feriuntur anathemate Macedoniani his verbis: *Anathematizamus Macedonianos, qui de Arij stirpe venientes, non perfidiam mutaverunt sed nomen. Et infra speciales Anathematismi in eos proferuntur, nempe: Si quis dixerit, Spiritum Sanctum facturam, aut per Filium factum, anathema sit.... Si quis non dixerit Patris & Filii & Spiritus Sancti unam Divinitatem, potestatem, majestatem, potentiam, unam gloriam, dominationem, unum regnum, atque unam voluntatem ac veritatem, anathema sit.... Si quis non dixerit, Spiritum Sanctum adorandum ab omni creatura, sicut & Filium & Patrem, anathema sit.*

VIII. Proscripta tandem fuit ab universa Ecclesia anno Christi 381. Damasi Pontificis 15. Theodosio seniore Imperante in Concilio Œcumenico II. & Constantinopolitano I., in quo à centum quinquaginta Episcopis fides Nicæna plenè fuit confirmata, & Macedoniana unà cum aliis sui similibus ad inferos amandata. Ad hoc Concilium vocatum fuisse Macedonium ipsum, cui tamen adversam valetudinem causatus adesse noluit, Danæus putat, asserens Sozomenum testem Lib. 2. Hist. cap. 39. Sed præterquam quòd in citato loco id invenire mihi non contigit; inverisimile, cenfeo eo anno 381., quo præfatum Concilium celebratum fuit, adhuc inter vivos Macedonium extitisse, imò nec Sozomeno ipsi consentaneum. Qui cum Lib. 4. Hist. cap. 26. dicat, quod *Macedonius Constantinopolitanâ spoliatus Ecclesiâ in locum quemdam juxta urbis Regiæ portas se recepit; ibique extremum diem obiit*, indicat, eum post depositionem parvo tempore superstitem fuisse. Licet autem postea suam hæresim conflaverit & publicam fecerit: cum tamen depositus fuerit anno 359., & anno 381. Concilium Constantinopolitanum fuerit convocatum, dato quòd aliquot annis supervixerit, credibile tamen non est, cum ad tempora Concilii vitam protraxisse, ut ad illud vocari potuerit: maxime quia nulla ejus in historiis impofterum mentio fit.

§. I I.

Macedonii error refutatus.

I. Pro asstruenda Spiritus Sancti Divinitate aliqua dixi cap. 45. contra Arianos §. 5. num. 13. cum omnia quæ de solo Deo dicuntur, de Spiritu Sancto quoque in Scripturis asserantur; quibus sequentiæ addam. Primò, S. Petrus Act. 5. ubi arguit Ananiam,

niam, quòd fraudando de pretio agri mentitus sit Spiritui Sancto; mox cui mentitus sit declarans, ait v.4. *Non es mentitus hominibus, sed Deo*. Ex quibus colligunt Spiritum Sanctum esse Deum S. Basilii Lib. 5. contra Eunomium, & Lib. de Spiritu Sancto cap. 16., S. Greg. Nazianzenus Orat. 37., S. Ambrosius Lib. 1. de Spiritu Sancto c. 4. & L. 3. c. 10., S. Epiphanius Hæres. 74. quæ est contra Pneumatomachos (idest Spiritus Sancti hostes) num. 6., S. Augustinus Lib. 3. contra Maximinum cap. 21. & alii.

II. Secundò, idem demonstrant loca illa Scripturæ, quibus cum Spiritus Sanctus locutus esse referatur, Deus locutus esse dicitur. Ita verba illa *Audite audientes & nolite intelligere*, quæ Isaias cap. 6. sibi à Domino Deo exercituum dicta refert; ut dicta à Spiritu Sancto refert Paulus Act. 28. v. 25. *Quia bene Spiritus Sanctus locutus est per Isaiam Prophetam ad Patres vestros, dicens: Vade ad populum istum, & dic ad eos: Aure audietis, & non intelligetis*. Ergo idem est Dominus Deus exercituum ac Spiritus Sanctus. Quod ostendit etiam in Epist. 1. ad Cor. ubi c. 3. v. 16. dixit: *Nescitis, quia templum Dei estis, & Spiritus Dei habitat in vobis?* Postea cap. 6. v. 19. *An nescitis, quoniam membra vestra templum sunt Spiritus Sancti qui in vobis est?* Idem ergo Paulo est esse templum Dei, ac esse templum Spiritus Sancti: & proinde quòd Spiritus Dei sit Deus, & meritò: quia solus Deus Templum habet. Quare S. Augustinus L. 5. contra Maximinum Arianum, qui petebat: *Da mihi testimonia ubi adoratur Spiritus Sanctus*. Inter alia cap. 5. respondet: *Si autem religionem, quæ colitur Deus, sicut dignum est, cogitares, multò plus esse cernereres, quòd habet Spiritus Sanctus Templum, quàm si eum legeres adoratum: & homines enim à Sanctis novimus adoratos. Templum verò non est factum ab hominibus, nisi aut vero Deo, sicut Salomon fecit: aut iis qui pro Diis habentur, sicut gentes quæ ignorant Deum. Spiritus autem Sanctus (quod cum magno honore de Deo dictum est) non in manufactis templis habitat, sed corpus nostrum templum est Spiritus Sancti. Et ne corpora nostra contemnas, membra sunt Christi. Qualis ergo est Deus, cui templum edificatur, & à Deo, & de membris Dei?* Ita valide, ut de more S. Augustinus.

III. Quid ad hæc Pneumatomachi Macedoniani, qui nolunt fateri Spiritum Sanctum Deum, quia in Scripturis nusquam nominatur Deus, vel proponitur adorandus? Nonne ea quæ de Deo dicuntur, de Spiritu Sancto dici ex Scripturis ostendi: & nos, qui solius Dei templum sumus, templum esse etiam Spiritus Sancti ex Paulo audierunt? Audiant insuper opera, quæ solius Dei sunt; inter quæ sanctificatio, adoptio, peccatorum remissio, principem locum

locum obtinent, à Scripturis Spiritui Sancto ut auctori tribui. *Spiritus sanctificationis* (Roman. 1. v. 4.) *Spiritus adoptionis* (Rom. 8. v. 15.) *Spiritus gratiae* dicitur. Ideò Act. 10. loquente Petro, vix cecidit super audientes Spiritus Sanctus, cum omnes qui aderant obstupefacti dixerunt v. 45. *Quia & in nationes gratia Spiritus Sancti effusa est.* Imò, ut habetur Act. c. 8. & c. 19. hi qui baptizati fuerant in nomine Jesu complementum gratiae & donorum per Spiritum Sanctum accipiebant, quòd quia ignorabant Spiritum Sanctum, etsi crederent, non acceperant. Unde Paulus Rom. 5. v. 5. ait: *Charitas Dei diffusa est in cordibus nostris per Spiritum Sanctum qui datus est nobis.* Ad Titum 3. v. 5. *Deus salvos nos fecit per lavacrum regenerationis & renovationis Spiritus Sancti, quem effudit in nos abunde per Jesum Christum Salvatorem nostrum.* Et 1. ad Cor. 12. v. 3. *Nemo potest dicere, Dominus Jesus, nisi in Spiritu Sancto.* Ac deinde enarratis gratiarum divisionibus addit v. 11. *Hæc autem omnia operatur unus atque idem Spiritus, dividens singulis prout vult.*

IV. Is ergo, quem Scripturæ passim nobis proponunt ut nostræ sanctificationis Auctorem, sinè quo nihil ad salutem possumus, & per quem omnia possumus, dividentem gratias singulis, non alterius arbitrio, sed *prout vult*; Is, inquam, Dei minister, creatura erit, non verus Deus? Nemo, nisi mente obcæcatus affirmabit. *Sanctificare nulla creatura aliam penitus potest: largitio sanctificationis munificentia solius est majestatis*, inquit Paschasius Lib. 1. de Spiritu Sancto c. 11. Et Ambrosius L. 1. de Spir. Sancto c. 5. *Creatura sanctificatur, sanctificat autem Spiritus Sanctus.... Non ergo potest sanctificatio & corruptela unius esse naturæ: & ideò non potest gratia Sancti Spiritus & Creatura unius esse substantiæ.* Itaque cum omnis invisibilis præter Trinitatem reliqua natura, cujus rationabilem & incorpoream jure quidam substantiam putant, non impertiat spiritali gratiam sed acquirat, non participet sed assumat; separanda est utique à societate Spiritus Sancti communitas creaturæ. Hæc ratione Dominus noster Jesus Christus, ut ostenderet, unam esse Spiritus Sancti cum Patre & Filio potentiam, majestatem, ac Divinitatem, voluit, ut objectum fidei, quam in Baptismo profitemur, æqualiter cum Patre & Filio esset Spiritus Sanctus, dicens Matth. 28. v. 19. *Docete omnes gentes baptizantes eos in nomine Patris & Filii & Spiritus Sancti*, ubi ut advertit S. Ambrosius Lib. 1. de Spiritu Sancto, dixit *In nomine*, non *in nominibus*; ut disceremus, unum illis tribus Nomen esse commune, quod est Divinitas. Hoc idem argumentum tractat S. Augustinus tract. 6. in Joann. Unde inquit S. Joann. Epist. 1. cap. 5. v. 7. *Tres sunt qui testimonium dant*

in Cælo, Pater, Verbum, & Spiritus Sanctus: & hi tres unum sunt.

V. Tertiò, Spiritum Sanctum à Patre & à se procedere, ostendit Christus eo modo quo ipse à Patre procedit. De se dicit Jo. 16. v. 27. *Ego à Deo exivi. Exivi à Patre & veni in mundum.* De Spiritu Sancto verò Joan. 15. v. 26. *Cum autem, inquit, venerit Paraclitus, quem ego mittam vobis à Patre, Spiritum veritatis, qui à Patre procedit, ille testimonium perhibebit de me.* Si ergo Filium Dei à Patre procedentem, à Patre missum Macedoniani saltem puriores esse cum Patre Deum genitum, non creatum admittunt: cur Spiritum Sanctum, qui à Patre procedit, à Patre & Filio mittitur, Deum esse negant, eàdemque Divinitate cum Patre & Filio potiri? Audiant Ambrosium Lib. 1. de Spiritu Sancto cap. 7. *Sicut creata, inquit, dici non potest Sapiencia, quæ ex ore Dei procedit: nec Verbum quod eructatur ex corde: nec virtus in qua plenitudo maiestatis æternæ est: ita etiam creatus non potest Spiritus aestimari, qui ex ore Dei profunditur, cum ipse Deus tantam ostenderit unitatem, ut effundere se de Spiritu suo dicat; quibus alludit ad Dei verba Joëlis 2. v. 28. Effundam Spiritum meum super omnem carnem & prophetabunt filii vestri &c. quæ de Spiritu Sancto intelligit D. Petrus Act. 2. v. 17.*

VI. Dicebant autem Macedoniani, ipsa Christi verba Joan. 16. v. 13. ostendere Spiritum Sanctum mitti tanquam legatum, qui à se ipso non loquitur, sed quid loquatur accipit ab eo, à quo mittitur. Sic enim ait: *Cum autem venerit Spiritus ille veritatis, docebit vos omnem veritatem: non enim loquetur à semetipso, sed quacumque audiet loquetur, & annuntiabit vobis. Ille me clarificabit, quia de meo accipiet, & annuntiabit vobis.*

Respondet. Etiam Christus Dei Filius, de se dicit Joannis 5. v. 30. *Non possum ego à me ipso facere quidquam, sicut audio iudico, & iudicium meum iustum est, quia non quero voluntatem meam, sed voluntatem ejus qui misit me.* Joan. 7. v. 16. *Mea doctrina non est mea, sed ejus qui misit me.* Et Joan. 12. v. 49. *Quia ego ex me ipso non sum locutus, sed qui misit me Pater, ipse mihi mandatum dedit, quid dicam, & quid loquar,...* Quæ ergo loquor, sicut dixit mihi Pater, sic loquor. Verba hæc, quæ de se dicit Filius, vel ostendunt, etiam Filium esse purum legatum missum à Deo Patre; vel si non, nec etiam verba allata Spiritum Sanctum Patris & Filii esse purum legatum ac ministrum ostendunt. Eàdem ergo ratione Filius & Spiritus Sanctus à se non loquuntur, sed ab alio accipiunt quid loquantur; Filius quidem à Patre; Spiritus à Patre & Filio; quâ ab alio ut à principio accipiunt quod sunt, nempe in Divinitate

tate subsistere. Ita Ambrosius & Augustinus. Ambrosius quidem L. 1. de Spiritu Sancto cap. 12. *Omnia*, inquit, *accepit à Patre Filius, quia ipse dixit* „ Omnia mihi tradita sunt à Patre meo „. *Omnia Patris habet Filius, quia iterum ait* „ Omnia que Pater habet, mea sunt „. *Et que accipit ipse per unitatem nature*, ex ipso *per eandem unitatem accipit & Spiritus: sicut ipse Dominus Iesus declarat de Spiritu suo dicens* „ Propterea dixi: De meo accipiet & annuntiabit vobis „. *Quod ergo loquitur Spiritus, Filii est: quod dedit Filius, Patris est. Ita nihil à se aut Filius loquitur aut Spiritus, quia nihil extra se Trinitas loquitur*.

S. Augustinus autem Tract. 99. in Joann. sic ait: *Non ergo loquetur à semetipso, sed quæcumque audiet loquetur. Ab illo audiet, à quo procedit. Audire illi scire est; scire verò esse. Quia ergo non est à semetipso, sed ab illo à quo procedit, à quo illi est essentia, ab illo scientia; ab illo igitur audientia, quod nihil est aliud quàm scientia*.

VII. Sed adhuc non quiescunt Pneumatomachi: ajunt enim. Gemitus & oratio Deo non conveniunt: sed gemitus & oratio Spiritui Sancto tribuitur ab Apostolo Rom. 8. v. 26. *Ipse Spiritus postulat pro nobis gemitibus inenarrabilibus: Qui autem scrutatur corda, scit quid desideret Spiritus, quia secundum Deum postulat pro Sanctis*: ergo Spiritus Sanctus Deus non est.

Præfata Pauli verba aliqui Veterum, ut Chrysostomus & Ambrosius interpretantur dicta, non de ipsa Spiritus Sancti Persona, sed de effectu, nempe dono ipsius, quo homines pii excitati postulant cum gemitibus à Deo, ut alii qui persæpe temporalia postulant, postulent æterna. Communior tamen interpretatio est, quòd Spiritus Sancti persona dicatur pro nobis postulare & gemere, qui suâ efficaci operatione in nobis nos orantes facit, nosque orare ac gemere docet. Ita S. Augustinus Epist. 121. (modò 130. cap. 15.) *Dictum est*, inquit, *Interpellat pro Sanctis, quia interpellare Sanctos facit, sicut dictum est: Tentat vos Dominus Deus vester, ut sciatis si diligatis eum, hoc est, ut scire vos faciat. Interpellare itaque Sanctos facit gemitibus inenarrabilibus, inspirans eis desiderium etiam adhuc incognitæ tantæ rei, quam per patientiam expectamus*: Lumen scilicet inspirans, ut eam cognoscamus, & ut cognitam desideremus.

VIII. At inquires. Si postulare pro nobis dicitur Spiritus Sanctus, quia facit nos postulare: Cur non poterit idem dici de Patre, quòd pro nobis postulet, quia postulare nos facit? Respondeo rationem esse, quia sicut Pater non dicitur mitti, licet operatio ad quam Divina aliqua Persona mittitur, puta sanctificatio hominis,

fit toti Trinitati communis, propterea quod necesse est, personam quæ mittitur à mittente procedere, à quo cum operatione accipit simul & naturam: Ita postulare licet significet effectum in hominibus, quem ipse Pater, imò tota Trinitas operatur, non tamen aut tota Trinitas aut Pater postulare dicitur; sed ea tantum persona, quæ accipit ab alia ut faciat homines postulantes; quod nec toti Trinitati nec Patri potest convenire.

IX. Ex dictis patet, Concilium Constantinopolitanum Œcumenicum Secundum adversus Macedonianos congregatum jure Symbolo hæc verba inseruisse: *Credimus in Spiritum Sanctum Dominum & vivificantem, ex Patre procedentem* (non dicit & ex Filio, quia hoc nondum contra Græcos, ut postea, statutum fuerat) & cum Patre & Filio simul adorandum & conglorificandum, qui locutus est per Prophetas. Quam fidem præfati centum & quinquaginta Patres, qui eidem Synodo subscripsere, in Epistola Synodica ad Episcopos Occidentis etiam expresse.

Quæ omnia auctoritate suâ roboravit Damasus Romanus Pontifex in Epistola Synodica anno 382. data, quam describit Theodorus Lib. 5. Hist. cap. 11., in qua pluribus anathematismis Pneumatomachi, & Arianae infelices aliæ soboles confodiuntur, ac præcipuè illi his verbis: *Et quia post Concilium Nicanum hic error inolevit, ut quidam ore sacrilego auderent dicere, Spiritum Sanctum factum esse per Filium; anathematizamus eos, qui non totâ libertate proclamant, eum cum Patre & Filio unius potestatis esse atque substantiæ.* Et rursus: *Si quis non dixerit Spiritum Sanctum de Patre esse verè ac propriè, sicut Filius de Divina substantia, & Deum verum, anathema sit.* Alios anathematismos omitto.

X. At quia Macedoniani (apud Epiphanium Hæref. 74. n. 14.) de his conquerebantur, dicentes „Nos eandem fidei formulam, quæ in Nicæna Synodo exposita est, & ipsi profiteamur. Doce, igitur ex illa, Spiritum Sanctum in Divinitate numerari. Eos tamen ita percellit Epiphanius ostendens etiam ipsâ Nicænâ fidei confessione reielli. Nam *quamquam nulla tunc de Spiritu Sancto fuerat instituta quaestio; Quippe de his, quæ singulis temporibus occurrunt, cavere Synodi ac decernere solent. Quare cum Arius in Filium maledicta conjiceret, propterea uberiori quadam disputatione argumentum illud est accuratissimè tractatum.*

Verum ex eadem fidei professione (Nicæna) animadvertere licet, ne hac in parte quidem contumeliosos illos in Spiritum hæreticos, ac Spiritus oppugnatores, & ab ejus sanctitate ac donis alienos quicquam omnino dicere. Siquidem expositio ipsa veritatem subinde proficitur nec negat.

„Credimus, inquit, in unum Deum Patrem Omnipotentem „
Ubi vox ista, Credimus, non simpliciter accipienda, sed de Fide in
Deum intelligenda venit, „Et in unum Dominum Jesum Christum,,
Neque hoc utcumque dictum, sed ad fidem in Deum referendum.
 „Et in Spiritum Sanctum „. *Quod neque simpliciter usurpatum*
est, sed in unam predicationem ac gloriam, in unam Divinitatis con-
junctionem, in unam Consubstantialitatem, in perfecta tria, sed unam
Divinitatem, unam substantiam, unam gloriam, dominationem unam.
Quod ea voces Credimus, & Credimus, & Credimus, declarant.
 His Epiphanius contra Macedonianos ostendit, eorum hæresim
 fuisse à Synodo Nicæna in suo Symbolo prædamnatam.

XI. Concludam igitur cum eodem. *Quid in hac sum disputa-*
tione longior, cum quæ adversus istos in hac disputatione hucusque
dicta sunt, veritatis studiosis satis esse non dubitem? Quocirca mis-
 sam & hanc hæresim faciam: & Deum precabor ut ad omnes ejusmodi
 profligandas opem nobis asserat, ut illius virtute freti, quod suscepi-
 mus exequi, & in omnibus gratias habere possimus. Contra hanc hæ-
 resim egi quoque Tom. 4. in 1. part. Qu. 1. de Trin. Dub. 4.



INDEX RERUM

Quæ in hujus septimi Tomi Parte II.
continentur.

A

A BASGI sibi virilia amputabant. pag. 148.

Abidas Astrologus cum Bardeſane de Fato disputavit. 130. 131.

Acaciani, in quo à Semiarianis & Arianis diſſimiles. 373. 374. Vide Semiariani. Acacius auctor fuit. 374. 375.

Adam non perdidit imaginem Dei peccando. 248. habuit corpus ante peccatum. 247.

Adamitæ, à quo orti, incertum. 85. 86. à Prodicto quidam putant. 87. Adam & Evam imitantes ante peccatum, ad ſuos cætus nudi conveniebant. 86. quid ibi agerent controvertitur. 87. is error refutatur. 88. 89. Nuptias rejiciebant. 89. promiſcuè commiſcebantur. 89. 90. ſe naturâ filios Dei dicebant. Deum non eſſe orandum, nec martyrium ſubeundum. 90. 91.

Novi Adamitæ in Bohemia. 91. 92.

Æichines Montaniſta. 9. unam in Deo perſonam poſuit. 23.

Agapetæ, quæ olim fuerint. 222.

Alcibiades Montani aſſecta. 7.

Alexander Montaniſta. 8.

Alogi, id eſt ſine Verbo, Verbum negabant, Apocalypſim reſpuebant & Evangelium S. Joannis; hoc Cerintho tribuentes. 76. 77. 81. De horum auctore ambigitur. 78. 79. confutatur. 81. 82.

Angeli. Eorum cultus pro Catholicis defenditur. 183. &c.

Angelici in Angelorum cultu ſuperſtitioſi. 181. 182. horum error à Catholico dogmate ſecernitur. 183. 184. 185.

Animam humanam corpoream eſſe putabant Montaniſtæ. 47. 48. creatam ante corpora Origenes. 240. 241. peccato in corpus detrufam. 242. pœnam non fore æternam. 244. eam eſſe ab igne corporeo. 247. Una, & bona. 306.

Anthropomorphitæ. Vid. Audæani.

Apocalypſim negabant Alogi. 76. rejiciuntur. 84.

Apoſtolicæ qui fuerint. 187. 188. quando emerſerint, & quamdiu duraverint. 189. ab Encratitis & Tatianis ramus avulſus. 188. 190. omnes continentiam proſitebantur, & temporalia bona abdicabant. 191. 196. 197. à Monachis diverſi. 192. &c.

Ap-

Appellationis jus ad Rom. Pont.

340. 341.

Ariani ad Julium Rom. Pont. appellant. 340. 341. ei refragantur. Ecclesiam scindunt.

342. 343. Mala Ecclesiae prae-

nuntiantur. 344. eorum error

de Filio Dei. 354. &c. de Spi-

ritu Sancto. 359. Verbum car-

nem assumpsisse sine anima dice-

bant. 360. 361. Hymnus Glo-

rificationis pervertebant. Ca-

tholicos rebaptizabant. 362. in

tres sectas divisi. 373.

Arius. Ei praelusit Origenes. 259.

Quis & qualis fuerit. 328.

Presbyter ambitione Episcopatus

& invidia haeresim forma-

vit. 329. eā auditā omnes ex-

horruerunt. 330. quibusdam

tamen placuit. ibid. damnatur.

331. Thalejam componit. Erro-

res in ea prodiit. 332. 333. Ec-

clesia scinditur, Nicanum Con-

cilium cogitur. 334. Constanti-

nus Imperator Arium rejicit

deinde recipit. 334. 335. 336.

ab Ario deceptus eum Ale-

xandriam mittit. 336. infelix

exitus. 338.

Artemon Christum purum homi-

nes Apostolos credidisse dice-

bat. 124.

Artotyritae panem & caseum in

Eucharistia offerebant. 56. 57.

Ascodrogitae utrem inflatum cir-

cumferebant: iidem fortè ac

Ascitae. 61.

Ascodrytae visibilia mysteria &

Baptismum rejiciebant. 61.

Asterius Arianus. 265. 266.

Astrologiae vanitas. 108. 109.

S. Athanasius Nicano Concilio

interfuit. 334. Ario resistit.

336. Ab Arianis quanta pas-

sus. 337. 340. à Constantio.

353.

Audrani, sive Audiani ab Au-

dao, sive Audio: cur schisma

fecerint. 363. &c. Vitam au-

steram praeferiebant. 365. eo-

rum historia. 366. ex eis orti

Anthropomorpha seu Vadiani.

367. Deum corporeum esse

fingebant. 365. 369. 370. Pa-

sccha cum Judaeis celebrabant.

371. eorum poenitentia ridicu-

la. De igne, aqua, ac Trinitate

quid sentirent. 372.

Auditores apud Manichaeos qui

essent. 311.

S. Augustinus negantes Sacrifi-

cia redarguit. 101. 102. inter

scientiam Angelorum & Da-

emonum distinguit. 107. inter

cultum Sanctorum & Dei. 185.

Monachos defendit. 192. rerum

temporalium possessionem. 204.

205. 206. 207. contra Mani-

chaeos. 289. 292. 293. 296.

297. 298. 306. 307. 308. se

apud Manichaeos olim Audito-

rem extitisse fatetur. 309. 310.

Aurelianus Imperator Ethnicos

faveat Ecclesiae Romanae contra

Paulum Samosatenum. 258.

259.

B

Baptisma Montanistarum re-

jectum. 23. collatum mortuis.

49. in lecto ob gravem infirmi-

tatem susceptum, olim dubium.

161.

Bar-

Bardefanis conditio & gesta. 130.

131. Valentini scilator an fuerit. 132. 133. Resurrectionem mortuorum negavit: eum corripit Epiphanius. 133. 134. præter Libros Canonicos apocryphos admittebat. 134. an Fatum admiserit. 135. 136. cum Abida Astrologo de Fato disputavit. 130. 131.

Bardefanite. Vid. Bardefanis.

Basilus Ancyranus Semiarianorum princeps. 374.

Bellum licitum esse ostenditur. 310. 311.

C

Cælibatus defensio. 193. 222. Vid. Virginitas.

Caro à Deo bono est. 295. esus carniū licitus. 299.

Cataphryges 1.

Cathari. Vide Novatiani.

Centuriarum Magdeburgensium calumnia. 31.

Christiani. Bonorum temporalium possessio eis non vetita. 196. 197. &c.

Christus: de eo quid sentirent Elcesai. 95. 96. Corpus immensa molis ei tribuebant. ibid. Purum hominem Theodotiani cum Theodoto asseriebant. 115. 116. quomodo id probarent. 117. 118. 119. quomodo discipulis rerum possessionem vetuit. 197. 198. &c. Non est iterum pro Dæmonibus crucifigendus. 245. Ante Mariam fuit. Verbum in eo non per solam inhabitatorem fuit. 260. Veram Carnem

Tom. VII. Par. II.

habuit. 296. Verè Filius David. 297. Unus, non duo. 302. Concupiscentia ex peccato est. 308.

Constantini Imp. zelus pro die Paschatis stabiliendo. 67. 68. 69. pro bonis Ecclesiæ restituendis. 207. 208. Arium damnat, postea deceptus recipit. 334. 335. 336. mors. 338. Orientis Imperium Constantio relinquit. 339.

Constantius Imp. à quodam Presbytero deceptus Arianorum causam suscipit. 339. Liberium exilio damnat. 345. 346. Athanasium criminatur. 353.

D

Dæmus Monachos cum Valesis ineptè confundit. 154. &c. item cum Apostolicis. 191. & seq. Recentium Catharorum causam contra Catholicos insulse suscipit. 176. in cultu Angelorum cum hæreticis Angelicis Catholicos ineptè confundit. 183. &c. ut Monachis detrabat Origenianorum auctoritatem facit Monachum. 221. Pauli Samosatani ad Aurelianium recursum abutitur sed ineptè. 258. 259. Catholicos cum Manichæis in abstinentia confundit. 299. Monachos cum Hieracitis. 315. Ritus Romana Ecclesiæ ritibus Meletianorum assimilat. 327. Audæanorum exemplo suam secessionem tueatur. 364. 372. Usum Imaginum Dei ab Anthropomorphi-

Ecc

iii

- tis ortum dicit . 368.
 Diaboli pœnam fore æternam .
244. 245. non est naturâ ma-
 lus . 291.
 Divinatio fallibilis . 109.
 Divitiæ quomodo sint possiden-
 da . 198. 199. quomodo à Re-
 gno Cælorum excludant . 200.
201.
 Deus malus non datur . 289. 290.
 &c. Corpus non habet . 369.
370.

E

- E**cclēsia Catholica secundas
 Nuptias permittit . 30. nec
 Matrimonia pro arbitrio diri-
 mit . 31. ejus Jæjunia injustè
 damnata . 33. 34. 35. 36. pote-
 statem omnia remittendi peccata
 à Christo accepit . 37. 38. 39.
40. Mæchis aliquando veniam
 negavit, non defectu potestatis,
 sed rigore disciplina . 40. com-
 paratur navi ex multis lignis
 compactæ . 193. 194. Etiam ante
 Constantinum bona tempora-
 lia possidebat . 207. 208. bono-
 rum Ecclesiæ Ministri non sunt
 Domini . 209. 210. Mula ei
 prænuntiata ex Ariana heresi.
344.
 Electi seu Sampsei ab Elxai
 orti . 92. 93. duas feminas Mar-
 tham , seu Maltham , & Mar-
 thanam seu Maltbanam in bo-
 nore habebant . 93. 94. harum
 mors , & heresis tempus disputa-
 tur . 94. 95. Unum Deum
 afferebant . Christum puram

- creaturam ejusque sororem .
 Spiritum Sanctum , illam ma-
 rem , istum feminam . Duos ta-
 men Christos : unum supernum
 & omnium conditorem , infer-
 num alterum & ex Maria na-
 tum confingebant . 95. 96. Li-
 brum à Cælo lapsum fingebant :
 formam orandi diversam ab ea,
 quam Christus præscripsit , ha-
 bebant : orare versâ facie ad
 Orientem probibebant . 97. 98.
 Fidem negare licitum affere-
 bant . 102. afferebant exempla
 Phinees & Jebu . 103. 104.
 omnia Sacrificia improbabant .
101. Virginitatem spernebant .
105. Magiæ vacabant . 107. per
 creaturas jurabant . 110. 111.
 Epiphanius Ecclesiam comparat
 navi . 193. 194. Trinitatem
 contra Sabellium probat . 219.
 contra Manichæos . 290. 291.
 de Meletio singularis est . 220.
321. Anthropomorphitis non
 favet . 367.
 Eilēntia ab hypostasi distinguen-
 da . 216. 217.
 Eva à Pepuzianis celebrata . 51.
 Evangelium s. Joannis negabant
 Alogi . 80. 81. descenditur. 82.
83. 84.
 Eucharistia à Montanistis conta-
 minata . 48. Hoc tamen nega-
 bant . 49. In ea solum offerri
 debet quod instituit Christus .
58. 59. à Manichæis polluta .
312.
 Eunuchi ad libidinem proniores .
152. 153. Qui sint Eunuchi , de
 quibus Christus . 153.

F

Femine Ordinis Ecclesiastici incapaces, bene tamen gratie gratis data. [53. 54. 55.](#) Hereticorum comites. [2. 3. 93. 94.](#)
 Fides non *neganda*. [103. 104.](#) ejus necessitas contra Manichæos. [309. 310.](#)
 Filius Dei non est creatus sed genitus, contra Origenem. [250. 251.](#) contra Arianos. [354. 355.](#) &c.
 Fuga in persecutione licita cui & quando. [42. 43. 44. 45. 46.](#)

G

Gangrensis Synodus continentiam laudat. [195.](#)
 Generatio à Manichæis damnata. [298.](#)
 Georgius Laodicæus Semiarianorum princeps. [374.](#)
 Gregorius XIII. multa egit pro die Paschæ stabilendo. [70. 71.](#)

H

Hieracitæ à Hierace seu Hieracha. [314.](#) à Macario per miraculum convicti. [316.](#) Carnis resurrectionem negabant, Nuptias repudiabant. [317.](#) Infantes à Regno Cælorum excludabant. Paradisum fuisse corporeum negabant, Melchisedechum Spiritum Sanctum asseriebant, de Trinitate pessimè loquebantur. [318. 319.](#)
 Hierax Hieracitarum parens Ægyptius fuit ab alio Hierace

Episcopo Catholico eruditus; Monachus an fuerit. [214. 215.](#) Unde factus sit hereticus. [319.](#) Vitam austeram profitebatur. ibidem.

S. Hieronymus ab Origenismo se liberat. [250.](#) &c.
 Homo habuit corpus ante peccatum. [247.](#) formatus in Paradiso terrestri, peccando non perdidit imaginem Dei. [248.](#) à Deo formatus. [303. 304.](#) quomodo ad imaginem Dei. [369. 370.](#)

Homouision & Homiusion quid significant. [256.](#) Homouision prudenter additum Symbolo. [380. 381.](#) Arianis injustè displicebat. [382.](#) Paulus Samosatenus eo abutebatur. [383.](#) non tamen propterea Homouision rejiciendum. [384.](#) Homiusion ad fidem exprimendam non sufficit. [385.](#) An omnes qui Homouision rejiciebant essent Hæretici. [386.](#)

Hypostasis ab essentia distingui debet. [216. 217.](#)

Hypsæ Scythiani uxor. [275.](#)

I

Iehu laudatur, sed non ob simulationem. [104.](#)
 Jejunia Montani cur damnata. [32. 33. 34.](#) Jejunia Ecclesiæ Catholicæ injustè jejuniis Montani comparantur. [34. 35.](#)
 Inferni pœna æterna. [245.](#)
 S. Joannes in Evangelio cur multa præterit. [82. 83.](#) Miraculum conversionis aquæ in vinum quo-

quomodo vocat primum . 83.
 Evangelium & Apocalypsim
 ejus esse defenditur . 81. 84.
 Ittigius Romano Pontifici Mon-
 tanismum affingit . 13. *Fejunia*
Ecclesia Fejunii Montani com-
parat . 35.
 Judæi versâ facie *Jerusalem*
 orabant . 98.
 Jurare per creaturas non licet .
 110. 111. quomodo & quando
 liceat . ibid.

L

S. Leonis zelus pro die Pa-
schatis . 70.
 Levite ant temporalia bona posse-
 derint . 208. 209.
 Lex vetus à bono Deo . 294. 304.
 Liberius Papa ab *Arianis* multa
 passus . 345. cui *Sirmienfi* for-
 mula subscripserit . 346. 347.
 348. quomodocumque fuerit
Romana Cathedra in eo non
 defecit . 348. 349.
 Liberum arbitrium negabant Ma-
 nichæi . 309.

M

Macarius Monachus Hiera-
 citam miraculo convincit .
 316.
 Macedonius ab *Arianis* Episco-
 pus *Constantinopolitanus* eligi-
 tur . 387. brevi à *Constantio*
 ejicitur . Hæresim condit , cui
Eusebius Eustathius & *Mar-*
thonius adjutores fuere . 388.
 389. ejus obitus . 390. Hæresis
 publicatio & damnatio . 390.

391. 396. confutata . 396. &c.
 Malum per se causam non habet .
 290. 291. nec sensum , nec
 vitam . 290. 293. nec est natu-
 ra , sed vitium nature . 307.
 Manes , prius dictus *Cubricus* .
Terbinthi errorum ac rerum
 haeres fuit . Ob filii Regis *Per-*
sarum mortem captus elabi-
 tur . *Manichaum* se vocari fa-
 cit . 277. 278. scribit ad *Mar-*
cellum . 279. 280. connititur fu-
 git . 281. sed occiditur . 282.
 ab ejus discipulis hæresis evul-
 gata diu subsistit . 283. 284.
Serpenti antiquo comparatus .
 313.

Manichæi ad Orientem versi *So-*
lem adorabant . 105. Hæresis
 ortus . 275. &c. Duos Deos
 unum bonum alium malum po-
 nebant . 285. insana hujus ex-
 plicatio . 286. Duas animas in
 homine asseriebant , carnibus
 &c. abstinebant . 286. 287. de
 productione *Adami* , de *Chri-*
sto , de *Lege* , de *Baptismo* , de
 concupiscentia pessimè sentie-
 bant . 288. 289. Errores eorum
 confutati . 289. 290. &c. de
 Deo ut de re corporea loque-
 bantur . 293. de *Trinitate* erra-
 bant . 294. de *Lege* , de *Ange-*
lis . ibid. de *Carnæ* . 295. hanc
 veram non esse in *Christo* . 296.
 Manichæi . *Christum* ad solas ani-
 mas liberandas venisse dice-
 bant . 297. Generationem exe-
 crabantur . 298. Esam carniū .
 299. Vini potum . 300. Panem
 pauperi præbere nefas arbitra-
 bantur , non pecuniam . 301. San-

etorum Reliquias abjiciebant.

301. 303. Christum fuisse Serpentem qui Ewam decepit, & alia de eo ridicula dicebant.

302. Duos Christos fingeant.

303. Hominem non esse à Deo formatum, sed à Principe tenebrarum. 304. In Manichæum descendisse Paracletum,

imò à Paracleta ipsum assumtum dicebant. 305. Eorum error de duabus animabus à S.

Augustino impugnatur. 306.

307. 308. Concupiscentiam ex peccato non esse asseriebant.

308. Liberum arbitrium & fidei necessitatem uegabant. 309.

Eorum insaniam. 310. Metempsychosim asseriebant. ibidem.

Bellum illicitum. 311. Eorum Elefii & Auditores qui essent,

qui mores eorum. 311. 312. in Eucharistia execrabiles. ibid.

Marathonius hereticus Macedonianus. 389.

Marcellus Ancyranus Photini preceptor. 265. an fuerit Arianus. 266. ejus errores. 267.

268.

Martha & Marthana Elcesæorum femine. 93. 94.

Maximilla Montani prophetissa. 2. 3. ejus exitus. 6. mendam prophetissam. 18. 19. &c.

Melchisedech purus homo; quomodo dictus sit Rex justitiæ,

sinè patre, sinè matre, sinè genealogia, non habens initium dierum, assimilatus Filio Dei,

Sacerdos in æternum, &c. 125. 126. 127. 128. 129. Spiritus Sanctus non est. 318.

Tom. VII. Par. II.

Melchisedeciani Theodotum tra-

pezitam argentarium auctorem habere. 121. Melchisedech virtutem Divinam asseriebant. 122.

Christo superiorem. 123. eorum fundamenta inania. 124. 125.

Meletiani à Meletio. primò schismatici, deinde heretici. 321.

323. Arianis in errore junguntur. 324. Eorum alii errores. 325. 326. ritus. 327.

Meletius seu Melitius. duo fuerunt, Catholicus unus, hereticus alter. De isto Epiphanius ab

Athanasio & aliis dissentit. 120. 321. 322. schisma fecit,

delatus fuit ad Concilium Nicæanum, in schismate obiit. 323.

causa schismatis. 324. 325.

Monachi à Valesio dissimiles. 154. 155. 156. Item ab Apostolicis. 191. 192. &c. ab Augustino & Epiphanio defensi.

192. 193. 221. 222.

Montani ortus, desertio, prophetissa Priscilla & Maximilla.

Eorum conditio. 2. 3. quando & ubi Montanus suam heresim

cæperit. 4. 5. exitus. 6. heresis duratio. ibidem. Ejus affecta

Theodotus & Alcibiades ac Themison. 7. Paracletum in se

ac suas prophetissas uberius descendisse, non tamen se Para-

cletum esse dicebat. 16. 17. 22. falsò tamen. 18. 19. 20. 21.

Circa Trinitatem non errasse verius creditur. 22. 23. 24.

Nuptias secundas damnabat. 25. Primas nuptias non solve-

bat. 30. 31. Jesunia quasi à Paracleta precepta multiplica-

bat.

bat. 31. 32. &c. Potestatem remittendi aliqua peccata Ecclesia auferbat. 36. 37. &c. In persecutione fugere illicitum esse dicebat. 42. &c.

Montanistæ. Eorum Baptisma cur *rejectionem*. 23. Vid. Montani. *Animam* corpoream existimabant. 47. 48. Eucharistiam sanguine infantis occisi contaminasse fama *fuit*. 48. Mortuos etiam baptizasse. 49.

N

Noetiani à Noeto dicti. 136. etiam Patripassiani. 140. confutantur. 141. 142. 143. eorum argumenta solvuntur. 143. 144. 145. eorum propago Sabelliani. 210. 211.

Noctus. Ejus patria & tempus discutitur. 137. Patrem, Filium, & Spiritum Sanctum unam esse Personam docuit, ac se esse Moysen, fratrem suum Aaronem dicebat. 138. à Smyrensis pulsus. 138. non diu cum fratre supervixit, nec sub ejus nomine diu hæresis permansit, sed in Sabellianam transiit. Non fuit primus qui Trinitatem personarum sustulit. 139. 140. ejus error de Moyse & Aaron contemnitur. 146.

Novatiani negando potestatem remittendi peccata Montanistas imitabantur. 41. Catbaros ob munditiam se dicebant. 157. Initio à Novato Novatiani dicti fuere. 157. quo tempore hæresis hæc apparuit. 169. diu

duravit. 169. 170. Novatiani veniam lapsis nedum in idololatricam, sed & in alia crimina denegabant; saltem Ecclesia hanc potestatem auferentes. 170. 171. refutantur ut injurii Christo & misericordie Dei. 172. 173. 174. 175. secundas nuptias rejiciebant. 177. Martyrum Reliquias contemnebant. 178. ad eorum Sælam venientes iterum baptizabant, Confirmationem tamen rejiciebant. 178. 179. de die Paschatis discordes erant, se solos puros jactabant. 180.

Novatianus Romanus Presbyter ex parentibus Ethnicis natus. Decubens Baptisma in lecto suscepit, non tamen postea Sacrum Chrisma. Quomodo ordinatus Presbyter. 160. 161. resistente Clero. 162. 163. cum Novato contra Cornelium scisma fecit. 163. &c. quid de eo S. Cyprianus & Cornelius senserint. 164. 165. &c. ejus artes. 168. tandem derelictus. 168. 169. Martyr falsò assertitur. 169.

Novatus à Novatiano diversus, ille Afer, iste Romanus: hujus tamen ille inceptor. 158. 159. Novatus ne damnaretur Romam aufugit. 159. ibi scismatis semina jecit. 160. Martyr falsò assertitur. 169.

Nuptias secundas Montanus damnavat. 24. 25. etiam Tertullianus in nova *Lege*. 25. 26. 27. Error iste rejicitur. 27. 28. 29. eas Adamitæ absolute rejiciebant.

bant. 89. *Novatiani quoque.*

177. *Hieracita etiam.* 317.

318.

O

O Blationes in antiqua Ecclesia ad Aliare fieri solita.

18. *abusus.* 59.

Orandi forma Elcesaitarum. 97.

Versus Ierosolymam orabant

Judaei, Christiani veteres ver-

sus Orientem, & versus Orien-

tem Tempia erigebant. 98. 99.

100. *S. Leo hoc Roma vetuit;*

ut Catholicos à Manichaeis se-

cerneret. 100.

Origenes cur Adamantius di-

ctus, Alexandria natus paren-

tem habuit Leonidem Marty-

rem. In adolescentia laudabilis.

225. 226. *Martyrii cupidus.*

227. *amore castitatis eunuachum*

se fecit. 228. *ejus studium &*

opera. 228. 229. *an thus Idolis*

obtulerit. 229. 230. *ejus obi-*

tus. 230. *In fide erravit.* 231.

232. 233. *&c. Ab haeresi excu-*

satur. 238. 239. *Ejus errores*

de Animabus, Daemonibus &c.

recensiti. 239. 240. *resutati.*

241. 242. 243. *&c. de Resurre-*

ctione malè sensit. 244. *Chri-*

stum pro Daemonibus fore ite-

rum crucifigendum dixit. 245.

246. *Paradisum, in quo Adam*

& Eva formati fuerunt, non

fuisse terrestrem. 247. *Peccan-*

do non amisit imaginem Dei.

248. *de Omnipotentia Dei ma-*

lè sensit. Filium Dei creatum

posuit. 249. 250. *Pelagianæ*

haeresi praelisit. 252. 253.

Origeniani seu Origenii qui fue-

runt, & quis eorum auctor. 220.

221. *Origenes quidam fuit, non*

Adamantius nec Monachus.

ibid. Gnosticonum turpitudines

imitabantur. 222. 224.

Osii Cordubensis lapsus. 350. *re-*

sipiscentia. 351. *falsa de ipso*

narratio. 352.

P

Paradisus, in quo homo for-

matus fuit verè fuit terre-

stris. 248. 318.

Parvuli Regni Caelorum capaces.

318.

Pascha quâ die celebrandum con-

troversia fuit. 63. 64. *causa in*

Nicæno L. decisa fuit. 67. 68.

Ecclesiæ vigilantia pro die Pa-

schatis custodienda. 69. 70.

Pastalorinchitæ iidem ac Tasco-

drugitæ. 60.

Paulus Samosatenus. Episcopus.

ejus vanitas, mores turpes. ab

Episcopatu dejectus. 255. 256.

257. *Contumax ad Aurelia-*

nium Imper. ethnicum appellat

& rejicitur. 258. 259. *de Chri-*

sto, Verbo, ac Trinitate blas-

phemus. 260. 261. *&c. Baptis-*

mi formam corrupit. Circum-

cisionem necessariam voluisse

fertur. 263.

Peccata omnia ab Ecclesia possunt

remitti. 38. 39.

Pelagiana haeresis ac Semipela-

giana ab Origene præformata.

252. 253.

Pepuza Phrygiæ oppidum, à quo

Pe-

- Pepuziani, Montanistarum Jerusalem.* 1. ibi secreta sua celebrabant. 49.
- Pepuziani Montanistarum soboles.* 50. *Pepuzam* colebant. *Christum muliebri specie apparuisse* fingeant, feminas extollebant. 51. 52. *Episcopatu & Sacerdotio* decorabant. 53. 54. *Eve* specialem gratiam tribuebant. 55.
- Persecutio* quomodo à Deo fit. 45.
Vide Fuga.
- S. Petrus Alexandrinus, ejus cum Meletio* dissensio. 321. 322.
- Photinus à Marcello* pravè imbutus. 268. 269. *Sirmii, ubi erat Episcopus ejus* hæresis caput. *Arianis* displicuit. Propterea depositus ab Episcopatu. 280. 281. *Hæresis* duratio. ibidem. *Errores de Deo, Christo & Verbo* prolatitio. 272. Verbum admisit in Patre æternum, sed non æternum Filium. 273. 274. in hæresi mortuus. 275.
- Phrygastiæ* unde dicti. 1.
- Pœnitentiæ locum* adimebant *Novatiani.* 172. &c.
- S. Polycarpus de die Paschæ.* 64. & *Polycrates.* ibid. & 72. monitus à Christo *Arium* in communionem non recepit. 328. visio tamen hæc suspecta est. ibid.
- Potestas remittendi peccata* non soli Petro concessa. 38. 39.
- Praxeas olim Montani discipulus* ab eo defecit. 10. *Roma* damnatur. 10. unam in Deo personam posuit. 23.
- Priscilla Montani prophetissa.* 2. 3. mendax. 18. 19.

- Proclus Montanista.* 8. 9.
- Prophetæ veraces qui sint.* 18. 19. 20. 21.
- Protestantes jejunia Catholicorum* jejuniis Montani comparant. 33. 34. potestatem dimittendi peccata Ecclesiæ negantes *Montanistas* superant. 41. *Pauliana hæresis* apud eos renovata. 263. 264. *Ariana* quod. 343.
- Psychici qui à Tertulliano* vocati. 34.

Q

- Quadragesimas Catholicorum* cum quadragesimis Montani injustè comparant *Protestantes.* 35. 36.
- Quartodecimani Pascha quarta-decimâ Lunâ* celebrabant. 62. non omnes ab initio hæretici fuerunt. 63. 64. sed tunc solum quando eâ die celebrandum esse more Judaico ex præcepto Christi dicere ceperunt. 65. Hujus erroris autorem aliqui faciunt *Blastum*, quem alii imitati fuerunt. 65. 66. error in Concilio *Nicano* 1. damnatus fuit. 67. opposita argumenta solvuntur. 71. 72. 73. 74. 75.

R

- Reliquiæ Sanctorum* quomodo venerandæ. 301. 302.
- Resurrectio* fiet in corporibus quæ modo habemus. 244. 247.
- Romanum Pontificem* Montano fuisse quidam dicunt. 13. rejiciuntur. 14. 15.

Sa-

S

S Abelliani à Sabellio Noeti discipulo: in errore cum Noetianis conveniebant. 210. 211.

Ut Dei unitatem tuerentur, Trinitatem negabant. 212. 213.

In Africa exorti. 214. Hæresis vel ex Judaismo vel à Stoicis prodiit. 215. refutatur. 216. 217. &c. Pseudo-Evangelio secundum Ægyptios utebantur. 219.

Sabellius Afer fuit. ejus error sub Xisto innotuit. 213. ejus conditio ignota. 214. posuit in Deo unam Personam trinominem. 215. nesciens distinguere inter essentiam & hypostasim. 216. 217.

Sacrificia Deo accepta in utraque Lege. 101. 102.

Sampsæi. Vid. Elcesæi.

Scriptura Sacra non privato genio interpretanda. 314. 315.

Scythianus Manichæorum parens. 275. ejus error & exitus. 276. 277.

Semiariani inter Arianos & Acacianos medii, Filium Dei non dissimilem Patri, ut illi, nec puram imaginem ut isti; sed Homiusion idest Similem, non Homouision, idest ejusdem Substantiæ, asseriebant. 373. 374. in modo tamen se explicandi suspecti erant. 376. 377. ac omnes malè sentiebant. 378. 379.

Spiritus Sanctus. Feminam eum Elcesæi dicebant immensâ corporis magnitudine. 96. Crea-

tum ponebant Ariani. 359. refutantur. ibid. Verus Deus, non Dei Legatus. 394. quomodo posulet pro nobis. 395.

T

T Ascodrugitæ inter orandum digitum ori apponebant, in reliquis cum Cataphrygibus convenientes. 60. dicti etiam Pasfolorincbitæ. ibidem.

Terbinthus Scythiani discipulus & hæres errorum ac rerum Buddam se vocari fecit: periit. 276. 277.

Tertullianus de Praxeas scripsit. 10. Ad Montanistas defecit: quâ causâ? 11. 12. 13. Secundas nuptias damnavit. 25. 26. refutatur. 27. 28. 29. aliqua peccata posse per Ecclesiam remitti negabat. 38. 39. fugere in persecutione damnavit. 42. 33. &c. Animam humanam corpoream putavit. 48.

Teslærescedecatitæ. Vid. Quartodecimani.

Thaleja Arii. 332. 333.

Themison Montani affecta. 7. à Montanistis martyr habitus. 8.

Theodotiani errores Theodoti Coriarii sequebantur. 115.

Theodotus Argentarius Melchisedecianorum auctor. 121. & seq. ejus discipuli. ibid.

Theodotus Coriarius. 112. 113. Jesum esse Deum cur negavit. ibid. & seq. Christum ante mundum conditum asserbat. 119.

Theodotus Montanista quis? 7. S. Tho-

S. Thomas pro Virginitate. 106.
107. de divinatione quid senti-
 at. 109. 110. Juramentum
 quale & quomodo licitum po-
 nat. 111. 112. de temporalium
 possessione. 205. de unitate Dei
 contra Manichæos. 290.
 Trinitatem sustulit Praxeas. 23.
 Noctus etiam. 138. & seq. Sa-
 bellius pariter. 210. & seq.
 Contra istos veritas Catholica
 probatur. 140. &c. 218. &c.
 de ea Paulus Samosatenus blas-
 phemus fuit. 260. 261. 262.
 Pbotinus quoque. 273. &c.

V

V Alefii unde dicti, quando
 eruperint disceptatur. 146.
147. sibi virilia amputabant.
148. agniti, fuerunt ejecti ab
 Ecclesia. 149. obscenè vive-
 bant. 149. refutantur. 150. 151.
 eorum motivum inane; Eunuchi
 enim ad libidinem magis proni.

152. 153. abutebantur Christi
 Verbis. 153. 154. quàm diffi-
 miles à Monachis & Sacerdo-
 tibus Catholicis. 154. 155. 156.
 aliis erroribus inquinati tra-
 duntur. 149.

Verbum Dei est æternum, non
 factum, sed per ipsum facta sunt
 omnia. 80. nec tunc solùm emis-
 sum quando Christo fuit uni-
 tum. 260. 261. Veram carnem
 assumpsit. 296. &c. non sine ani-
 ma. 360.

Victor Papa de die Paschatis. 64.
 cum Asiaticis pacem habere
 noluit; quia rem hanc non ad
 purum ritum sed ad dogma spe-
 ctare volebant. 64. 66.

Vincentii Lirinenfis movitum.
253. Ariani schismatis deplo-
 ratio. 342. 343.

Vini potum execrabantur Mani-
 chæi, non tamen aquas. 300.

Virginitas in pretio habita ab
 Ethnicis. 105. quomodo præse-
 renda nuptiis. 106. 107.

F I N I S.



